

清名家詞

共讀樓校輯

夏敬觀題



餘 飴

運

彰



山
詩

趙執信（康熙一——乾隆九）

字伸符。號秋谷。山東益都人。康熙十八年進士。授編修。累遷右贊善。以國恤觀演長生殿罷職。優遊林下者五十年。時王漁洋以詩古文雄長壇坫。執信作談龍錄。持論獨異。漁洋心折其才。不以爲忤也。著有飴山堂詩文鈔聲調譜。

飴山詩餘

青州趙執信秋谷

采桑子 虎邱舟中有贈

落托十年狂杜牧。此地逢秋。何意勾留。青翰舟中見莫愁。
酒淺歌深人已醉。鬢影橫流。眼色遙偷。薄倖從今怕起頭。

菩薩蠻 同前

波光搖曳亭亭塔。畫船明月相逢恰。比塔似儂情。一層還一層。
紅燈明玉手。笑語香生酒。催別怨晨鐘。乍歡成夢中。

浣溪紗 贈小妓玉姿

榴火當筵照玉人。芙蓉意態柳精神。歌聲舞影惹香塵。
倚酒添嬌顫暈重。背燈拋笑眼波春。斟量無分住西鄰。

虞美人 同前

園林南畔荷香起。玉貌臨池水。柳枝嬌小未成陰。知否恁時相見已留心。而今十載重相見。猶是雛鶯燕。燈前鬢影枕眉痕。便道司空見慣也銷魂。

蝶戀花

題畫扇留別蕊枝

秋老家山紅萬疊。何意淹留。斷送重陽節。醉裏情懷空自結。彎環低盡湘簾月。總爲相逢教惜別。明日風帆。亂落霜林葉。暮雨迷離天外歇。寒花付與紛紛蝶。

減字木蘭花 卻寄前人

牽萍惹絮。隨意溫柔鄉裏住。三度天台。不見桃花爛漫開。脂香粉膩。染向青衫和酒氣。未得無情。長憶秋波灩澦橫。

鵲橋仙 重過虎邱有寄

遙山寫黛輕波。凝眼一笑岸花微逗。夢迴午枕。費思量。料鬢髮如雲依舊。酒邊明月。病中黃菊。剩賺沈郎腰瘦。重來取次過殘春。枉榴火蒲香時候。

虞美人 贈吳中酒妓

前年曾醉昌亭月。小字人爭說。冶城詞客最多情。遙向玉鉤斜畔喚卿卿。今年喜得頻攜手。風味濃於酒。斗教別恨上眉尖。我亦拋將魂夢到江南。

小重山 同前

長憶池亭促座聯。紅蕖將素袖。共嫣然。眼波斜溜酒杯前。知卿意。酒客荷相憐。三度醉嬋娟。斷交兼手語。豈無緣。歸心搖落入秋天。留儂否。同作飲中仙。

眼兒媚 留別吳妓耿四娘

越來溪上午烟濃。心事去留中。翻憐住久。從看天遠。肯放杯空。他鄉又作匆匆別。愁對翠眉峯。三分春思。兩番幽夢。一點秋風。

南柯子 同前

別恨桐秋促。歸心桂棹遲。胥江潮急暮風吹。記取烟波和夢。共參差。濃酒迷香盼。輕衫逗膩肌。畫船微月語支離。道是不曾真箇。更相思。

前調 題湖莊清夏圖

楊柳千條綠。紅蕖一水香。人間信有此湖莊。羨爾烏紗白葛，在中央。地有牛過靜。天將鷺去長。披圖午汗坐翻漿。安得輕搖艇子，入茫茫。

前調 白門久客作

書望江頭雁。腸紆酒底蛇。斜陽容易下簷牙。坐看閒園開過，早秋花。雨入虛窗碎。山衝斷夢賒。宵分蟋蟀向明鴉。正是淒涼時候，未還家。

浣溪紗 秋思

寒雨聲聲滴小窗。清宵偏是到秋長。愁人猶自滯江鄉。宿酒醒來難續夢，孤衾薄處早驚霜。此時爭道不思量。

南鄉子 題春墅晚歸圖

春色滿江村。日日江頭倒玉尊。薄酒歸來騎馬路。黃昏。淺綠深紅染月痕。鐘動野烟繁。樓外青山繚短垣。小犬數聲燈隱隱。桃源。前有漁童爲打門。

定風波 題朱天標寫真

愛就霜林繫短篷。鳧鷖鴻雁滿西風。手有絲綸何處著。拋卻。悠然身寄水晶宮。船尾相看嬌小女。如語。芙蓉欵岸避顛紅。若道功成堪共載。猶待。西施別在五湖東。

敘頭鳳 秋思

棲鴉絕。啼螿切。晚陰搖漾玲瓏月。鄉山路。家園樹。新秋風景。幾番晴雨。去去。清歌咽。春情疊。醉紅雙眼頻生纈。雲朝暮。人新故。迷離歸夢。一時難訴。住住。住。

惜分敘 歸興

人已倦。秋將半。社前空羨飛飛燕。望齊城。計歸程。似隔銀河。一水牽情。盈盈。清尊斷。寒蛩亂。鞭絲夢裏西風岸。乍涼生。宿裝輕。細雨留連。待到新晴。行行。

滿江紅 題吳門陸萊臣秋亭園

寒雨空齋。但共對蕭然四壁。誰畫出生綃小幃。清泉白石。解道江南秋色好。狂夫亦是山中客。料淒迷千里欲歸心。惟余識。高臥裏。嫌岑寂。久別後。愁拋擲。看茆亭渾似。身曾遊歷。幾度西風吹夢去。驚魂無那簷間滴。到重陽。一倍染相思。霜林赤。

踏莎行 和萊臣

釀雪尖風。洗霜纖雨。黃花紅葉寒無主。歸期道是近重陽。重陽已遠猶難據。醉遣
杯知病和燈語。離情似海寬多許。夜深魂夢只南飛。征鴻過盡誰將去。

卜算子 爲佟聲遠題閨中畫

古塞際天長。寒月臨關靜。一片香閨夢裏程。萬里烟沙冷。霜樹攪秋深。雁字翻旗
迴。傳語團圞少婦知。看取南來影。

浣溪紗 同前

欹閣平橋碧玉潭。山光水色寫雕簷。銀河垂處翠相銜。荷氣中間深酒榼。烟波側
畔隱漁庵。卿卿是否似江南。

菩薩蠻 同前

澄江極望平如掌。清秋多少離人想。淼渺一帆開。當年向北來。高亭臨紫翠。畫閣
煙中閉。林際有新霜。愛他深夜涼。

春光好 題畫美人

曉妝了。上紅樓。不知愁春與離情氣味投。暗相勾。
柳色深深遠海。征人渺渺孤舟。
陡惹關山千萬里。聚眉頭。

荷葉杯 同前

開得名花滿徑。相映。略似玉人無。豔紅雙臉白肌膚。
香透薄羅襦。婀娜風前微步。
迴顧。含笑折蘭蕤。芳心應是小鬟知。團扇晚涼時。

秋蕊香 同前

眉黛新秋嬌姹。衫袖輕盈低亞。縹囊細帙空盈架。
不載人心中話。幽情應惜花將罷。
拋杯罌。花枝合在紅顏下。秋老紅顏不謝。

雪花飛 同前

鷺白分將砌竹。猩紅染就山茶。渾似天寒衣袖。輕雪黏花。
隱笑修眉黛。含情小步斜路。把人間意態。還與西家。

柳梢青 贈津門角妓真珠

無計枝梧。病身陡頓。春夢模糊。亂惹閒愁。驚開倦眼。斗帳紅珠。醉濃不省歡娛。曉鏡裏臨窺畫圖。聞道門前。烟波淡沱。楊柳蕭疏。

前調 睡起再寄

客思厭厭。拋花仗酒。午睡初甘。簾幕風高。鐸鈴聲碎。夢破紅酣。起來添著輕衫。對影處霜侵鏡奩。殘春去也。多情燕子。猶自呢喃。

南柯子 贈玉素

酒醒愁未醒。酒醒愁未醒。春光不信去天涯。看取樽前楚楚海棠枝。警眼渾相識。移漏鼓參差。雲間細月如眉。滅燭解襟香澤散。一石何辭。

玉人相笑近郎時。何物比將嬌與巧。燕子鶯兒。杯趁晚風

南鄉子 午睡起索贈

午睡起來遲。嫩澹紅潮壓翠眉。欲驗枕痕餘幾許。垂垂。鬢角斜分半縷絲。花影傍
簷移。正是濃香芍藥時。獨倚簾櫳看乳燕。微微。一笑含情屬阿誰。

臨江仙 題悶

落盡瓶花紅芍藥。輕雷過雨斜陽。單衣新浴細生涼。牽情殢病。白晝不勝長。止酒
當杯還復醉。殘宵短夢微茫。覺來何事惹思量。閒衾半枕。彷彿似聞香。

謁金門 贈金仙

腸欲斷。昨暮酒闌人散。明月似知情戀戀。夜深教夢見。聞道高唐開宴。悵望行雲
一片。誰送暗香來枕畔。頓成新繾綣。

女冠子 同前

薄酣枕上。月淡窗明相向。可憐生。風裏纖纖柳。花前恰恰鶯。新歡偏鄭重。幽態更
輕盈。酒醒寒近曉。不勝情。

清平樂 同前

曉窗晴暑。黯淡巫山雨。寶鏡晶明香一縷。故傍新妝耳語。輕衣乍退妖紅。微波暗逗春濃。坐覺雙蛾顰久。芳心更屬誰儂。

菩薩蠻 戲簡張輔公

張有樓名浣烟。屢見許爲花月之飲。皆以有故未能邀致。雖比日同醉而前。諾杳然。

殘更夢著玻璃枕。微涼曉沁鴛鴦錦。道是醉連宵。如何酒易消。主人情似月。明處偏教缺。不上浣烟樓。烟多只結愁。

少年遊 題登車圖

誰教相見卽相思。取次贈將離。脈脈牽情。盈盈迴顧。紅袖苦參差。漢皋香佩空留。在迢遞幾秋期。最是銷魂。一川風柳。撩亂夕陽時。

夜合花 贈若青

天與溫柔人傳嬌小。幾年思殺傾城。江波浩渺斷潮何處相迎。秋有信。月還盈。鵲橋
邊巧送新盟。劉郎前度。徐娘未老。消得風情。連宵雨暗窗櫺。趁向雲輕漢淺。掩映
三星。龍鬢鳳枕。黛眉幾許低橫。金不暖。玉無聲。算瑤池。獨有飛瓊。東阿才費。文園消
渴。端爲卿卿。

雨中花 詠老少年

一夜霜風淒卉木。誰潛與偷紅換綠。叢棘籬邊。荒苔庭際。百葉嬌堪掬。爛縵秋容
看不足。渾不似春心拘束。添得淒涼。催將酌酎。未肯輸黃菊。

桃源憶故人 詠碧桃花

劉郎乍識天台路。溪上桃花無數。幾朵濃妝含露。偏解和春語。妖紅容易催春暮。
從被燕欺鶯妬。不信落花飛絮。絆得東君住。

燕歸梁

柳颺桃花點細塵。燕子掠來新。輕盈愁殺小腰身。風際態。月中痕。畫閣留痕。雕梁

無主軟語泥東君。他時縱使得相親。渾不是。此番春。

少年遊 夕宿青縣懷若青

離情觸處總相關。小字縣名傳。聽去偏驚。避將無計。誰使駐征鞍。夢中從此尋猶近。寒夜奈無眠。轉眼春風。預愁江上。萬點見青山。

減字木蘭花

陸居非屋。三徑幽偏溪一曲。誰與追尋。把臂風期似竹林。清言狂醉。問著時流渾不會。隔斷仙津。妝鏡欹斜照美人。虹別名美人見詩疏

水調歌頭 題李廷尉出獵圖

孤矢丈夫志。射獵正秋冬。從者亦騎驕馬。手自挽強弓。愛聽箭如鷗叫。不覺鼻尖出火。耳後亂生風。一片曉霜白。千里晚霞紅。瀚海上。夢澤畔。雪山東。北平飛將封侯。無相敢稱雄。試領天家熊虎。立淨草間狐兔。歸報未央宮。他日認君處。麟閣畫圖中。

賀新郎 寄松風老人

送爾辭金殿。記當年狂歌一曲。京塵傳遍。解道能文真不幸。我亦傷弓斷雁。白首向江南重見。畫舫春深同載酒。帶斜陽繫著垂楊岸。驚十度歲華換。頻來往事成河漢。況平生無多知舊。星流雲散。惟有金風亭長老。長和松風吟歎。尙醉後詩篇爛漫。遲我扁舟和烟月。共平章秋色垂虹畔。歸未卜。定如願。金風亭長朱竹垞自號也

散天花 爲長洲計節婦宋作

鸞影孤懸寶鏡傍。人間無日月。剩冰霜。重泉只隔小樓窗。廿年身未死。已心亡。雪覆蘭芽特地長。庭階春草裏。爛生光。天書鄭重詔閨房。黃金應鑄像。共焚香。

行香子 不寐書懷

坐擁書城。自占寒廳。向晴窗不厭淒清。新來漸覺。觸撥愁情。但夜偏長。酒易醒。夢難成。故國盈寧。勝侶逢迎。且安心何用牽縈。昏眸倦耳。有底堪憎。是亂雞啼。殘月影。遠鐘聲。

酒泉子 題畫三首玉洞桃花

忙煞花工堆紅砌粉無重數。賺教蜂蝶不知羞。亂難收。東君畢竟有情不。邀勒韶華三月到。披猖風雨一時休。問何由。

生查子 落花戲魚

都將幾許愁。散入春風裏。可惜好桃花。點點和流水。花情不自禁。水意何當已。卻羨水中魚。隨意親紅蕊。

訴衷情 蓮浦雙鴛

荷香一帶趁風斜。極浦浸明霞。鴛鴦沙際雙立。影也解躑花。微雨過。澹陰遮。許誰誇。蕩舟遊女。垂釣漁翁。臨水人家。

滿庭芳 題遲歸集

漱玉佳人掃眉才子。春風陌上歸遲。藐姑冰雪爭肯污。臙脂愛寫樓頭煙雨。詩囊底細。裏心絲。令人憶。妝添病減。閒坐獨吟時。佳期星漢杳。王郎狡獪。偷得支機。料深閨鎮日。但樹降旗。一卷天孫雲錦。焚香讀我亦情怡。鷓夷子。湖山花月。珍重共西施。

江城子

停橈注目小橋灣。曉妝鮮。倚門闌。欲得從容。故故弄漁竿。應覺篷窗人有意。嗔與笑。兩難安。羞眸試擲臉微丹。遠增憐。近何緣。約略芳心。如線引波瀾。飄瞥相逢知不。忘。今夜月。恰團圓。

浪淘沙

深屋小溪隈。倦眼驚開。東風吹悶避金釵。消受纖纖雙膩玉。撩亂傳杯。紅燭影徘徊。酒滿香懷。桃花糝雪上春顛。記得橫波嬌欲溜。幾爲儂迴。

生查子

明妝競蚤梅。弱態分新柳。乍見我偏憐。再見卿知否。歸心動若烟。春思濃於酒。無計寫柔情。倚醉攜纖手。

前調

輕寒避酒卮。好手移絃柱。細膩引歌聲。一箇鷓留語。無心得笑時。有託通辭處。已

自不勝情。更對黃昏雨。

風入松

似迎桃葉渡江來。春已儂回。花枝深穩偏相待。遣輕燕飛傍瑤斂。枉惹橫斜情泪。行雲隔斷陽臺。佳期付與後期催。烟棹難開。垂鞭擬訪門前路。怕勾引蜂蝶驚猜。欲識情深情淺。船窗無語徘徊。

八聲甘州

漸年多酒少料陶潛。何心賦閒情。向金釵小隊。狂香浩態。陡頓愁增。最愛一枝穠豔。眉黛不勝青。小字儉相問。恐是雙成。不分從來未識。對微顰低語。渾似平生。看山城如斗。不笑也教傾。入新秋涼輕暑薄。拚幾番沈醉月朧明。憑誰道周郎頻顧。不爲歌聲。

菩薩蠻

宮妝笑罷高鬟側。羅襦醉後微香溼。送我到牀前。情知常獨眠。拋人何處去。月映

凌波步。留夢竟無成。酒醒天已明。

前調

新晴天色催歸急。飄蕭行李迎寒日。團扇漸淒涼。匆匆書幾行。臨分聊命酒。執轡還攜手。安得與卿卿。芳樽十日傾。

七娘子

三生一夕凝嬌眄。新詞醒醉流傳遍。綺席分肩。紅燈對面。因緣只合頻相見。袖香空惹玲瓏釧。衾孤不換鴛鴦薦。巧語鶯鶯。輕飛燕燕。人間無數閒庭院。

清平樂

鶯殘花冷。往事休重省。乾鵲聲聲呼酒醒。報到仙居非迥。舊愁新喜難分。無緣飛渡江雲。從此心頭眼角。依前著箇人人。

前調

儂家何處。家傍真娘住。臉暈花光腰束素。占斷碧山紅樹。當杯半晌留連。背人一

笑相關。從此天涯魂夢長。教著暮燈前。

浣溪紗

深屋鶯聲卽漸調。薄寒花性不勝嬌。相看贏得是無憀。
促膝傳杯禁永夕。牽衣強笑問明朝。此情終竟若爲消。

荷葉杯

道是放情花酒。信否。閒澹近風流。餘生未合付溫柔。休摩休。休摩休。

臨江仙

酒癖詩狂消未盡。閒和花月因循。畫圖嬌樣逐翻新。偶然成一面。偏是惹相親。
髻鬢芙蓉城裏見。瑤英認得前身。不須憑夢寄殷勤。拍肩聞小語。含笑喚仙人。

點絳脣

莫怨前期。浮花浪蕊知難定。誤人薄倖。總爲三春病。
曲巷重經。雨過斜陽淨。還相映。舊時門逕。風弄黃楊影。

如夢令

昨夜燭花無賴。照盡佯羞薄媚。細雨嫩寒天。只道歸來濃睡。渾未渾未。卻是酒醒人醉。

品令

晴新寒陡。好雪月休辜負。杯中綠蟻。舟中青眼。坐中紅友。領略秋娘風味。等閒難偶。梅花臘後。更莫道章臺柳。尊前促膝。燈前送目。人前緘口。明日狂奴杜牧。爲卿病酒。

河傳

秋近。芳蘭傳信。永日空齋。故應偏爲主人開。銜杯稱幽懷。春前誤被東君見。荒吳苑。蝶妬蜂猶戀。好裁紅錦護氛氲。爭教取次聞。

南歌子 贈紅媚

徑僻鶯難至。簷荒蝶不窺。妖紅淡白盡離枝。誰遣天香相赴。過春期。月引酣容重。

風將豔態欺。漫勞玉手進瓊卮。怕惹山翁憶著少年時。

滿江紅 題仲翰村雪龕圖

何許容龕在岱北。溜西山雪。其中有詩人一箇。心腸孤潔。爛醉狂吟長放浪。塵容俗狀都銷滅。任三春暖意夏炎威。寒無別。清夢裏。何劉接。高屐底。方蓬列。拚鄉關隔斷。烟波吳越。妙繪偏從閒處賞。佳名渾似前生揭。是王維曾現畫師身。今雙絕。

樊榭山房

詞

蓮影



厲鶚（康熙三十一——乾隆一七）

字太鴻。號樊榭。浙江錢塘人。康熙庚子舉人。乾隆丙辰薦試博學鴻詞。以違式未用。工詩詞。精深華妙。獨闢畦徑。著有遼史拾遺宋詩紀事樊榭山房集等。

樊榭山房詞

錢唐厲鶚太鴻

國香慢 素蘭

路遠三湘。記幽崖冷谷，采徧瑤房。仙人鍊顏如洗，尙帶鉛霜。窈嫺東風搖翠，返魂處、佳珥成行。飄零遇張碩，已墮紅塵，還舞霓裳。月中何限怨，念王孫草綠，孤負空香。冰絲初弄，清夜應訴悲涼。玉斲相思一點，算除是、連理唐昌。閒階澹成夢，白鳳梳翎，寫影雲窗。

齊天樂 吳山望隔江霽雪

瘦筇如喚登臨去。江平雪晴風小。溼粉樓臺，蠟寒城闕，不見春紅吹到。微茫越嶠。但半沔雲根，半銷沙草。爲問鷗邊，而今可有晉時權。清愁幾番自遣。故人稀笑語，相憶多少。寂寂寥寥，朝朝暮暮，吟得梅花俱惱。將花插帽。向第一峯頭，倚空長嘯。忽展斜陽，玉龍天際繞。

百字令 丁酉清明

春光老去恨年年。心事春能拘管。永日空園雙燕語。折盡柳條長短。白眼看天。青袍似草。最覺當歌嬾。惜惜門巷落花早。又吹滿。凝想烟月當時。餽簫舊市。憤逐嬉春伴。一自笑。桃人去後。幾葉碧雲深淺。亂擲榆錢。細垂桐乳。尙惹游絲轉。望中何處。那堪天遠山遠。

西江月

靜極翻如有待。眠多未是無憀。柳花毵轉碧窗綃。不信東風纔到。閉月三三小徑。藏鶯六六彎橋。香囊蟬錦嬾重挑。乞取春愁閒了。

疏影 湖上見柳影因賦此闕

輕陰冉冉。正嫩苔弄碧。庭宇深掩。千縷柔魂。搖蕩如烟。無端忽度闌檻。章臺路。陪人歸處。看足了。斜陽濃淡。又幾痕。水際低窺。近日楚腰全減。依約勻梳月底。亂雲鋪滿。徑籠住文簾。欲結同心。空試萸苗。作就三分銷黯。寒添白袷。清明後。掃不盡。隨風

微斂。最鏡中、再寫秋疏。記得踏枝鴉點。

桃源憶故人 螢

夜涼那更秋情獨。冷燄雨餘輕撲。墜處溼黏簾竹。瞥見因風逐。穿烟照水猶難足。小簾窺人新浴。殘月剛移桐屋。一箇牆陰綠。

惜餘春慢 戊戌三月二十二日汎湖用清真韻

綠徧山腰。青迴沙尾。花信幾風吹斷。屏閒鳥度。鏡裏舟移。乍試苧衫綃扇。常把禪機破除。難負春妍。流光如箭。正蘅皋稅駕。襪塵不動。黛明波遠。看漸是、弱絮縈烟。新荷鑄水麗景。一番熏染。初啼鳩後。將噪蟬前。池閣嫩晴千變。誰道凭闌有人。晤憶年華。自憐幽倩。且停橈淺酌。霏雨霑衣數點。

摸魚兒 得汪舍亭婺州晚春見懷詩用蛻巖韻答之

又騰騰。一番春晚。無情潮落江浦。故人猶憶春前別。不肯載愁流去。窗暝處。展淡墨吳牋。忽見殷勤語。客懷定苦。在穀水雙流。沈樓一角。日日獨看雨。淒涼意。不數淋

鈴督護風流那減張緒。平生我亦多情者。更招酒邊遺譜。還問取。問青子綠陰。可記城南路。休歌爾汝。待再覓郵筒。餘花晚筍。刻意爲君賦。

臺城路 蠶

青萍葉大桐花落。村村又鳴鳩婦。細雨如塵。餘寒若水。蟻動吳匭時候。狸奴聘否。怪生客偏憎。閉門長晝。守定蘆簾。三眠三起似人柳。深窗幾回罷繡。挽籠鉤陌上。親費摻手。夜屋燈邊。曉牆烟外。最怕銀筐飢後。心情漸逗。記瓦卦曾占。簇山將就。待寫雙蛾。更呼鄰女耦。

夢芙蓉 戊戌五月十八日汎舟碧浪湖作

曉天魚板響。趁青蘋風起。碧鷗波漲。一枝塔影斜。鳥打雙槳。道場山在望。仲姬猶牘眉樣。劃碎玻璃。占蘆灣柳汊。新雨欲沈網。何處紋簾捲上。白紵歌輕。去也終怙悵。雙鬢可買。應作五湖長。水雲連浩蕩。杜郎元是疏放。有日重來。願身爲鵲鏡。妝臉鎮相傍。

永遇樂 戊戌閏中秋

恨海填平。情天補就。月共秋駐。秋半偏雙。月圓卻再。減了閒風雨。井梧知信。又開一葉。羅薦較涼前度。想沈沈。青冥萬里。此情此夜尤苦。殷勤露下。把杯重問。也算平生希遇。蚪箭聲添。鸞簫約爽。不少傷心處。干卿何事。清輝依舊。更按桂花新譜。便鴉啼。紋窗影轉。忍教睡去。

浣溪紗

數到湘琴未滿絃。春殘過了。摘櫻天。芳時卯飲最思眠。八字眉痕剛半畫。二分月影恰重圓。第三橋外見飛仙。

蝶戀花

一片東風吹豔雪。錦瑟如人。忍使華年歇。夢去青溪溪畔月。洛神休寫王家帖。非霧非花疑刻襪。楚客多愁。鳳紙新來絕。落葉依枝飛又怯。秋匳空羨泥金蝶。

霓裳中序第一 宋德壽宮芙蓉石在南樞署

牆陰擁翠浪。搔首繁華成俯仰。藤絡苔皴草長。是親見光堯。蓬萊無恙。香銷玉葬。怕夜深、山鬼來往。淒涼處、奉華舊閣。記否捲簾賞。惆悵。疏菴藏響。雨洗淨、嶙峋十丈。芙蓉孤倚月幌。問點額宮梅。已歸天上。冷衙蜂乍放。不照到、銅溝膩漲。青蕪裏、宣和金字。也是此情況。宋梅已枯。

菩薩蠻 題呵手梅妝圖

斜紅不暖凝酥面。春來未許春鶯見。小凭侍兒肩。花寒人可憐。無言空擁袖。蘭氣熏花透。髻壓一枝斜。前身萼綠華。

摸魚兒 己亥初春過太湖次李秋堂韻

尙恩恩、垂虹春早。殘蘆風裏如語。愁陰不散煙汀闊。一葉輕波翔舞。扶柁去。望練繞吳城。幾點青旗字。鱸鄉社樹。想霧鬢風鬢也。憐寒峭。淺翠照眠鷺。千年事。零落荒臺別墅。乾坤元是孤旅。漫臨匳鑑驚清影。客子何堪塵土。須小住。看重疊雲衣。裏就湖天暮。低眠舊浦。續漁具因緣。茶人滋味。休寫斷腸句。

滿庭芳

寄暢園在惠山下。梁溪勝地也。引第二泉穿垣而入。匯爲大池。有聲幽潺。池中多磐石。上莼喬木。皆數百年物。軒楹倒影。與波澹蕩。己亥暮春十有三日。汪青渠邀予來游。坐蔭弄水。顧而樂之。同行虞山沈生。彈箏作秦聲以佐酒。因成此調。青渠近買吳姬。自杭來家梁溪。故戲及之。

屋借峯圍。徑隨泉改。過橋別是深清。闌干十二。眞在鏡中行。不道黃衫去久。風前樹。猶帶茶聲。江南好。菟裘似此。何用買傾城。攜朋春已謝。梅丸緘怨。蕉紙書情。任陰陰隔葉。啼老吳鶯。明日片帆催發。幽崖畔。正有雲生。句留住。簾紋設否。容我聽調箏。

浣溪紗 奔牛道中初晴

莎雨前宵打布帆。柳花今日撲征衫。催春杜宇怨春酣。天有心情雲破碧。風無氣力水接藍。銷魂時節在江南。

揚州慢 廣陵芍藥

疏雨催妍。穉寒凝態。天涯相見魂銷。問春歸幾日。未盡減春韶。算亭北、新妝老去。不多風露。暗展輕綃。送杯中、婪尾香心欲話無聊。鴉黃初試。記當年、曾識煙苗。奈月幌低籠。雲階斜倚。夢到迢迢。除卻謝郎俊句。無人與、淺暈深描。想難禁、攜贈離情都在紅橋。

賣花聲 徐翩翩書扇自稱金陵蕩子婦

花月秣陵秋。十四妝樓。青溪迴抱板橋頭。舊日徐娘無覓處。芳草生愁。金粉一時休。團扇誰留。殢人只有小銀鈎。句尾可憐書蕩婦。似訴漂流。

玲瓏四犯 暉正叔西湖汎月圖爲陳玉几賦

寒玉砌瀾。脩蛾橫綠。青天明月初湧。人閒今夕好。柳外涼陰重。沈沈兩堤跨竦。問何人、曲聲吹送。酒面邀秋。船頭照影。吟思欲飛動。烟空遠眸堪縱。想菱鬢亂起。荷氣深擁。清歡驚易曉。光景隨塵鞞。南田詞客今仙去。賸沙鳥來成幽夢。誰與共。裴回寫閒情數種。

水龍吟 用丁宏庵韻

客懷偏恨秋陰。故遮一半闌干影。蜚欺人獨。鵲欺書滯。何曾慣聽。疊疊吳雲。迢迢楚水。悠悠醒枕。漫尋思那日。門前銀浦。不抵似。關山永。凝立風簾露井。可能拌。參差簧冷。飄零愁髮。蕭條長缺。無言自領。樓月斜初。篝烟清後。舊家標韻。又新涼陡起。添衣時候。作西窗暝。

采桑子

晚秋同程松門汎舟紅橋登平山堂

重陽過也成虛負。賴有詩仙。肯作延緣。人與黃花共一船。沿堤轉盡垂楊路。水影橋邊。山影樽前。畫出傷秋雨後天。

高陽臺

題華秋岳橫琴小像

劍氣橫秋。詩腸滌雪。風塵湖海年年。三徑歸來。慵將身事。賤天。草堂不著櫻桃夢。寄疏狂。菊圃梅邊。想清游。如此須眉。如此山川。枯桐在膝。冰徽冷。縱一絃。雖設亦似無絃。世外音希。更求何處成連。幾時與子蘇堤去。采蘋花。小艇衝烟。笑平生。忘了機

心。合伴鷗眠。

尾犯 坐趙谷林西池泊花檻看新種青蘆悠然動江湖之興

水空雲淨。見菰蒲叢外。數枝交映。梢梢瑟瑟。無人處。被荷風吹醒。搖波十里。遠界破、青山影。作秋聲。不到秋來。要君倚檻閒聽。最是淡烟低暝。逗漁燈。前浦冷。便移栽、蕩戶。添個根邊。鴨雛游泳。捲葉鳴笳。揉花裝被。尙遲清興。又何似、折取橫江。相思還踏三徑。

清平樂

風梭織雨。萍葉籬根聚。水滿蘭橈應斷渡。昨夜夢魂來去。春衫起樣休寬。偷描一、輕鸞。將息釀花天氣。憑他料理餘寒。

曲游春 郊外探春作

一水仙源曲。被柳條遮斷。千縷婀娜。有約湔裙。怪逢伊還向。重簾單舸。出意新梳裹。看鬢鬢。蕊黃微澹。縱近來。遠似天涯。誰倩玉顏初破。禁火。心情偏妥。伴錢藕偷分。

鈿符輕墮。容易斜陽。恐穿煙鳳子。尙尋珠唾。波面虹橋臥。任怨咽。玉簫吹過。無奈澹月籠燈。翠扉恨鎖。

一枝春 城東許氏水軒臨流梨花一株妍淨可念主人命酒邀賞已半落矣感而賦之

縹蒂無多。過清明。幾度東闌愁凭。飄搖素羽。漲曉乍迷天鏡。垂楊倦眼。似相見。雪融酥凝。拌早趁。深淺沾春。護惜夢雲輕冷。聲聲鶉鴉催暝。憶初籠香雨。煙綃娟靚。清蟾墜小。瘦減玉兒妝影。憑誰看取。好留向。繡牀低映。還帶葉。偷綴瓊絲。晚風未肯。

感皇恩

已是殺釘花。月籠深閣。何處行雲到巫峽。一灣流水。只有浮萍開闔。依稀親記鬪池邊鴨。明日暖風。蘭紗裁夾。玉翦多情度簾押。蜜犀蠲忿。定帶露痕偷招。幾時頻見也。纖紅甲。

丁香結 暮春初霽用清真韻

吹落嬌雲。展開平碧。枝上雨殘猶隕。恨流光偏迅。數景物。賸得鶯愁蜂潤。小紅會記
否。朝醒。薄寒自忍。可憐游舫。散後定是。蕪菁開盡。相引。早餽。釘陰晴。花信催過
幾陣。曲巷幽坊。柳絲竹粉。翠樓生暈。謝家飄蕩。紫額。翦麴塵盈寸。凭闌干。那曲。冶葉
何人摘損。

高陽臺 成窯九十九子瓷合金壽門索賦云是宮中妝具也

祕翠分峯。凝花出土。依稀粉滴脂函。鈿合前塵。宮羅冷卻。菱尖。浮梁猶有當時月。向
夜深。孤照秋匳。怨長門。夢斷蒼龍。字漬眠蠶。戲嬰圖子。誰描得。恰臨妝試。仿黛筆
重添。數比螽斯。未曾盈百。休嫌。從今舊價卑哥汝。宛青娥。紅淚偷淹。莫銷魂。漢苑瑤
箱。久落江南。明時瓷器進御者皆出浮梁之景德鎮

眼兒嬌

一寸橫波惹春留。何止最宜秋。妝殘粉薄。矜嚴消盡。只有溫柔。當時底事。忽忽去。
悔不載扁舟。分明記得。吹花小徑。聽雨高樓。

西江月

春淺初勻細黛。寒輕不上仙肌。玉梅花下見來遲。夜月深屏無睡。心倚紅牋能說。情除青鏡難知。試香天氣惜香時。人靜街痕如水。

三姝媚 櫻桃花

嬌鶯含得未。正眠燈風收。繁心低綴。薄暈微頰。學玉窗勻面。粉淹脂淚。悄探芳期。先占了、沿溪桃李。無語銷魂。偷折斜枝。下階遊戲。休觸蜂須飛墜。到細數圓珠。好春流水。翠沼深深。照一庭、朧月暖香吹碎。記挽單衫。相送嬾。難醒殘醉。隔著重簾花下。蒼騰喚起。

淒涼犯 庚子十二月二十四日宿濟南敖陽店寒甚有懷故園節物悽然作

此解

疏林宿鳥。柴門裏、凝塵半榻誰掃。倦程繫馬。風刀裂酒。雪花欺帽。何時古道。看長倚、敖山翠小。又燈昏、寒星照戶。不使客愁少。敲枕尋思處。畫句爐閒。印梅窗杳。歲殘

氣味歎詩人。在家貧好。底事飄蓬。竟輸與、蛾兒夜鬧。恐明朝、漸看鬢影似暗老。

慶清朝慢 辛丑長安元夕同王雪子金繪甫集汪西亭水部寓齋賦

掃雪燈樓障風酒幕。千門春散京華。閒情似夢小歡深。醉銷佗。莫趁走橋人去。故園
伴侶在天涯。當杯有一般好月。燭影初斜。簫鼓隔牆未厭。況水曹詩俊。淡墨棲鴉。
疏香共憶。窗外應少梅花。從此滿城鬪草。細娘催上卓金車。心期遠。鶯邊古寺。雁外
晴沙。

玉漏遲 永康病中夜雨感懷

薄游成小倦。驚風夢雨。意長牋短。病與秋爭。葉葉碧梧聲顫。溼鼓山城暗數。更穿入、
溪雲千片。燈暈翦。似曾認我。茂陵心眼。少年不負吟邊。幾熨帛光陰。試香池館。歡
境消磨。盡付砌蟲微歎。客子關情藥裏。覓何地。煙林疏散。懷正遠。胥濤曉喧楓岸。

百字令 月夜過七里灘光景奇絕歌此調幾令衆山皆響

秋光今夜向桐江。爲寫當年高躅。風露皆非人世有。自坐船頭吹竹。萬籟生山。一星

在水鶴夢疑重續。舉音遙去。西巖漁父初宿。心憶汐社沈埋。清狂不見。使我形容
獨寂。寂冷螢三四點。穿破前灣茅屋。林淨藏烟。峯危限月。帆影搖空綠。隨流飄蕩。白
雲還臥深谷。

憶舊游

辛丑九月既望。風日清霽。喚艇自西堰橋。沿秦亭法華灣。洄以達於河渚。時
秋蘆作花。遠近縞目。回望諸峯。蒼然如出晴雪之上。庵以秋雪。名不虛也。乃
假僧榻。偃仰終日。唯聞櫂聲。掠波往來。使人絕去世俗營競所在。向晚宿西
溪田舍。以長短句紀之。

遡溪流雲去。樹約風來。山翦秋眉。一片尋秋意。是涼花載雪。人在蘆漪。楚天舊愁多
少。飄作鬢邊絲。正浦澈蒼茫。閒隨野色。行到禪扉。忘機。悄無語。坐雁蘆焚香。葢外
絃詩。又送蕭蕭響。盡平沙霜信。吹上僧衣。憑高一聲彈指。天地入斜暉。已隔斷塵喧。
門前弄月漁艇歸。

聲聲慢 題符幼魯風雪歸舟圖

征衫換色。客枕催寒。川塗自古酸辛。楚尾吳頭。風雪獨自歸人。低迷凍鷗片影。恐吟魂、攪亂江雲。遠望外、有敗蘆斷竹、何處孤村。莫怪蒼山白首。看淒清到此，愁也如君。溼重帆遲，贏得畫裏閒身。灘空夢回犬吠。正鴻妻、相候柴門。待歲晚、酌椒花、全未是貧。

長相思 綠萼梅

生九疑。住九疑。自小山光染玉姿。碧羅天上飛。春到時。雪到時。獨向花中詠綠衣。斷魂烟月知。

沁園春 心

一寸通犀。脈脈難窺。含無限情。記鍼纒棘刺。捧時尤媚。鎮餘銀液。捫罷偏驚。小恰容憐。芳能颺恨。莫近彈棋最不平。羅襟掩。歎幾曾灰盡。半爲琴聲。覆蓮狀未分明。愛慧性玲瓏在。目成乍歡。娛著處。忤如危柱。別離催就。亂若懸旌。門裏輕挑。秋來暗合。

閒悶閒愁特地生。花前見算。除非換得。方表深盟。

齊天樂 秋聲館賦秋聲

簾淒燈暗。眠還起。清商幾處催發。碎竹虛廊。枯蓮淺渚。不辨聲來何葉。桐飄又接。盡吹入潘郎。一簪愁髮。已是難聽。中宵無用怨離別。陰蟲還更切切。玉窗挑錦。倦驚響。簷鐵漏斷。高城鐘疏。野寺遙送涼潮。嗚咽微吟。漸怯訝籬豆花閒。雨篩時節。獨自開門。滿庭都是月。

賣花聲 壬寅立春日作

春信一番新。春水生鱗。春花春鳥尙逡巡。翦就釵頭春勝也。添個春人。準擬踏春塵。春色初勻。春風困著小腰身。製就春詞知幾首。帖寫宜春。

西湖月 明慈聖李太后賜畫九蓮觀音像在靈隱寺借秋閣

恩恩夢了華胥。早鷺嶺窗前。貯將圖畫。翠瓔長帶。銖衣細疊。冷綃光研。巖居瞻瑞相。展一椽。松風塵外挂。任水際。苦入秋心。依舊九蓮開也。暑年髣髴神宗。說侍養深。

宮白頭閒話。月輪圓裏。山河小影似驚飄瓦。興亡多少事。便指與枯禪。應淚灑。已零落。阿監當時。奉香黃帕。

綺羅香 壬寅春分約徐丈紫山同賦

水榭收燈。虹梁待燕。判斷韶華如許。九十芳辰。一半自今堪數。嬌意緒。欲暖翻寒。嬾心性。乍晴還雨。已飄殘。梅雪鱗鱗。井桃花信未遲暮。簫樓應惜冶思。誰在生香徑裏。和鶯低語。約略東風。好似破瓜眉嫵。剛宿露。蝶夢攪勻。更惹烟。柳絲偷取。悵年時。一掬春愁。試分知解否。

阜羅特髻 賦包頭

膠鬢攏能稱滑笏。吳綃摺成如水。淺絢素額。更斜遮蟬翅。重窺鏡。非關怕冷。上頭初。愛道隨時世。最宜淡泞。恁略施珠翠。還把一痕絲擘。襯微微紅起。春愁困。莫教半卸。到殘妝。秀暈分明是。碧烟抹斷。看兩蛾尤細。

夏初臨 初夏雨中同蔣丈靜山汎湖

蘸就魚天。搓成鷗雨。空濛撥櫂遲遲。無數蘋花。輕香點破漣漪。遠風沿岸斜吹。溼青
篷。誰弄參差。湖心亭柳。千條映波。纔是愁時。可憐春去。追送今朝。破除酒病。更鬪
檣旗。簾釘窗眼。曲游俊侶。都非。那不淒迷。放殘陽。綠過橋西。記蘇堤。衣香後船。柔橈
枝枝。

喜遷鶯 初夏

竹香新引。漸綠到岸東。茶蘼吹盡。描繡心慵。行棋聲歇。長日瑣窗清潤。閒臨小風揮
扇。涼思先歸鬆鬢。爲誰瘦。彈單衫。尙束春前幽恨。芳信緘密意。蠅字玉釵。待招榴
巾問。鬪茗樓前。澡蘭屏底。猶記那回眉印。幾絲麝煤飛度。山枕天涯。翻近夢。催破聽
迎梅雨點。敲簷初緊。

八歸 隱几山樓賦夕陽

初翻雁背。旋催鴉翼。高樹半挂微暈。銷凝最是登樓意。常對亂波紅蘸。遠山青襯。不
管長亭歌欲斷。漸照去。鞭痕將隱。想故苑。燕麥離離。滿地弄金粉。何況春游乍歇。

花愁多少。只惱黃昏偏近。冷和帆落。慘連筇起。更帶孤烟斜引。誤雕闌倚。徧霽色明朝也應準。無言處。望中容易。下卻西牆。相思人老盡。

大聖樂 東園餞春追和草窗韻

空苑游絲。舊池飛燕。薄陰千樹。正小闌人意厭厭。細數亂花。翻怨錦鳩呼雨。皺得綠波新如倦。似無奈。啼綃臨別浦。春何在。在南陌麴塵。西窗烟縷。閒思古今事。苦有紫曲青樓千萬語。且寄愁彩筆。橫塘重見。楊枝應許。尙戀淺寒羅袞曉。記門掩。紅香深院宇。傷飄泊。是誰倚。疏簾吹絮。

雪獅兒

華亭錢葆勳以此調詠貓。竹垞翁屬和得三闋。徵事無一同者。予與吳繡谷約。戲效其體。凡二家所有。勿重引焉。昔徐鉉與弟錯共策貓事。鉉得二十事。錯得七十事。作此狡獪。殆非詞家清空婉約之旨。觀者幸毋以夢窗質實爲誚也。

雪姑迎後。房櫺護得黃晴明潤。撲罷蟬蛾。更弄飛花成陣。穿籬遠近。未肯傍、茸氈安穩。念寒夜、偎衾暖處。夢尋燈暈。繞膝聲聲低問。似無魚分訴。憐伊嬌困。展膊屏前。髣髴三生猶認。懷春最恨。漸取次、歸來難準。瓊籤盡。上案晴蟾鋪粉。花毛褐染。炎天尙記。荷塘爭浴。鼠卜閒時。畫損砌苔幽綠。闌干幾曲。任側輶、橫眠初熟。恰又斂、脩脩金尾。蝶衣偷蹴。忽起驚跳風竹。聽蠅鳴茶鼎。何會輕觸。暮眼纔圓。香綺叢邊看足。簷聲斷續。休喫盡、草芽盈掬。娛幽獨。勝了狻猊鏤玉。妝樓鎮臥。底須詰取。於菟癡小。解事吳娃。戲學鳳仙親擣。紅絲繚繞。便萬貫、呼來還少。防失卻、裏蹄重鑄。閒坊尋到。蟋蟀吟中醒悄。正無聲、四壁立殘斜照。不捕依然。階藥紛披藏好。攜兒乳飽。坐榻畔、微溫相惱。春回早。八九牆陰新掃。稱伊虎舅。斑斑璫瑁。身邊頻戲。食有溪鮮。又上小庭高樹。如丘拗怒。想喚汁、多應回顧。何事費、峨眉畫手。穴中空怖。延頸盤旋爭赴。笑綠沙幃底。深憐羣聚。銷得侯封也。算北門長護。青錢百數。買雙耳、微痕添鋸。窺鸚鵡。月季花前亭午。

思佳客 吳中作和繡谷

窄窄紋窗小小舟。空波一片漾難收。滿天細雨曾成夢。壓水涼陰半倚樓。深玉瓊。
暖香篝。夾紗衣薄不曾秋。吳中舊事君知否。晚泊荷花爲洗頭。

東風第一枝 癸卯元夕雪晴

拂柳蛾消。妝梅鶴瘦。玉烟吹散無影。放教明月初圓。最憐倚篝漏永。街泥不斷。已減
卻。燈邊遊興。料粟肌、籠袖香留。笑裏有人偷並。占響卜、紫姑誰證。思舊約、素娥暗
省。一番花信添寒。十分草痕洗淨。凝情買夜。漫再認、飛鸞窺鏡。悔少年、爭逐輕塵。得
似煮茶風景。

浣溪紗

馨折春波吹婢魚。粉塘烟竹迥蕭疏。此中堪注水經無。蘭語脆疑鶯谷近。柳情慵
覺燕簾孤。晚風休減玉肌膚。

高陽臺 落梅

縞月啼香。青禽警瘦。遺環與恨俱飄。雪沒鞋痕。何人爲掃溪橋。東風欲避層臺遠。御風歸。第一春銷。惱相思。枝北枝南。冷夢迢迢。山空記得吟疏影。拾參差片腦。自裹冰綃。湖水無聲。流殘舊怨新嬌。餘酸已在濃陰裏。怕重屏。半萼難描。更堪他。消息經年。雨暮烟朝。

木蘭花慢

城西開元宮。本宋周漢國公主府。元時句曲外史張伯雨入道於此。外史開元宮得月軒詞。有環堵隘花狼藉。溝水漲雲充斥。似石魚湖小酒船。寬窄之句。今闌入軍營中。僅矮屋數楹。奉高真像。旁有隙地。積水縱橫。猶是當日陳跡也。雍正癸卯二月十九日過之。書此以貽訪古者。

自吹簫伴去。還再住。列仙儒。想瑤草呼龍。梅花待鶴。詩鬢慵梳。平生愛尋先隱。冷襟懷。要與俗人疏。可惜風騷零落。而今纔到清都。漫郎曾賦石魚湖。流水繞階除。膾一片涓涓。斷雲新柳。照影荒渠。宮隘已銷餘豔。覓彩毫。何處寫黃圖。說與游人記得。

羽觴汎也應無。

點絳脣 次韻答紫山見寄

節近清明。一池春綠蛙催雨。凭闌無緒。目送年芳去。擬翦湘天。不供牋愁句。相思苦。花無重數。紅認斜陽暮。

思佳客 柳

自琢新腔唱柳枝。段家橋外水仙祠。絲輕最在無眠處。腰弱尤看不舞時。鶯一囀。笛孤吹。碧波澹澹影依依。春風若爲長條惜。應遣情人少別離。

少年游 春日訪紫山同坐學士橋望湖

南屏新畫西冷小隱。動卽到君家。船載湖光。橋分野色。一鳥落雲沙。十年無限傷春意。說與小桃花。結客金空。游仙枕在。風外祝蒼華。

絳都春 清明風雨

烏衣過客。約孤注賽春。春還輕擲。潤被換香。低几留燈。愁通夕。餘寒猶是連寒食。強

偷眄清明天色。傍簷攜手。茸茸柳眼。淚痕頻滴。敲側。前年舊旅。寄單枕。悶把臥枝
花摘。水外澹紅。簾底纖瓊。游蹤隔。文園多病。何人惜。有鬢影。參差知得。便教晴蝶敲
風。岸陰翠織。

瑞鶴仙

賦聖幾齋中牡丹名藕絲霓裳種來自亳州

海天霞未卷。和曉岫。空青付誰裁翦。花師戲成幻。約嬌春千里。翠深紅淺。回頭意嬾。
但微認。崔徽背面。映衫痕。一色慄慄。誤道藕絲秋半。曾見。夢中彩筆。歌畔檀唇。醉
餘羅扇。雲窗月館。湖山在。舊情遠。便聽風聽水。霓裳譜得。自對珍叢夜怨。問尋芳。人
瘦如何。細看帶眼。

念奴嬌

甲辰六月八日子將北游東扶聖幾餞予湖上泊舟柳影荷香中日

落而歸殊覺黃塵席帽難爲懷抱矣因用白石道人韻歌以志別

孤舟入畫。怪人閒。誰寫漁朋鷗侶。起坐不離雲鳥外。倒影山無重數。柳寺移陰。葑田
挖碧。花氣涼於雨。詩成猶未。遠蟬吟破秋句。忽記身是行人。勞君把酒。暫揖湖光

去。共惜風亭今夜笛。月逗離聲前浦。千里幽襟。一堤野思。終擬將家住。甚時攜手。水
蕩搖曳烟路。

好事近 吳江月夜

夾岸響青蘆。瑟瑟吳波搖碧。天借一帆風勢。看垂虹秋色。滿船明月照無眠。今夕
是何夕。應被素娥笑我。太疏狂蹤跡。

點絳脣 題授衣讀書稻田隅圖

片雨斜陽。柳陰濯足看行水。世閒良計。識字耕夫耳。風約雲萍。又向蕪城會。推書
起。酒闌無味。爲我言田意。

菩薩蠻 馬佩兮梅花卷子寓騎省之戚徵予賦此

微波冷託湘筠色。高枝早信尋難得。玉骨不爲泥。輕於雲一絲。鏡花留半影。最薄
東風命。楚角莫飛聲。人閒無此情。

蝶戀花 長安秋雨夜賦

曲巷低窗雲色暮。節近黃花。又下淒涼雨。長記江南楊柳渡。孤篷翦燭曾聽處。悔別翻將書信誤。雁落吳天。已是愁難訴。今夜長安千萬戶。相思不爲砧聲苦。

定風波 甲辰冬杪南歸過邗城被江見留酒閒款語忘暮月黑江寒行五六里送至舟中而別到家旬餘被江書來作此寄之

記來時。傍柳維舟。歸人一寸心折。歲晚高鴻。天寒脩竹。欲下山陰雪。硯香凝。酒鱗熱。語短情長不成別。淒咽。悔秋燈種了。星星僧髮。野橋路滑。聽江聲。送客愁如結。又空林門掩。疏簾夢阻。低共梅花說。杜陵荒。浩歌發。猶有詩傳布衾鏹。天末。幾時同看。燕城明月。

疏影 菊影和祓江

幽姿欲舞。見稜稜幾葉。空際微吐。半枕游仙。飛作輕雲。不怕滿城風雨。琉璃屏上秋多少。也澹到。痕無描處。記昨宵。灑背新霜。翠袖翦燈窗戶。尙有籬根淺醉。敲斜簪帽底。會費回顧。笑問尊前人。瘦如花。花瘦可憐如許。東西活脫殘枝畔。合賺得。閒情

詞賦待醒來。重覓橫陳。低捲小簾寒曙。

解語花 春日見閨人搗鼓

簾遮晝影。釵翦春痕。香度深深院。玉嬉鶯婉。無愁處。小坐釘花牀畔。飛空碎遠。看一
朵翠翹難顫。驚夢回。聲落高唐。白雨隨酥腕。長記柑筵飲散。遇紅蘭潮壓。青柳垂
眼。唾霏休濺。飄鸞袖。應是細敲腸斷。微音弄釧。料無此。漁陽嬌怨。生晚寒。燈暈妝樓。
敲被池人倦。

琵琶仙 乙巳早春過吳門作

帆色新年。又輕約。水枕春寒同載。堤上沽酒。人家湘梅已先賣。斜照傍。紅樓未啓。惜
猶護。一層芳靄。趁燕幫歸。調鸚檻遠。塵夢都改。悄彈指。閒立平沙。更吹綠吳波緩。
衣帶堪笑天涯蹤跡。有垂楊相待。人意與。東風是客。洗輦香。雨際烟外。且聽鐘度楓
橋。舊情如在。

又 康山在揚州輦土爲之以康對山寓此得名今屬吳氏乙巳二月四日祓

江招飲其上四顧曠然俯仰今昔同集者尺鳧授衣各賦一解

休恨無山小。闌外略借江南眉色。何況山在人家。梯青喚雙屐。吹不斷。風前笑語。怕驚起。退紅簾隙。古堞飛帆。平林指塔。春望無力。舊知己。觴送花迎。盡歌舞。屏閒未頭白。誰道琵琶纔招。賸康家陳跡。豪氣被。蕭蕭草樹。甚曳裾。有此狂客。爲問天畔歸鴻。遠愁銜得。

摸魚兒 蕪城清明

杏錫香。鬧花門巷。家家風外晴穩。來時猶道江程短。定不短如愁鬢。飛絮近。作酒惡寒輕。只是無人問。紅絲硯潤。便杜老傷春。江郎賦別。難寫此時恨。西湖路。最愛山聯眉暈。游船會記。歸盡綠楊。闌角聽鶯坐。知我平生疏俊。情一寸。回首處。雲容水態還相引。天涯自哂。繞九里街中。三分月底。誰與寄芳信。

掃花游 乙巳三月二十三日客揚州空齋積雨孤愁特甚問人始知是春盡

日也黯然於懷賦寄尺鳧

折花汎舸。又夜淺燈孤。綠陰如許。舊遊閒阻。聽簷聲壓酒。醉醒無據。落魄多愁。尙記羅裙雁柱。向南浦。訝楊柳今朝。腰瘦慵舞。行徧深院宇。已負了春來。忍教春去。笑人易誤。似山中枕石。頓忘時序。小榼櫻桃。更憶西園勝聚。寄情處。畫當年。滿湖烟雨。

摸魚兒

首夏歸杭過吳淞景物清曠有會而作

綠陰陰。江南千樹。重來桃葉依舊。十年不負烟波興。付與帶人杯酒。船喚否。度一片涼雲。最戀河橋柳。凭闌望久。趁螢影高低。漁歌斷續。搖過五湖口。歸非偶。正是清和時候。深村樂事多有。焙茶煮繭。梅風裏。換得霜鱗盈斗。詩思瘦。待小草湘蘭。已入騷人手。西泠永晝。汎五日輕橈。獨醒何事。散髮醉還又。

喜遷鶯

賦趙谷林三十六鷗亭

風蒲低暑。見白羽帶波。翻翻還住。闌影搖人。簾文生夢。夢入藕花深處。閒笑汎湖伯。越閒笑。啼湘懷楚。晚涼外。動忘機一曲。悠然琴趣。休去尋釣艇。重理舊盟。草合垂虹路。倚扇開襟。調冰膾玉。不問是誰賓主。三十六梯明月。三十六陂秋雨。戲招手。認

青天片雪飛來詩句。

鬪嬋娟 題趙飲谷采香詞居近滄浪亭自榜曰小吳船

中吳烟水微茫地。吟邊何限清感。夜深腰笛伴漁謳。冷玉花千點。翦秀骨、香霏露染。
娃宮風景。數長占。錯羨舟居好。幾雁齒、橋頭解纜。回首銷黯。仍是載酒年時。驀然
低憶。薰爐絲鼻。菱鑑斷腸。重唱小橫塘。粉字開還掩。縱賀老、心情未減。無端世味如
雲淡。好約我、垂竿手。斜雨梅黃。凭君畫檻。

探春 次趙飲谷韻

冷硯敲秋。枯筇倚晚。西風斜掠平楚。芋熟湖田。楓明水巷。先放烟鴻飛去。還似春時
節。掃不盡、閒愁吹絮。暖紅院落誰家。迎寒猶試簫鼓。此際青門會住。記曉碾霜輪。
未教離阻。老大才華。淒涼身事。銷得笠篔知遇。三五回圓月。怕靜夜、窺人良苦。待問
梅花。何時香拂衫縷。

一萼紅

樊榭山房詞

丁未始春。客吳興。郡治後圃。有愛山臺。南宋時建。蓋取東坡尙愛此山。看不足之句。日與客登其巔。蒼弁清茗。奔赴襟烏。情味灑然。如遇白石草窗諸名勝。於五百載上。乃歌此曲。以寄予懷。

乍寒輕。被鄰園翠羽。喚起愛山情。烟草殘碑。風榛斷笛。千載誰記經行。想春在、樓痕幾曲。破曉霽。妝鏡見飛英。欲雪消時。無人知處。我髻青青。飄瞥少年前夢。便移舟弄水。有若平生。西塞魚肥。東林酒熟。滋味何似浮名。待傳與、蘋香暖信。醉吟地。常憶柳邊城。回首家江非遠。十四長亭。

水龍吟

梅雨初霽。湖上山水浮動。涼氣沁人肌骨。尺鳧買舟。約予輩數人。緣孤山。掠蘇堤。入西林橋。以泊於裏湖。時意林鼓琴。敬身作小篆數幅。樂城觴碧筍勸客。予與尺鳧各賦此曲。極暮乃罷去。丁未五月二十五日也。

蜻蜒偷眼涼多。飛隨小舫。搖空翠。西冷五月。碧羅初染。冰壺乍洗。多麗香車。閒情椒

壁夢塵空徙。載荷心酒苦。桐枝絃澹。看一陣風漪細。更譜玲瓏散水。戰長林。葉間
疏吹。高寒更憶。迴峯隱舍。鳴泉僧寺。易得驚秋。菰蘆深處。此歌堪倚。漸鐘催人散。平
波墜露。點青螢尾。

清平樂 題飲谷說劍圖

仙源風雅。不恨知音寡。艇子采香歸去也。袖有驪珠無價。天涯共話秋窗。吹簫載
酒何妨。莫把吳鉤再看。燈前化作柔腸。

意難忘 丁未冬杪客蕪城將歸次飲谷送別韻

舊苑荒灣。正恩恩別袂。草草歡筵。放歌銷白日。轉枕夢青天。風力緊。折吳絲。寒色漸
蒼然。話倦游。不如歸去。如此湖山。津頭已買篷船。尙樵歌共譜。琴趣閒編。沙河春
拊馬。燈市夜飛蟬。花倚擔。菜登盤。節物又增年。問幾時。掀髯一笑。追逐吟仙。

蝶戀花 戊申春暮城東周氏小園池上作

三月風顛吹斷柳。何況薔薇。落處依苔厚。折得一枝花在手。戴花人尙平安否。行

徧回塘銷永晝。水影蘋香。只是侵襟袖。杜宇數聲春欲瘦。斜陽黯黯醺如酒。

憶王孫 懷紅橋舊游

小秦淮映小紅橋。蘭舫重來酒未銷。秋雨多從蟬鬢飄。夢迢迢。曾倚闌干弄柳條。

謁金門 七月既望湖上雨後作

凭畫檻。雨洗秋濃人淡。隔水殘霞明冉冉。小山三四點。艇子幾時同汎。待折荷花

臨鑑。日日綠盤疏粉豔。西風無處減。

水龍吟 春晚倚樓見海棠葉底餘花同谷林賦

殘春能幾番風。猩雲一朵藏深翠。嫣然最小。窺人闌角。憐伊睡起。羞見當時。天衣澆
薜宮鬢垂地。歎宣華舊色。鳥聲啼盡。遲開處。伶俚矣。尙恐朱顏易老。倩薔薇、殷勤
鉤袂。樓高十二。妝輕粉瘦。綃痕寄淚。雨雨風風。鈴兒未掣。蜂兒先退。待解愁知道。前
身記得。晚花流水。

國香慢

壬子冬至後三日過馬半槎南齋。炙甜香以供客。風味幽絕。前明宣宗時禁中製也。坐上索予譜斯闕成。半槎謂予云。昔熊訥齋請詹天游賦。輒香慶清朝慢。云願掃陳言。君於此題。當與天游競爽矣。明日以綠牋請予書之。裝成小軸。高西唐篆其首。曰甜香新唱。

雨浥芳塵。愛花瓷寶屑。百種芬氤。誰將蜜脾滋味。散作濃春。顛裊微烟。猶未寫蘭韻。如幻如真。輕翻小銀葉。舌本先參。鼻觀徐聞。漢宮遺事遠。歎尋方難和。按譜偷分。茗甌初啜。依約攙了餘熏。縹緲華胥一枕。蝶飛來。猶戀梨雲。回思殢人處。寄與當時。浣罷羅巾。

澡蘭香 癸丑淮南重午用吳夢窗韻

荷聲碧檻。蒜影紋簾。詩在枕根夢覺。釵邊綴虎。扇底彈蠅。輸與彩舟佳約。記琵琶。初見灣頭。纔舒新眉半萼。立盡梅陰。晚雨猶鳴青鷺。贏得星星短鬢。羞照江心一規銅魄。涼生楚簟。怨人宮砂。多少玉窗羅幕。想南湖。十頃菱波。閒了微吟淺酌。還認取。

天際歸帆飛鳧闌角。

西江月 秋晚同嶰谷登烟雨樓

浮玉塔前風色銷。金鍋畔晴瀾。都來收拾一樓閒。只少青山數點。望眼蒼黃越樹。醉魂清冷吳天。柳邊猶繫五湖船。西子烟中去遠。

摸魚兒 塵梅追和元人顏吟竹

怪朝來凝芳盈席。一枝幻出清瘦。紛紛不用將犀辟。付與散花搵手。無乍有。想漠漠輕寒。昨夜穿窗透。紗籠護否。恐疏朵橫陳。探春多誤。更與灑冰溜。偷描處。漫比脂妝玉鏤。寓形休污吟袖。鹿胎幾點閒蹤跡。驚覺輭紅回首。延望久。恍翳月吹烟。正是開時候。高情似舊。笑學字蕭郎。低徊未拂。香影寫難就。

踏莎行 嘉禾道中和江皋

鴨鴨隨波。鶯鶯坐樹。天涯芳草疑無路。惱人只有燕梢船。濃春又向船中度。鬪酒香留。題襟墨聚。菜花黃了忘歸去。韋娘髻子曉妝成。今朝定出湔裙否。

露華 玉簪秋海棠同置小餅詞以寫之

楚雲夢遠。覓鬢底瑤肪。悄在秋苑。素萼乍敲。遮住青鸞輕扇。最憐付與紅兒。只隔幔紗遙見。涼颼度。嫣然笑拈。鬧掃初綰。明河墜露分半。稱香浸銅餅。臙粉零亂。幾點睡壺情淚。翠襟吹濺。倚妝靜看搔頭。又恐一枝敲斷。丹白想。亭亭夜深自遣。

浣溪紗 乙卯冬日同抱樸載酒過湖酌耕民殯宮作

一櫂迎霜拂曉開。非關乘興訪疏梅。斷雲叫徹玉龍哀。雞酒有情應戀此。湖山如夢可重來。隴泉幽咽語初回。

南鄉子 題揮扇士女圖

思夢髻慵梳。鸚鵡驚回倚井梧。扇影似人人似月。圓初。十六盈盈十五餘。並蒂點紅蕖。更有關心好句書。不用近前頻掩面。生疏。水院雲廊見也無。

蕙蘭芳引

乾隆丙辰秋七月十日。行郊城道上。殘暑猶熾。夾道楊柳依依。慙有慰于倦。

旅。予自庚子冬經此。已十七年。爾時樹猶未種也。江潭憔悴之感。在人更有甚于樹者。賦此闕書旗亭壁。

塵沁短衣。話前事。倦途亭午。向長景新秋。官柳自垂萬縷。繫人舊感。問翠黛。那時何處。等再來。瞥見。付與驟網鈴語。粉絮吹簾。柔枝縈扇。擁髻曾訴。念好箇江南。爭似路旁低舞。少年容易。鬢霜早聚。顛顛多。長夢畫橋烟浦。

一絡索

風走葉聲簾底。夜長燈細。秋塵不肯洗征衫。有前日、分攜淚。暗憶餘香殘醉。幾層烟水。分明新夢到伊行。但道得、相思字。

惜奴嬌

深院無人。看分月、紋疏小。閒情約。青奴漫惱。藕惹冰絲。悄一似、紅衣拗。會道。賦微涼、單樓悟早。露篔烟襟。可暗憶、凌波權。垂楊髻。幽花玉照。夢繞香瓊。又喚醒、煩塵掃。秋到。休更怨、西風草草。

天香

烟草神農經不載。出於明季。自閩海外之呂宋國移種中土。名淡巴菘。又名金絲薰。見姚旅露書。食之之法。細切如縷。灼以管而吸之。令人如醉。祛寒破寂。風味在麴生之外。今日偉男髻女。無人不嗜。而予好之尤至。恨題詠者少。令異卉之湮鬱也。暇日斐然命筆。傳諸好事。

瀛嶼沙空。星槎翠翦。耕龍罷種瑤草。秋葉頻翻。春絲細吐。寄與繡囊函小。荷筩漫試。正一點。溫磨相惱。纔近朱櫻破處。堪憐蕙風初裊。嬌寒戰回料峭。勝檳榔。爲銷殘飽。旅枕半敲熏透。夢闌人悄。幾縷巫雲尙在。濺唾袖餘花未忘了。喚剔春燈。暗縈醉抱。

虞美人

游絲不惹東風住。和悶閒吹絮。嫩寒猶護小窗紗。試比去年今日。瘦些些。飛紅只在迴塘裏。塘下差差水。水邊杜宇盡情啼。喚得春歸。何似喚郎歸。

樊榭山房詞

杏花天影 丁巳秋日舟過荷葉浦

蘋花纔報西風信。早添得、清愁上鬢。短蓑
鏡、紅疏翠暈。聽依約、菱歌去盡。已涼天氣

醉太平 戊午暮春汎舟紅橋同授

楊花滿天。榆錢滿船。太鴻綠陰湖上。年年

廉風夕陽一角闌干。對春風可憐。太鴻

減字木蘭花 過張無夜花籠

竹垣花架。四面陰陰堪結夏。手捉松枝。君
是伴。久斷知聞。一縷茶烟裊作雲。

水龍吟

半竿殘日江城。平蕪寒色新來淺。舊游似
念。最難消遣。況雨聲不管。愁人厭聽。更長

天遠。絲占蟾子。香盟心字。關情在眼。碧鏡春酥。青綾秋夢。紫簫幽怨。待佗時。絮語西窗。今夜把蘭燈翦。

湘月

揚州勝處。惟紅橋爲最。春秋佳日。苦爲游氛所雜。俗以大舟載酒。穹篷而六柱。旁翼闌檻。如亭榭然。每數椽並集。或銜尾以進。則烟水之趣希矣。戊午十月十七日。風日清美。煦然如春。廉風莢亭賓谷葑田。招予與授衣于湘。喚舟出鎮淮門。歷諸家園館。小泊紅橋。延緣至法海寺。極蘆灣盡處而止。蕭寥無人。談飲閒作。亦一時之樂也。懸燈歸櫂。吟興各不能已。相約賦念奴嬌。鬲指聲一闋。而屬予序之。

客游未嬾。記名園水鑰。誰與重叩。淡寫霜痕。愛到處。吹盡尋常歌酒。斷激通烟。疏籬借暖。尙挂微黃柳。移船遙去。照人都爲詩瘦。何地更著功名。天教老子。付垂綸閒手。細數闌干。問往事。春共橫波爭秀。亂影風燈。催歸晚笛。眷此情依舊。城頭生月。作

成鄉思時候。

風入松 憶茶

陸家休更說遺經。負了雨前盟。當時風月花瓷畔。餘甘漱。幾許看承。戲語從佗。歐九
困人不止春醒。爲茶作病病皆清。關鬪有凝冰。而今卻費閒薑桂。開芳焙。可是忘
情。一瓊微聞蘭氣。半簾時夢松聲。

角招

予與趙谷林長安別三年矣。戊午初冬。谷林自北歸。相見于邗城。塵衣風帽。
同話舊游。悽然根觸予懷也。家山漸近。又復薄遽分手。予歸杭。當在冬杪。谷
林家西池梅花下。談讌之樂。計日可待。因用白石老仙自度曲所云黃鍾清
角調者。製一闕寄之。

話離索。相逢又是。江天雁影寥廓。近來偏憶著。並馬去程。茅店山郭。情懷最惡。向舊
日。淮南樓託。看盡人閒迎送。似官道柳垂垂。任西風梳掠。休莫。琴移別調。塵銷古

怨此意真如瘡。夢歸烟漠漠。題扇書裙。三年前約。吳船乍泊。早問取、疏梅池閣。爲怕
寒香瘦削。想翻笑、我歸遲。延春酌。

步月 己未歲吳山燈市甚盛用史梅溪韻

瞰月峯高。看街簾遠。物華取次如歸。夜深寒淺。春在六銖衣。望來處、紗籠萬點。見背
後、釵燕雙飛。疏梅下、星移漢轉。勝似拜安妃。塵霏。行不斷。踏歌伴、輭舞隨地成圍。
天教晴穩。樂事往年稀。念游侶、餘醒尙在。問殢人、香夢誰知。匆匆裏、餽簫又曉透羅
幃。

梅子黃時雨 梅雨

枯坐幽窗。賺輕夢、破時驚響。荷扇正濃綠。牆頭金丸堪薦。想到一犁江上。暝愁將入
吳雲遠。淙淙徧。吹笛夜船。燈影遙顛。深院殘寒猶戀。漫妨他、燕乳簾暗慵卷。奈掃
壁看題。蝸偷銀篆。依約紅綃香潤句。襪羅應、佇沿階薜。風微便。樓前鏡波深淺。

摸魚兒 和葑田病耳

甚年時。楚江寒早。病懷偏惱。孤旅悠然。自喚空閒字。瘦影幾番回顧。難寐處。也省聽、敲窗暗葉穿階雨。殘更漫數。總付與醒眸。青燈素被。渾未減愁緒。人間世。幾個知音伴侶。幽蘭淥水休譜。祇應不了。枯禪味。閒性卷荷猶貯。凝思苦。問隔屋。釵聲。可是忘情句。因君小住。向無想山中。飛塵浣斷。相約枕流去。

瑣窗寒

初夏同葑田松泉過深柳草堂

戶小關雲。城高縹碧。嫩陰搖瓦。何年種柳。正憶漢南游冶。想依依、香綿褪時。繡鴛不到。閒庭榭。付餘花倦。螻橋痕簾影。伴人情話。疏野連漁汊。聽笛弄滄浪。悄然歌罷。離蹤似寄。頓冷故溪吟社。笑輸他、桃根渡頭。載來翠峯偏淡寫。看籬根、艇子縈回。任取浮萍惹。

天香 薛鏡

藍浪浮花。青銅淬彩。空明大好無翳。樣巧裁菱。面平揩粉。不數尙方新製。吳船載取。縈繡帶。疑迴鸞翅。低挂蘇潭。片月如描。弁峯晴翠。華年誤人似此。杜郎看、鬢絲難

避。幾對淺渦梨暈。笑臨秋水。勛業平生付與。最愛是、長宜舊銘字。聽罷懷中、窺餘睡起。

水龍吟 漳蘭

海帆吹送瓊姿。一番又拆秋前信。雲衣嫋嫋。冰心的的。高情占盡。著意扶持。青瓷架小。素甌茶嫩。向風亭水檻。炎光不到。塞香夢。今纔準。可惜幽芳易近。有誰知。楚天閒恨。逢迎只許。靈均水佩。湘娥烟鬢。驛荔程遙。蠻花種杏。不堪重問。試山空露下。琴獨按寫。深林韻。

摸魚兒 芡

趁平湖采芳艇小。荷盤初沸。烟雨釵莖靜。照涼波影。不比脆絲纏露。花點注。看傾盡斜陽。幽意憑誰訴。西洲倩女。訝碧臆纒翻。青吭漸滿。脈脈水天曙。明珠剖。誰道暗投無誤。鮫人何事相妒。攜來菱市瓜。膝畔猶著宮黃深護。論斗煮。算風味親嘗。只有涪翁語。輕圓薦俎。早縈繫心期。春蔥膩雪。巧夕翦燈處。

齊天樂 絡緯

夕陽纔作微涼意。幽窗便聞秋紡。怨緒回風。情絲曳雨。交戛依然搖颺。離悰記往。在楓葉橫塘。豆花深巷。翠股斜敲。蕭蕭又送去年響。何人聽時較早。舊帶銀燭背。寒素無恙。染黛形輕。翻車韻急。偏隔秦樓朱幌。餘絢漫想。怕短髮難搔。助愁千丈。夜色柴門。幾聲天更爽。

桂枝香 銀魚

平橋永晝。慣柔浪寸鱗。來問春後。長是船橫鴨背。派流鶯脰。高人不見元真子。但烟波。到今依舊。葦汀花岸。千絲作網。笑伊還漏。更比似。針鋒細瘦。好分付。吳娘。掩樓烹就。翠釜片芽。菽乳入甌。芳溜。鷗鄉占取。閒滋味。任年年。阻風中酒。幾分纖軟。堪人斷腸。憶鱸能否。

木蘭花慢 賦木犀香數珠

訝熏爐未燼。分秋字。染鉛丹。正露重銅盤。風搖鈿粟。暗和沈檀。珊瑚。佩環零亂。擣花

房聲共曉鐘閑。一串胸垂圓相。雙心臂纏清寒。窗闌待洗塵煩。斜挂處。藕絲單。認現住冰輪。前身香國。不算緣慳。更番秋期細數。勝纖痕。留印在雕闌。宛轉仍酬密願。氤氳難解連環。

慶宮春 冬夜泊舟鴛湖有憶

倦柳驚鴉。澄湖低月。墜霜初度。篷罽搖落。心情交加。魂夢水天離。思難寫。賦箋詞筆。憶相見。秋娘淡雅。淒涼只在。學繡村邊。曉鐘敲罷。可能負卻西風。兩槳來時。暮雲凝乍。啼紅唾碧。衫痕猶澆。尙記那回簾下。怨人輕別。是纔識。香囊分麝。孤鴻遙去。說與教知。酒醒今夜。

換巢鸞鳳 張東園送洋雞一雙賦此報之

一訊槎風。有雙棲錦羽。攜取筠籠。菴時春嶼裏。啼處曉波東。洪桃花下。幾回逢。乍呼小名。朱朱未通。瑤窗遠。想誤卻。凡人同夢。珍重。誰乞種。持比汝南。噤痒神偏聳。幘染蠻砂。昆梢蜃雨。特地移窠分送。我已無心。舞秋宵。負雛看啄。苔階縫。憑丹青。喚梅

家寫伊飛動。

清平樂 元夕悼亡姬

春衫淚浣。誰問春寒淺。依舊去年正月半。錦瑟華年未滿。重來徑曲苔荒。一屏梅影淒涼。疑在小樓前後。不知何處迷藏。

沁園春 聲

隔院飛來。巧囀如簧。初聞可憐。正金經學誦。生成柔輒。珠歌教唱。分外清圓。花下冷泠。簾中嚶嚶。小玉頻呼密意傳。吟郎句。慣臨流對月。韻更悠然。道將雙字聯翩。比相見春風一笑。嬌記。讀桃幽思。呪餘茸舌。折楊離恨。噎在香咽。細語歡濃。嬌啼夢淺。時送吹蘭到耳邊。關情甚。聽鶯雛燕乳。仍是笄年。

又 影

賦就閒情。願逐娉婷。朝朝整隨。恰花陰行過。費他迴顧。柳絲遮住。暫爾相離。悄照春波。偷窺曉鏡。只道無雙更有伊。研丹粉。愛自描活脫。小樣崔徽。何妨坐起輕攜。怪

幾度拋人欲睡時。又低鬟月底。問來不語。凝眸燈下。抱處如癡。蹴踘幽坊。秋千舊徑。看未分明。捉搦遲。重逢後。羨香肩斜倚。共映屏幃。

水龍吟 題吳東壁大洋汎月圖

憑誰畫就滄溟影。連南極搖空碧。茫茫何在。雲帆吹送。高秋今夕。蛇種城遙。鯤人國杳。水天無迹。正銀濤上湧。冰丸倒射。應笑岸臨風幘。爲問乘槎此客。挹長庚。幾經淪譎。一官寄耳。乾坤奇處。肯教輕擲。身到清虛。胸吞雲夢。舊聞嫌窄。看蠻童起舞。澄輝零亂。瀉蓮花白。

清平樂 春游士女圖

膠鬢新拭。正是停針日。小扇撲餘無氣力。風裏楊花吹急。銷凝石畔兜鞋。不如偃蹇蒼苔。欲就濃香一夢。翩翩胡蝶飛來。

臺城路 題周雪舫運判萬夫人八分遺墨

使君高會詞人處。霜風正凋疏柳。白雪徵歌。青猿授簡。不惜連車沽酒。高情感舊。展

翠閣遺函。玉臺嘉偶。錯落蛟龍。光和體格最清瘦。人閒謫來未久。悵芝田路。杳鸞
馭難又。伏氏經傳。吳家韻寫。空絕才華前後。紅絲小籀。合長供鈴齋。異香薰透。夢井
淒涼。一編時在手。

行香子 憶焦山舊游

落托華顛。棲泊頻年。展心胸、都付山川。名區壯觀。勝友奇緣。約弔坡公。訪綸老。謁焦
仙。鼉吼更傳。龍抱寒眠。記霜崖、佛閣燈懸。詩囊點檢。莫怪蕭然。但貯江風。貯江月。
貯江烟。

沁園春 腕

十二樓高。隱約輕雲。全遮玉容。正簾衣半卷。斜支雪藕。香羅一握。乍斂春蔥。膚薄微
攢。節圓漸露。獨倚霞顚。想像中。涼侵處。有退紅衫袖。淺護西風。欠伸在畫屏東。見
背後凝酥兩欲融。更朱繩力怯。秋千齊挽。綵絲痕緊。端午深籠。對脈慵擡。傷心小盃。
笑學簪花運未工。新來瘦。問那人知不。跳脫旋鬆。

聲聲慢 題停琴士女圖

簾垂有影。院靜無聲。誰家待月闌干。兩點深顰。分付次第眉山。薄妝乍悅。便低鬟更自幽妍。心事遠。看轉將瑤軫。尙怯春寒。只有梅花知得。愛香生絃外。韻在絲前。小立徘徊。肯教流響空烟。人閒尙留粉本。不愁他。輕誤華年。凝望處。想參橫。依約未眠。

臺城路

當湖喜晤張今涪別去以詞見寄依韻奉酬

柘西尙有詞人在。梅邊愛聽吳語。明鏡慵窺。青山欠買。贏得吟情如縷。高陽伴侶。約小醉圍爐。孟婆能阻。斜日歸鴉。一羣寒影向村塢。殘年猶是近旅。津亭仍解纜。離恨難譜。橫泖蓴鱸。東湖烟水。輸與漁兒漁女。心期暗許。在第六橋頭。酒旗茶鼓。一片春光。快教胸臆吐。

又 留宿張龍威藝舫同話丁卯舊遊有感用前韻

重來君有攙先卜。燈唇昨宵如語。問訊東湖。年時柳色。猶賸烟中殘縷。英游俊侶。歎范蠡船遙。黃公壚阻。一曲南莊。更無人過白雲塢。乾坤總成逆旅。化兒多戲劇。顛

倒誰譜。風掩閒門。冰斲老硯。絕代空吟貧女。淹留未許。早歲晚天寒。又催津鼓。別夢依依。小樓窗日吐。

沁園春

己巳除夕偶讀楊南峯循吉詩云買餽迎竈帝酌水祀牀公吳蓋同

杭俗也予老嫻無事所須者飽食安眠而已因賦沁園春二闋以當樂神之

詞

天上歸來。司命醉餘。家人合迎。訝蒙莊書幻。神原號髻。諾皋志怪。童亦名劔。難覓黃羊。祇掛綠螳。小市簫聲喚買餽。寒宵盡。早踞觚語好。黔突春生。瓣香脈脈通靈。訴口腹尋常累不輕。歎火需朋舉。常如僧飯。釜非嫂轆。那羨侯鯖。避煬何人。先炊有典。一飽無求掩竹局。吾儕事。向山空歲晚。稍理遺經。

安穩閒房。仗爾平生。寢興載司。記窗橫窺月。情柔似水。屏遮聽雨。鬢改成絲。金盞低顏。玉存暖老。漸近橫陳嚼蠟時。吾衰矣。但摸稜不管。跌坐偏宜。一杯酌爾休辭。想此夕殷勤也合知。笑放懷物外。年年夢。求官何處。日日搢龜。早起雖慵。春來更健。

睡法希夷好護持。寧須羨設沈香八尺花。下頻移。

疏影 小玲瓏山館賦絮影

飛絲近遠。又綠陰弄日。吹過隋苑。比雪還輕。度水無痕。東風下上低捲。成團作隊。冥
濛甚。真共幻。總迷心眼。倚繡簾。誤卻吹時。明滅箇人庭院。尚憶張郎好句。正朦朧
淡月。墜處初暖。漫綴征衣。點鬢休驚。欲捉兒童仍嬾。悠颺夢入離亭路。寫不盡。楚江
春晚。笑雨餘。一種霑泥。付與老禪爲伴。

一翦梅 立夏後一日同人集晚清軒補作送春之會

吟鬢蕭疏客夢輕。春盡忘情。春去關情。問春去了幾何程。鳩作雙聲。燕作雙聲。櫻
筍盤筵理舊盟。芳夜心爭。涼夜心爭。綠陰便是短長亭。歌趨春行。酒駐春行。

摸魚兒 透風透月兩明軒賦新荷

掃千紅。已隨流去。綠雲南浦偷換。錢錢點點田田樣。浮動鏡心纔滿。青蓋輦。想早畏
朱曦。爲覆雙鴛伴。全舒尙卷。似龍女淺絨。鮫人帕束。含憶又含怨。西湖好。何處羅

翫玉腕。采香休道來晚。粉紅未逐薰風嫁。扇底且藏嬌面。珠倒濺。聽驟雨聲聲譜入歌喉。嘖吟騷意。嬾任細裊冰絲。低搖翠柄。衣小那堪翦。

柳梢青 效許圭塘體

鬢點吳鹽。十年來去。苧翦征衫。千里鶯花。幾重烟水。一片雲帆。鄉園試話情忺。有黛染明湖鏡匳。佛土茶香。漁村蓴滑。好箇江南。


佳處會探。量泉惠麓。踏蘚靈巖。多少吳娃。明妝倚舫。玉面乘籃。秧田竹屋蘆簾。指歸路。垂虹舊諳。瑟瑟波搖。彎彎月唱。好箇江南。

臘尾春緘。楓霞徧縱。梅雪相兼。新綠初成。輭紅不到。水國無炎。女湖兒店程添。記茗甞。秋風挂帆。洲渚神仙。樓臺烟雨。好箇江南。

湖傲山酣。綠蕤白雨。紫筍黃柑。蠶戶新封。鷗鄉近署。當了頭銜。興來浪跡猶堪。訪酒社。詩朋快談。焦洞潮聲。攝山月色。好箇江南。

齊天樂 庚午夏五將歸湖上留別韓江吟社諸公

平生慣向蕪城客。吳絲暗斑雙鬢。雪嶺才高。青樓句好。那比前人疏俊。吟朋勝引。愛款竹尋題。占花分韻。忽覺歸心。一燈搖夢野鷗近。湖山此時舊隱。玉壺涼萬斛。紅膩蓮暈。江雨鳴篷。林風解纜。離緒滿於潮信。流連未盡。謝送我多情。熟梅芳醞。彈指秋清。重逢期定準。



銅

絢

詞

運彙



蔣士銓（雍正三——乾隆四九）

字心餘。一字茗生。號清容。江西鉛山人。乾隆丁丑進士。授編修。乞假養母。歷主蕺山崇文安定三書院。母服除入都。以御史用。旋患風痹。還南昌。詩古文詞負海內重名。著有忠雅堂集藏園九種曲。

銅絃詞

鉛山蔣士銓定甫

滿江紅 渡黃河

混混黃流。秋九月、狂瀾初落。背夕照、揚舲東去。扁舟如雀。千尺射波浮日彩。一溝洪水圍天脚。破烟雲、兩朵北邙山。青如昨。艣聲軋。潛蛟愕。帆影側。游鱗躍。笑當年割據。今朝城郭。數折源通星宿遠。一層冰繞崑崙弱。把英雄、事業問前朝。消河洛。

念奴嬌 泊黃州二十初度

落帆江口。是太行歸客、懸弧之日。逝水年華驚廿載。兩字功名難必。白眼談詩。黃衫說劍。已是飄零極。人生加冠。一身如此堪惜。且向橋上觀瀾。磯頭舳舻。蠟我登臨屐。拂拭泥金題畫扇。點染江山陳跡。斗麪誰炊。瓣香自翦。酌酒坡公席。黃花落矣。莫辭盡醉今夕。

滿江紅 赤壁

鑿翠流丹使全楚。山川襟帶。是一片神工鬼斧。劈開靈界。磯下白龜橫斷岸。樓中黃鶴飛天外。賸文章。雙照大江流。垂金甌。一斗酒。猶堪載。三分事。聊堪話。甚英雄。豎子。條焉成敗。歌舞二喬誰得有。舳艫千里。今安在。便江風。山月尙如前。都無奈。

醉江月 望廬山

推篷一笑喜十年。重見廬山面目。問訊匡君無恙否。五老須眉如夙。日照香鑪。雲生鶴觀。雪挂康王谷。銀河倒卷。青天亂灑飛瀑。我欲左拍徐凝。右攜李渤。共跨先生鹿。小載玉淵潭上酒。料理百錢青竹。松下吟詩。雲中倚劍。坐看黃冠局。掉頭一問。山靈可有緣不。

夢中曾到向東林。結社西林拄笏。大石橋邊呼慧遠。不畏虎聲騰谷。鹿洞芝肥。麝囊花紫。醉倚芙蓉簇。白雲留我。蓮花峯下同宿。醒後遊迹俱非。衣鶉馬狗。仍逐窮途哭。十載天涯。幾兩屐。踏遍太行千曲。投筆歸來。布帆無恙。穩泛潯江綠。青山相對。形容偃蹇如僕。

百字令 蔡文姬壁阮圖

畫中人面坐胡牀。摘阮雙雛侍側。貂帽蠻靴垂辮髮。絕代春風顏色。旃帳魂孤。兜離語異。獵騎如雲黑。闕氏年少。此時應也頭白。當日一樣還朝。羌兒淚灑。不若蘇通國。留取餘生埋衛冢。蓬首翻求國賊。虎士如林。龍驤滿廐。都尉何恩德。那堪再誤。胡笳不用多拍。

賜書能記論才華。豈媿中郎之女。不放龍門成謗史。留得班昭何取。一種傷心。幾番隱恨。詩在誰憐汝。桃花廟側。試拉息嬌同語。可惜今古佳人。泰山一死。天不尋常許。我過明妃青冢畔。著帽黃沙如雨。霜壓盤鷗。風吹病馬。出塞悲行旅。虧他銀甲。邊聲細細彈與。

賀新涼 藕塘銷夏圖

不記來時路。認分明。風亭月榭。此中堪住。擎出龍官珠一串。幾點露盤涼雨。秋到了。兩行疏樹。一桁簾波湘水碧。約新涼。小伴知何處。無一點。人間暑。紅妝翠袖真容。

與好園林。清虛樓閣。臥游應許。只有清風生畫壁。莫使客餐寒具。高唱也。名花解語。明月欲來香在水。聽新蟬。送下斜暉去。試共把荷錢數。

水龍吟 題戈二齋壁

相逢同飲亡何酒。酣清淚。飄如霰。茂陵詞客。秦川公子。惟君其彥。臺上呼鷹。河東飲馬。隴頭磨劍。數年少。豪游。唯吾與汝。記得潼關四扇。舊恨新愁。難遣。誤才人。烏闌黃絹。一寒至此。婦人醇酒。斯言誠善。僕本恨人。君真佳士。奈何貧賤。莫辭痛飲。人心不似。大都如面。

念奴嬌 前題

官街斜日向城南。訪汝毳花堂裏。紫鳳天吳。團繡襖。親見小茶簾底。問我誰何。楊梅孔雀。戲答前言耳。柴關晝掩。文簫四壁如此。那須寫韻吳娘。鍼神綵線。臙馥黏圖史。潑悶漫勞沽酒伴。爛嚼殘絨而已。眉嫵風流。一般疏嬾。貧病何年始。人生失意。琅邪當爲情死。

賀新涼 自題一片石傳奇

蝶是莊生化。絕冠纓。仰天而笑。閒愁休挂。大抵人生行樂耳。檀板何妨輕打。窮與達。漫漫長夜。獸女癡兒歡笑煞。歎何哉。已老秋娘嫁。須富貴。何時也。十年騎瘦連錢馬。經幾多。浮雲變態。悲歌嫚罵。南郭東方游戲慣。粉墨誰真誰假。弔華屋。荒邱聊且。不見古人何足恨。只文詞。伎倆斯其下。我本是。傷心者。

念奴嬌 李鳳山忘機圖小影

波平如許。記不起。涼月空江何處。抱膝船唇。天澹漁。不見一枝柔艣。半臂生寒。好秋難臥。孤坐和誰語。宦情如水。此時忘卻今古。幾人明鏡當頭。肯來消受者。雁沙鷗嶼。恰憶歸舟酒醒。對蟬鬢。添衣吟苦。予戊辰下第有歸舟酒醒圖點點江山十年脚底。燕趙秦吳楚。滿船涼月。問君載向何所。

鎖窗寒 雪朝遲孫翰庭徐蓋山朱震江小飲

滴粉搓酥。柳棉飛處。亂縈簾影。檐瓦層皴。似較昨宵寒緊。想先生。夢嘯蘇門。放衙猶

擁黃紬寢。歎丞真負汝。十八年來。一官酸冷。袞袞讓多少。都尉通侯。浪登臺省。悲歌何益。萬事不如狂飲。爲羣公。掃逕敲冰。滿爐拙。煎濃茗。望詩人。乘輿而來。莫使求羊等。

萬年歡 前題

十笏荒齋。有淮南鞞鼓。謝家絲竹。煨芋醃蕪。差勝朱門梁肉。隨意持螯行炙。聽攪耳。箏琶繁促。不須管。蠟淚如山。雪花堆過茅屋。誰稱兔置馬牧。縱諸君有恨。未多於僕。鳳泊鸞飄。那似浮屠三宿。萬事不過如是。屐幾兩。江山滿目。行樂耳。美酒羊羔。何須笑彼麤俗。

解連環 麻姑圖

乍離蓬島。約風裳幾褶。羽衣縹緲。負筠籃。半鞦香肩。縱力不勝嬌。肯拋瑤草。塞外歸來。又一度。滄桑枯槁。綰臙支小髻。瓣髮新盤。內妝偏好。破費工夫多少。看明金錯繡。一天風調。算不比。畫裏真真。倚三尺生綃。許人低叫。我憶餘杭。問花釀。幾人沾了。

拚忍受王遠仙鞭一親長爪。

滿宮花 言愁

態嬌癡人獨自。長帶一分愁意。尋思着甚比量愁。沒個和愁相似。不解愁從何處至。覺道眼前都是。同行同坐總難銷。只好與愁同睡。

蝶戀花 前題

雨雨風風愁不止。月下鐙前。愁又從新起。天許有情人不死。不應更遣愁如此。暫時撇去仍來矣。纔遠天涯。又到人心裏。我愛人愁愁愛你。一人一個愁相倚。

賀新涼 南昌判官程士七北涯浮香精舍小飲酒闌口占雜紀

瀟灑房櫺底。展文茵、紅氍一片。秋光如水。殘月曉風多少恨。我輩鍾情而已。問低唱、淺斟何似。忍把浮名輕換了。鈍詞鋒、不過吳蒙耳。敢浪犯將軍壘。北涯方校子新詞院本。官齋十笏堆圖史。拓軒窗、招人來坐。米家船裏。錦袋緋魚腰手版。別駕風流如此。歎海內、幾人知己。虛擲年華無寸益。戴儒冠、不合稱才子。擊碎也、烏皮几。

名宦何堪數。讓先生、風裙月扇。歌兒舞女。達者爲官遊戲耳。續了袁家新譜。北涯有後西樓填詞。誰唱得、屯田樂府。非我佳人應莫解。向花閒、自點檀匡鼓。奏絕調。可千古。秋宵想見文心苦。列名姬、共持椽燭。箏瑟兩部。忍凍揮豪辭半臂。明月西樓纔午。儘一串、珠喉吞吐。越霰吳霜。篷背飽。奈年來、王事都靡盬。藉竿木、尙能舞。

帳冷香銷夜。斷腸吟、生平一事。最傷心者。記得琉璃爲硯匣。新詠玉臺頻借。春去矣、小樓花謝。誦偈朝雲會現影。怨東風、兩次吹蘭麝。看燕燕、香泥惹。北涯姬人趙蘭微。龍詩亡後廿餘日。八月十三夜。夫人將產北涯時。共友人露坐庭所。見姬魂冉冉外來。入夫人臥內。遂生于七日。而殤姬復見夢曰。本非樂生者。聊歸視家人耳。判官自判氤氳且。白尙書、歌填長恨。再生緣也。北涯爲姬作再生緣樂府。世味從來皆嚼蠟。情緒偏同啖蔗。夢斷了、浮香精舍。君語如斯吾怕聽。便英雄、淚也如鉛瀉。兒女恨。那堪寫。

燭炮銅盤矣。挂絺衣、幾枝蘿薜。晚風吹起。猿笛雁箏聲拉雜。一帶天河斜指。論甲子、

大夫強仕不信東方編貝穩。笑昌黎早落期期齒。北涯年未五十齒脫幾年。渾未免聊復耳。飢驅我亦愁無底。揖諸侯人呼上客。自稱狂士。十載黃齏酸到骨。嚼出宮商角徵。豈年少甘爲蕩子。大噉仰天天也悶。肯登堂浪進先生履。淪落感竟如此。

喜遷鶯

題烏程沈蓴崖小照圖爲北涯姬人金氏筆

聽松餐菊似瘦鶴。秋山絕無塵俗。鬢點吳霜。酒澆越劍。堆粲閒愁千斛。誰是狂夫牛。儉君或先生馬牧。絳蠟底。把行蹤略語。牢騷如僕。橫幅寫面貌。京兆眉。匳衣染春山綠。彤管親摹。置伊邱壑。不畫淩烟也足。何取弓刀。褒鄂較可丹青顧陸。傳神手。勝衛夫人字。管夫人竹。

賀新涼

鄱陽徐公覆負才名。工爲南北曲詞。任俠好客家。遂落年五十日貧。

困偕孺人畫秋香圖。雙照自娛。屬予題幀首。

草閣憑消受。護茅檐。蒼松落翠。高梧環牖。城北徐公美無度。才在盧前王後。拋心力。豪蘇膩柳。把卷六州難鑄錯。哭秋風。負汝拋詞手。空唱破。旗亭口。神仙將相原難。

就笑人閒。勛名富貴。男兒自有。收拾牢騷行樂耳。坐爾秋香半畝。偕老者。梁鴻佳婦。莫唱小山招隱曲。願兒孫。森列當階秀。君更愛。蟾宮否。

老屋三閒下。看眼中。頭顱如許。君其健者。何不彎弓馳獵騎。飛雁翻身仰射。知未了。男婚女嫁。鄭婢蕭奴齊侍側。奉夫人。小摘香盈把。饒此樂。自當畫。史公奔走真牛馬。且旁觀。爛羊牽犬。人奴笞罵。我欲岑牟披單袂。揜袖鼉皮親打。否則種。梅花繞舍。酌酒唱君新樂府。賺細君。割肉明年也。英雄淚。如鉛瀉。

玲瓏四犯 程十七判官有侍兒能吹橫竹者書箏贈之

細雨黃昏。聽翡翠屏邊。笛聲初起。鬢影依稀。坐背紅燈烏几。丁星竹籟。蛩音都迸入。一行纖指。韻鳴鳴。絲兒氣力。吹得秋聲如此。尊前只合分明見。認窈窕。樊川婢子。料得前生爲弄玉。或是雙成姊。醉把紅牙親拍。應笑我。微雲學士。問娉婷騎鳳。何時直得。配他蕭史。

念奴嬌 前題

中年絲竹列金釵。十二司空見慣。滴粉搓酥。蘭氣暖。月照一層烟幔。元九堂前。岐王宅裏。小夢年華換。分司御史。座閒偏解腸斷。吾人富貴何時。讀書好色。事事堪長歎。淚漬青衫塵染鬢。鏡裏朱顏愁看。飢便吹簾。悲來擊缶。累汝櫻桃粲。狂歌無奈。清商爲我低按。

水調歌頭 鄱陽徐衡友小照

名宦幾人了。揮手弄潺湲。百道跳珠噴雪。聲在翠筠閒。試問曳裾趨走。何似科頭箕踞。落得半生閒。作達古來少。爭笑老夫頑。官似夢。髯如戟。鬢先斑。不記吹臺梁苑。屋後有青山。拋去朝衫手版。攜取隱囊冰簟。常侍熱全刪。古調勿復操。羣響滿前灣。

長亭怨慢 箇儂

畫檐上。蟾鉤皎潔。也似揚州。二分明月。玉臂清輝。卷簾同坐。半窗雪。憑肩私語。無那箇儂癡絕。問河畔。雙星可眞箇。年年歡喜離別。笑多情誤我。耐盡燈花磨折。循牆對影。算名士。傾城相悅。縱然教。四角生輪。銷不去。天涯雙轍。且看你。晚風吹鬢。閒愁

休說。

水調歌頭 沈維涓太守席上感事

對酒不能飲。看鬢欲成絲。眼中咄咄怪事，誰可合時宜。幾許弓蛇惹草，片白衣蒼狗，大概盡如斯。耳熱勿擊筑，劫急且圍棋。牧豬奴，屠狗僧，販繪兒。鯨徒伎倆止此，恩怨鳥嘻嘻。兔狡竟遭人畢，蠶巧那堪目縛，斷送老頭皮。奮袂爲公舞，爛醉莫須辭。

又 爲南昌尹顧瓚園悼亡姬姚氏姚爲舊家子幼歷患難瀕死而生者三性

烈而俠言行皆可傳予爲譜空谷香傳奇弔之

佳人難再得。逝者歎如斯。風外曉星明滅，愁絕在東時。落葉半窗如夢，綃帳一層如霧。只有斷魂知。曉妝憐小女，學母畫雙眉。心中事，眼中淚，畫中姿。哭煞梁鴻夫婦，白了鬢邊絲。一樣寒梅官閣，幾隊花鈿蟬鬢，頓少一人隨。雛鳳不能語，索乳指靈帷。

華胥引 前題

萬千愁緒。廿九年華。桃花命短。取印提戈，不及看兒碎盤暖。一縷藥竈殘烟，似箇儂

腸斷姊妹花繁。人閒天上相伴。玉杵無情。殉蕭娘。但餘金甃。妝臺塵漬。仙郎書記誰管。眼見碧落黃泉。返魂香散。淚落君前。一聲淒絕。河滿。

臺城路 前題

當年曾棹沙棠楫。桃葉春江。攜渡廿四橋邊。青篷紅豆。作弄揚州樂府。朝朝暮暮。爭禁得。今年者番酸楚。荀令神傷。牽衣忍看小兒女。青天靈藥誰誤。賸呢喃雙燕。夫人親哺。草佩宜男。花簪蠲忿。不歎秋娘金縷。朱顏黃土。向月暗。鐙昏。可會低訴。他日錢唐。傍朝雲小墓。

滿江紅 送程十七判官入都

短後之衣。學新婦。車中閉置。閒管領。魚龍角觝。莫非王事。鐙市畫廊圍綺閣。天街仙樂飄檐翠。有迦陵。小部奏鈞天。霓裳隊。豪俠客。誰能似。詞賦手。難爲繼。況兼人才調。聰明絕世。天下英雄君與操。夢中蝴蝶官如戲。歲星耶。流落又人閒。神仙吏。馬鐸郎當。南浦上。雁聲淒絕。誰與唱。窮秋一路。曉風殘月。畫壁重尋釵脚字。黃河怒。

卷龍門雪。憶官齋。吹徹玉笙寒。新婚別。北涯方納。嫗故戲之。英雄概。剛腸熱。兒女態。柔腸折。負綢繆小印。臂痕親。翳取瑟而歌。公莫舞。以儒爲戲。吾真拙。把離愁。拋擲與江山。都休說。

百字令 題畫

碧沼紅闌。似西園雅集。玉山偕隱。拂面涼陰。垂地綠微。漏幾條天影。萬卷奇書。一枝翠蓋。贏得荷筒飲。衣冠灑落。人閒殘暑消盡。試問高柳誰栽。樹猶如此。多少琅邪恨。河朔風流。今已矣。畫裏須眉無準。月榭飛觴。露臺角伎。醉擁紅妝。寢酒闌人散。不知留得何景。

紗巾挂壁。向南窗高臥。那知寒暑。夢與古人相伯仲。嘲戲何妨爾汝。說鬼談天。讀書論劍。我意都無取。捫圖大噓。此中誰箇堪語。不妨落佩欵冠。解飲醇醪。亦足稱豪舉。觸熱可憐牛馬。儉爭買名園花墅。巢燕纔飛。秋風又起。那得閒居處。人生行樂。古今大抵如許。

賀新涼 天津舟次與山陰平瑤海夜話感懷卽書其閉關詩後

蠟淚銷殘炬。卷秋篷、兩舟離合。羅浮風雨。曉角霜天吹冷月。高唱大江東去。老蕩子、惟吾與汝。鳳泊鸞飄多少恨。訴窮愁、吟到傷心處。詩一卷、奈何許。重趸又曳公車履。歎年年、成河客淚。經天東注。君是秦嘉秋夢遠。記得喁喁私語。瑤海內子能詩。扇上送行小令音節清絕漫分別。英雄兒女。閱世纔知同調少。對佳人也算神仙侶。誰忍聽、搗衣杵。

莫管青衫溼。念家山、茫茫對此。百端交集。礧塊填胸澆不盡。笑向青天長揖。夢中蟻、日中駒隙。何者人生爲不朽。但歧途、如此真堪泣。腸斷也、一聲笛。添衣坐待天河直。倚危檣、帽檐欹側。寒星歷歷。小聚他時亦增感。幾點雪泥鴻迹。君自整、排風毛翼。我有慈親離不得。出門心、已作歸飛鷁。憶今夕、是何夕。

齊天樂 壬申下禮部第出京宿良鄉

來時盡說長安樂。出門西向而笑。半入雲霄。半飄塵海。半在秋原殘照。欹斜烏帽。對

冷月啼蛄。影形相弔。此味辛酸。古人先我已嘗到。風雲何限屠釣。歎行年廿八。已非英妙。數折桑乾。一條虹彩。車騎喧喧爭鬧。不如歸好。共烏鵲南飛。聽他低叫。飽喫黃梁。擁衾眠一覺。

金縷曲 春夜曲阜使院讀鄭荔鄉太守青衫詞書卷尾

一夜清明雨。翦鐙煤、顰而坐者。蕭然愁旅。唱徧青衫詞一卷。太守清豪如許。想少日、淹留情緒。百感孤蹤都似僕。對江山、肯作尋常語。拔長劍、向天舞。白頭詞客今誰侶。擁朱輪、頽然老矣。日趨公府。塵世光陰飛鳥過。哀樂中年何取。身後譽、幾人堪數。對此茫茫百端集。聽黃雞、白日成今古。旗亭酒、那須賭。

賀新涼 廿八歲初度日感懷時客青州

仰屋和誰語。計年華、人生不過數十寒暑。轉憶四齡初識字。指點真勞慈母。授經傳、伊唔辛苦。母意孳孳兒欲臥。翦寒鐙、掩泣心酸楚。教聽麗譙鼓。十齡騎馬隨吾父。歷中原、東西南北。乾坤如許。天下河山看大半。弱冠幡然歸去。風折我、中庭椿樹。

血漬麻衣初脫了。舊青衫，又染京華土。敗翎折墮齊魯。
愁似形隨影。苦飄零，身如槁木。心如廢井。塵海迷漫無處著。常作風前斷梗。觸往事，
幾番追省。十載中鉤吞不下。趁波濤，忍住喉閒鯁。嘔不出，漸成癭。眼前一片饑黏
境。黑甜中，癡人戀夢。達人求醒。閱盡因緣皆幻泡。纔覺有身非幸。况哀樂，勞生分領。
歷亂游蜂鑽故紙。溺腥羶，醉飽憐公等。草頭露，但俄頃。

虞美人

謝蒼崖松下問雲圖

人生只在浮雲裏。過眼皆彈指。喬松偃蹇臥蒼龍。閱盡浮雲、老樹與山翁。也知此
意無人會。問也無人對。不如放眼向青天。立盡松陰，我與我周旋。

念奴嬌 曹州尋芳紀游

芳郊如掌。逐香風，穿過縱橫林薄。幾處花畦春爛漫。豔錦紅氍爭拓。地列雲霞，客俱
蜂蟻，不減秦宮活。餘脂賸馥，憑他燕子偷掠。可惜香霧沾衣，濃陰拂面，好處無亭
閣。詰曲深廊交古翠。那借松毛編縛。佳日來稀，東鄰見慣，歲歲開還落。何郎舊識，漫

題凡鳥相諠。何氏園

閒閒十畝。看花如菘韭。更如鶯燕。夕露朝霞。供採摘。買斷綠愁紅怨。老樹維駒。殘葩
炙肉。雜沓笙歌宴。芳叢鶴蓋。一年幾度相見。獨有偃地虬松。孤檜傲骨。橫臥如人
倦。剔蘚捫苔。無醉墨。我向壁閒尋徧。譜繼揚州。種分京雒。也算河陽縣。城中萬戶。豈
無高士庭院。官園

離奇夭矯。借怪樹爲門。天然圭竇。中有喬松。前代物。閱歷幾何人壽。碧蓋盤空。枯筋
穴地。白雨蒼皮溜。樹猶如此。主人門第應舊。怎奈屋少樓臺。地無邱壑。拳石差堪
漱。么鳥爭含紅雨墜。萬點朱櫻如豆。露井尋詩。平臺啜茗。香染荷家袖。斜陽歸去。鬱
然回首深秀。郭氏園

金縷曲 吳門張秀才傳詩年少有雋才游濟南受知於金檜門先生明日以

四雨莊吟卷質之先生予誦而愛之題二詞於後

十幅澄江練。鳥香絲。文心一縷。驚才絕艷。出水芙蓉生夢穎。丰致嫣然初見。恰又似、

朝霞舒卷。張緒風流標格好。比垂楊。一樹靈和殿。眼灼灼。更如電。思騎黃鶴尋仙
眷。訴喁喁。鏡前才子。淚痕清泫。皆用卷中語。怪底風人俱善感。各帶一分哀怨。記當
日。春蠶絲繹。翦彩裁雲。工綺語。把鶯花。金粉思量徧。成往事。說來倦。
愁向歡場起。易銷魂。才人結習。大都如是。只覺江山多寂寞。無處教人歡喜。抱斯意。
吾儕應爾。抑鬱無端。同故態。更飄零。知遇俱相似。共回首。雁聲裏。閒情十載拋流
水。念家山。暮雲回合。自傷羈滯。麗句清詞。刊落盡。柳絮今沾泥滓。有錦瑟。吟編曾燬。
予年十七前有無題詩四百餘首。辛酉秋一夕忽有所悟。取而盡焚之。今不爲情語
者十二年。尙憶孱軀癡絕日。病琅邪。幾爲多情死。同調者。那堪此。

蝶戀花 吟鄉入使院受業於檜門先生。凡廿四日。鏡窗對榻朝夕與俱。八月

初三夕留二詞別予。明日將出。應秋試也。次韻答之。

雲路千金爭一刻。喜近秋中。黃作眉閒色。底事暫離離未得。此情惟有孤鏡識。雲
錦江花豪彩織。徑寸明珠。照破秋霄黑。六月淹留因爾息。明年和爾聯風翼。

莫數寒宵銀漏刻。秋是愁天。夜是愁人色。聚散無端誰禁得。相關豈若休相識。滿耳西風鳴促織。暮氣深沈。星月皆昏黑。眼底征鞍何日息。不如烏鵲身生翼。

城頭月 中秋雨夜書家信後

他鄉見月能淒楚。天氣偏如許。一院蟲音。一聲更鼓。一陣黃昏雨。孤燈照影無人語。默把中秋數。荏苒華年。更番離別。九載天涯度。

清宵定置高堂酒。料得柘當手。弱婦扶持。雛孫宛轉。怎及兒將母。遙憐扶杖依南斗。明歲兒歸否。窮達難知。團圓最樂。悔煞長安走。

去年拜月深閨裏。憶我風檐底。一片清輝。三條畫燭。遠盼泥金喜。今年憶我愁千里。月上天如水。姑鬢成絲。兒膚勝雪。瘦影中間倚。

蘇幕遮 大明湖泛月

畫船游。明月路。古歷亭虛。面面朱闌護。百頃明湖三萬戶。如此良宵。一點漁燈度。棹開時。香過處。說道周遭。荷葉青無數。卻被蘆花全隔住。泛徧湖灣。不見些兒露。

虞美人 八月廿五日遊城南千佛山

歷山耕者知何處。田畔山如故。女牆如帶指城中。別露平疇、尖翠兩三峯。依山鑿佛人爭拜。生怕金身壞。不知是佛是山靈。都說城南、山似佛頭青。

虛空臺殿皆朝北。簾卷鸞旌色。天生翠壁作屏風。安放仙山樓閣、御牀中。淳泓龍井甘如乳。不識人閒暑。寒天石佛未能燒。卻讓田家、山後結團茅。

城中仰看山容好。山上看城小。半城斜日二分秋。別有一分秋色、在僧樓。城南車馬山前路。幾許來還去。高人難得住山緣。卻似鵲華、相望不相連。

百字令 次韻送金鍾越同年歸全椒

春明夢醒。便灑然歸去、非同秦贅。一幅輕帆數聲槳。預遣風姨回避。場上魚龍。盤中竇叢。變滅聊相戲。生于憂患。古今大抵如是。且去視膳堂邊。凝妝樓側。小拓鐙龕地。晝捧雙筇宵伏案。強似吹簫吳市。稱體斑斕。等身圖籍。佳日花前醉。故人寂寞也。應夢我千里。

難教人聽。是談天鄒衍，多言而贅。昔作無心雲出岫，嘗恐鶴羞猿避。投筆非難，致身須蚤。始信前言戲。五窮相守，行吟帶索如是。暫把眉上愁捐，鬢邊塵浣，去覓藏名地。吾愛吾廬，卿用法，不管誰門如市。母是經師，婦爲佳友，月伴先生醉。舉頭良夜，惜君生不同里。

醉蓬萊 秋江別友圖

向空濛無際，一片江山，艣聲難住。飄泊何爲，與年光來去。去國心情，送人滋味，記銷魂何處。對此茫茫，最無聊賴，一園秋樹。我似垂楊，管人離別，不堪回憶。瀟湘如許。乍醒三眠，又身隨飛絮。鬢上塵堆，襟邊酒暈，歎朱顏非故。我欲無言，仗他哀雁，替人分訴。

邁陂塘 彭夷鵠儀菴詞後

灑秋風，淚痕幾許，釀成酸楚如此。哀猿啼到三聲後，不管征人欲死。吾與爾，分萬斛閒愁，歌泣將焉止。青春去矣。問何者銷憂，只應無語，相對夕陽裏。情一往，豔豔溶

溶難比。恰似一江春水。無端風雨。豪端出。哀怨聲盈天地。知音幾箇。我輩傷心。不似
鍾情耳。嗚嗚誰倚。當付與雙姑。玉簫相和。低唱過彭蠡。

望湘人 前題

恨年年逆旅。處處魂銷。銷來無可銷處。風外移巢。鏡前抱影。誰念飄零人苦。易得狂
名。難求利市。懷哉吾土。況禁他、去燕來鴻。一遞一聲相訴。同看天涯明月。問幾人
寂寞。幾人歌舞。縱唱徹旗亭。畢竟於卿何補。爛醉也。不借雙鬢。願不弔屯田荒墓。待
攜君、置酒沙棠。隨著大江東去。

徵招 王穀原舍人青谿邀笛圖爲送人人蜀而作圖中坐小亭吹笛者商
寶意太守也

江山到處都如此。其閒黯然惟別。秋柳正垂垂。刻意教人折。免華生又滅。禁幾許。清
歌嗚咽。寒夜重來。舊游如夢。故應淒絕。恰憶五年前。江南岸。酒醒歸舟時節。一桁
碧闌干。聽笛聲吹澈。年華流水闊。那不遣。鬢絲成雪。忍看君。一幅閒愁。苦覓恨人說。

賀新涼 前題

秋在臺城路。聽吳娘、小樓低唱。蕭蕭暮雨。畫裏簾波丁字水。每憶垂楊一樹。逐落葉、隨風飄舞。南北東西行萬里。對河山、飄泊猶如故。誰耐寫、別人處。能詩司馬吾家住。寶意官西江時假館舍。閒家雨笠兄。因得受業及予。自上黨歸而司馬行矣。記泥牆、釵痕墨瀋。昔年會護。不道河樓留雪爪。又惹賓鴻相訴。邀笛奏、王郎新譜。我或前身據牀客。踏荒煙、會表桓公墓。歷寒食、又三度。桓伊墓在南昌城南久湮水田中庚午春予訪得其處作記付南昌令顧瓊園立碑表之

又 陳其年洗桐圖康熙庚申夏周履坦畫

一丈清涼界。倚高梧、解衣盤薄。髯其堪愛。七十年來無此客。餘韻流風猶在。問何處、桐陰不改。名士從來多似鮒。讓詞人、消受雙鬢拜。可容我、取而代。文章烟月思高會。好年華、青尊紅燭。歌容舞態。太白東坡渾未死。得此人生差快。彈指耳、時乎難再。及見古人圖畫裏。動無端、生不同時慨。口欲語、意先敗。

金樓曲 春郊送客圖送陳望之歸商邱

海內無多友。聚離蹤。黃金臺畔。一桮殘酒。南北東西廿年路。別緒千回禁受。君去矣。吾能歸否。明日懷人何處最。記離亭。半樹初黃柳。一展卷。一回首。君能使筆如揮帚。諒斯人。天非無意。勛名終有。卿相之榮等閒耳。何事方爲不朽。莫但學。鄒枚賦手。愛惜年華開萬卷。笑塵容。碌碌隨人後。任餘子。曳履走。

我亦悲歌士。憶當時。青雲結客。黃沙射雉。三十行年豪氣盡。川上低徊流水。看徧了。江山如此。圓缺陰晴。今古共。達人心。那不如灰死。知我者。二三子。已曾三食神仙字。笑飢蟬。逡巡雪案。消磨敗紙。不斷車雷喧客枕。欲借杜家聾耳。更無奈。別人燕市。滿目風烟。兄弟感。夕陽中。長揖分行止。都付與。畫圖裏。

百字令 家戟門員外蓮塘銷夏圖

水精之域。現如來。一丈青蓮花界。嬾角簪裾。河朔飲。水枕風船俱在。公子風標。麗人顏色。恰與仙郎對。十分消受。世閒殘暑無奈。轉憶僕射陂前。綠楊千縷。淺濺如羅。

帶展放天機雲錦段。擁出紅妝翠蓋。廿載飄蓬。更番觸熱。閉置車箱隘。清涼如許。船唇著我差快。

古來銷夏。有玉簫金管。木蘭之棹。柳嶼花汀。隨處有。只有閒人難得。麴院三秋。鑑湖五月。越女無雙白。婀娜碧玉。不妨添寫身側。君有鷗鷺奇姿。神仙逸氣。新注金門籍。那得科頭箕踞坐。不向瀛洲太液。粉署含香。黃扉直夜。同是東華客。何年買棹。弟兄花裏浮拍。

臺城路 諸申之鏡湖嬉春圖

江山如此無情甚。水與春愁俱滿。深悔當時。踟躕陌上。卻任花開緩緩。東風不管。將一丈游絲。等閒吹斷。若道絲慳。恩恩怎做踏春伴。人生此恨難遣。賸垂楊一樹。雨疏烟嬾。碧漢星移。銀橋鵲去。比並天河還遠。料他憔悴也似爾年來。鬢絲新換。贏得思量。向懷儂船幔。

洞仙歌 前題

春衣初試映湖光。脈脈記得羅衫一痕碧。正魚龍曼衍，鶯燕紛紛，原不合憎尚。春
憐惜。已令君識面，又不關情。此境迷離信難覓。誰遣杏花媒，噉使遊蜂，句引去尋
春油壁。不埋怨，湖山惹相思，反畫出湖山，教人思憶。

賀新涼 饒上舍韜明篆印小冊

咄咄真堪怪。習彫鏤，文人餘事，如斯狡獪。切玉昆刀君才似，不管銅章魚佩。執寸鐵，
腕如風快。造化鑄鑿天欲泣，刻琳琅，字字垂金鏤。力豈但透紙背。靜觀雲鳥蟲魚
態。說文爲古之小學，而今皆廢。卻使壯夫工篆刻。秦漢風規猶在。在何震文彭而外。
不入明誠金石錄。志名家，賴古堂應載。爾生晚，亦無奈。

滿江紅 自題空谷香傳奇

十載填詞，悔俱被粉黏脂澆。纔悟出，文之至者，不煩堆梁。譎諫旁嘲，惟自哂，真情本
色憑誰和。待招他，天下恨人魂，歸來些。淳悶語，真無那。顛倒事，何堪唾。談笑把，賢
愚肝肺，豪端穿過。誤處從君張眼顧。悲哉讓我橫肱臥。料知音，各有淚痕雙。誰先墮。

水調歌頭 舟次感成

偶爲共命鳥。都是可憐蟲。淚與秋河相似。點點注天東。十載樓中新婦。九載天涯夫婿。首已似飛蓬。年光愁病裏。心緒別離中。詠春蠶。疑夏雁。泣秋蛩。幾見珠圍翠繞。含笑坐東風。聞道十分消瘦。爲我兩番磨折。辛苦念梁鴻。誰知千里夜。各對一燈紅。

賀新涼 書空谷香後

女子如斯也。自低回。一聲檀板。數行泣下。幾許花叢懶回顧。儘着流鶯輕罵。只聽說文君新寡。明鏡無情春又老。歎紅顏。一例愆期嫁。三五豔。易凋謝。倦辜潘陸抄楊馬。腆忍說。文章華國。何關風化。呼吸商聲秋氣滿。節義幾人肩者。渴睡漢。酒闌鐙炮。三十功名塵與土。古之人。先我將愁寫。公等語。大都詐。

又 送家恒軒相公侍從東巡

帝命三公從。擁朱輪。曲江風度。天然端重。問俗省方行紫塞。香案邊旁陪奉。更樂事。還同萬衆。吁咈都俞人未識。掌絲綸。帷幄推姚宋。帳殿月。外蕃共。屬車塵裏攜雛。

鳳時爭子實夫...似終童短衣繡鞵雕鞍飛控拂袖御烟春講講到處河冰...
聽曉角。霜天初弄。佳氣陪京。雲爛漫。看龍蟠。虎踞。知天縱。拜手上岡陵頌。

又 吳門墮水後題張吟薌詞卷

三爵陶然矣。君魃把驪珠一串。納吾懷裏。醉墮寒江光滿抱。險被靈胥攪視。誰撒下。珊瑚網起。一十三行真本在。衍波紋。皺了桃花紙。衣篝炙。自料理。挑鐙細讀烏闌字。爲師友。行歌坐泣。纏綿若此。小雅離騷存別派。幻出情仙俠鬼。便仙鬼也須愁死。雲錦爲裳心作翦。淺人看。但解呼才子。吾不語。悶而已。

又 袁子才前輩郵駢句數百言訂交題詞奉報

記向秦淮水。問何人。小樓吹笛。勸人愁死。雨皺嵐皺多。偃蹇。我與蔣山相似。白下柳。又添顛顛。卻到江山奇絕處。遇雙鬢。都唱袁才子。情至者。竟如此。羅衫團扇傳名字。比風流。淮南書記。蘇州刺史。常聽東華故人說。腸斷江南花底。何苦較。天都人世。樓閣虛無平等看。謫塵寰。終是神仙耳。花落恨。莫提起。

百字令 前題

才人爲政。羨宦成三十，居然不朽。五聽參觀如善射，轉側皆能入彀。游戲奇情，循良小傳，千里傳人口。西清餘子，旁觀且袖雙手。底事拋擲西湖，句留南國，展放林端牖。六代青山橫淺黛，都作袁家新婦。酒客清豪，名姬窈窕，小令歌紅豆。香名豔福，幾人兼此消受。

大酺 題葉秋媵小照 春曦

有田不歸如江水。東坡亦可憐者。邨邨啼布穀，正留犁風起。僧衣全畫，雨片如烟，鞭聲若鼓。淺澱輕浮秧馬，踏芳塍宛轉，似丈人荷篠，樊遲學稼。把齊民要術，豳風雜詠，共老農話。秋成看穠稔，脫青蕞，泥飲瓜棚下。更打疊，稚子候門，山妻釀酒，騎牛小結雞豚社。約投閒他日，共築箇，溪南茅舍。將桑柘，從新寫。歸田錄罷，頽然美睡，簾罅聽他香稻輕打。

十二時 前題 雪窗

六花堆上黃茅屋。顯出風神清皎。有玉樹、瓊枝圍繞。端不讓戴安道。寒背衝寒船唇。忍凍冰雪年年飽。倘相過、不厭狂奴。願作飛鴻一試去來泥爪。算百歲、浮名草草。低唱淺斟差好。糝徑縈簾。隨車逐馬。放眼成繚緲。賴遮藏闕陷。兒童何必多掃。觸熱者、本堪絕倒。不龜手藥難討。竹挺高風。梅刪俗豔。便是山翁照。問如何不樂潘郎鬢點華了。

邁陂塘 前題 垂綸

看斯人、嶽崎屨落。不應寂寞如此。我爲壯夫君白首。相見紫薇花底。三年矣。但訴說平生。大抵勞薪耳。故鄉千里。到月白風清。酒闌燈灺。夢斷一竿水。風濤闊。幾許躁鱗。鱗尾。浮沈畢竟何止。烟波着個忘機叟。鷗鷺同生。懽喜魚不餌。想得失拋空。老作天墮子。憑誰呼起。把兩鬢風塵。卅年心事。都共釣綸委。挂秋旻。布帆無恙。何堪相送南浦。鯉魚風起人歸也。吹動一城砧杵。津頭鼓。報水宿郵籤。紅到青楓樹。畫中延佇。問拍拍鳧鷖。船梢可肯。添我捉魚鱗。思往事。曾把江

山閒數。孤篷聽徧寒雨。而今尙作臨淵羨。敢與樵兄爲伍。心自語。且暫借漁蓑笑學。鏡前舞。蘆花深處。坐薛濺湖邊。輸他征雁。共汝宿平楚。

臺城路 題某小照

人生失意尋常耳。那得全無飄泊。習靜緣慳。買山貲少。孤負江南邱壑。亂愁拋卻。將客裏閒身。畫中安着。琴意詩情。低徊猶可慰蕭索。及時聊且行樂。看魚龍舞罷。海天空闊。須鬢蒼蒼。江山浩浩。容易蹉跎芒屨。考槃何處。我亦似匏瓜。偶然懸縛。聽到松風。便消魂林薄。

邁陂塘 鍾叔梧秋水懷人圖

劃人間。東西南北。無情最是秋水。水與秋光較深淺。不敵相思無底。愁欲死。怨海內知音。不合相知耳。離懷若此。誰耐得星星。夕陽紅樹。幾箇雁聲裏。記前歲。同在京華懷爾。爾懷又復相似。自北而南魂黯黯。我是畫中汀沚。三千里。待隨着。檣烏。轉擲風帆尾。慰君何以。願橫篷遙山。填平巨浸。縮地共歡喜。

解連環 王穀原比部丁辛老屋圖

寂然如此。問誰守庚申。誰論甲子。聽門外、轂走驚雷。料爽塏難求。且居塵市。共燕分巢。何用擇干支。戊己。把槿籬草屋。移畫城西。一角山底。退食閉門而已。但掃葉聽蟬。可除多累。待成名宦何年。歎朔雪炎風。拋棄流水。萬卷三閒。容俯仰。閒身足矣。甲辰雌。只愁老我。軟紅堆裏。

多麗 堆帛美人

傍湖山。小坐誰家閨秀。映羅衫、芭蕉幾葉。宛如春水新皺。似周昉圖中仕女。當初花下相近。顧盼嬌兒。提戈取印。阿侯伶俐。伴儂前後。舉玉指、輕扶蟬鬢。生怕金釵溜。還恐是、傳神纖手。自家描就。是翦出、春雲態度。堆成裙帶衫袖。費綠窗、工夫幾許。打稿評量。肥與瘦。錯彩盤金。雕文纂組。付他小婢街頭售。也只似、才人賣賦。流落風塵。走傷心者。一分聰慧。一分儂憊。

虞美人 丙子九月廿六日盡室登舟北行紀事

宦游且自浮家去。浮到何時住。親闈甥館兩船分。時妹倩饒四拱北秀才初婚曾往。明鏡香奩。各向小窗陳。團欒笑語鏡前共。相對猶疑夢。出城纔覺一身輕。展放勞筋。百事暫消停。

衰親弱婦多勞苦。清瘦都如許。今朝安穩謝塵緣。問餽相循。不許再牽連。秋光空闊天涵水。放眼同歡喜。全家移向畫圖中。領略江山。不願滿帆風。

邁陂塘 舟次寄別棣可玉亭

怪西風聚來鴻影。又將兄弟吹散。自從雞黍登堂後。心在壽萱花畔。雅頭粲。縱不解風詩。解捧留賓案。從容一飯。有無限清言。霏霏玉屑。斜日照簾蒜。依依處。別緒幾多零亂。津頭自上青翰。故鄉難住他鄉遠。底事雁行分斷。江南岸。和病婦慈親。思念增長歎。一條河漢。把天上星光。人閒山色。隔作幾般看。

想綺窗琴邊書畔。離懷一樣相憶。添得鍼樓幾多話。目斷江天無極。捫胸臆。既相識如斯。不若休相識。親闈難卽。但計算征途。丁寧母弟。前路慎眠食。留不住。慚愧石

尤無力。去帆千片如織。秋江正可遲遲去。爭奈銅鈺催逼。緇塵域。歎釵珮衣冠。知己都難得。老天催抑。教北客來南。南人往北。又不插雙翼。

醜奴兒令 三十二歲初度泊濟寧州

年光得得。恩恩去。二十黃州。三十蘇州。懶去重登太白樓。青山黃閣傳何事。半爲閒愁。半爲忙愁。聽雨江湖易白頭。

膝前長跪。慚潘令。感上心來。悲上心來。那得高堂笑口開。停舟沽酒團欒飲。婦拔荆釵。妹拔金釵。周澤今朝卻是齋。

賀新涼 送吳蓀圃舍人返南昌

不是蘆中士。莫便歎。士之不遇。悲歌如此。初日年華未三十。驗取朱顏鏡裏。騎款段。暫辭燕市。草制綸扉。須健筆。揆天庭。讓汝才清綺。上林樹。此枝美。與君今世生同地。況又是。十年同舉。同心兄弟。小作升沈添悵惘。僕亦因愁幾死。纔浣卻。衫襟前淚。此事春風。渾不管。記劉郎。前度傷心只。君且臥。紫薇底。

鵲語人歸了。恰正是、高堂日永。紅樓春小。慈竹連枝添古翠。籠定椿華萱草。共對著、芝蘭微笑。游子捧觴同上壽。願銜書、歲歲來青鳥。兒去寫鳳銜詔。明年買定沙棠權。自結束、鏡奩鍼管。詩筒茶竈。花月春江同泛泛。手訂和鳴新稿。纔疊起、相思儂懷。轉憶秋衾黃葉館。愛人呼、小宋聲音好。試訴與、可煩惱。

側帽隨秋去。消受者、曉烟山店。夕陽紅樹。犬吠孤邨。鐙一點、於此解鞍而住。是馬食、僮眠之處。料得主人清夢少。問東鄰、誰唱黃河句。盼不上、紙窗曙。蕭蕭林莽雅無數。畫一幅、秋山行旅。亂愁堆絮。豈必飛騰感遲滯。對此本無歡趣。算一帶、荒原古戍。有我征魂拋擲下。倩歸人、尋著同他語。十年淚、雨奔注。

水調歌頭 崑山徐芝山小照

東海不復見。世德重清門。絕代流風餘韻。披拂見遺芬。喬木廣留嘉蔭。叢桂濃堆別業。秋色正平分。倚樹讀書者。金粟是夫君。淮海氣。書畫手。宰官身。合向木樨花畔。添寫月中人。妾本芙蓉豔豔。郎似紫薇冉冉。黃色到眉痕。衣上暗香襲。底用換鑪熏。

蝶戀花 桂樹詞

長安何處天香滿。絕好園亭。不是淮南館。獨坐圓蒲無箇伴。陌頭花謝人歸緩。月
榭風亭閒領管。睹豎羊曇。歲歲成疏嬾。讀倦拋書尋茗椀。倩誰偎得桃笙暖。

念奴嬌 病中柬友人牡丹宴集

燕支如雪。正清明天氣。催花風緊。百寶闌邊結束了。飛燕新妝嬌靚。膩臉朝酣。畫衣
香染。卷起千堆錦。謫仙猶在。酒邊肯教人醒。笑我斗帳垂烟。綠窗孤負了。箇儂春
寢。國色當筵想花神。也念相如多病。庭院深深。有酒客尋芳。漫嫌官冷。斜陽來看。滿
身都是花影。

賀新涼 朱震江席上醉歌

醉也看吾舌。儘人呼。說詩匡鼎。冠纓索絕。犀筯鸞刀行酒處。玉版銀絲紛切。算不若。
春郊射獵。耳後弓弦。餓鴟叫。解花韉。坐飲黃鸞血。吹短竹。石俱裂。偶然各問筵篔
筍。遊戲耳。才人好色。都無磨折。同是倪迂書畫壻。姊妹桃根桃葉。笑兒女。英雄雙接。

殢酒休歌三婦豔。唱烏烏。且擊純鉤鐵。誰讓爾。朱家俠。

浪淘沙 答玉亭

愁味比秋濃。雨滴疏桐。來書似有淚痕封。夢裏癡人爭盼醒。醒也恁恁。聚散已朦朧。目斷賓鴻。酸酸楚楚付西風。諸想不生諸病減。心莫玲瓏。潦草一年年。人似蠶眠。玉堂清冷興蕭然。解憶江湖飄泊苦。我亦啼鵑。塗抹衍波箋。短詠長篇。欲將身化嶺南船。送爾仙山樓閣上。揮手雲烟。

摸魚兒 宋懋庭觀察杏花春雨圖

別燕雲。軟紅塵土。板輿一兩輕御。夢魂先到江南岸。畫取尙書詞句。紅幾樹。待小建花坊。碎錦親題署。黃鶯相遇。認舊日使君。朱陳邨裏。乍暖勸農路。燕支塢。坐領滿身香露。壽觴歡進無數。醉來可憶長安陌。二月街頭賣處。將母去。至樂在田園。此事教人妬。好春遮護。索半臂偎寒。紅妝舉燭。續撰遂初賦。

瑣窗寒 吳杉亭舍人席上分詠氈帷

冷氣難侵寒威自遠。一層遮定。森嚴堂戶。終日帖然平正。笑銀鈎動搖。讓他壓住狂。
飄勁。配冰天雪窖。褐衣毳幕。者番相稱。休令孫康映。儘簾額窗楣。霰飄霜凝。湘紉
蜀錦。媿爾龕疏情性。翦青茸。懸來小門。主人疑是王子敬。鎮朝昏。不卷茶烟。香篆收
藏併。

賀新涼 題畫

小榭圍香雪。是詩人。是花是月。一般清絕。半畝玻璃浸疏影。掩映水中蟾魄。消受者。
玉壺冰潔。不倩梅花爲眷屬。有彈箏。小婢篋篋妾。春意蚤。暈紅頰。一枝橫竹聲鳴
咽。算不比。落梅風裏。江城五月。誰焙鵝笙誰擷管。把闌干輕拍。與鄧尉。孤山無涉。忍
著清寒辭半臂。愛梅心。定不因。人熱。持此意向花說。

青玉案 自題空谷香院本

幽蘭偶現嬋娟影。把苦趣。都承領。歷歷摧殘多少境。尋常烟眷。幾番生死。劫滿天纔
肯。珠圍翠繞須臾頃。廿九年華塵夢醒。只恐香名隨骨冷。商聲譜就。三貞九烈。淑

女當思省。

水調歌頭 熊滌齋前輩秋江垂釣圖

一葦載翁去。豈有羨魚情。爲愛秣陵秋色，獨泛大江橫。不是磻谿隱士，不是富春男子。不乞鑑湖清。三朝瀛海客，八帙老先生。喚農父，引牛牧，召樵兄。醉向白蘋洲畔，把酒問長庚。人頌起居八座翁。戀烟波萬頃，笑與鷺鷥盟。何必赤松子。遯迹采黃精。一載住京國。戶外滿朱輪。就問朝廷掌故，聲望鼎彝陳。六十年來三老，八千歲中喬木。翁是漆園椿。風流文字飲，矍鑠謫仙人。買歸櫂，整魚具，理絲緝。暫別蘭陔馨膳，游泳率吾真。不列玉簫金管，只載法書名畫，去結米家鄰。來歲桂叢發，重到作嘉賓。明年己卯翁當重宴鹿鳴

滿江紅 壬午京兆闈中詠物

毛穎先生新除授，蔚藍天使。青眼內，生平不識楊朱墨氏。翠壁閒題，應滅迹。綠天徧寫難尋字。草新詩，待借碧紗籠，添螺子。黛眉恨，何關爾。青衫淚，多由此。判升沈，一

旬辛苦三年悲喜。疏密圈來方入殼。縱橫抹去非知己。比盧公老臉坐中書。操生死。藍筆

判姓分銜。縱五尺。二分寬窄。雕鏤出一行細字。堪陪玉尺。左右分陳監試案。收藏不到司衡席。認經房。卷面印分明。存稽覈。天人界。鴻溝畫雲霄路。函關隔。發軍符。好風吹送。幾行飛翮。半喜猶爭文字命。終身已注師生籍。抱遺珠。借慰老儒心。嗟何益。薦條

束筍投來。展素冊。分行羅布。指星宿。三垣列舍。各依躔度。面貌難猜。謾蔑醜。姓名那識。顏標誤。待揩摩。老眼認參軍。如遮霧。白圭玷。青蠅汚。兼金屑。黃沙淤。自披尋。斜斜整整。蟲魚夾注。愛者兼存題品字。棄之還載瑕疵句。比文昌。祿籍更分明。堪憑據。號簿

經笥便便。知不等。巾箱儲蘊。歎燕石。豐年難售。匱中重韞。趙括殘兵同一泣。田橫義士都相殉。待求他。藥籠貯黃楊。偏逢閏。冬烘冊。陳年券。魚豕字。尖叉韻。向此中。沈

淪苦海。地天俱悶。躍冶豈無干鑊寶。藏鋒偶作鉛刀鈍。祝他年。拔宅共飛昇。休長困。
落卷箱

比並堂餐。計日進紅箋一紙。十八品盤中餽。釘米鹽羊豕。魚缺寧生馮缺歎。蔬多恰
稱樊遲鄙。大官廚日費萬千錢。如斯耳。饗饗客心何喜。曹騰僕飽欲死。尋思到小
人有母。尙無甘旨。減食聊存啜菽念。斷葷竊養齋居志。笑先生果腹不多時。瓜期矣。
供給單

來自田閒。代老婦。燔柴於爨。消受煞殘杯冷炙。餘薪燼炭。奪得瓜壺魚鑰底。受來鞭
箠風簾畔。比杜陵詩老灌園人。獠奴段。雞鶩食低眉看。井臼利偷閒算。還細問官
人門第。居何里閒。媚竈深知求福理。戛羹定少封侯願。盼歸田。乞肉遺山妻。譁然散。
鄉廚

黃卷青鐙。二十載。紙窗消受。分給到九枝銀蠟。冰壺明透。照我量才分玉尺。讓他修
史圍紅袖。記風簾默坐盡三條。聽寒漏。耀赤字珠輝秀。映彩筆銀花茂。晃朗到斗

光神眼。虛堂左右。淚盡不知歌舞席。心灰直到文昌宿。炳元燈。炯炯日中天長如畫。
官燭

祝祝呼來。佐公膳。卻分雙隻。一拳耳。不成毛羽。休論肥瘠。酷似小兒窠內老。待尋道
士籠中易。奉高名。取笑冠同羣。予滋戚。不爾殺。知無益。必自斃。生何迫。可記得。斜
陽邨塢。于埒于桀。深院教栖名士牖。後車載去淮南宅。有茅容。明日飯林宗。非疇昔。
魁雞

解連環 燕子磯獨眺

江流日夜。問六朝人物。爾何爲者。三百年。龍戰元黃。但歌舞荒淫。風流儒雅。醉夢興
亡。又節次。欺人孤寡。放千尋鐵鎖。一片降帆。妝點圖畫。幾處殺人盈野。算偏安纔
過。幾王幾霸。說天塹。虎踞龍蟠。被風月鶯花。幾番誤也。眼底蒼茫。賸燕燕。于飛上下。
訴當年。故國山圍。空城潮打。

滿江紅 平臺讀書

鋼絃詞

伏几昏昏。卻又是、困人天氣。寧耐著、飛花庭院。落紅鋪砌。藥鼎聲微。窗轉日。茶烟風軟。簾垂地。抱新愁、扶病幾登臺。無情思。隄上柳。鵝黃膩。隄下磯。魚鱗細。掩映出、芳塍宛轉。荷鉏人至。學稼難耕歸去土。浮家悔識飢來字。聽錫簫、社鼓一聲聲。春如是。

水調歌頭

楊默堂侍御江湖聽雨圖

夢醒簪篷底。一點一聲秋。密密疏疏。淅淅聽徧不勝愁。數朵濕山如黛。兩岸蘆花似雪。白了旅人頭。誰識繡衣客。轉憶綠蘋洲。是僧樓。是羅帳。是扁舟。觸惹平生心事。仕宦苦沈浮。忽見魚生牀下。又聽鼃鳴竈底。難得喚晴鳩。檐溜灑空下。多半作浮漚。何處乞漁艇。應怪雁聲遲。多少青山紅樹。誰唱去來詞。想到平岡古木。夢落橫塘小岸。各自有相思。莫笑伯時嬾。公尙在京師。水粼粼。石齒齒。草離離。人生轉境堪念。悵惘概如斯。只好臥游蕪澤。便是燕居清曠。真箇欲何之。烟水接天闊。讓與白鷗嬉。

醉江月 題歸舟醉吟圖

載書一艇。似乘興而來。興盡而返。回憶出門西向笑。此意頓成疏嬾。徧友時賢。細參

世味兩鬢鐮塵滿。長卿倦矣。雲山是爾歸伴。去年燕市相逢。九門風雪。酒罷眠孤館。折到旗亭烟外柳。小別也堪腸斷。初日年華。謫仙標格。天未容蕭散。冷吟閒醉。放君暫作嵇阮。

布帆無恙。是獨往獨來。不同飄泊。越鳥尋巢。歸翼健。送喜聲傳乾鵲。辟蠹香濃。浮蛆鑿滿。竟把虛舟縛。無心出岫。依然去臥巖壑。憶我當日歸舟。也曾畫取。白舫青油幕。不道十年成罪案。人罵樊川輕薄。事等烟雲。君攜圖史。檢點波濤惡。時來風送。明年還到京雒。

玲瓏四犯 題落花圖爲友人悼亡姬

滿地燕支。是無情有恨。不堪多數。春色三分。已作二分塵土。回首燕掠鶯捎。消受到。五更風雨。想綠窗、病眼啼妝。千片淚痕如許。隔簾誰唱山香舞。可憐人、亂紅辭樹。柳綿榆莢。愁多少。同做香泥辛苦。仿佛倩女離魂。又似荀郎淒楚。待來春花放。三生石上重語。

賀新涼 明餘杭知縣府谷蘇公萬元殉節哀詞

寇至無人抗。歎孤城、九泥失守。誰當屏障。舊令歸田遺一老。肯復去先民望。露白刃、與公相向。亂世之人爲賊好。勸先生、冠改黃巾樣。得富貴、且無恙。公怒眦裂聲何壯。看微臣、此時心目。海天空曠。願脫齒牙爲劍戟。一罵豕蛇都喪。賊顧曰、是真倔強。爾不我從須賂耳。奈窮官、壁立無封藏。但斫此、好頭項。

利刃環而下。血淋漓、浩然之氣。與刀相射。賊技如斯堪一唾。公乃憑虛而駕。看府谷、荒城斗大。中有孤魂垂白練。照河山、不許秦關夜。萇弘恨、豈能化。鄉官義烈南雷亞。惜當時、寸權尺土。一無憑藉。過客哀歌還擊缶。淚湧渭橋清灞。公有後、士之良者。作吏尋公遺愛去。向餘杭、酌酒公祠舍。述祖德、定悲咤。公裔孫遇龍壬申進士龍泉令

又 偕吳蓀圃舍人西郊踏青飲譚振之書齋

花信風猶淺。有詩人、隔城先折。尋芳小束。東閣仙郎初下直。拉取春愁同遣。恰烟柳、麴塵初碾。行到仙源流水外。吠劉郎、忽有桃花犬。似雪夜、剡谿轉。草堂負郭經帷

卷愛康成。明弟子。鳳雛聲。囑留客。盤餐兼味。列供給。寧嫌市遠。是真意。觥籌續。人海中。閒尋舊雨。儘當前。放取金尊滿。還料理。踏青眼。

又 劉丈小像

方丈蓬萊裏。有神仙。大都皆是。賢人君子。五利文成。荒誕者。鬼伯豈容方士。翁立命。居仁由義。生氣無虧。生理足。喜歡心。便可長生矣。不死藥。妄言耳。石稜秋露先生。履。拍洪厓。此都真有。洞天福地。好飲耽詩。還結客。一笑黃金泥滓。薛包產。讓之子季。孝友在躬。天與壽。抱遺經。付爾趨庭鯉。道書籙。可焚已。

邁陂塘 題潞河送客圖餞蔡蘭圃以臺歸觀次戴匏齋韻

指南天。鴻來燕去。河干閱盡車馬。天涯修禊無多友。卻又送君行也。花信寡。只一樹長條。斜映離亭寫。文章新價。想扁舟過處。還如鸞掖。傳說姓名雅。吾廬在。不等求田問舍。驢車暫許停駕。一年偷署湖山長。管領詩壇酒社。堂上學。照綵袖宮袍。樂事多牽惹。涼秋新夏。願舊疾消除。身如藥樹。習靜壽萱下。

泛春游。花明柳暗。輕舟自緩于馬。江鄉十里珠簾卷。笑指狀元來也。情多寡。擇好句。旗亭壁上親題寫。春風無價。倘妙手傳神。畫來團扇。風度定閒雅。清暇日。重啓讀書舊舍。古人誰足方駕。天公厚意科名美。莫戀月邨烟社。拋酒罈。念國士遭逢。魏闕添縈惹。翻經長夏。將後世評論。他年事業。料理一鐙下。

賀新涼 賀友人納姬

本是多情者。百樣爲無情。懊惱有情牽惹。小社尋春多少恨。所事心纔輸下。容易到好天良夜。恰是東坡嘗荔日。絳紗中。白玉膚斜亞。任鸚鵡。隔簾罵。讀書倦後填詞罷。從此把。零愁碎苦。盡情辭謝。更有甚于眉嫵事。不但遠山新畫。須趁取。綠窗清暇。再玩愆期歸妹象。算今年。居士應同嫁。綠衣汗。向他借。

滿江紅 題桑乾送遠圖再送李載庵返滇南

春草蘆溝。又加寫。旗亭行色。比疊到。陽關三曲。曼聲悽惻。畫本重題言不盡。故人相送情難極。較桑乾。深淺意何如。惟君識。車與馬。鞭絲勒。主與客。舳船側。埋怨到。綠

楊絲短繫君無力聚首不如圖以內懷人只在天之北咽離聲流水最無情何會
游子歸來洗鞞襪征衫纔卸浣不盡燕雲塞雪酒痕狼藉蔡順倍添慈母惜杜羔幸
免山妻罵看嬌兒繞膝更思親何年赦舊檠戟青山亞新綽楔朝暉挂儘經年行
田上冢治家麤罷毛義自應求仕宦向平且漫謀婚嫁捧安車奉母渡桑乾當重畫

水調歌頭 壽徐丈

蚤作文中子晚號石徂徠閒數江東名士弟子盡鄒枚堂上六經諸子杖底千巖萬
壑窗對澱湖開梁孟笑偕老兩拜告身來探龍湫觀禹穴問天台更看廣陵潮勢
八月走奔雷傳說種花仙吏仍是趨庭學士九載舞衣陪宦成奉親去雙舉介眉杯

金縷曲 題王介子先生尺牘卷子後

念舊情無奈追數到徐陳劉應一時俱在慰喻綢繆文采麗字字琅玕金甃述往事
時乎難再傾海并山爲酒肉過屠門想見當初快離索感詎能耐河山隔斷微塵
界誰得似雲龍鹿豕友羣無礙別遠會稀何處夢風雨雞鳴如晦三復矣唏噓而慨

青眼弟兄頭半白。二十年。古誼推前輩。讀此者。共生愛。

忽廢書而歎。送年華。浮沈寂莫。幾人名宦。周黨有時尋閱貢。終日樵蘇不爨。或徙倚。雪窗螢案。舊學商量知己少。對前賢。敢效偏師戰。越人射。感時變。功名三十魚龍幻。記恩門。昔年曾奉。定興香瓣。夢繞秦中函丈遠。那得長依經幔。憶隔歲。東華重見。引領雙旌容易別。又晨星。落落風流散。披尺素。忍多看。

韋曲停雙節。聽人謂。關西夫子。宦情真別。畫戟森門香凝寢。大筆重刪中說。讀復飲。唾壺敲缺。回首西清猶繾綣。只十年。令僕輸同列。公自立。不磨業。朝來渭水雙魚接。開看處。細窮匣啓。爛然生纈。一往情深縈錦字。三載袖中難滅。有弟子。低回門雪。紙尾書名懷抱盡。奉緘封。儼侍先生側。語聲寄。隴頭咽。

又 翟耕墅七十初度

古處饒風雅。魯靈光。巋然一老。琴谿儒者。羅隱詩名彭澤品。文學更兼游夏。騎馬到。廣文階下。每向濠梁羨魚樂。拂朝衣。一笑歸田也。築耕墅。結耆社。平生游迹方筇。

把到名山捫蘿剔蘚。斷碑全寫太白散金三十萬元。振堯夫之亞。隱德種茶。蘭梧。一鳳摩霄。一栖竹。燦春筵。疊進長生罍。宮袍彩御香惹。

又 揖別圖送方郡丞之任粵西

何處相思水。桂林邊。山城一角。伏波巖底。插筍牙樁。分岸泊。漠漠汀脣沙觜。是送客之圖如此。作郡幾人從此去。翦寒波。直到灘江尾。潞河景頗相似。方干風度思量起。記會見。南昌香令。愷之堂裏。十二年來人事改。感逝傷離而已。問司馬。鬢絲餘幾。榕樹門東支手版。憶長安。夢繞零陵矣。題畫者共悲喜。

又 申檀林桃葉渡江圖

芳草如裙帶。那更有。春江如鏡。遠山如黛。花月低迷。石城艇。名士美人俱載。是當日。狂奴故態。司馬多情。親折證。看朝雲。坡老真無奈。掀髯處。可憐太。詩情畫意憑誰解。道箇儂。傾城顏色。廣陵人在。翦燭推篷。寒自忍。裘已爲卿而賣。奉半臂。笑披郎背。今夜三星光豔豔。護鴛鴦。不許秋河界。夢中語。醒還愛。

兩槳春風動。不隄防、夫人愛惜。比郎尤重。翡翠窗前初識字。自取周南低誦。向大婦、邊旁隨從。鸞侶中年常比翼。又新添、一朵桐花鳳。引玉燕、入香夢。迴思江上蘭橈送。暮雲邊、塔鈴低語。晚風輕控。君去桓伊邀笛步。橫竹定然三弄。料不要、桃根相共。試繪洗兒長卷子。索同人、玉果犀錢奉。當再乞、畫師宋。

又 金棕亭秋江擁櫂小照

展卷嗟行旅。寫牢愁、碧波千里。一枝柔艣。不擊虛舟。天浩渺、飄泊何年纔住。算中酒、阻風情緒。十五年來淮海客。扣舷聲、中有傷心語。青篷下、聽寒雨。天涯兄弟離心苦。記當時、謝家山館。對君淒楚。得喪紛紜真偶爾。相見鬢絲如許。數點雁、兩行秋樹。不用重尋石城艇。遣繁憂、只此堪憑據。載一鶴、渡江去。

水龍吟 春江歸釣圖爲王蔗邨太守作

何人翦取吳淞。拖藍脫寫春江本。山眉翠展。漿牙花皺。木蘭安穩。風響菰蒲。波鳴鸞。盡遠天無盡。念少年游泳。釣牀漁具。觸惹處、便難忍。回首故園櫻筍。被東風、水鄉

牽引綠楊堤外。錫簫粥鼓。清明天近。碧澗香芹。銀刀鮮鮑。夢歸無準。問當時。漁弟樵兄。且未許。先生隱。

摸魚兒 前題

接平泉。玻璃萬頃。舊開丞相花墅。角巾曾詠澄江練。淥淨執經堂戶。春申浦。記芳草裙腰。曬徧斜陽罟。昔游佳處。但一著低回。水邊林際。歷歷盡堪數。曲江宴。忽漫縮人簪組。朱輪來往公府。冰銜小署詩人字。臣本張谿漁父。教畫取。畫葉葉蜻蛉。欸乃搖輕舫。待持竿縷。把卅載忘機。臨淵心事。細向惠施語。

又 蔡瞻亭侍御小照

寫風懷。分司御史。依依射鴨闌曲。熏鑪侍女桐陰下。添染朝衫新綠。珠幾斛。買翠鈿成雙。暖老須燕玉。畫中看足。道舞扇歌裙。不曾真箇。新註小名錄。人生事。大抵烟雲斷續。但須舉酒相屬。嬌兒解覓金魚珮。還乞老夫詩讀。香薷熟。待舌本迴甘。清味徐徐復。多情杜牧。休再發狂言。驚迴紅粉。笑轉紫雲目。

百字令 程仁山夢雲圖

虛無縹緲。是因何結想。珊瑚來矣。彩霧香雲留不住。留下語言文字。昨夜星辰。仙山樓閣。主者非耶是。女三爲粲。姓名歷歷堪指。只恐詠到無題。寓言十九。別有閒情旨。小雅離騷。何所謂。香草美人而已。澤畔明珠。舟中玉杵。信否憐才子。士嗟不遇。夢中聊索知己。

摸魚兒 張松坪荷淨納涼小照

認田田。東西南北。碧波魚戲蓮葉。藕花亭子新涼後。一桁闌干斜摺。人影貼。唱水殿風來。香與鷗波接。暮雲千疊。想十里平山。二分明月。中有笛聲。緇塵海。那覓采芳菱牒。漫尋手板支頰。畫樓若許人同倚。三尺碧簫應挾。冰簟闊。指明鏡中央。小夢鴛鴦愜。銀河難涉。只百頃風潭。千章夏木。都借畫屏攝。

賀新涼 陪蘄石先生小飲顧晴沙侍御宅

三落鞞鞞鼓。記今宵。十年師友。翦鐙而語。酒映須眉人歡喜。那更三星在戶。薄醉也。

平生堪數。廉讓泉清會共飲。古之人。默默心相許。茶與薺。孰甘苦。茫茫何處吾鄉土。念江南。鶯花風月。可成賓主。介母萊妻同此願。促買半山荒墅。借隱者。久安貧窶。仕宦人生須自量。再因循。可有絲毫補。難道是。恩恩去。

沁園春 前題

歸與歸與。鍾山之英。草堂之靈。看阜屬蔣侯。小姑相倚。墩仍謝傅。介甫何爭。一片江山。六朝金粉。著我其閒亦有情。無名氏。是南州孺子。東郭先生。有時醉筆縱橫。定題徧江南。溼翠屏。喜雞犬圖書。扁舟安穩。孺人稚子。壽母康寧。畫裏攜家。花時載酒。吳越風光次第經。緇塵裏。問驢車辛苦。名宦誰成。

賀新涼 疊韻留別紀心齋戴匏齋

聽罷蘭臺鼓。信從來。銷魂惟別。黯然難語。說禮敦詩周旋久。夢繞兩公堂戶。把人物。恆沙量數。只有惺惺解憐惜。是斯文。未喪天公許。識字矣。者般苦。落紅已葬燕支土。算楊花。飄茵入溷。年年誰主。猿鶴形骸麋鹿性。未可久居亭墅。況臣是。孤生寒窶。

袞袞諸公登臺省。看明時、無闕須人補。不才者、義當去。

沁園春 前題

翰林主人。御史大夫。文章有靈。只風騷跌宕。隨時自得。神仙遊戲。與物無爭。紙閣蘆簾。錦衾角枕。梁孟偏旁著豔情。房櫳悄。在琴邊酒畔。仍是書生。鏡中遠遠山橫。又何取。俚寒軟玉屏。但填成小令。凭肩指授。歌來綺語。逐字丁寧。燕貼香懷。蘭窺好夢。蚤誕嬌兒授六經。敲詩夜。恐聰明小婢。還昵康成。

賀新涼 再疊韻柬心齋匏齋

水鳥愁鐘鼓。問如何、猩猩鸚鵡。皆能言語。燕子顛當誰高下。一樣傍人門戶。孤雁把、更籌細數。蜂蜜蠶絲。因何事。轉香丸。只有蜨娘許。蟬吸露。太清苦。百蟲瑾戶爭銜土。費商量。虎威狐假。鵲巢鳩主。蝴蝶飛飛迷香國。心死那家園墅。脫毛羽。號寒艱簞。不若蜉蝣衣裳美。海茫茫。精衛思填補。一聲鶴。渺然去。

沁園春 前題

手斂薑芽。豈有霜毫。驅馳百靈。算鳴機組織。佳人暗解。投壺揖讓。君子閒爭笑。絕冠
纓。悲橫蠟淚。悱惻纏綿。共此情。誰堪語。只寒山拾得。可話無生。華堂霧鎖烟橫。看
孔雀文章。列畫屏。是檐花爭笑。儘教春重。塔鈴無語。只要風寧。口莫談天。書休謁鬼。
戲注孫陽相馬經。蕭蕭路。賸江關詞賦。愁煞蘭成。

百字令

吳江秋色圖

一帆婀娜。引孝廉歸舫。半江秋水。下第情懷初領略。未可悲歌難已。健翮方搏。霜蹄
小蹶。況有陳平美。豈長貧賤。西清正要才子。且去將母吳門。尋親白岳。一洗淮陰
恥。惡少年來相問訊。當日餓夫如是。家傍垂虹。窗橫笠澤。小住爲佳耳。扁舟散髮。春
來我亦行矣。

虞美人

秋雨停尊圖爲阮吾山舍人悼亡

疏桐墜葉敲羅幌。疑是金釵響。小樓鐙暗夢初醒。恰好哀蛩低和雨鈴聲。憐他斗
酒收藏久。更忍杯當手。小山叢桂露應晞。幾夜秋墳人唱阮郎歸。

水調歌頭 自題歸舟安穩圖

緩緩弄春水。未是急流中。舟比退飛六鷁，那要滿帆風。畫裏谿山不改，鏡裏須眉可笑。骨相老詩翁。瀟灑一官足，磊落半生窮。母康寧，妻婉婉，子童蒙。去揀江山佳處，小築百花叢。醒則奉觴上壽，醉則關門熟睡，舊事海天空。勿以悠悠說，亂我讀書胸。

摸魚兒 王琴德比部三泖漁莊冊子

放先生鸞臺鳳閣，如何夢繞烟水。九峯三泖空濛極，移入輞川圖裏。還細指，看一桁斜陽，網挂魚鰕市。釣絲樓底。怕闌外沙崩，檻邊湍落，鷗鷺暗驚起。蒼茫外，何處汀脣沙觜。輕帆葉葉如駛。誰歟管領湖山者，讓與蘆中窮士。君莫擬。渾不放大魚，東海揚鬢尾。御溝波瀾。且斫膾蓬池，釣鼈瀛島，豈必食河鯉。

沁園春 題王蕉邨太守錦瑟詞後

上元夫人碧落侍郎，仙緣去來。恰鐙宵現影，銀河吐豔，鐙宵示寂，鉛淚成灰。廿六年光，平生慰藉，老去柔腸日九迴。頭白矣，擁東方千騎，鴻案誰偕。三年官闕傷懷。怕

月轉空樓雨滴階。騰膝前兒女呼耶作母。畫中冠珮滅倖營齋。五十繁絃百千絮語。雪鬢鍾情更可哀。償辛苦。有兩株瓊樹。三錫鸞回。

醉江月 宛平查氏崇禎甲申紀烈詞應恂叔太守

清門娣姒。周蚤寡。行年四十有四。張姒年纔三十六。有妾廉姬廿歲。三女隨肩。筆牀硯匣。聽講周南旨。瑣窗鐙火幽閒。貞靜如此。更有蚤寡之姑。適于黃者。攜女歸相倚。女亦聰明分硯席。蕙性蘭心無二。孟慕神仙。仲矜義烈。笑問黃家妹。妹云。毋泥。得時皆可爲耳。

金縷曲 前題

城破身難辱。周夫人中堂危坐。放聲而哭。查氏家應隨國滅。三世同居此屋。列坐者。齊聲相屬。張母黃姑明大義。歎廉姬有母能兼勗。誓殉此。一巢覆。登堂三女嚴裝束。翦香雲。藏之羅袖。年俱十六。小妹垂髻齡十二。就義心情尤篤。也不必珍珠淚。未死身迴情轉迫。向梁閒。舉首如飛鵠。死易耳。瞑吾目。

玲瓏四犯 前題

巷戰無人。賸雕梁一桁。九條羅帕。再拜皇天。以次從容齊挂。賊至仰視而驚。似聽得。精靈交罵。但吞聲。怯篋奔逃。不敢臨風呼咤。廉姬小妹還魂亞。妾爲尼。妹婚而寡。殘軀兩兩登耄耋。鬼伯當時同赦。再生已證無生。死者無殊生者。算清明風雨。又到甲申年也。

邁陂塘 前題

古今人。貞心烈性。捐生大抵如許。狗彘紛紛草閒活。何必同年而語。休悉數。到地覆天翻。毅魄難枚舉。青燐如雨。指太僕街頭。阜成門內。死算得其所。尋榆垆。馬鬣纍纍相聚。還如堂列賓主。珊然環珮靈旗閃。點點神光來去。聲激楚。聽鬼唱秋墳。痛彼離離黍。廉姬季女。踏兩朵慈雲。生天稍後。來趁九蓮炬。

四字令 洪兩山烏絲紅袖圖

仙郎玉人。仙娥麗人。烏絲紅袖溫存。是迦陵後身。冰絃指痕。鸚裘酒痕。凍豪底用。

鍾熏借吹關口曆

清平樂 前題

子虛烏有。真箇消魂否。擗笛彈箏交玉手。唱出曉風楊柳。書生未耐寒酸。寄想鶯鴻舞鸞。何日珠圍翠繞。畫中且自尋看。

百字令 汪怡齋林於小憩圖

十年前影。是碧梧翠竹。鸞停鵲峙。歲月遷移人事改。今有鬢鬢須矣。綵服隨兄。壽觴娛母。重啓尙書邸。賜書千卷。孝廉之樂何似。記得同住仙源。杏壇春永。愛看趨庭鯉。文石幽篁身左右。遂寫冰顏于此。忠孝承家。文章報國。磊落佳公子。不宜宴坐。鶴書將詔君起。

又 送徐蓋山宰永川

冰銜墨綬。是螭蚘領賜。聖恩除與。天念文翁富儒術。教種錦城花去。詩闢蠶叢。名題劍閣。官是神仙侶。川分巴字。懸門清澈如許。好趁江水平安。樓船穩便。迎到康寧。

母仕女。舉帷父老拜。想見壺漿盈路。酒酌軒筒。魚烹丙穴。再試斑衣舞。尊前上壽南
陔。笙曲全補。

生才之地。有相如賦草。子雲奇字。仙吏放衙還講學。人拜南州夫子。郭繞桑麻。堂陳
琴瑟。風俗歸淳美。從容爲政。平生學可行已。可惜十上公車。兩登薦剡。纔飲巴江
水。疇昔風流盛文藻。白袷烏巾名士。劍拂衡湘。氣吞雲夢。笑奪曹劉壘。登臨回首。莫
提少年心事。

兩牀絲竹。比南樓老子。興復不淺。胸次依稀海天闊。彼此低回青眼。十五年情。三千
里路。室邇人非遠。范張雞黍。家庭真意彌滿。此去灑灑波長。峨眉月冷。別緒何由
遣。夢入渝州猿嘯苦。惆悵思君不見。兄上新銜。弟還初服。出處交相勉。宦成可待。十
年歸未爲晚。

沁園春 北方有蟲名哥哥者戲詠

蟲爾來前。爾雅重箋。爲伊釋名。想公會夫人。汝爲齊女。晉留重耳。誰是申生。孤竹餐

花萼樓中第幾聲。比苦竹叢邊。行兮不得。秋風原上。急也會經。餅怨婆焦。婦稱姑惡。蜂蟻網常友愛并。嘈嘈處。有闕于牆者。驀地心驚。

聒聒哥哥。南北之人。語音不同。似蟬翼流嘶。未登月令。莎雞振羽。不入豳風。腹乃皤然。背尤盎爾。長脚還堪比相公。馬頭上有半鞍明月。聲在其中。秋來紫豆花叢。挂紙閣。蘆簾鐵馬東。向壺腹藏身。請君入甕。瓜瓠作餉。爲爾開籠。蟋蟀窺牀。斯螽動股。借亂軍聲。十二峯。拋殘體。任蟻穿雞啄。化作沙蟲。

清平樂 三邨尋芳圖

尋芳載酒。詞客年年有。一片江城歸畫手。認取連蹊花柳。去尋桃葉桃根。草綠裙腰幾痕。遙指第三邨子者。番真個銷魂。

賀新涼 會稽令舒澹齋小照

涼意芳塘轉。渾不辨。姚山稽水。有斯池館。仙吏退公銷夏處。綠沁玉壺冰盃。儘蓮葉。

田田鋪滿。待取紅妝扶翠蓋。柳腰肢。更比詩人嬾。寄此意。共香遠。高情琴酒原疏散。是才子。風流爲政。鶯花勾管。畫卷詩奩清供好。袖有蘭亭真卷。不用覓支頤手版。面面蓬萊園。把荷花。勸引歌喉緩。加幾個玉臺伴。

又 宗芥帆惜花起蚤圖

春色濃于酒。好園林。曦輪未起。曙光纔透。萬物之初朝氣在。況值羣芳如繡。喚起。起。畫樓開牖。不待雞鳴吟戒旦。試仙郎。滴露搓酥手。現一對花閒友。生香豔豔交花。又。免春愁。鏡中眉黛。陌頭楊柳。恰趁曉妝勻膩臉。珠蕊笑開檀口。儘讓與。閒時消受。他日官人頻問夜。整朝衣。侍史熏香候。花殿瑣。數聲漏。

水調歌頭 自題轉情關院本

萬縷亂愁緒。一塊大疑團。任爾風輪旋轉。難破此重關。賢聖幾多苦趣。仙佛幾多惡劫。舊案怕尋着。細想不能語。老淚溼闌干。收白眼。持翠管。寫烏闌。偶譜斷腸情事。舉一例千端。不管周郎顧曲。誰道醉翁嗜酒。作者意漫漫。一切有情物。如是可參觀。

虞美人 劉寶七聽雁圖

秋光好在江空處。柔艣聲難住。一株殘柳帶蘆汀。來趁天邊新雁兩三聲。此時聽者知多少。生怕閒情攪。詩人倚櫂唱嬋娟。不比江楓漁火對愁眠。

蜨戀花 題畫

綠蘿垂幔紅妝繞。妾意君情細細游絲裊。忍把浮名輕換了。淺斟低唱風光好。檀板鶯喉詞懊惱。郎是青藤。妾是迎陵鳥。臉際荷花開窈窕。笛聲嗚咽雲縹緲。

瀟湘靜 薛壽魚屬題雲華校書圖

是人是竹亭亭影。看一樣。蕭疏情致。霜痕粉印。謝他移種。有湘江愁淚。待寫十分嬌。纔寫出。一分寒翠。畫中如此。琴邊香側。那不教郎心醉。卻怪影兒難拆。峭風前。拋他獨自。料應偎倚。防人相妬。轉令歡相避。日落月生時。個個是。相思雙字。風流贏得。江南詩老。爭題本事。

百字令 豆棚閒話圖

居吾語汝。啓雕龍炙輶。談天之口。跂脚支頤。還袒臂。雜坐東西前後。吐舌伸頭。聳肩側耳。共拍盧胡手。古人名姓。子虛亡是烏有。試看忽鼓忽歌。妄言妄聽。椎魯皆良友。怕問三家邨學者。六四括囊无咎。蕉扇驅蚊。竹衫收汗。星挂疏疏柳。先生倦矣。豆花聊以爲壽。

氏州第一 紅衣釣師圖

清渭通淮。富春采石。無聊蹤跡相似。曳玉腰金。賜緋衣錦。畢竟干卿甚事。戒衣花一朵。裝點漁郎風致。滿袖丹砂。仙人狡獪。者般遊戲。倒影綠波紅欲墜。算落豔。浮英相餌。竿拂珊瑚。身騎赤鯉。鏡展新荷芰。向蓮舟。呼太乙。共點點。霜楓同醉。孤鶩驚飛。應錯認。晚霞飄至。

十二時 爲吳姬李秋蓉作應陳竹香舍人請也

人生不幸無過此。才子美人爲最。在孝女者般狼狽。真不解箇中意。柳絮沾泥。楊花落溷。竟作蘇臺妓。抱浣塵。一卷新詩。小小銀鈎。泣寫秋蓉名字。恰待得。掃眉人至。

翠竹碧梧相對鏡裏紅。妝月中素影笑問非耶是。料三生石上因緣豈但今世險。
做出香銷玉碎。自題小照憔悴。釵腳頻敲燭灰將盡。總是傷心淚。把斷腸花葉。教郎
一一私記。

玲瓏四犯 前題

怨海茫茫將此情填作鏡光綠本。無可如何。淚溼青衫紅粉。更製玄璧徵詩。乞海內。
恨人憐憫。斷腸詞。何補摧殘。但屬有情都肯。風流自古無憑準。是前因。許多傷損。
脈脈思量當懺悔。莫怨老天殘忍。試想今生。即便今年今日。似卿卿兩箇。一般多少
悲忿。

齊天樂 水榭話舊圖

蒹葭水落闌干下。曾照老翁清影。水宿非舟。陸居非屋。賸得三椽篷艇。諸公臺省。讓
野鶴孤雲。烟霞簿領。書局隨身。鴛鴦湖上是箕穎。當時出岫歸林。怕獻嘲騰笑。終
焉此境。古鐵舟園。小長蘆屋。轉眼憑他兼併。兒孫追省。守處士蝸廬。百年何幸。換以

華堂問先生可肯。

留客住 商次紆夜雨懷人圖

最淒楚。是小樓者般孤另者般蕭瑟。又是者般風雨。一時愁緒如織。穿入海角天涯。情一縷。平生知己。算今年。今夜幾人孤處。誰共語。鐵馬含風。瓦鐙搖影。作弄秋聲。那不銷魂如許。太息輕裘公子。綠鬢仙郎。去留難自主。者般時候。想有人從此者般懷汝。

賀新郎 詠美人題紅圖爲宗芥帆作

霜作青楓色。響闌干。飛來一片。美人初拾。拭淨烟痕涼雨暈。把作紅箋輕擘。有半縷。秋懷脈脈。不是嬋娟寫宮怨。是新娘。學和催妝什。豪欲點。頰微赤。雲根一朵三生石。小花神。嫁他紅葉。此緣真得。不用鏡臺低語諠。郎貌未過三十。願添寫。紅衫人立。再拾階前紅一片。墨雙聲。補入和鳴集。郎更有。掃眉筆。

百字令 童二樹借庵詩意圖

子虛烏有問前生。後世我身何在。誰是主人。誰是客。空處向誰相貸。意蕊心香。雲車風馬。都是難酬債。偶然住脚。可知庵在。身外。一切莊列言詮。但增饒舌。轉見胸中隘。晝取團瓢歸夢裏。夢醒思之無奈。知覺因緣。虛無起滅。甚矣詩人憶。還他一卷。先生無挂無礙。

齊天樂 又題二樹討春小照

問誰修到梅花者。輸君獨能如此。筆吐寒香。意橫疏影。身作槎牙斜倚。江邨遙指。道雪滿千林。好春來矣。翻把扁舟。載將人去與花比。花枝較人何似。恐朱顏玉骨。不
如人美。冷韻幽情。素襟芳信。總在詩翁就裏。丁丁玉齒。儘細嚼微吟。共花眠起。驢背酸寒。論風流讓爾。

賀新涼 次韻題平確齋桐陰引鳳圖

樹影過簾柱。記當年。紗幮眠起。花甌共數。十載鈿車隨阜蓋。聽徧江湖涼雨。把一卷。循良新譜。綴向和鳴詩稿後。夜吟聲。響答蟾宮杵。酬唱樂者般嫵。雲霄小謫瑤臺。

侶。拭端谿。鴛鴦錦硯。采豪雙舉。玉茗穠開香寢畔。樓外蒼然平楚。過嶺覓珠娘鸚母。初試梅花妝額樣。美人蕉。紅傍疏櫺吐。仙蜨翅。掩堂廡。

笑別丹砂鼎。寫仙官。歸來句漏。移家相等。新築鑑湖三畝宅。合署蓬萊行省。暫住也。老天纔肯。小院涼生人並坐。海棠紅。偎熱秋蘭冷。靠一樹梧桐影。讓人迤邐終南徑。好夫妻。讀書雙眼。都如明鏡。雛鳳聲清依老鳳。總角定簪紅杏。背經史。銀餅將迸。階下宜男花又吐。小麒麟。以次爭馳騁。添幾箇。擎珠媵。

沁園春 題吳方甸刺史汴京紀游

比事屬詞。敦厚溫柔。春秋國風。是司馬游梁。年華正富。虞卿解印。著作彌工。良嶽烟雲。樊樓鐙火。一代興亡在此中。遺聞瑣。便箴縫錦衲。網綴魚蟲。敲來幾點晨鐘。更勘斷森嚴審異同。歎東京鼎盛。歡場易散。中原事去。夢境全空。兀兀觀圖。婆留索地。天使吳山易汴宮。一杯酒。又一聲長笛。才子英雄。

百六十年。人物風光。天中勝區。看金明池上。秋涼洗馬。玉津園裏。日落啼鳥。廣武興

悲夷門隕涕。七十侯生尙在無。傷心處。比學陽官闕。一樣荒蕪。幾番搔首踟躕。便寫向旗亭補說郢。似阮公講學。淹留尉氏。班生作賦。歎美東都。調語丁寧。叢談細碎。入手皆成一串珠。誰更要寫開元遺事。南宋新書。

百字令 周虎木小照

燕居而坐。是力田孝弟。明經才子。九命文章憎蚤達。廿載三冬文史。四韻敲槃。萬言倚馬。捷敏誰能似。登樓入幕。書生聊復如此。但須紅袖添香。綠衣司硯。何物誇金紫。聞道更番吟錦瑟。贏得佳人畫裏。媚矣三姝。豔哉三婦。粲者皆予美。唐書再撰。大臣將薦君起。

添字漁家傲 程筠榭拓谿漁父圖

門前百頃魚蝦國。老屋三閒。收取風潭色。小作栖遲非隱客。誰拋得。五湖一片揚州白。笑聽漁歌紗帽側。雨笠烟蓑。不是閒標格。赤壁襟懷風月笛。勞筋息。傍人漫認天隨宅。

畫船簫鼓江南路。冉冉涼烟。恰引乘鸞霧。璧月瓊枝聯玉樹。歸來去。鴛鴦一對隨鷗鷺。桑柘陰陰簾影護。畫裏人家。可便完婚娶。寫向輕綃題好句。雲水暮。花源那許漁郎誤。

燭影搖紅 胡孝廉翦燭雙書小照

池館涼生。晚風吹月黃昏乍。誰拋小鏡貼鷗波。肩影羅衫亞。兩朵珊瑚筆架。對沈吟、玉纖齊下。雙聲疊韻。鸞鳳和鳴。倩他描畫。越國江山。潞烟河景都無價。蓮花莊子且安居。過了今年夏。明歲曲江宴罷。彩豪簪、釵梁同挂。天街歸後。御燭光搖。細君歡筵。

金縷曲 題陳玉池小照

溟滓空無際。有人受、白玻璃界。最初之氣。展放槎牙玉龍影。凍蕊疏疏纔試。只數點、心含天地。不管百花何日綻。在雪中、未問調羹事。約鴻爪、共游戲。揚州官閣蕭然寄。任喧闐、淮南鐘鼓。竹西歌吹。夢繞林家三萬樹。香沁冷魂皆醒。爛嚼也、冰融珠碎。

便欲身居水精域。講孤高。兀傲皆無謂。誰解寫箇中意。

雙雙燕 定郎小影爲金棕亭作

忽然縈繞似飛絮。沾泥落花依草。凭肩握手。著處粉圍香嫋。又浴向清華沼。學睡醒。鴛鴦偎靠。恁般匿笑迴身。背面教郎看飽。誰遣離情相攪。要鏡裏藏春。雪中留爪。丹青現影。長貯春雲容貌。十七年來何處。怕也似徐娘已老。賺將詞客癡魂。展卷一齊銷了。

探春慢 同老圖

桐帽棕鞋。谿翁園叟。六枝靈壽藤穩。臨水登山。尋花踏月。鶴鹿銜芝相引。共說昇平事。同看徧。晚菘朝槿。喜無雜姓幽栖。敢說一家肥遯。正德年閒。諸老算比並前賢。後先招隱。宗法家規。衣冠禮讓。伯仲兒孫相準。耆舊黃山錄。羨遺韻。風流未盡。入畫須眉。儘人摹作真本。

賀新涼 題盧竹圃詞本後

公子年華妙。寫烏闌、清詞麗句。者般精到。小劫滄桑一番過。只許方平微笑。纔數徧、亂山殘照。廿四橋邊重徙倚。玉簫聲、不似當時調。江滾滾、發長嘯。淋漓醉墨多憑弔。怕聽他、牀邊蟻鬪。枕邊驢叫。記我扁舟尋噩夢。紅杏枝頭曾鬧。恨不倚、郎君烏帽。文字因緣遲廿載。但惺惺、相惜還相勞。請釋憾、莫終拗。去飲餘杭酒。似文簫、彩鸞夫婦。雲中攜手。家具而今無長物。並少圖書雞狗。是萬象、皆空之後。憂患仳離生水火。轉靈丹、鍊到功夫九。藥成矣。漫迴首。斷橋殘雪蘇隄柳。定新居、水光山色。好安門牖。釋子孺人共歡喜。慈母頻開笑口。便永久、康寧長壽。題徧西湖僧寺壁。看明年、柳汁霑衣袖。陳平壻、困非久。

定風波 高東井陳蓉圃聯句小照

韓孟韶年可得如。竭來東野井邊居。展放桐陰遮別館。青滿。仙郎開現兩芙蕖。冠玉姿容文字伴。嵇阮。清詞麗句吐徐徐。鸞鳳交鳴吹六琯。長短。雙聲搖曳響瓊瑤。雙鳥奇文二鬼詩。吟來不稱少年姿。爭及風標兩公子。如此。謝莊王彧比肩時。他

日鬢纒看不似。就裏者般情況好尋思。合璧連珠稱二美。歡喜。杏花簪鬢莫教遲。

邁陂塘 秋萍

寫秋光難尋匹練。溼銀猶被輕蓋。不放樓臺浸空闊。換了荷花世界。烟水礙。待翦出鷗波。那有并刀快。黏天無賴。怕鋪滿明河。誤他烏鵲。接翅碧雲外。遮掩處。牽惹荇釵菱帶。淩波襪子偷曬。鏡裏山痕無一點。誰見秋孃眉黛。飄泊債。有蕩子離妻。種種傷心在。許多機械。算蛟落寒罨。蟹迷新斲。更比網羅壞。

四字令 高館疏桐爲王梅軒作

修篁翠排。疏桐翠揩。滿檐天樂飛來。是琴材。笛材。珍珠迸階。玻璃溜苔。白雲滿地。皚皚。聽泉聲暗迴。

凭軒憶誰。凭闌待誰。幽人雅擅臨池。是羲之獻之。香絲鬢絲。簾絲釣絲。此閒少住些兒。看山泉出時。

蝶戀花 引鶴圖

妾意君情花遠近。轉眼胎禽，卻被松枝引。再訪玉真雲路隱。人間祇有情難盡。鬢影衣香留畫本。寫自何年，色韻都相準。打鴨隨雅天最忍。柔腸莫被相思損。

賀新涼 送汪劍潭學正歸揚州

所事俱停妥。挂帆天、澄江如鏡，好風移舵。略現烏紗紅袖影，才異鷗夷一舸。有篷底、比肩人坐。笑對明妝理琴瑟。畫秋山、兩筆青斜。小姑髻，並鬢鬢。心情比較來時可。到慈闈、文鴛一對，金萱一朵。卻趁春來郎及第。鏡裏芙蓉阿儻。要一品、朱衣雙鸞。只合移家紅軟住。待賢妻、問漏卿卿我。曳魚珮，向青瑣。

又 錢鍾介伯孝廉返越卽送春試

買定秋江艣。鯉魚風、三朝三暮，把君留住。已是離情禁不得。幾陣芭蕉愁雨。十二載、惟吾與汝。貧病更番相倚苦。又兩年、同臥歸來墅。稱眷屬，到兒女。多君有母觴頻舉。展慈顏、芝房列饌，身如藥樹。苦憶并州山水窟。攀挽慈裾未許。向禹廟、蘭亭歸去。舊路分明魂夢熟。草黏天、南浦連東浦。平安字，雁邊取。

別我梅花舍。繫離心、琴絃張壁。書燈留架。教得三雛皆振羽。費盡先生冬夏。算浙吏公車將駕。有策金門當再獻。董生帷久向藏園下。報慈母、鵲聲乍。愆期歸妹多年罷。鬢鬆鬆、東家醜女。明年重嫁。笑整朝衫隨鵲立。榜出天門光射。看一桁、宮袍花亞。聽唱郎君名字好。是鍾生、及第當頭謝。越潮湧、又東瀉。

又 次汪劍潭韻題管平原梅花

獨立空山影。認夫君、顏唐風致。峭寒心性。長劍高冠布衣叟。洗盡人間金粉。似老樹、著花齊整。四世三公好枝葉。讓先生、破屋眠欹枕。調羹信、漫催警。雪欺霜壓能安穩。抱孤芳、儘教人看。儘教人詠。蚤放遲開隨氣候。爭甚南山北嶺。合伴我、堂東玉茗。檀板金尊歌翠羽。好些時、忘記冰天冷。不用寫、探春艇。

疏影 題吳仲圭竹譜不全卷子爲張晴谿作

疏枝嫩葉。放烟梢數寸。襪襪鸞羽。半幅霜縑。幾叢寒碧。知被誰家割去。一樣篔簹憐。偃蹇算仍仗。坡翁記取。認至正、己丑之年。晝日將逢端午。想見湖州老友。偷彈斑

竹上淚痕如許。遺墨流傳。古意蕭疏。中有夜風涼雨。得酒枯腸。芒角出馬。遠殘山難補。躑躅襄陽。半個人兒。愁煞梅花庵主。

琴
室
樓

詞

運
彰



王昶（雍正三——嘉慶一二）

字德甫。號述庵。又稱蘭泉。江蘇青浦人。乾隆十八年進士。從阿文成公平大小金川。在軍九年。授鴻臚寺卿。累遷至刑部右侍郎。以病乞休。工詩詞古文。精於考證。所著金石萃編國朝詞綜湖海詩文傳春融堂集等。都數十種。

琴畫樓詞

青浦王昶德甫

綺羅香

嫩柳縈煙。疏花謝粉。一夜東風吹雨。獨客西窗。偏記舊時歡緒。卷繡箔。月照紗幮。點銀葉。香添寶炷。最殷勤。研粉吳箋。薔薇佳約寫吟句。如今何限淒怨。閒了吹笙小院。彈棋深墅。梅潤空箱。忍展春衫白紵。人遠隔。青瑣西樓。夢還迷。淶波南浦。又江城、冷漏殘鐘。斷魂誰共訴。

琵琶仙 秋日過薛澗湖

黃篾衝波。漸迎面。策策寒颿淒凜。紅蓼開滿。煙洲沙鷗正涼寢。遙望裏。冰奩一片。映依約。翠峯同浸。水國樓臺。山家門巷。溪樹交蔭。又多少。釣叟漁童。向菱浪蓮泥下。柴罍。最好故鄉秋老。有蓴鱸。幽品。須縛個。苔磯草屋。倚枯藤。看遍楓錦。底事湖海飄蓬。鬢華霜沁。

瑣窗寒 橫雲山

桂棹衝煙。篷窗載酒。曉停游櫂。空山秋老。石逕暗飄紅葉。傍籬根、金鈴乍開。但憐一片霜蕪壓。況暮禽喚雨。殘蛩咽露。蘆花如雪。數折登雲疊。見蒜影重簾。韭花遺帖。京華仙客。忘了東山游屐。記年時、階鶴几琴。南村舊句誰賞愜。剩平湖、倒浸鸞環。翠浪生寒月。

洞仙歌 自題小照

梨夢雲遠。恨春愁誰省。自寫吟魂伴梅影。念暈紅詞句。慘綠年華。都付與、小閣輕寒薄病。雨絲風片裏。蕉萃相如。懶踏尋芳舊香逕。小榻颺茶煙。碧葉惜惜。好占取、松溪蕙磴。只一片、傷心畫難成。怕點鬢秋霜。又添明鏡。

丁香結 雙桐書屋本葉氏廢園今借爲學舍前松桂讀書堂牆下有小橋曲

水頰幽寂

松桂團團。雙桐初引。前後簾波相映。好緣陰滿徑。塵不到、芳草叢苔俱淨。湘簾時半

捲麻芸架圖書清整。祇聞枝上。玄鳥似伴。幾番清詠。遙應。又吟罷。微行闌外。躑躅花影。短約斜通。蘋絲蓮葉。小池如鏡。何人更共弦誦。道茗爐香鼎。試筆牀翡翠。坐到日斜梧井。

南浦 渡柳微雪山村汀樹盡入玉壺世界中風景蒼寒扣舷歌此幾令凍鷗拍拍驚起也

雲色半晴陰。望疏疏。凍雪猶棲亭埃。浦澈正蒼茫。冰漸響。風定湘紋微皺。香林莫認。但聽煙外殘鐘吼。十里江鄉無限景。遙露幾稜寒岫。回思鐵笛吟仙。泛瓜皮。每共詩朋石友。茸帽倚篷窗。清游好。獨坐試香溫酒。何時小隱。漁莊閒試垂竿手。更做松溪勻粉墨。寫出斷蘆衰柳。燕文貴有松溪殘雪圖

甘州 酬張大木先生

正蕭蕭朔雪暮寒餘。西風響荆扉。歎荒江老屋。橫橋小艇。訪戴人稀。乍喜白家菱角。剝啄寄新詞。多少殷勤意。譜入烏絲。知是柴桑清興。但香添銀葉。琴按金徽。向禪

燈梵筴老去作心知。念生涯、寒蛩凍雀。更何時、結襪試荷衣。相隨往、尋梅問竹。小坐苔磯。

更漏子 章練塘鄒氏東樓雪外同鄒薇仙邵玉蕖作

玉爐寒。銀燭冷。已是黃昏風景。傾桂酒。簇椒花。春盤薦歲華。風蕭屑。三更雪。偏覺吟情難歇。村柝急。寺鐘鳴。南窗月半明。

擊梧桐 泊橫塘

十里橫塘路。吹遍了、幾陣催花微雨。月近燒燈候。畫樓上、已按箏絃笛譜。魚天雲淡。鷗波水軟。隔岸垂楊萬縷。鴈齒紅橋外。望鄧尉、西面巒環無數。沽酒帘斜。焙茶香遠。樂事江邨如許。況是梅開也。臨水處、兩兩么禽弄語。蠟屐尋芳。第一難忘。是舊日、秦娘繡戶。待秋來、採蓮歌起。重放柔櫓。

倦尋芳 胥江夜泊

一溪碎雪。十里殘陽。吳市初夜。倦客烏篷。斜泊姑胥城下。綠檻官橋。排鴈齒。紅簾妝

閣分鴛瓦。傍荒祠。看靈旗半捲。怒濤如乍。況正值梅邊寒緊。珠絡藏香。元夕近也。月上燈街。幾許鈿車羅帕。賣酒樓臺人擲笛。傳柑門巷。衣飄麝。寫吟箋。作昇平。水天閒話。

惜餘春慢 春雨初霽移舟支硎訪南北二禪寺過訪鶴亭松影在地爰禽時

語塔表花鈴與鐘聲聲相應石室寒泉灑人襟袖憩息者久之斜陽欲墜尋徑下山而淡月黃昏已印前溪矣隔水簫聲徐出層樓曲檻中篷窗孤坐置酒挑燈遂成此解

綠滿籬根。青迴岸觜。已覺雪消寒定。筇枝劃蘚。屐齒黏泥。來訪南峯曉景。正值東風乍晴。松響禪關。鳥啼僧逕。看孤厓遙挂。飛泉一道。玉波春冷。有古塔。遠倚花宮。琅璫殿角。相和上方清磬。鶴亭雲罨。魚尾霞醺。取次水昏煙暝。銀魄還明。隔溪竹屋簫聲。畫欄燈影。算江山如此。那能忘卻。五湖游興。

憶舊游 由支硎而南入寒山過法螺菴卽趙凡夫與陸卿子偕隱處也高風

如昨渺渺予懷

正偏提載酒。不借穿花。人到空山。曲折棠邨裏。問盤陀舊築。一片荒寒。昔年白雲樓。隱竹石共流連。況揚畫絃詩。紅閨更對翠袖吟仙。幽閒阿蘭若有飯。盍春蔬。香印沈檀。鶴老高人去。賸鳥啼松逕。梅臥苔欄。冉冉夕陽西下。疏磬出禪關。祇回首蒼崖。千層碎雪飛澗泉。

曲遊春 靈巖

雨後春山潤。向巖村西去。煙樹零亂。蠟屐衝泥。傍禪林試訪。館娃宮苑。幾曲寒松偃。問石徑。采香人遠。歎當年。玉井銀牀。都付蒼苔碧蘚。悽惋。繁華夢短。剩響屨廊邊。幽鳥啼怨。重上琴臺。望孤篷雪浪。青螺千點。登眺情何限。漸殿角殘陽一線。又早佛磬煙沈。梵燈風顫。

高陽臺 天平

載酒輿輕。尋詩筇健。芒鞋早蹋天平。山翦雙眉。煙中八字斜橫。么禽警起苔梅謝。款

東風初語吳鶯。看春光過了，燒燈漸近清明。周郎游記重吟寫，歎熏香新葺，誰續茶經。一道寒泉飛來空和松聲。草堂西崦荒基在，念生涯、合與鷗盟。又何時、石磴花龕，長伴殘僧。

女冠子 眞娘墓

虎邱寺側對斜陽，一片荒冢。苔碑久雨蝕，正柳霑殘露。梅染餘熏，倚風微動。想年時歌舞地，玉鏡飛鸞，碧簫吹鳳。到今惟有幾曲危亭，山腰斜聳。聽疏林幽鳥，聞歌啜看層臺，穿雲冷月還高湧。梵宮漏靜，祇禪燈粥鼓，喚醒海棠春夢。徐孺孤墓近，應是香魂，夜闌相共。灑楚花湘草，點點慣與愁人吟諷。

浪淘沙 題素心並頭蘭畫卷

鬪掃試新妝。略注鉛霜。寒崖冷谷占幽芳。月下閒階雙笑在，連理唐昌。風雨夢三湘。損盡鵝黃。冰絃彈怨露華涼。祇恐鈿車同去也，寫影雲房。

更漏子 梅汀小幘

曉霜寒。斜月冷。誰認石屏清景。江外驛。竹閒橋。依稀入畫綃。梨雲曙。玄禽語。銷盡
蘭膏小炷。縞袂客。幾時逢。斷魂清夢空。

清平樂

傷春病酒。人比梅花瘦。看到花殘春已透。況更青梅如豆。斷腸芳草天涯。絨情慵
訴琵琶。欲寄別來蕉萃。麝煙親畫蟬紗。

臺城路 友石軒印譜

鄱陽石帚飛仙後。何人更溯三古。蠶尾形存。蠶頭迹渺。空憶埤蒼訓詁。幽懷誰訴。念
景伯遺文。杜林殘語。往冊銷沈。摩挲貞石半風雨。高人自多逸趣。愛收圖印在。編
作小譜。黃蠟堆盤。青田盈篋。宛對秦碑周鼓。西泠古渡。判喚個蜻蜓。訪君幽處。金薤
琳琅。商略共容與。

更漏子 爲玉蕖題畫

乳鴉啼。涼鴈語。人在小芙蓉渚。蓮漏杳。篆香凝。蘭期卜夜燈。桃鬢膩。梅簪墜。玉鏡

禮妝慵理。愁擁瑟。怯憑欄。西風翠袖寒。

秋波媚

黃葉聲多顫晚風。古寺遠鳴鐘。那堪更聽。一繩新鴈。四壁殘蛩。輕寒不管人孤睡。翦翦入珠櫺。涼生楚簟。夢回山枕。香燭燈紅。

虞美人

迴廊曲檻苔花壁。曾記題吟筆。西窗別夢已經年。回憶翦燈話雨隔溪煙。園林秋色今如許。合付幽人住。數株松桂讀書堂。應是月明紅袖夜添香。

消息 甘蔗

石蜜漿寒。相如舊日。曾題詞賦。種滿芋田。根連瓜堰。幾度逢春雨。畦丁慣是。鎌磨新月。剛向短籬荒圃。奈孤僧、寒驢秃尾。行遍翠微山路。冰刀試切。勻堆碧盃。抵似銅仙清露。置酒論兵。臨花校射。休說英雄語。紫梨垂處。黃花開後。臥病徒添悽楚。憑誰唱。梧桐葉落。玉京人去。

百字令 雪

茅齋向晚。正江山一望，荒雲漠漠。黃葉灘邊風更緊，吹徧蘆簾紙閣。酒舍帘低，僧房
逕斷，誰掃橫溪約。吟朋不到，閉門無限蕭索。遙聽老樹啼烏，清寒料峭，石鼎香煙
薄。松火擁爐閒索句，最憶羅浮舊約。料得煙梅，竹枝深處，漸吐紅椒萼。明朝喚艇，水
南還試芒屨。

疏影 梅影

山房寂靜。正苔枝如玉，寒月交映。暗上湘簾，遙印羅幃，最引孤山詩興。疏香滿地黃
昏後，看幾度斜斜整整。到夜闌，依舊欹眠，不怕笛聲淒冷。紙帳殘燈，夢斷翠禽清
響處，雲澹煙暝。舊雨江南，春信迢遙，剩有霜條難贈。凍痕應倩松煤染，細暈出竹邊
清景。料深閨，誤認幽花，欲試曉來妝鏡。

河傳

翠浦。香雨。梨花飛雪。柳花飛絮。綠波春草，小河橋，魂銷可憐歸路遙。瓊窗話別還

酒。今分手。忍聽唱紅豆。上南樓。望西洲。離愁。短篷雲外舟。

浣溪沙

聽得銀屏玉佩搖。雙雙乳燕欲歸巢。柔蔥一捻儘魂銷。最是有情憐昨約。那堪無夢度今宵。畫牆微雨打芭蕉。

魚子單衫快暮寒。玉釵重整曉妝殘。一雙和笑鏡中看。花逕風柔枝嬾娜。竹窗日上影檀欒。松煙親畫小眉山。

一翦東風到碧紗。粉牆輕暈海棠花。箇人睡起正天斜。金斗微勻裙上蝶。檀梳細掠鬢邊鴉。閒催鸚鵡喚煎茶。

柳下紗窗月下階。藕絲衫子茜紅鞋。東風恰值晚花開。銀甲調絃低鳳管。玉擘分局賭鸞釵。夜深香夢儘徘徊。

風入松 題陳仲醇江墅晚歸橫幅

綠秧畦外板橋斜。水漲平沙。紙窗竹屋梅風靜。聽池塘、一部鳴蛙。白石清泉身世，青

苔碧草生涯。梵音猶記老僧家。夜漏還餘。又魚射鴨人歸未。亂前村。短棹咿啞。細雨閒敲棋子。油燈落盡殘花。

洞仙歌 和友人作

吳船三版泊蘋花水岸。疏柳絲絲亂鴉晚。向秋千架底。屈戍窗前。移款步。卻喜者番重見。同雲催薄暮。砌竹蕭森。忽聽西風送微霰。分座試藏鉤。翠袖柔葱。含笑勸。桂醪荷淺。便絮語。殷勤到更闌。又獸鼎微溫。鳳燈輕翦。

鴉棲疏柳。看月明花嶼。換了單衫理茶具。正鵲鑪香細。鳳蠟花殘。深夜裏。細按松陵遺譜。吳淞春水活。底事羅囊重。向迴廊灑梅雨。火候到嬰湯。一縷濤聲。漸響遍。碧紗窗戶。把小小。清盜淪春旗。伴消渴情懷。暗吟詞賦。

廉纖細雨。正落花時候。忍向旗亭折煙柳。對柔波畫舫。芳草官橋。最苦是。此度忽忽分手。夢華遺事在。曾記重逢。雪打疏櫺翦春韭。玉鏡整殘妝。添了紅綿。挑短燭。溫香試酒。歎分薄。鴛鴦又驚飛。指後約薔薇。淚痕霑袖。

鷗沙亭外聽秋風。微動銀蒜紋。簾寶鉤控。正芙蓉簾冷。豆蔻湯溫。新浴後。桂魄一丸孤湧。碧羅雲影淡。疏柳濃陰。幾點池荷。暗香送。簪了素馨花。閒倚湖山。按舊曲。玉簫吹鳳。漸珠露。輕寒透。吳衫愛半枕新涼。五更幽夢。

水天閒事。早繁華夢斷。司馬青衫淚痕。記燒燈巷陌。擷笛樓臺。重過處。多是梨花門掩。年來憔悴甚。作客江湖。回首寒雲。故山遠。檻外又西風。葉葉芭蕉。攪一片亂葦哀鴈。向酒醒。更闌自尋思。付老去。生涯佛燈禪版。

月華清 盆梅

宮粉香飄。仙衣雲臥。幽花獨占窗戶。猶憶青鞋。曾訪村南幾樹。聽殘鐘。茶磨山房。踏曉雪。銅坑石路。淒楚。正板橋流水。翠禽交語。受盡冷煙疏雨。倩健步移來。碧瓷深貯。爆竹傳柑。喜作新年伴侶。最娉婷。春色三分。好珍重。芳心一縷。留取。莫等閒輕按。江樓笛譜。

摸魚兒 丁卯春仲送廖覲揚入都

正江南、野梅零落。垂楊初展金縷。輕衫破帽尋芳地。最憶舊遊情緒。君又去。向野水荒村、立馬呼官渡。離愁幾許。念茂苑鶯花、蓮塘風雪、曾共寫吟句。長安道、幸有銅駝俊侶。翦燈深夜相語。應知黃葉山農集。傳遍笛家簫譜。須記取。是第一雲藍、早寄吳中路。蘆汀蓼渚。待挂席歸來、木蘭艇子、同泛綠蓑雨。

金縷曲 登蒜山

波浪兼天湧。倚晴空、雲根一片。水邊龍嵒。磴滑苔花無路到。誰縛茅亭孤聳。喜草屨、筇枝堪用。吳楚青蒼分極浦。望大江、萬里長風送。海門闊、水煙重。金焦幾疊銀盤捧。最蒼茫、雲陽杜野。遙連鐵甕。蕭蕭沈戰壘。憑弔六朝如夢。但估客、帆檣橫縱。北府冰廚無限好。倩谷兒、夜市偏提控。判醉待、月流汞。

月華清 秦淮舊院

一段清愁百年遺事。翠苔零落碧瓦。記得年時。多少歌臺舞榭。繡檻裏、雲鬢飛鴉。珠箔外、玉鞭嘶馬。良夜有蘭舟徐泊。寶燈斜挂。回首江山如夢。祇泣雨籠煙。柳絲盈

把水綠秦淮。還繞赤欄橋下。將南都、花月新聲。作北里、水天閒話。吟寫任墨痕。淚點淋漓羅帕。

高陽臺 題板橋雜記後

南部新聲。東京舊夢。留傳猶在長橋。書記重來。寫成淚涓鮫綃。赤眉黃犢烽煙近。尙流連、月夕花朝。且休誇、玉麈香囊。王謝風標。甘陵卻剩諸年少。伴銅仙露冷。綠暗紅消。結綺臨春。江山同付寒潮。手提金縷還難問。恁青溪、冶葉倡條。再休令、賀老淒涼。譜入檀槽。

采桑子 夜泊梁溪

櫓牀冷撥龍山下。夜柵茶樓。古塔雲邱。紅葉蕭蕭打客舟。寒衾自倚孤篷宿。商笛前洲。漁火中流。併作蓉湖一片秋。

金縷曲 宜興道中

歲晚漁村閉。早平蕪、斜陽一抹。斷蘆風起。衰柳棲鳥啼不定。黃葉聲疏墮地。漸佛院、

寒鐘林際。石渚煙汀。雲欲暝。剩彎環。幾點青螺髻。停柔櫓。泊沙觜。蕭蕭雪打孤篷。碎。倚船窗。鑪溫松葉。飯炊菰米。白髮青燈。思客子。添得高堂憔悴。忍重話。薄遊情味。橘社尊鄉。偕隱好。辦荷衣。定作歸耕計。清夢到。故園裏。

采桑子 皋橋感舊和劉跂三

彎環淥水皋橋路。亞字牆邊。丁字簾前。曾記清遊繫錦鞵。重來已斷繁華夢。零落珠鈿。寂寞箏絃。夜雨殘燈話往年。

南柯子

野火山中屋。疏烟竹外樓。葦條風起送篷舟。又是一番霜信。下沙洲。白髮高堂淚。青衫客子愁。蛛絲應是挂羅幃。早晚片帆歸去。泖西頭。

月華清 長至後舟過溧陽天寒歲晚猶泊江湖回首故山悽然欲絕也

雪颭蘆花。霜酣楓葉。枯楊搖曳殘縷。一片西風。長伴愁人羈旅。宿江程。單枕燈寒。過水驛。橫橋月苦。聽取。又幾番哀鴉。幾聲柔櫓。篋裏征衫如許。望翠黛彎環。故鄉何

五下 王 賦 報 孤 小 由

摸魚兒 蕁

正吳江采菱歌罷。涼風一夜蕭颯。鳧葵點點天然細。長繞露蕪煙荻。誰記憶。是薄宦京華。歸隱耽幽適。扁舟岸側。愛錦帶參差。銀絲膩滑。尋取遍蘭澤。充家膳。付與廚娘親摘。黃花情味須識。蘋洲況有新菰米。無限鄉園秋色。清興劇。好點向青瓷。玉筍凝香液。松窗月夕。和綠鮒庖霜。紅鱸縷雪。沽酒恣浮拍。顏氏家訓。荇水草圓。葉黃花似蕁。

臺城路 蟬

千秋未了齊宮怨。年年斷魂誰訴。槐蔭當檐。柳絲拂井。又聽琴絃如許。故園殘暑。想一樹無情。三更還舉。我亦能清。蕭條同飲夜深露。西風又送冷雨。柴門倚杖處。落葉滿戶。野渡秋殘。滄洲人遠。多少別離情緒。瑣窗獨苦。向帕子紅羅。一雙描取。剩有吟蛩。砌苔寒共語。

桂枝香 蟹

江楓欲舞正舫泊。斷沙榔歇古渡。截住秋潮曲。一燈孤炷。頻聽郭索殘。虜裏恁橫
行。爬沙淺渚。星稀露冷。葦梢細縛。青篋滿貯。好勝似、江瑤雪乳。付松火山廚。香橙
細縷。再搗薑芽。快佐槽頭菊醕。持螯況味清如許。又記起、年時情緒。銀鐙影下。玉纖
親擘。夜涼庭戶。

鬢雲鬆令

吳中張憶孃爲北里名流。曩昔往來蔣繡谷先生家。因爲寫簪花

小照。憶孃歿後。是圖亦飄泊不省所在矣。繡谷令嗣蟠漪。得于竹西市肆攜
歸。重付裝池。縑素猶新。如見采蘭攏鬢時態也。

理雲梳。勻石黛。鬧掃將成。小折芳蘭戴。杏雨梨煙渾不愛。一縷幽情。合與幽香配。
酒場荒。歌榭改。江北江南。風貌崔徽在。展玉鴉。又懸竹。簾。淺碧哥窰。好插湘花對。

百字令

秋夜聞芭蕉雨聲

一枝冷燭。記春時。曾見斜遮窗戶。幾日蘇臺寒信到。添得秋聲難數。南浦哀砧。西樓
遠笛。北渚離鴻語。石闌干外。并教風顛涼雨。何況紙帳殘燈。更闌酒醒。恰值人鬪

旅便是江鄉歸夢好。只怕者番無據。羅扇閒來。緘書拆後。忍向林邊住。紅闌此際也。應題徧愁句。

天香 煙草和厲太鴻作

綠映滄波。青分海樹。憑誰種向瓊島。珠舶攜來。花畦種後。製出香絲多少。羅囊暗貯。還恰值。筠窗秋曉。幾度春葱輕剔。閒拈碧荷。笛小。獸炭又殘。瑞腦撥餘熏。爲禁寒峭。一點絳脣開處。蕙風低裊。薄醉依稀犯卯。伴岑寂。何須玉尊倒。飛遍巫雲。翦燈夜悄。

銀鴨煙銷。玉鳧灰冷。疏燈落盡殘燄。小挈筠筩。閒攜錦袋。試向短檠輕點。朱櫻欲破。喜一縷。仙雲冉冉。桃頰徐生薄暈。羅衣半凭畫檻。小樓晚寒斜掩。唾珠圓。細黏蠻毯。忽憶海天波靜。載來吳艦。今煙草到處有之。而由福建海舶來者爲多。幾片蘭香重染。奈荀令愁深。賦情減。怕惹相思。夜闌淒黯。吳中有蘭花。煙相思煙。

清平樂 小停雲畫幅爲岡齡作

樓櫺翠篠橋外煙波繞。一曲鷗沙無限好。祇乏詩人吟到。水窗竹屋涼多。石闌斜挂漁蓑。容我藜牀秋夢。閒聽夜雨疏荷。

百字令 藝圃同姜光宇游卽其高祖學在先生寓居也光宇故又以度香爲號

霜飛白簡。記萊陽當日。瑤階抗節。一自龍眠行戍去。擬向江邊葬骨。社稷滄桑。家鄉烽火。淚灑霑襟血。吳閭小築。寓居何限淒咽。縱有鵝館鷗池。肯教魂夢。忘敬亭風雪。回首秋墳楚雲隔。泉石都成消歇。佛閣燈紅。香橋柳碧。付與茶檣列。小祠猶在。壞廊半護苔碣。圃已爲市人茶肆。惟二姜先生祠在。虎阜內有鄭篋隸書碑刻。

一枝花 送凌叔子之揚州兼訊吳梅里

碧浪生南浦。又是送君西去。小桃花謝也。灑紅雨。計到雷塘。十里春風暮。綠柳拖金縷。廿四橋頭。珠簾低映眉嫵。舊事堪悲楚。休問寒潮瓜步。玉驄游遍了。蜀岡路。酒幔茶檣。好覓吹簫伴侶。三分明月裏。憑說與吳剛。別來空綰離緒。

臨江仙 過甫里訪許子遜

過了磬清路。三篙淺水。一片涼風。傍沙觜。煙村面面疏楓。幽蹤。問鷺酒甕。焙茶竈。往事都空。蘋花暝。有綠頭繡鴨。飛過湖東。詩翁罷官歸隱。老去長伴耕農。管漁莊蟹舍。豚柵牛宮。從容。記袁江上。孤舟裏。愁聽征鴻。鄉園好。且同攜短櫂。吟遍吳淞。

新鴈過妝樓

朱適庭新納。姬人自琢新詞。爲贈和之。

鶴怨秋風。菱花冷。長閒釵影簾櫳。鈿車迎到。又見寶髻盤龍。杏子衫溫。金跳脫。藕絲裙。顛玉瓊瓏。問芳蹤。蕊珠再見。休擬香東。鴛幃香消夢醒。恰翠螺低掃。並倚熏籠。小屏六扇。箏鴈斜按柔葱。書牀笑攜蓮葉。又索取。新詞羅帕紅。煩料理。有酒邊茶具。窗下詩筒。

瑤華 新蝶

煙沈蕙徑。雨宿花房。憶舊時佳麗。秋霜夜冷。便忘卻。那日紅情綠意。殘梅飄盡。又重見。香鬢粉翅。想昨宵草滿南園。難認碧紗裙子。料應韓壽芳魂。愛飛入妝樓。偷伴

春睡野蔬江橘團。扇底尙帶前身風味。溪堂詞客重寫句。玉羅窗裏莫待逢。茄葉新蟬。纔染藤溪素紙。

惜紅衣 題閨秀方芷齋在璞堂吟稿

繡結衣船香添篆鼎。印梅窗靜。梳罷蟬雲。玉臺試芳穎。紅絲小硯。更染取。松煤翠餅。新詠。藤紙寫來。愛鉛華掃淨。妝樓獨凭。一片西冷。鷗波漾明鏡。山華水葉。盡是入詩境。喚起粉奩清思。賦徧酒旗煙艇。想冷吟如此。那數蘋椒題茗。

法曲獻仙音

白苧衫輕。青羅扇小。約略春歸時節。竹浦橫橋。荻溪短櫂。曾經去年離別。記款語。雲屏底。忽忽帶愁說。遠山疊。問誰遣。溯紅題葉。空剩取。幾點薜階印屨。細檢舊香羅。寫相思。付與吟筵。冷院黃昏。忍更聽。玉笛聲咽。伴殘燈孤榻。祇有一丸涼月。

秋霽 別吳企晉三年復遇於秦淮水閣風塵寥落有歸隱吳山之志時新雨

初過涼颿微扇相對惘然爲填此解并索凌叔子錢曉徵諸子和之

放艇秦淮。記綠檻紅窗。景色如故。柳葉風疏。蓼花煙暝。望中幾番涼雨。相逢倦旅。舊歡重按巴山句。訴別緒。曾記對牀。尊酒話幽素。江國秋早。橘里萸鄉。好尋前盟。沙外鷗鷺。問何時。橫塘一曲。荷衣換了。伴君住。回首俊游清夢阻。最斷魂處。又是水榭懸燈。板橋橫笛。夜歌金縷。

南鄉子 豆花

溪雨初肥。幾簇疏花繞竹籬。滿地秋陰清露下。良夜。好約鄰翁相對話。

摸魚兒 芡

正江南。鴈奴來後。幽花向日容與。采菱歌罷西風起。十里淡煙微雨。秋色暮。漸翠蓋蕭疏。雪點殘蘆渚。孤篷短艣。掬重疊羅囊。參差玉粒。竹竈桂薪煮。淒涼味。又值新寒一度。青霜落葉滿樹。當年額上相思夢。多少結茅情緒。須記取。看堆向柴哥。膩滑凝秋箸。鄉園甚處。趁碧蟹橙香。紅鱸菰冷。歸隱伴鷗鷺。

桂枝香 薑

半畦秋澹。剛幾簇纖芽。勻排村店。一縷輕紅。不似筍胎葱莖。山僮致到柔尖潤。尙溜雨。沙痕微染。擣餘蟹白。嘗來碧盃。清寒漸減。和薄醋。酸風掩冉。值登盤郭索。燈明酒醞。問訊行廚。祇少黃橙同糝。泖湖况有蓴絲碧。記佳味。吳孃親點。如今但憶。柳家新樣。誰人手斂。

憶真妃 秋葵

數枝斜曳疏煙。晚秋天。看取宮黃淺樣。綺窗前。寒風定。微霜冷。最清妍。約略玉人病起。鬢雲偏。

臺城路 寄懷鳳喈

歸雲閣外梅風軟。藤窗正臨芳渚。粉箬評茶。香羅浥酒。多少天涯俊侶。相逢倦旅。看數點孤帆。數聲柔櫓。短屐黃桑。蹋泥更上翠微路。分襟重唱南浦。向滄波長笛。時夢漁父。柿葉湖亭。蒨花水港。已近殘秋節序。吟朋甚處。想門掩柴桑。研箋題句。好約聯牀。夜燈同聽雨。

大聖樂 家存素留寓楓橋已經匝歲翰墨之餘與其子蓼菴兼修梵行日來
小住青瑤池館因言婁水百餘年詞學鹿樵生體綜北宋未極幽妍至小山
漢舒今培罔懷素威穎山出乃能上繼浙西六子同時作者武林則樊榭授
衣廣林則漁川澄里陽羨則淡存及位存兄弟樵李則南薌春橋穀原吳中
則企晉湘雲策時升之共二十餘家各擅其工卽南宋未有其盛也衆以爲
快論微吟薄醉之餘填此記之

水榭吟鷗山齋簇蜨尋春此住喜連朝側帽同來揚畫譚禪不厭臨風絮語見說倚
聲姜張後逮秋錦茶煙皆妙緒今何許是一曲婁江重新樂府烏衣無限佳侶謂
小山萍虛香雪別花四詞况論到曇花猶共詡盡東吳西楚舞裙歌扇留傳法部蘭
舫半帆溪湖近試按拍飛觴同證取憑君數付麻沙並傳千古

惜秋華 滴庭招同來殷雨中泛艇山塘落葉蕭蕭溪邊疏柳皆颯然有秋暮
意予本愁人能無江潭搖落之感耶

波冷桐橋。正蘋花零亂。藕花憔悴。一櫂吳船。斜停綠楊絲裏。西風慣作秋陰。送涼雨。菰蒲聲細。雲起把、遙山掩了。數椽寒翠。猶憶尋春地。有歌珠幾串。粉柔香膩。短夢忽忽。空惹庾郎愁思。酒邊幸有吟朋。共攜屐。小亭閒倚。歸未。聽禪林、暮鐘煙際。

八聲甘州 送沈歸愚先生遊天台

記天台、萬仞削東南。寒雲湧晴嵐。望赤城突兀。瓊臺縹緲。玉鏡澄涵。苔壁藤橋倚處。飛瀑灑空嵌。冷月千山裏。梵響茅菴。喚起謝公清興。辦竹兜笥。芒屨筠籃。向懸崖絕澗。杖策恣幽探。笑生平、游蹤寂寞。祇夢魂、夜趁浙江帆。期何日、有團蕉地。結個花龕。

二郎神 雨後追悼玉藻

分襟南陌。永別青門詞客。歎冷卻、杜陵舊社。空有寒風暮笛。應是鮑家墳上路。吟遍了、曉楓秋色。看塵滿玉琴弦。灑淚念疇昔。還憶雞鳴埭下。烏衣巷側。趁夜月、鞭籠翠袖。閒訪茶檣酒柵。醉墨吳箋詩卷在。但回首、俊遊悽惻。最愁是、翦燭西窗。夜雨簷

聲蕭槭。

摸魚兒 贈趙飲谷卽送其之揚州

問江南采香詞客。生涯長是羈旅。邠卿老矣悲秋甚。鬢溼霜華千縷。新樂府。愛粉字吳箋。重唱橫塘句。厲太鴻贈君詞有斷腸重唱小橫塘粉字開還掩之句清吟細譜。似石帚梅溪。蘋洲玉筍。此外那堪數。吳船好。猶在滄浪古渡。釣車相伴漁父。比鄰來往雞豚社。況有樓山舊雨。謂李客山霜信苦。恁破帽衝寒。又到雷塘路。歸期早賦。向雪屋深窗。煙堤短約。共看冷楓舞。

金縷曲 丹陽對雪同企晉作

急雪如鴉大。打疏窗。蕭蕭槭槭。隨風交墮。旅店雞聲催曉夢。不許繾綣閒臥。起相對。茅檐土鏗。一輛柴車。剛待發。奈春泥。滑刺真無那。行不得。恁時可。故山最好思茶。磨記溪邊。珊瑚冷月。小梅初破。況是傳柑佳節近。多少鬧蛾燈火。枉孤負。星橋鐵鎖。人在荒城孤驛外。嘆家鄉。節物閒中過。愁遠道。響鈴馱。

暗香 壬申仲春月夜與企晉同寓秦淮俊流並集文酒留連數年來所未有

也且將約爲牛頭雙闕諸山之游

青溪三度算此番春到勝遊第一。況是詩人客裏招尋話車笠。江左風流猶在。更桃葉波痕初碧。待喚取六柱吳船。柳外試箏笛。仍憶去秋寂。恁桂月將殘。便收吟席。雪消今夕。長板橋南共浮白。擬向定林深處。梅未落。芒鞋堪給。好同譜新詞卷。兜娘按拍。

梅子黃時雨 雨夜同朱適庭話舊

白紵寒生。又漏冷蓮籌。香炷檀印。聽點滴簷聲。正逢春盡。已見蓮心擎翠蓋。那堪婪尾銷紅粉。愁難穩。幸有吟朋。憑訴幽恨。漸近楚江梅信。嘆飄零如許。霜染青鬢。待老作空山。詩逋畫隱。歸夢只憐蘅薄杳。故園空憶雲林潤。挑蘭燼。更是打窗風緊。

一枝花 爲顧祿百題畫

杏子飄紅豔。窗外東風微颭。夜深涼雨過。兩三點。鴛被餘香。猶在湘筠簟。竹几孤燈

閃。夢到重樓。有人斜凭朱檻。別後情悽黯。閒了菱花玉鑑。眉山誰畫取、黛濃淡。六幅榴裙。應有淚痕勻染。忍負蘭閨念。須早辦歸裝。春江試喚烟艫。

木蘭花慢 張策時以詞見憶賦答

正柴桑門掩。聽梧葉、下階除。歎書卷叢殘。酒杯寂寞。鬢髮蕭疏。閒居。紙窗晝臥。又一行、雪鴈落菰蒲。遺得吳牋細字。故人近致音書。愁余。俊侶半黃鱸。我亦病菰蘆。恁秋雨秋風。月泉吟社。夢冷江湖。秋歔。梅崖何許。想白蘋洲裏作寒漁。甚日草堂翦燭。開樽夜薦香蔬。

南浦 題沙斗初春江雨泛圖

新漲滿銀塘。映青蕪、一路芹芽初展。江店綠陰濃。橫橋外、多少緗桃零亂。雲昏水暗。柳絲斜度紅襟燕。愁絕尋芳人去盡。寂寞綠蘋溪岸。憑誰爲棹春船。趁東風半捲。烟檣雨幔。萍梗寄江湖。清游處、依約元真重見。魚罾蟹斝。舊盟思結閒鷗伴。相約吳淞楓落後。來共蓴絲菰飯。

法曲獻仙音 秋日聞趙升之臥病填此懷之時讀曼華閣樂府補題卽書其

後

梅屋聯牀。柳橋攜屐。夢憶江湖舊侶。秦望山高。春申浦急。迢迢故交何處。想落月寒窗裏。疏燈聽涼雨。湖芳序。歎文園。又逢秋暮。閒伴卻。禪榻茶烟鬢縷。景物最關情。研吳箋。粉字輕譜。蓮葉尊絲。喜江鄉。風味如許。問何時。翦燭。同向石屏題句。

清平樂 題葭水村莊升之外舅所居

清江一曲。築個花南屋。種得檀欒千畝竹。添取芙蓉紅簇。安排書庫詩瓢。屏當茶具魚標。儻許吟朋來往。與君同結香茅。

摸魚兒 酬升之卽用來韻

聽瀟瀟。畫簾朝雨。茶鑪閒伴幽獨。巴山舊侶經年別。卻恨飛鴻斷續。風動竹。喜點屐莓苔。傳得吳箋幅。一行書牘。勸白蛤論交。青樽結社。文酒莫相逐。勞生事也厭紅塵萬斛。雲林擬築茅屋。疏籬短約天然好。添取老梅叢菊。耕且讀。再約個吟朋。小住

清溪曲。西窗翦燭。便溫鼎分香。石牀題句。抱被話同宿。

瑤華 木瀆遂初園在靈巖山下蓋企晉祖所構也分爲十景各系以詞 巖

東霽雪

試燈風軟挑菜冰銷聽簷聲乍滴玲瓏石角漸露卻點點苔紋草色幽蹤莫認問誰訪空山岑寂但凍鴉飛過松梢林外一痕遙碧嚴寒初減衣棧剩簾底清陰猶照窗格緜梅瘦也想冷蕊開遍花坪南北鄉園春好只愁損玉塵無蹟趁新晴流到吳淞添了蕩波幾尺。

玉京秋 書堂晚香

孤館淨碧梧滴殘露晚風淒冷一痕淡月雕闌移影記取小山吟罷趁涼秋開遍荒町對清景底須沈水再添溫鼎引得王孫歸興伴幽叢繙書淪茗掩重門濃芬漠漠空林人靜俊侶天涯歲又暮招隱誰來三徑寫新詠休用翠奩香餅。

疏影 松門夕照

寒澗晴吼。愛枯斂落處。早築新構。雙槩柴扉。藥錄農書。空山消遣清晝。夢回午枕疏
陰轉。又田舍夕陽時候。看絲絲魚尾殘霞。倒映綠波紋皺。取水水昏烟暝。板橋聞
櫂語。沙際漁叟。石鼎香溫。竹竈茶寒。又見月明簾牖。前邨幾陣歸鴉晚。都集向。斷槐
疏柳。試挑燈。自釘盤餐。料理竹孫菱母。

惜紅衣 平橋夏漲

翠竹初抽。紅薇纔謝。熟梅時節。柳外平池。短橋畫欄接。雲昏烟冷。聽一夜、雨聲蕭槭。
清絕。添了柔波。浸釣筒魚蘊。蘆間蘋末。新綠三篙。田田露荷葉。臨流試望。幾點雪
鷗沒。可惜盤灘坐處。長遍苔衣石髮。趁碧梧風靜。閒去移罍洗鉢。

探春 柳堤鶯囀

梅雪初殘。梨雲乍損。一逕柳枝低亞。笛裏香綿。烟中粉絮。低拂綠陰臺榭。裊裊無人
處。問誰弄、清吟閒冶。最憐長板橋邊。殷勤似惜花謝。幽客夢回東舍。聽繡羽飛來。
池館清暇。隔葉纏綿。隨風宛轉。好與紅襟細話。便趁雙柑在。壓茆酒。翠樽輕瀉。怕到

涼秋啼鳥空繞月夜。

霜天曉角 高臺秋月

清霜初降。落葉飄幽幌。天際碧羅雲捲。看冷月、夜深上。攬杖閒眺望。邨燈明三兩。最愛寒山秋靜。但留得、磬聲響。

風入松 松閣聽濤

園林面面對雲峯。翠滴烟濃。粉牆繞處添吟閣。閣前五粒長松。老幹慣留殘雪。枯斂時顛清風。幽人睡醒夕陽中。碎影重重。寒濤響遍油窗外。亂他古寺秋鐘。須倩嗣翁好手。朝來譜入絲桐。

浣溪沙 春園晴曉

結得香茅五畝居。春風昨夜到衡廬。翠簾斜捲啓方疏。挑菜桑畦殘雪後。傳柑筍席嫩晴初。玉梅幾點影扶疎。

鬪莎行 竹溪烟雨

小闌花。蹊新開。芋圃幽情更愛吳郎賦。仙人鸞。種池南。歲寒每聽清風度。粉鑊
初消。霜筠欲舞。冷雲又下。疏疏雨。烟波迢遞不勝愁。夜深夢到瀟湘路。

漁家傲 莎村觀刈

楓葉蘋花秋漸老。江村處處垂香稻。趁取茅茨寒日曉。山農笑。紅蓮今歲收成早。
聞著長菱添袂好。磨鎌並往溪南道。捆向空罍歸去好。鳴單櫂。破柴籬下場新掃。

月照梨花

畫棟香重。畫簾風動。幾疊離愁。幾番幽夢。芳草綠遍王孫。近殘春。湘奩檀畫無人
共。玉簫數弄。淚溼輕衫。鳳柳花如雪。滿苔痕。細雨重門。又黃昏。

掃花游 汪鞞懷至吳閫訪予於春風亭寓舍孤舟短屐將入東西崦探梅賦

此話別并訂維揚之游

性耽紅葉。記蜀紙新詞。那時曾見。鞞懷有性癖。耽紅葉之句。燈窗詠遍。正相思。落月
故人天遠。袖裏音書。目斷蘆花冷鴈。在孤館。喜一笑。乍逢。同話情款。江國春尙淺。

望雨後湖山。黛痕輕展。闢殘碧。想瓢中定有。暗香詞卷。何日扁舟。繫向隋隄柳岸。約吟伴。聽珠簾。夜深歌管。

邁陂塘 江于九來自邗溝。枉臨寓舍。話舊之餘。匆匆告別。賦此送之。兼柬賓

谷

正春城。試鐙風裏。疏梅竹外。開早。么禽喚起江南思。悵望夢花人杳。愁渺渺。喜畫舫晴波。穩載吟朋到。重逢一笑。向石墨題詩。筠箋按譜。款語訴懷抱。曇華侶。謂升之還憶謝池芳草。謂叔子昆仲。何時更共游眺。單衣細雨雷塘路。應有烏絲新稿。春漸好。恨載酒分襟。又放香溪櫂。離亭殘照。約水榭疏燈。板橋寒笛。清夜翠樽倒。

又 題翁霽堂春篷聽雨圖

問三十三山詞客。舊盟長伴鷗鷺。榭林閒曳紅藤杖。更向扁舟容與。浮棹去。看葉葉圓萍。綠遍滄江路。東風日暮。漸翠黛峯低。碧羅雲暗。幾陣餞春雨。清游好。曾記雪篷詩句。千秋共此佳緒。船窗點滴天然韻。况有寶洲笛譜。新樂府。待喚取樵青。小按

銀箏柱烟波可恨。定酒釵偏提衣裁。獨速來共翦燈語。

綺羅香 題商寶意惆悵詞後

屈戌花濃。罨日暖。最憶蘇臺佳麗。曉啓紗幮。重換碧羅衫子。纔勻罷。一道春山。悄回著。兩行秋水。向銀屏。小炷薇魂。蕙鑪幾縷篆心字。片帆還又遠別。記起妝臺圓月。那時情意。芳草河橋。總是相思滋味。便忘了。紅袖調箏。爭忍看。翠綃彈淚。又何堪。旅店殘燈。夜窗春雨細。

臨江仙

蔣蟠漪工墨蘭。嘗畫小幅。藏弄篋衍中。其配李夫人爲綴冰梅于上。

洵雙絕也。升枚出以相示。與企晉策時同填此闕。

湘絃彈怨秋波冷。幽人寫入生綃。粉奩吟賞思迢迢。更憐芳信晚。勻墨綴冰條。想見明窗同點染。鷗波舊日風標。雙鴛乘月上清霄。玉鴉又挂處。一樣暗香飄。

鳳凰臺上憶吹簫 七夕和葉芳宣

秋雨如塵。晚涼似水。花前悵望明河。正濃陰作暝。潤遍烟莎。似恨蘭期易逝。鵲橋路。

障了香羅。應羞見。桂宮月姊。瓊石雲娥。蹉跎。蒲芝別也。翠色九峯清。遠隔江濶。想穿針樓掩。愁損雙蛾。應有西堂小宴。傾下若。淺酌紅螺。還又怕。夜深人稀。獨對銅荷。

鵲橋仙 同江賓谷于九訪馬湘蘭故宅

烟花小部。水天舊事。名占紅樓十二。吳昌梅雨。畫船歸。便魂斷。禪燈佛字。幾叢新綠。幾枝寒翠。剩有茶檣夜市。名園飛絮也成空。共惆悵。斷垣荒砌。

梁州令 雨中同曹來殷上宏濟寺

微雨濛濛墮。早繫沙邊畫舸。荷衣筍笠話同遊。紅牆梵院。屐印莓苔破。絲絃翠葉搖千箇。老樹懸崖臥。疏枝時落山果。壁間石刻。蝸涎涸。徑轉迴廊左。卻登石臺閒坐。大江一線走寒潮。帆檣點點。總向簾前過。白銀盤裏芙蓉朵。萬疊烟雲裏。生涯只合香林老。禪燈長伴殘僧課。

百字令 同嚴東有訪阮圓海詠懷堂今爲陶蘅川居住訪之感而有作

山樵百子。溯當年。居在百花深處。圓海號百子山樵。自題百花深處詠懷堂。係長洲。

門人張修所畫。嗚咽秦淮。通別渚。微潤蒼藤老樹。舊院沈烟。新亭灑涕。華屋偏如故。詩人偶賃。綠陰猶可銷暑。已附委鬼茄花。又從瑤草。擢髮真難數。燕子春燈遺曲在。恁有才情多許。南渡繁華。東林節概。往事俱千古。詠懷休問。何人更畫圖譜。

臨江仙

梅坪竹塢閒游處。花前曾遇芳姿。一簾香月定情時。淺斟金鑿落。低按玉參差。疏柳長亭人別後。茶烟禪榻相思。翦燈和淚寫新詞。斷魂涼雨後。殘葉下階墀。

木蘭花慢 小雪前一日舟泊青暘風葦蕭蕭初寒料峭明日當至澄江欲同

霽堂訪陸起潛舊居因賦

蓉湖風漸緊。喜傍午。一帆懸。看茅屋彎環。柳橋宛轉。翠篠參天。青青正長廿里。又修眉已在斷雲邊。想見皆山樓閣。吟朋同此流連。林泉應尙依然。詩社冷。隱居遷。怕難似當年。白雲詞句。空在瑤編。山翁定能指識。好施筇。躡屨共沿緣。弔得兩賢遺蹟。倚聲譜上湘絃。

憶舊游 霽堂居君山下向題其三十三峯草堂圖茲造廬盤旋竟日抵暮而

別作此誌之

記楚波送別吳市同游。荏苒年華。聞說抽帆去。向沿江蒼翠。高臥烟霞。竭來者番相見。香飯共胡麻。看竹樹叢叢。畫圖相較。風景無差。山家最幽處。有蘆洲似月。楓磴如花。詩卷重雕刻。更蒲輪重到。名滿天涯。可惜仍辭蕙帳。載酒約終賒。儻憶我春明。芸箋好付歸鴈斜。

離亭燕 甲戌上元前三日寒月皎然疏梅已放家人小設杯槃刻日計偕北

上悵然賦此

簷外冰輪初起。照入雪梅叢裏。誰道上元三五近。已報征帆斜艤。整頓小辛盤。喚取一樽浮蟻。仍作傳柑風味。豈免分攜情意。明鏡寶釵無可贈。只有柔情似水。那禁市樓東。隱隱管絃聲細。

減字木蘭花

桐花小鳳舊游回首真如夢。樽酒離亭。曾記清歌掩淚聽。船燈戍鼓腸斷江南芳草路。澹月重樓。誰伴西窗詠玉鉤。

南歌子 詠別爲黃芳亭作

碧蘚攤錢地。紅梨倦繡天。畫堂無那掩離絃。悔煞當時。草草負芳年。清淚霑銀勒。濃愁入玉船。不須聽雨暫流連。祇願江山處處響春鶻。

邁陂塘 憶別

記春城鬧蛾撲蝶。傳柑初近元夜。旗亭暮雨催輕別。攜手蝦鬚簾下。鉛淚瀉。認幾許連珠染遍秋羅帕。寒更初打。任蕙葉香消。梨花酒冷。未許片帆挂。淞南水穩送離人去也。篷窗誰共清暇。吳雲楚樹都經過。又向亂山荒舍。閒駐馬。對衰柳寒沙。淡月鋪簷瓦。研箋難寫。把殘驛新愁。小樓舊事。夢裏翦燈話。

探芳新 初至京師定寓時值花朝微霰忽零淒然寒色因呼酒消之卽示黃芳亭陸聽三

御街前。漸六花又飄。驟網已憩。土鏗蕭簾。仍似冰牀雪被。軟紅旋拂拭。卸征衫。收短轡。傍西窗。牢丸兼薄餅。乳潼芳膩。旬日風霜憔悴。喜跂脚伸眉。夜來夢寐。硯匣書籤。便與吟朋同試。今宵黑甜最穩。喚春酤。謀小醉。待明晨。探禁苑。杏花開未。

喜遷鶯 謝崑城庶常招同陳寶所吳荀叔錢曉徵三舍人鳳喈孝廉聽鐘山

房小集

峭寒漸徹。剩鴛瓦初消。昨宵微雪。石帚攜來。氈車屆處。兼近討春時節。燕臺吳市。新
知舊雨。幽蘭雙結。對好景。喜兔華方起。光移仙闕。笑語歡霏屑。數徧蓮漏。樽酒猶
未竭。獸炭添溫。蠟缸頻翦。又聽晨鐘將發。良游佳話已消。前日風塵短褐。况紅杏欲
生花。擬向東風並折。自崑城外餘皆會試

聲聲慢 題諸草廬宮贊高松對論圖

蒼枝偃雪。翠蓋生濤。翛然長覆荆柴。薜逕荒涼。誰同解帶藤齋。生愁歲寒人少。對高
陰。自蹋吳鞋。聽屋角。正秋風乍起。落徧疏欵。回憶居名藏史。但莓牆石井。往蹟沈

埋。剩有枯鱗。年時落落霜階。苔花半凝碧。照清泉。瘦影幽佳。伴詩老。看小窗詩卷
新排。

憶舊遊

京城西便門外白雲觀卽元長春宮也。以邱真人處機居此故名樂

笑翁游此有詞。今殿閣荒頽。過半香火。猶存。聞正月十九日真人生日。四方

黃冠駢集。士女遊者甚衆。予于三月下旬與吳荀叔金棕亭同游。慨想真傳

因填此解

嘆青牛路杳。白鶴烟消。難問全真。琳宇西華近。望蒼松翠柏。交映檐楹。金龜尙留香
火。鐘磬傍蜺旌。說落燈風後。時傳灌頂。士女傾城。生平自蓬島。向終南太華。訪道
瑤清。更歷龍沙遠。便安車回日。名著燕京。玉田舊闕誰記。好取叶鸞笙。喜仙侶同來。
暮春芳草雨正晴。

金縷曲 寄曹來殷

午節匆匆過。又玉河。初漲柔藍。新荷欲破。昨日直沽雙鯉到。不見隨風珠唾。但憶得、

瑣窗閒坐。虎僕毫尖龍尾滑。伴秋潭、聽雨同吟和。寫新句、定思我。生涯休更悲摧挫。且優游、琴薦香爐。詩囊藥裹。短簿祠前濃綠好。更好山尋茶磨。那得許、單衫塵沓。蕉萃京華春夢醒。算故園、歸計終須果。到吳市、共燈火。

長亭怨慢

別鳳啣曉。微子宣武門外。遂至潞河客舫。時將往濟南萍蹤靡定。

回憶分襟益深淒黯

正槐蔭、綠深渡口。已出燕郊。旋登鷁首。回憶郵亭。淚珠零落尙盈手。軟紅踏遍。終猶是、青山舊。話雨坐西窗。嘆甚日、翦燈還又。傷憊。問心情何似。彷彿絲絲亂柳。鵲華東去。看湖上、綠肥紅瘦。最苦是、新侶無人。待誰與、尋詩鬪酒。漸日暮蒼涼。忍喚長年放溜。

剔銀燈

予在真州旅舍曾譜燈詞四闕秘置篋衍久矣青光舟次燈窗夜坐

忽檢及之悲感橫生再爲摹寫匪徒體物亦以志身世蒼涼更甚于昔也

嫋嫋兼葭波起。旅客孤舟斜艤。隔竹茶檣橫橋酒店。幾點微明小市。篷窗雨細。伴山

龍縱橫清淚。回首江鄉天際。綠樹東村迢遞。水驛殘更。河梁遠夢。誰信此時情。
長瓶難醉。祇獨宿、夜涼相對。

何日簷花夜落。窗下茶鐺自淪。青簡抽來。紅樓題罷。更做江東詩學。楓林蕭索。閒聽
取、溪邊鳴鶴。外舍清寒如昨。休說過橋珠箔。草閣風疏。竹窗露滴。一任酒罏寂寞。
水村山郭。但留伴、茅茨煮藥。

十載吟詩看劍。依舊天涯壞坎。破驛長亭。荒祠故國。長見一枝冷燄。西窗雨暗。想只
有、山妻長占。客裏寒衣誰念。鄉信從今難驗。翦韭莎畦。擣茶茅屋。荒逕蓬蒿自掩。
淚痕淒黯。更絡緯、清吟小檻。

腸斷慈親頭白。獨聽殘葦催織。一紙書回。兩行淚下。惆悵天涯消息。寒沙暗壁。有多
少、荒村岑寂。長病還重作客。合住谷郎巖側。野寺疏鐘。雲房積雪。參取林閒遺集。
金蓮侍直。只付與、故人天北。

西河 同吳廷韓由峭山河還至歷下亭晚荷已盡蘆雪翛然時寒露後三日

也

閒窗寂。不耐新愁臥病。吳郎相勸訪秋行。蜻蜒小艇。嵒山一曲。映玻璃。湖亭更選名勝。微雨過。紅衣冷。薄靄不霑明鏡。蘆花偶惹鯉魚風。閒鷗驚醒。清遊曾寄集賢知。長箋寫徧幽景。時出趙子昂明湖秋瑟圖展玩更喚酒。銀瓶素綆。少消除。天涯旅興。回憶江關路迴。想漁莊。雪藕絲蒹。應向夢中尋。誰重省。

法曲獻仙音 癸酉秋鄭禹谷琢詞見贈草草未遑答也今客濟南旅窗清暇

復檢散帙得之因填此解奉酬秋云暮矣能無尊邊呼櫂橘候思書之感耶
側帽尋花。單衣試酒。共作中吳吟客。折柳歌殘。翦燈人杳。奩中剩留詞筆。記贈我。雲藍句。生香徧瑤席。念岑寂。恁年年。斷萍蹤跡。只夢度。松陵竹邊烟驛。秋雪繞西湖。更與誰。葦岸攜屐。橘社荒寒。問何時。同話涼夕。把烏絲醉墨。閒付小紅催拍。

解佩令 泊淮關

殘鐘微度。哀笳微度。更清淮、數聲柔櫓。已是愁人。那禁得、櫂歌淒苦。又孤篷、一番寒

雨。故鄉何處。舊游何處。檢征衫。淚痕凝聚。飄泊誰憐。算只有疏楊幾樹。似年時。魂情緒。

臨江仙

昨夜鯉魚風起。輕寒初到衣襟。十年身世感飄蓬。高堂雙鬢白。客舍一燈青。夢到橫雲山下。小橋流水柴荆。故園雖好有誰耕。雨荒松葉逕。秋老菊花塍。

華胥引

題竹林宴坐圖爲藥畊作

生綃滑笏。是誰描取。翠鸞烟鎖。石逕荒蕪。獨結團蕉愛敷坐。一任雨滴寒梢。更風鳴枯筇。不染閒心。淨名自理清課。卻恨經秋。軟紅塵。荷衣常浣。瘦權癩可。頻勸歸參智果。好覓閒田。種取綠筠千個。梵筵龕燈。空門共結香火。

秋霽

題查藥師鋤菜圖

矮幅藤溪。倩翠墨勻來。染遍幽景。葉落荒陂。烟寒老圃。望中碧蔬綠逕。短衣掩脛。自攜鴨嘴金鋤冷。趁野興。底用園官。相送作芳釘。江國久別。區芋耘瓜。幾時歸尋。湖

上清境。挂輕帆、橫雲路近。好來同放采莼艇。還摘露葵供說餅。此意誰省。算有南岳多情。西鄰好事伴君棲靜。

秋波媚

故里歸心寄扁舟。旅舍暫淹留。寒燈掛壁，破窗鳴紙，一枕鄉愁。吟朋小別西橋路。回首碧雲稠。蓉湖今夜，殘鐘杉寺，細雨蘋洲。

早梅芳近

丁丑上元前一日官梅亭小飲時翠華南幸邗溝風景一新而

運使明日有茂苑之行招予同往想一路殘雪微寒朝花新柳更足供吟賞也

畫屏開。湘箔捲。梅萼香猶淺。琴書多暇。裙屐偕來綺筵展。燈明東閣暖。雪霽西風善。正藏鉤側帽。蟾影光初綻。鬪清談。如珠貫。芳酌真無算。勝緣不少。鼓舵明晨下吳苑。雲山楊子渡。烟月蘭陵館。記清游。貽君同笑粲。

揚州慢

乘風渡江泊竹西城外燈火微茫偶聞弦管作

初月孤雲虛沙。酒客初泊。近紅橋喜燒燈飯。候隱隱。聽簫想水館。春寒何處。
城俊少。共暖金椒。只孤舟欸乃。和他畫角清宵。紫微去久。但空傳。鸚舌徐調。到柏
葉烟微。竹枝聲咽。燭蕊將消。回憶故園別夢。眠難穩。欹枕魂銷。况落梅風起。柁牙正
向江潮。

減字木蘭花

一樽清醕。會記擁鑪深夜語。翦了蘭釭。翠篠淒淒雪打窗。蘋花江岸。回首紅樓香
夢遠。野艇黃昏。竹柵寒潮正斷魂。

臨江仙 與汪經芸沈方毅庶常相晤邗關感賦

記得金巒初唱第。芳堤同碾香車。仙雲縹緲侍東華。簫韶聲裏。玉漏遠穿花。而今
湖海重漂泊。相逢雨雪天涯。青衫有淚溼琵琶。夢魂難忘。曉日散宮鴉。

又 丹陽舟次有懷

小泊雲陽驛外。板橋初柳如絲。落燈風定鴈聲遲。疏林煙際寺。殘雪水邊籬。報道

欲歸未得。江南江北相思。佳期好在熟梅時。蘭窗同命酒。竹屋共彈棋。

東風第一枝 從龍潭渡江夜半至真州

沙燕風閒。江豚浪靜。夕陽還又喚渡。輕帘纔捲。茶檣遠火。漸生漁步。半帆如箭。已近
傍。龍潭古戍。最喜是。小市猶開。爲客蒸藜炊黍。幸已約。東吳俊侶。趁給札。凌雲同
賦。春城隱約。觚稜稍隔。淡烟平楚。篙師且緩。更莫辨。乘流東去。只待聽。翠羽聲聲。還
似綠楊清曙。

浣溪沙

漏靜鐙殘酒欲消。孤篷泊處更瀟瀟。玉蟲一點度蘭膏。花落不堪寒食雨。春心常
記廣陵潮。誰家又奏小檀槽。

解連環 竹西遇陸南鄉以白蕉詞見示聲情妍婉當與張蛻巖相上下不啻

貽我青玉案也

平湖渺矣。是烟波深處。地連谷水。恨一棹未訪高門。賴小令長箋。妙參詞旨。何意相

蓬卻正在紅橋花底喜開尊。清話翦燭題襟。客裏風味。還貽白蕉舊製笑搓酥摘粉。總涉濃麗。誰得似、投効歸來。託漁弟樵兄共寫幽致。只我征帆待遙溯。潞河雲霧。擬他時、夜窗聽雨和吟重記。

浣溪沙

題王石谷水邨圖爲張漁川作

尙湖小景不須多。湖上山房映碧羅。綠楊烟雨隱漁歌。

翰墨誰如烏目好。香茶清

供伴吟哦。藍田輞水比如何。漁川西安人

夏初臨

春暮閨秀徐若冰製三泖漁莊圖扇見惠并系以詩賦謝兼寄雲清

燕子初飛。鼠姑已謝。南薰誰得招涼。畫扇輕羅。遠貽喜自吳航。墨痕猶伴粉痕香。寫明珠小字成行。南樓清暇。玉屏東望。遙憶漁莊。新詩婉約。妙繪空濛。團圞影裏。宛見江鄉。官梅亭舍。於今便作羲皇。况有簪笈。付雕鏤。並置書牀。并寄筆筒。亦刻詩畫于上。意難忘。飛瓊寄聲。更報瑤章。

摸魚子

題嘉定錢氏兼春書屋圖

望蒼屋。叢篁古木。翠微占斷塵境。茅柴縛取三閒屋。屋外別開落逕。春欲醒。愛么鳥啼時。滿地梨雲冷。幾枝疏影。看殘雪園林。嫩寒籬落。此意有誰省。溪橋遠。正值杖藜人並。尋詩還共清興。琴原藥錄編排就。更好試香分茗。書館靜。應笑我。年年孤負江鄉景。水昏煙暝。待辦得棕鞋。攜來蠻榼。隔柳繫孤艇。

又 端午前三日將返吳淞示子存適庭漢倬肅徵

正銀塘。棟花風定。陰陰翠葉如許。月泉社裏聯吟慣。小別也成淒楚。相送處。怕一翦烟帆。便見攀清樹。故鄉延佇。想懸艾簾櫺。澡蘭庭院。誰與共芳序。垂楊岸。還憶尋春前度。分襟淚點輕注。天涯重見無多日。又寫江郎恨賦。情最苦。是兩槩寒潮。催送斜塘路。忽忽款語。約置酒絃詩。移鐙讀畫。再聽小樓雨。

南鄉子 題朱吉人畫叢篁飛瀑圖

雨霽起秋嵐。雲外斜橫碧玉簪。隱約三閒茅屋在花南。一道飛流下斷巖。略約倚寒潭。鸞尾蕭蕭映石龕。如此溪山清絕處。真堪容我幽棲卜草庵。

祝英臺近

策時自寒山來同宿蘋花池館時簾外雨潺潺竹梧蕭瑟因填此

解兼示子存適庭

小屏深孤竹冷涼雨下苔石款竹重來琴酒共瑤席卻思昨夜空巖飛泉響處恨不與故人游歷正相憶誰知繫艇煙堤攜手慰岑寂話了巴山更聽短簷滴待看紅藕香生黃梅風定同踏遍數峯晴碧

金縷曲

偕友晚過滄浪亭因憶與策時同游時已隔歲矣賦之以寄憶

隔水鳴遮了石橋南槐葉惜惜柳絲裊裊竹屋梅坪微雨過無限新涼懷抱記勝侶會同短櫂回想歐蘇詩句好聽篙師已說溪亭到沽桂酒一樽倒翠玲瓏外秋葉早淪春旗倚欄吟遍銀塘碧沼今日詩朋同話舊猶是青山皂帽祇不見雪窗風調露溼莓苔歸路暗漸半規涼月梧桐杪魚子寫鴈奴杳

秋波媚

舟泊斜塘

香稻風生繫吟艖竹露滴篷窗銷魂最是昨宵畫閣今夜烟江短亭回首家山隔

何處寄蘭芷。知他也合。慵熏簫局。倦翦銀缸。

憶秦娥 青溪旅夜

情脈脈。扁舟頻作秦淮客。秦淮客。柳邊殘雨。水邊殘笛。紅欄橋下秋潮急。梨花門巷長相憶。長相憶。烏啼涼月。夜深人寂。

一翦梅

小閣寒生玉篆銷。塵滿檀槽。淚滿珠翹。碧窗風起響簾梢。殘雨蕭蕭。殘葉蕭蕭。雲帆何日溯秋潮。倚遍花橋。望遍蘭皋。銀鐙低照可憐宵。幽夢迢迢。芳訊迢迢。

金縷曲 家受銘僑寓秦淮時送人入蜀攜歌酒過丁字簾前夜已二更矣聞

水榭中笛聲淒咽因叩門求見則商寶意司馬自度曲也遂邀入坐中翦鐙話舊痛飲達曙而別復丐畫師寫青溪邀笛圖自倚曼詞紀之屬予繼聲題後

蜀棧雲千尺。送征篷、小姑祠畔。柳絲凝碧。已聽陽關魂斷後。更聽小窗風笛。驚相見、

天涯倦客置酒呼燈同攜手。認蕭蕭短鬢吳霜白。還款語。訴游跡。清淮烟水渾如昔。又誰知。飄零舊雨。重逢良夕。傷別傷秋情無那。况對露蕪風荻。忍再喚。小紅催拍。畫出女牆明月影。照寒潮。一片淒涼色。衫袖上。淚痕滴。

踏莎行 題廖覲揚西風鞍馬圖

旅館敲風。孤篷聽雨。三年會憶燕臺住。涼秋白下又相逢。一鞭更跨征鞍去。身世飄零。功名遲暮。重來錄別添愁緒。江南春到杏花梢。期君走馬長安路。

又 送沈學子歸華亭

古驛長亭。荒灣野水。頻年也灑征衫淚。一繩新雁正橫天。短書早寄秋風裏。豚柵雞棲。魚牀蟹市。夢魂慣憶江鄉味。何時築屋傍青山。柴門共作垂竿計。

小重山

楓霜昨夜著雲幃。暗蛩催織罷。月籠秋。夢魂便到小紅樓。西風緊。容易響簾鉤。獨自掩青牛。腰圍今減盡。帶頻搗。誰人欸。乃過贛洲。雲窗裏。幾度誤歸舟。

行香子

一幅孤篷。一櫂吳淞。數離亭、幾點霜鴻。落鐙過也。吹盡梅風。又柳絲華紅。回首湖東。烟水重重。認眉棱、剩做遙峯。一樽薄醉。更惹離悰。聽灑灑佛樓鐘。

玲瓏四犯 題友人小像

家近西泠。愛一片涼波。幾疊雲嶂。吹遍梅風。莎徑苔痕初長。蠟取曉窗。歲寒松杖。問送僧、尋藥前去。只費黃桑幾兩。樓欄笠子尖圓相。製鼠師釣叟真無別。但少綸竿颺。好向十字蘋邊。喚菱角、輕搖煙舫。把酒寫成漁唱。

湘月 送朱吉人歸桐鄉

抱琴歸去。喚蜻蛉直下。西水荒驛。蓮葉田田。早映遍十里。鴛湖寒碧。試茗老作漁竿客。虛堂夜雨。對牀共伴岑寂。謂浚谷長恨錄別經。

陽關催拍款竹盟鷗。嘆冷落多少。吟箋遊屐。柳髮梳風。蘋絲點雪。舊侶烟波隔。鏡窗月冷。忍聽江館涼笛。

浣溪沙

裊裊東風拂畫闌。碧羅窗外杏花殘。可憐春信第三番。細雨曉晴雲半斂。玉屏微露翠彎環。捲簾描上小眉山。

徵招 將歸松江同沙斗初朱子存漢倬小集企晉璜川書屋兼觀朱吉人作

畫放筆之餘黯然賦別

玉鳧香地蕭齋靜。天涯故人重聚。把袖正忽忽。又蘭舟催去。別情休細訴。試香墨。閒勻縑素。幾摺寒雲。幾叢修竹。迴汀曲嶼。疑似細林東。香茅屋。結在翠微深處。猿鶴愜幽尋。奈斷魂難賦。西窗深夜語。應憶我。綠蘋南浦。與誰對。水驛孤燈。聽空江細雨。

石湖仙 南旺湖曉發

湖山雨霽。聞七十名泉。明流交匯。縹緲望徂徠。自東南。烟雲無際。虹堤遙截。有多少。

楓人蘆子。棲此。比農桑。更裕生計。會通又經分派。爲神倉。常通桂柵。穀雨初過。舶
趁正當風起。襟履蕭閒。琴書清潤。宛然畫裏。誰喚取。荆關細寫清意。

高山流水

楊柳青舟。次陰雨連朝。遙望西北烟巒。杳靄風景不減吳中也。填

此寄蓮坡先生

水窗連日掩簾櫳。喜朝霞。一縷微紅。烟靄漲寒潮。隔溪猶繫魚篷。綠遍了、垂柳濛濛。
城圍轉。遙望城樓如畫。酒旆迎風。似半塘橋外。淺碧互眉峯。重重松篁翠深處。應
添得、石瀨雲淙。勝地幾時遊。空憶高士芳蹤。蓮坡先生兄弟時時往游香山退谷今
不在家。鎖名園。欲去誰從。趁薄霽。且喚篙師解纜。放棹從容。待他時話取。此景記詩
筒。

霓裳中序第一

長夏侍直示吳沖之章慎占兩同年

高槐傍禁苑。榆柳陰陰青翠遍。正值直廬清宴。喜奏牘將陳。制詞初獻。露華猶泫。望
故人。囊筆來見。問近日。詩壇舊侶。晨夕共談讌。遊衍分曹同伴。少此地。雲山隻遠。

新蟾况已如綫。好酒啓黃封。箋排青案。銅壺聽漸轉。且暫停。花驄去緩。趁今夜。微涼對榻。再話故鄉款。

惜餘春慢 題受銘丁辛老屋圖小幀

雨屋疏槐。煙籬短篠。隱約蕭齋十笏。分泉試莽。剔石栽花。長是吟商散髮。拂盡京華軟紅。竹簾蕉衣。那愁炎喝。似鴛鴦湖畔。柴扉蘚逕。半臨清樾。想幾日。晝省歸來。掩關踢壁。不信家鄰珠闕。試箋視草。聽漏含香也。勝江湖飄忽。祇我春明路遙。淚溼青衫。琵琶怨月。幸故園無恙。且須料理。檜田鹿檝。

綺羅香 曉入西華門過金釐玉竦芙蓉盛開有賦

太液秋澄。華林曉霽。放盡池荷千柄。幾曲魚梁。倒拂綠波虹影。竹露重。寶鈿青敲。葦風涼。舞衣紅冷。似瑤天。一道銀河。瓊宮縹緲。隔清景。金源舊事。曾記多少。碧虛樓閣。遙依雲嶺。柳線蘋花。都入蓬壺仙境。臨紺塔。雪鷺雙飛。邊粉牆。玉驄齊騁。底須尋圓泖湖亭。月涼移畫艇。

露華 題仙姝采菊圖

玉山秋晚。漸朶朶金鈴。開到松晚。鴈影度江。應悵採芳人遠。誰知偷擬靈均。思與木蘭同薦。筠籃貯。還宜鬢鴉。插處微顫。霜楓乍照蒼巘。算不比緗桃。曾引劉阮。恰笑芙蓉仙侶。淚痕紅泫。彷彿翠袖天寒。只少叢篁低偃。蕭齋靜。肯作曇花輕散。

臺城路 寄友天津

楊青驛外垂楊樹。陰陰會繫畫舫。酒市燈明。官橋月映。最憶風帘低颺。紅欄綠浪。便聽漏東華。夢魂難忘。應有才人。自研松墨寫惆悵。江湖何限客思。况蓮坡別墅。林泉堪賞。杏蕊將殘。蘆芽漸起。恰值西沽新漲。登樓吟望。須慰我相思。頻貽魚網。好喚心奴。炙笙傳逸唱。

采蓮令 庚辰立夏日同企晉荀叔寶所過法源寺小集時芍藥將開

啓精藍。消盡纖埃處。正簪盃、東南舊侶。當窗紅藥。喜昨宵、幾度櫻桃雨。料斯際、湘靈鼓瑟。峯青江上。鎖闌將薦詞賦。好趁閒時。半階綠影分香醕。又何異、小查院宇。企

晉遂初園內小查山閣最佳斜陽芳砌風過候并覺花能語情未已藏鈎脫帽試聽歸鳥猶勸酒徒少住。

梅子黃時雨 適庭至都下銜盃溯舊根觸曩游卽次昔年雨夜韻用敍幽懷
小別三年喜一笑乍逢還對芳夜記北碕詞場人如檀謝雨浥蘋花憑檻坐露零梧
葉移燈話微香炷清夢尙懸竹外林下愁訝月泉吟社詢舊游芳蹟草碧琴謝更
京雒浮沈勝情都罷銀字誰憐調錦瑟時綠陰槐夏閣詞初刻竣綺窗無分題蘭帕
姬人已逝栽桑柘歸去課耕秋野。

玉京秋 七夕後一日企晉南還既別賦此懷之

人乍別歸來尙延佇望雲淒切紅綾同宴青衫仍疊空在潞河橋畔慘垂楊一樹重
折愁難說蘭舟獨伴蓼花蘆雪還向故山先業檢舊時詩瓢酒榼近局中名僧畸
客共耽幽絕清夢回時應憶我常是東華仙闕銀河沒靜聽亂蟲聲咽。

江城子 秋夜同適庭編次倡和詞卷忽風雨蕭森恍如身在舊時蘋花水閣

中也

一襟涼思入清宵。夜迢迢。雨蕭蕭。數徧檐花。點滴響疏寮。青蘚空階行不得。吟坐到。水沈消。對牀曾記住桐橋。聽秋颿。拂梧桐。京洛相逢。仍共別蘭膏。蝸區書詞藤紙膩。誰付與。玉箏調。

徵招 瓜子和適庭來殷

青瑤膚裏叢叢列。雲溪慣聞逃暑。秋盡碧漿寒。付羅囊深貯。十瓶休誤取。算難比。蘭金同譜。玉指拈餘。檀唇約後。拋殘繡戶。綺席記重排。官窰淺。一撮先教送與。更劃棗痕斜。作梅花瓣縷。杯巡憑暗數。祇怕惹。故園清緒。幾番想。瑞草橋西。伴竹莊閒語。

好事近 題張柳洲侍御羅浮夢畫冊

溪外小梅花。初破一林殘雪。最好酒家門掩。映疏煙微月。夜深皺玉爲誰溫。相對正佳絕。不奈翠禽朝語。又夢中人別。

雪獅兒 題文端容畫漁游春水卷

寒山春暖是千尺。雪瀑飛來柔波如縠。數尾銀鱗已到池塘一曲。香奩幽獨。便翦取生綃小幅。正寫得穿花拂荇。濠梁清淑。考槃近繼芳躅。想靈均同住。賞吟難足。家法傳來。原在停雲書屋。前塵怱怱。還又備。麈尾展讀。雙鬢綠。誰畫並依修竹。

一萼紅 汪康古屬題桐鄉老屋圖

護茅廬。有籬笆數曲。筍蕨滿青蕪。短鐮分來。長鑿劖處。畦局已足香蔬。早市取。白鹽赤米。共午飯。松火熟山廚。野圃生涯。底須聽笛。夢憶銀鱸。添得江鄉佳味。祇蘂香勝肉。蓴膩如酥。竹几藤窗。瓦盆瓠碗。老去真可清娛。閉柴門。日長岑寂。賴牀頭。缸面發新蛆。待約南鄰來飲。隔水招呼。

揚州慢 寄題墨花禪圖章小譜

白唾芒寒。丹砂氣靜。開函古色光晶。是鑄銅鏤玉。蛛迹共迴縈。歎蒼籀。如今去遠。雌彝鳳翬。略擅遺型。止黃門解字。編來體格分明。杼山詩老。向圖章。並寄閒情。看攜拾零星。朱文綠篆。堆遍書簾。都是三蒼舊意。藉辨取。三字鴻經。問搜尋倦否。禪牀與

正飛騰。

探春令 壬午春分劍亭愼占雲椒小集

唐花欲謝。筠窗漸暖。春中時候。正東華退直。當晴晝。吳船至。丁香酒。閒門剝啄同鄉舊。待消磨紅友。話十分春色。平分後。剩一半。更休負。

如夢令 瑞園夜雨寄雲清

看盡東闌春絮。又聽西池夜雨。知道玉窗人。坐別薰鑪殘炷。寄語。寄語。婪尾花開幾許。

臺城路 初夏送儲玉函主事南回兼柬史位存衍存兄弟

簪花宴罷。司清要。望郎譽標京洛。玉署抽毫。蘭臺聽鼓。還見新詞盈握。槐陰漠漠。恁忽念銅官。煙巒繞郭。通潞波生。雲帆直下。最堪樂。杜郎水榭如鑿。茶亭橋社裏。何限邱壑。况有芳鄰。小眠齋近。唱和共耽華萼。調弦開酌。待道夏吟秋。西風又作。一騎重來。相逢衿並捉。

瀟瀟雨 沈學子書來知徐若冰于除夕前一日逝矣若冰生西泠居北郭會

屬余定其南樓集瓊箋錦字今猶填篋笥也賦此悼之

南樓霜月冷。湖瑤臺。何處問飛瓊。記鉤簾寫韻。花低楚簾。煙裊湘屏。薄病不禁短夢。孤了上元燈。剩有春椒在。曾賦幽情。小展檀箋遺墨。便團香鏤雪。未比芳名。甚芝田去也。縹緲六銖輕。想殘宵。誰詠風絮。驗芳魂。約略玉梅橫。吳波遠。紅窗舊侶。腸斷鷗盟。

芰荷香 立秋日喜陸健男至都下曉徵冲之來殷小集

暑將歸。正日斜珠網。風透羅衣。塵清曲巷。小車並到階墀。砌梧欲落。愛盆池。菡萏香微。開筵處。酒動玻璃。脆堆碧藕。涼沁紅梨。季重而今猶滯。祇斑駁初下。捧袂依依。吟商刻羽。題襟已免相思。僧寮况近。時來殷寓法源寺。好常從。翫燈彈棋。游興應共無違。銀河絡角。再訂秋期。

點絳脣 題畫冊爲鮑雅堂作

彙曲闌干。舊時曾繫花驄住。畫窗低語。翦燈修琴譜。香夢重尋。燕子銜春去。淒涼處。一溪柳絮。兩岸黃梅雨。

漁父

綠樹清江碧四圍。晚雲作雨釣人稀。攜竹榼。解蕉衣。一棹萍花放鶴歸。

聲聲慢 題若冰南樓吟藁後

詩宗北郭。家近南濠。芷齋當日齊稱。十子飄零。西泠林亞清等。康熙年間號十子。猶繼淥淨芳名。橫塘記逢春曉。趁雙魚。長寄幽情。吟好句。視綠肥紅瘦。加倍淒清。誰識中郎阿大。是三生分薄。悵怨難鳴。賦就傷心。常聞珠淚盈盈。香奩尙留團扇。寫漁莊。煙水柴荆。從此後。付紅牙。傳遍江城。

一枝春 題宋人畫壽陽公主梅花點額圖

曉夢初醒。未梳頭。早向玉階小立。南枝信到。已覺香塵寂歷。東風如愛。送一瓣。鬢雲微側。應自有。粉蝶飛來。細賞眉邊春色。誰知含章遺蹟。但芳華久沒。畫圖省識。吳

綺寫出別是一番風格。當年阿監定改盡，六宮仙額正好伴，九九消寒紅脂並滴。

釣船笛

疏柳掃江橋，一隻橈頭船。風外蕭蕭葭，映蓼花紅穗。偶然歧脚把筠竿，不用伴漁弟。隨意尋詩載酒，是畸人生計。

臺城路

北地秋葢有與絡緯相似者，聲清越可聽，俗以叫哥哥名之，實卽袁宏道劉侗促織志所謂聒聒者。八尺琉璃香殘酒醒，傾耳殊不惡也。爲填此

解

軟紅三尺啼螿少，誰吟清怨如許。瑟瑟鳴風，蕭蕭浥露，也比寒葢同數。幾聲還住，似苦竹黃蘆，瀟湘暮雨。叫罷山鵠，有人衫袖淚痕聚。楚魂尋夢正遠，枕函憑喚醒，相對鸚鵡。小貯筠籠，偷銜雪飯，斜挂碧苔窗戶。春明倦旅，記豆架瓜棚，故鄉殘暑。擬譜哀蟬，好同絃外語。時方悼亡

竹香子 西陵道中

過盡桑堤柳陌。野店初停銀勒。幾番微雨溼征衣。喜見青青麥。東風猶自側側。遠山重被春雲隔。棠梨花外共提壺。知是明朝寒食。

疏影 灤陽旅舍秋夜

疏槐墜葉。早蒼苔逕小。菘語初歇。埃館寒深。酒冷更殘。鄉關夢裏難越。西風最是銷魂候。那更聽、夜聲淒咽。但半簾、細雨蕭蕭。掩盡短窗微月。苦憶梅邊竹屋。夜涼零露底。階下刻襪。鬪草籌花。蜀紙新詞。猶在分香舊篋。斷腸已恨秋江遠。又恨隔、暮山雲疊。待曉來、重覓清愁。鏡裏鬢絲添雪。

探芳信 乙酉玉泉侍直時三月十九日也

禁林曉。聽翠鳥徐鳴。青驄先到。恁送春春去。落花已如掃。層層樓閣明流外。新綠綠溪遶。啓重門。香滿紅蘭。露留翠篠。短杓映方沼。更碧藻參差。蒼藤窈窕。敕尾披來。正值晴霞照。蓬萊回首真天界。蓮漏風中杳。待明晨。更上香山古道。

解連環 題宋人畫孤山處士圖

翠屏千尺結香茅。小屋橋邊溪側。想春到、煙水西冷。又香雪垂垂，破寒先坼。小坐筠牀，卻自便、輕衫短幘。看山僮未到，花外皋禽，來伴仙客。因思昔年事蹟。正東封將屆，金泥玉冊。更誰料、獨抱幽貞，但疏影橫斜，相共晨夕。半幅溪藤，留千古、冰霜標格。溯當時、一筇一笠，瓣香暗憶。予少日遊孤山小龕，中有塑逋仙遺像，旁有一童一鶴，風神幽雋，自是物外真仙。後有司改作四賢祠，塵容俗狀，而舊像不可復得矣。

留春令 水墨士女十二幅爲吳興沈宗騫畫，依次賦之 思春

似夢聞香，如雲漏月，憶春何處。招取東君，低鬟掩袖，思共嬌鶯語。廿四番風猶未度。身與韶光住。祇愁南陌，紅稀綠暗，又送花神去。

望梅花 撫梅

苔石猶存殘雪。枝北數花明滅。來領寒香，爭忍折。可似上元佳節。憶得年時簾外月。夢到故山幽絕。

尋芳草 踏青

嫩柳綠如許。誰得寫、傷春情緒。望蘅皋、且幸攜僊侶。正落紅、滿鈿路。恁風颺銖衣。試羅襪、凌波微步。想雙雙、共訴閒情趣。憑拾翠、晚歸去。

采桑子 采桑

板橋桑葉陰陰綠。小曳羅衫。親揭筠籃。正是田家欲飼蠶。清和時候將登蒨。雪繭分函。翠釜頻探。更置纜車曲牖南。

海棠春 簪花

海棠開遍香階側。喚小玉、春葱輕摘。初日照輕紅。添上雲鬢色。妝成不向垂楊陌。愛消遣、蘭闈岑寂。試做衛娘書。別作簪花格。

品令 品茶

風信冷。下閒階、猶覺宿醒難醒。石臺畔、喜見松爐暖。分泉試茗。未啓櫻桃小啜。一翦香暗誰省。應還念、相如曾病渴。喚取待共品。

更漏子 校書

倦彈棋。停擲管。愛校青箱黃卷。微步到小窗西。梧桐日影低。想像耽吟賞。應與檀奴酬唱。比謝女。傲班姬。還須絕妙詞。

華清引 待月

碧梧葉葉下銀牀。聽盡寒螿。檀槽獨抱誰見。冰輪照晚妝。不須銀甲奏宮商。秋闈無限淒涼。欲傳清夜怨。莫認在潯陽。

一落索 搗衣

幾日含情添線。又還搗練。梧桐影裏井華涼。砧杵雙鬟伴。憶得龍沙人遠。淚痕零亂。此聲暗祝五更風。好吹入昭陽殿。

醉花間 折桂

濃香起。芳園裏。折贈應誰寄。卻憶小檀郎。可到蟾宮未。盈盈擡翠袂。先得姮娥喜。攜插膽瓶看。笑望泥金字。

清商怨 彈琴

琴畫樓詞

苔茵小坐香軟。對玉琴輕按。徐拂冰弦。蕭蕭秋度鴈。天涯欲寄清怨。但悵望、瀟湘雲遠。飄緲餘音。風篁留共轉。

河傳 禮佛

性耽仙梵。慣向松龕。香雲獨占。小坡陀下。蕙炷初染。木樨休更攬。團蒲清課真無厭。還細勘。稍覺芳意斂。比同天女何忝。散花好共驗。

雲仙引 題仇十洲畫西園雅集圖蓋摹李龍眠舊本也西園爲王晉卿居故

其家姬侍焉此雅集必在元祐初文忠文定弟兄及山谷少游輩皆在其後諸公散去且不久卽被譴矣圖向無年月略考正之

窗紫邀花。池青映竹。依稀禁巒名家。倚短杖。駐輕車。多是中朝俊侶。小集西園一徑斜。樂事賞心。談詩試墨。鬪酒分茶。誰教畫入蟬紗。又翠鬢、雲鬟欲墮。鴉。瓊海將行。玉堂難久。轉眼雲沙。一幅丹青。數成八八。付與高禪說夢華。內有圓通大師說無生法。蠶頭細字。想停雲叟。搦管咨嗟。前有文衡山題字

綺羅香 又題十洲搗衣圖

半擘雲鬟低垂羅袖。小坐綠梧深院。鴛杵初停。應是搗衣人倦。掩香巾。粉汗微霑。挂寶釧。檀唇猶喘。困腰肢。侍女扶來。龍沙遠憶更悽惋。夕陽花外猶在。可是正須消渴。笑嘗茗椀。晚製征衣。重擬著綿添線。祇可惜。一片淒涼。何自聞。昭陽宮苑。剩成樓。露冷霜寒。秋笳常寫怨。

思遠人

戊子冬日叢臺驛作時往雲南

趙北燕南憑振策。已到叢臺驛。征鴻無定。疲驢已困。一飯少求息。彈絲擊筑今猶昔。樸被叨留客。恁官燭將殘。戍笳互響。夢歸正難得。

簇水 風雪過漳河同升之作

如墨層雲。積灰欲落清漳口。停鞭喚渡。也不管。茸衫溼透。銅雀荒臺已盡。誰識當途舊。徒枉斷。此日未就。思勝友。便相約。夾河居住。記佳話。傳不朽。而今漂泊。欲耕釣。成何有。待得半篙輕濟。已是昏黃後。催送急。又聽胡笳奏。

疏簾淡月 鬢暮南來湖外白蓮數頃內地所少並無有採其花而食其實者
亦不知爲蓮也

荒灣遠水訝濯雪凝冰。亭亭十里。本少紅妝採擷。畫船迤邐。鬢雲已盡寒江外。但相同。蘋花徙倚。誰能相認。纖鱗微度。閒鷗忽起。正白羽初分天際。甚翠蓋翻時。幽香如此。不管露涼波淨。脂消粉墜。西池迢遞。知難到。祇盈盈。微點清淚。惟應月姊。宵分遙對。一奩秋意。

天香 香楠一名畫楠。日久中有紋理。劈之如水墨。畫然出虎踞關外六七百里。濃陰直幹。四五月間。日色臨之。香氣鬱勃。聞者易以致病。番人云。此卽香瘴也。其地距中華既遠。而金沙江又由景邁而東出南海舟楫不能通。故行軍時詢之番人云。此楠蕃茂。南北四五百里。東西未能測其所止。地不愛寶。如此營卒樵採以歸。爨飯時香氣盎然。肉桂亦雜其中。蓋中華楠木皆來于越海外洋。而此則總限于異域耳。

蠻岩蒸雲怒江絡石南荒久餘珍幹輪扁誰知工師未採一任異香零亂陰陰翠蓋
但綠盡八關東畔說是驕陽凍雨濃芬總盈鼻觀依稀瘴雲頻見染征衣病情難
浣聞道浮來瓊海雕陳几案驃骨于今萬里縱欲遡金沙路何辨祇供兵廚晚來炊
爨。

瀟瀟雨 銅壁關芭蕉顆蕉高至三四丈生谷中上出層崖葉長丈許戍房漏
者則取而蓋之壓石片可以禦雨花未開時顆色微紅大如匏瓜蠻官觴客
盛以漆盤用銀鉞飲之漿升許其甘如蜜

羣峯凝曉翠更層崖清蔭散遙汀又長藤夭矯高榕晻暎苦竹崢嶸猶是芳心半捲
難寫此時情掩映征途外紫旆紅旌聞說仙莖初長有銀花欲展玉液先盈又何
人愛客相餉漆盤擎看戍房三重茅屋但翦來微壓護簷楹應小坐話巴山雨聽到
深更。

臺城路 雨中過洱海望點蒼十九峯不得往書此記之

雪峯十九橫天際。相逢似經青眼。疊翠排空。層螺接漢。多少松巖竹澗。客游汗漫。正擬駕。飄車名山當面。誰料雲師。曉來觸石度重巘。扶筇欲試游衍。衝風兼凍雨。飛瀑頻濺。玉局嵐深。桃溪煙暝。閒作畫屏清玩。勝情未倦。待回日新晴。歸途沙暖。重訪仙林。舊盟還可踐。

瑤花慢 出雞足山還至賓川官廡

名山回首。仙梵冷泠。尙遠來林藪。一重一掩。恨此去。偏覺肩輿人驟。山城如帶。取路出。驛亭前後。上小樓。點點青螺。寧忍匆匆分手。瀑泉何處潺潺。知送客情深。直恁僂僂。齋廚麤飯。也未敢。遽試茅柴新酒。落紅滿地。又枝上。青梅如豆。更坐深竹外。香飄喜聽鯨鐘徐吼。

水調歌頭 七夕同傅碧夢升之作

今夕此何夕。碧漢啓新秋。一丸花外涼月。先已照牽牛。料得黃姑妝罷。便試凌波微步。終是不勝愁。相見又將別。淚與露華流。值佳節。逢俊侶。小勾留。細斟藥玉。羅衫

同倚看山樓。最苦天涯萬里。况隔風塵兩載。無語聽蓮籌。料得京華夢。也不到蠻陬。

金縷曲 碧夢剛梅枝爲飲煙笛屬賦

何事能消遣。掩戎旂也無從覓。香鑪酒棧。差喜淡芭菰葉在。輕颺煙絲一翦。算偏少、碧筩堪玩。聽說蠻山冰雪裏。墮霜華。尙有寒梅幹。喚康結。康結番人稱梅之語此稀見。斲來未覺餘芬散。恁蒼皮溜雨。刮摩工擅。如玉一枝清吏直。瑤草恰宜相伴。儘銷得、秋深夜淺。烽火連天雲霧黑。點星星。忽憶春葱撚。噴珠唾。伴彤管。

減字木蘭花 再賦梅筩

靈犀一點。透出絲絲雲掩冉。瘦比琅玕。馬上微醺破曉寒。蠻煙瘴雨。香雪飄零誰見取。翦得南枝。梅信分明鼻觀知。

憶江南 中秋追憶舊事做樂天體十二首

中秋憶。最憶雪葭莊。涼沁春葱湖藕碧。香生雲鬢木樨黃。供月拜筠廊。
中秋憶。憶得在蘇臺。紅芰秋池珠露潤。綠蕉月砌夜燈迴。話雨共銜盃。時同曉徵鳳

嗜來殷寓滄浪亭

中秋憶。水閣雨晴初。楊柳風姿聯袂坐。芙蓉詩格劈箋書。宛在小清虛。謂蘋花水閣

中秋憶。白下最銷魂。鴈齒橋西蓮葉舫。蝦鬚簾底藕絲裙。檀板隔花聞。

中秋憶。小住近明湖。柳絮名泉閒躡屐。鵲華秋嶂共提壺。銀鹿伴香懣。

中秋憶。最憶住邗溝。十部名倡齊度曲。兩行狎客妙藏鉤。燈影月華浮。

中秋憶。蒲褐小齋前。詩社人歸停酒琖。妝臺夜永換花鈿。人月鬪嬋娟。

中秋憶。侍直在西清。絳蠟銷時仙漏緩。瓊樓高處峭寒生。吟對玉輪明。

中秋憶。三度鎖闌中。煮茗分泉瓷椀翠。研朱滴露筆花紅。蓬島與仙同。

中秋憶。從獵在金微。萬里星河隨出塞。十番簫鼓送行圍。詰旦侍龍旗。每年駕幸熱

河至七月二十五六日始演劇及聖節將近再演戲過中秋遂啓蹕入圍場行獵

中秋憶。壁壘大江涯。兩岸蠻煙昏似墨。千重鬼燐撒如沙。何處望京華。

中秋憶。人尙客荒陬。鼓角軍聲仍北府。琴樽詩興侍南樓。家遠碧雲愁。

浪淘沙 羅紅本京雒歌伶飄流大理博晰齋觀察以詞贈之屬余爲和未見
其人也

羅幙篆燈紅。玉頰春融。京華回首萬山重。誰分酒旗歌扇底。摻袂相逢。蒼雪照籬櫺。遠鬪眉峯。使君見慣尙惺忪。撩起羈人無限意。夢裏愁中。

渡江雲 辛卯九月將赴成都渡江門驛風水甚厲噴薄中至瀘州小憩飯罷
宿

路盤金筑盡。惡溪一綫。磨石濺飛濤。斜陽山外隱。三老相呼。待渡已魂銷。輕篙纔舉。便橫穿。雪浪千條。暫夾岸。停舟相慶。頃刻度嵯嶢。浮橋。鳴笳伐鼓。擊柝懸燈。更驛樓窈窕。胡牀上。清樽並設。足慰蓬飄。醉來猶覺身如葉。眩空花。銀海光搖。喜明日。驟網又聽征鑣。

玉漏遲 寓松茂館旬日內當卽往魚通進討作示曹荔帷及秋汀弟
三旬風雨半。錦官雖到。征衫難換。籌筆方殷。負了故人開讌。但有棣華問省。且招集。

江東詩伴。還空羨。雉皋城裏舊游如見。自甲戌在如皋與秋汀見後。至今已十六年。匆匆萬里橋南。又小住萍蹤。松潘行館。雙鬢蒼浪。忘卻昔年情款。遙指維關千疊。想路出魚通更遠。衝霜霰。那更頻年兵燹。

燕山亭 歲暮合兵美諾與升之夜話

風掃危巢。兩路軍麾。已向疏林並進。半載分袂。風雨相思。難約萍蹤鴈影。火報平安。看幾夜。烽煙已淨。山徑。正一笑伸眉。舊愁都省。還幸沐雨炊風。便書檄頻繁。起居猶勝。從此東華紫詔。紅旗應有家人相慶。鈴索聲閒。且暫免。嚴宵告警。寂靜。好消受。殘年風景。

沁園春 自樊榭老仙逝後武林詞學歇絕茲夕讀徐袖東刺史詠桃樂府猶

見虎賁中郎之似也喜而和其韻摩盾鼻截牘尾郵寄于登春軍次時癸巳六月望前二日燈下書

檀篋生香。松煤含潤。細描穠春。似紅板橋邊。穿籬短短。青帘樓外。壓水鄰鄰。祓禊人

遙。澆花箋在。回首蘇堤蹟未煙。銷魂甚。伴垂楊似綫。嫩草如茵。西泠詞客無存。愛
城北清詞琢句新。念冰雪重嵐。韶光不到。烽煙遠徼。芳意誰申。與我周旋。爲郎憔悴
感此飄零。迨路塵。天涯恨。歎仙源難訪。長是迷津。

淒涼犯 中秋感悼蓋自得雲清亡信已周年矣

冰輪如濯。乘秋望、素鸞何處淒泊。相思路斷。返生香燼。經年蕭索。紅絲綠薄。又雪壘、
風煙常作。祇宵來、如珠秋露。苦伴淚痕落。萬里京華遠。况是吳淞。海天綿邈。玉屏
蘭筍。應還似、脩眉隱約。水暗雲荒。更難認、當時妝閣。便夢魂欲去。難度警鈴柝。

金縷曲 聞藥圃郎中近日倚聲甚夥詞以索之兼柬儉堂袖東

衰謝今如許。渾不記、東吳舊夢。引商刻羽。昨日燕臺詞客到。爲說京華仙侶。真個是、
筆驚鸚鵡。楚幕烏啼刁斗靜。傍寒江、愛詠巴山雨。裁蜀紙、夜頻賦。年來慣向窮邊
住。歎參軍老矣。祇工蠻語。縱有中仙家法在。誰耐更尋簫譜。空悵望、新聲白紵。石屋
繩橋烽火地。也應須、一聽花奴鼓。煩寄我、澆愁緒。

陽關引 袖東來而復去。畫玉叢清露。小幅留別賦。此送之。

雪嶺飄秋雪。小住旋成別。烽煙將靖。行正近。茱萸節。盼天涯俊侶。寥落晨星列。淒涼處。臨岐畫角曉鳴咽。仍寫分袂意。吳縑潔。宛湘潭上。粉香淨。珠露浥。把同心認取。朝晚銷愁絕。但霜時。枯楊瘦盡不堪折。

解連環 官軍下宜喜。連營大江南北。商風薦爽。成都諸君。又送南酒。至銜杯。

小酌蓋兩年來所未有也。

西風送喜。聽隔江呼嘯。啼鳥驚起。自進屯。幾及三旬。望風落山空。雲旗天際。誰料先機。已不待。囊沙聚米。任霜清。月苦。螺徑千層。笳吹猶沸。已如投醪情味。更攜來畫榼。重煩鴈使。看爐火。石上猶紅。且喚取老兵。瓦盆先洗。小作消寒。怕掙卻。蒼騰睡思。但得除羈愁一枕。夢回京邸。

絳都春 丙申正月回至成都游青羊宮

崢嶸金碧。是千古舊留。仙宮帝宅。臺榭如新。香火微消。仍遺蹟。當時柱下人誰識。共

瞻仰猶龍風格。函關紫氣經傳尹喜。常垂竹帛。最憶流沙西邁。便後裔逢啓晉陽英傑。奕葉盤根射雀銀屏符嘉錫。中有唐高祖寶太后像青羊鑄在苔階側但不見青牛舊式。更看旌旆飛揚。製同宗祏。

高山流水 爲楊九我題藍田叔山水挂幅上題云甲申夏日畫于西溪山莊

想爾時猶未得北都信也而水墨蒼寒春日而有秋意北風雨雪之感已應

于筆墨間耶

百年遺墨最淒清。畫幽居。竹樹縱橫。墟路莽蕭森。春來未見農耕。也不似烟水西泠。想正值雨晦風瀟時候。桑海將更。是布衣老去。無處寫昇平。幽情。空懷昨時夢。秦淮上。語燕啼鶯。勝事總難尋。承露盤已先傾。繪桃花。竟惜娉婷。還家處。一任天荒地老。獨掩柴荆。笑藝林評泊。分派指溪藤。田叔後人指爲浙派不知其胸中涇渭也

霜葉飛 霜降後五日復病來殷星實諸君攜酒來看兼憶策時升之跋三方

宣先後下世

清霜初向層檐下。茸衫早覺寒薄。勞人草草始歸來。伏枕還蕭索。搯茶鼎、蘿窗西角。相思誰更循前約。有紅藥交游。偕俊侶、高軒偶駐。閒門剝啄。回溯廿載江湖。詩場酒座。都作遼東化鶴。後來孰可定文章。恐負黃壚諾。秋已暮、襟懷正惡。過從且盡閒時樂。况直沽、雙螯到。擣辣篩香。再同絃酌。

大聖樂 題文衡山前後赤壁賦畫冊

如此江山。幾番烟月。勝游千古。况天涯、正值新涼。放棹幽尋。愛受滿身風露。酒熟魚香。歌聲起。又一似、飛仙凌玉宇。憑空望。嘆赤壁烏林。英雄何處。重來清景如故。至石瘦波寒。秋又去。對臨臯木落。雪堂路遠。夢回無據。唳鶴東飛。休相警。祇此意、停雲能領取。定當日、是座上、吹簫伴侶。

金縷曲 題潘湘雲小影爲胡元謹作

試問真真影。是玉山、芝儂女史。調鉛點穎。寫出鴛湖娉婷侶。宛是春秋未醒。剩掃取、梅魂相並。一片玲瓏蟲炷石。倩柔荑、自襯湘裙冷。秦簫約、忍重省。楚江烟雨無憑。

準念斑駁何時見也。三生空訂。彩鳳隨鴉誰知惜。零落燕釵蟬鬢。休腸斷。紅樓薄命。環珮歸來圖畫在。有紅屏和淚題清詠。更才子謂元謹薦香茗。

又 答馬依墀

令節過重午。趁熏風綠陰蟬噪。紅窗燕乳。走馬蘭臺初罷直。小集江湖倦旅。還跌宕。茶鎗酒具。劇羨東籬才調美。甚年年。失意嗟岐路。和淚寫斷腸句。題來宮扇工如許。付旗亭吳孃應唱。瀟瀟暮雨。我已天涯磨盾久。不耐引商刻羽。喜此夕。翦燈同語。錦瑟華年根觸慣。擬攜君坐月修簫譜。頻喚取玉箏度。

八歸 送張漢宜歸吳興并序

天低鴈字。適逢南陸之辰。風颺驪歌。言指東吳之路。命朋尊而道故。恨似江淹。難官燭以言懷。愁逾庾信。况復豐臺霜冷。陸無可贈之花。潞水冰堅。岸渺堪攀之柳。於時冬也。能不悲乎。爰有京華舊侶。湖海清流。素叶神交。夙同道術。姑分劇韻。用寫離悰。亦知去舞萊衣。欣還桑梓。歸貽秦鏡。喜動廳燕。此行楚水燕山。不盡分襟。

之歎。他日宮雲苑樹。重期摻袂之歡。

圍鑪小集。翦燈深語。相約共過九九。西風况攪長亭雪。正值苦寒時節。偏教折柳。芳草缸深梨酒熱。且還對。二三朋舊。知共勞。小幅吳箋。譜此際。傷憊。最憶。經年下榻。評香鬪茗。促坐聽殘清漏。而今獨趁。驟網鴈字。歸向畫眉窗牖。想水晶宮裏。遙憶東華定回首。郵程遠。重來未卜。臘尾春頭。短書能寄否。

謁金門 題畫

香茅矮。畦局幾稜寒菜。籬落茶蘼開玉蓓。兔須緣屋背。竹榻倦拋黃嬾。料理茶僧酒海。斜拓藤窗疏雨灑。隔江聽欸乃。

渡江雲 過汾湖訪午夢堂疏香閣故址尙存

垂虹橋外路。丹楓葉葉。村落遠模餽。小堂名午夢。并有疏香。妝閣對烟蕪。掃眉未了。記三生。已誤仙姝。聞說正。紅絲將結。便化彩雲徂。飄車。桂宮不返。梵筵香燈。與慈雲同住。只傳得。零章斷句。玉冷花孤。邨亭洛浦應相等。恁難逢。翠羽明珠。招魂去。凌

波儂下清都。

萬年歡 追題葉元禮山塘尋春冊

竟體芳蘭。是七葉名家。風調相繼。慘綠年華。合作荷衣遊戲。况值春陰新霽。便喚取、吳船沙尾。纔半篙。行過桐橋。小紅闌下斜檣。紋窗六扇未啓。諒不教鸚鵡。啼醒香睡。待捲珠簾。試看粉融脂膩。好倩青禽作使。恐重說、紫薇情事。還怕是、倩女離魂。單衫再滴清淚。見江湖載酒集高陽。臺一闕。

醉花陰 題廖織雲女史墨蘭

檀心碧葉香風遠。恁丹青全浣。水墨一痕寒。描取湘花。補入離騷傳。彞齋遺派無人管。賸冰絃彈怨。只付與幽閨。淡影微勻。略似春螺淺。

齊天樂 小桃源女道士觀在木瀆西偏少日數往游焉蓋從前觀主呂貞九

青浦人康熙年間道行與施亮生齊名及楚游歸得南嶽魏真君法吳人建此奉之觀左有蓬萊道院數楹前方池池上長橋橋南小亭昔亦嘗夢至其

地半池明月風露翛然將渡有嫗止之曰此非應渡時也望亭中柱對聯云
野店溪橋香入夢繡簾明月夜繙經不知作何解恍然而寤今道院久圯池
亦湮沒惟堂前鼠姑盛開凡數十本遊者尙多欣賞

小桃源近河干路誰知武陵重到水國舟移雲房徑曲雨後蒼苔未掃鐘沈磬杳但
啼鳥留春篆香繚繞紫案丹爐蓬萊何處問烟島石梁空憶縹緲月寒清夜裏會
隔方沼簾底繙經花時尋夢舊事廿年縈抱仙人歸老恁萼綠蘭香松風飄渺常有
繁紅數枝依翠篠

釣船笛 題秋圃覓句圖

蘅畹起新涼風動簾簾千箇最好翠玲瓏外有鬢蟬斜鞞
襄陽播搢好鈔來松花
滿雲朵付與冬冬閒唱和玉簫聲破

沁園春 邵桷亭屬題花韻館圖

卸卻青衫卜築衡茅薛澗湖頭愛短籬六枳紅薔枝亞橫橋三板碧柳絲柔硯北無

人花南誰侶。通隱時娛白社秋。知何日。再對牀抱被。石竹頻留。耽情芋圃瓜邱。只禪伯樵兄並唱酬。况香生薤簞。堪容高臥。苔黏梅杖。足伴清遊。料理吟身。從容致語。蹤蹟何妨比四休。期相訪。向藤窗共倒酒。瓊茶甌。

夢芙蓉

柿葉山房留別張玉壘時已亥秋晚乞假將滿回日下

商飈高閣敞。看一林柿葉。殷紅初上。諸峯掃盡。濃翠見秋爽。主人延勝賞。茶鑪正發清響。蘭若微香。有幾層紺塔。移影到書幌。廿載前遊。渺莽。何事閒情。終作邱中想。碧梧翠竹。已向瑤階長。謂坤厚諸耶家山真可傍。棹歌無奈先唱。指點蒲帆。嘆菱灣荻浦。後夜夢難望。

國香慢

將往青州讞事道過閩門留別企晉懷朱吉人諸友

雉堞如雲。訪故人新宅。曲巷斜分。小廊攜筇相見。對坐微曛。試看方池湛綠。偏銷盡。玉典珠墳。苔階鼠姑謝。喚掃殘紅。還薦芳罇。硯山仍似舊。認喬松修竹。臺榭無人。時企晉。遂初園。瓊川書屋。皆因分產。別售藏書業。已無存。清歌按拍。舊日周伶侍側。

夢幻難溯前塵。又恨揀花風緊。淮南北、催送江輪。歸來近重午。待約同遊。再賦銷魂。時予擬于讞事後挈家南歸旋以使臬江西不果

清波引

庚子仲夏雨中至南昌百花洲寓舍風景幽絕殆與虎阜不殊挑燈

作此

風梳雨沐喜繫纜。章江正綠。垂楊翠鬣。入戶茶香熟。屏影低明燭。相對數莖叢竹。只愁簷露丁耽。還似伴青蘆宿。漳蘭芬馥。閒倚隱囊畫軸。風塵局促。何緣占清福。宛在山塘曲。如此賞心難足。再尋南浦西山。昔賢遺躅。

金縷曲

新秋讀桐石草堂詞中有寄籜石一闕感和其韻非識曲聽真誰知

別有懷抱耶

何處重尋醉。念頻年、吟箋分寫。來禽青李。白楮坊南嬉遊地。慣聽僧鐘烟際。更潑墨、閒情偶寄。楊柳春旂南去日。便忽忽、遠別題襟輩。想昔雨、雜悲喜。青衫誰識今蕉萃。剩摩挲、江湖小集。墨淪紙敝。指點小屏風中路。盼望舊遊何已。籜石前從錢文端

公遊歷西江最久擬喚取明童崽子。唱徹懷新桐石句。灑天涯。清淚如鉛水。况節序。又秋矣。

早梅芳 初至湖上與書局諸君就莊小敘卽示幔亭

柳橋深。芸閣靜。書局開幽靚。扁舟初到。正值梅花破春冷。記簪豪捉麈。共寫湖山景。問山翁久逝。此樂又誰省。海鹽陳文勤公昔曾居此尙有遺墨 舊遊稀。新知并。莫負扶筇興。消盡香雪。更上籃輿訪名勝。梧桐吟夏雨。菡萏覘秋令。鷗盟此後長訂。

點絳脣 題稼軒先生墨梅小幅蓋曹慕堂通政所藏時居其地

翔鶴堂寒。堂偏半幅梅花瘦。雲窗月牖。淡到無何有。疏影浮筠。猶見熏香守。還回首。山陽笛奏。立雪幾時又。

聲聲慢 癸卯七月初五日臥疾將起企晉東有獻之枉攜樂部來過寶慈齋

感而有作兼寄姚雪門臬使湖南

聽。正當三夕將臨。七簫齋十笏清虛。小隊蠻鞞。攜自問疾文殊。試省哀絲豪竹。道愁

驚絕勝巴歛。還看取。有乳鶯新燕。串串歌珠。芍藥如今蕉萃。念瀟湘路遠。鴈斷音疏。伶人芍藥爲雪門所眷。合與吳儂相伴。茗椀香鑪。西窗嫩涼乍起。好消磨。翠蠟紅氈。儘款坐聽初更。纔滴漏壺。

三姝媚

杜曲桃花甚開約。東有往遊夜雨不果。因寄來殷京師。

長安聞小住。喜已遇春來。杏花微雨。千點輕紅。想盈盈多傍。紫薇村塢。擬喚青驄。約酒伴。尋芳幽墅。無那東風。吹溼香泥翠巒如霧。應是良遊難遇。但簫局爐香相對。款語。可是當年。正香羈欲跨。也會間阻。來殷以乙未歲游秦欲游杜曲因雨而止。詩見于集中。待訂新晴。又怕是東君將去。閒聽秦雲低唱。別銷愁緒。東有來殷等有秦雲擷英錄皆曲部之後也。

渡江雲

東有在長安歌場酒座。懽聚半年。今入春旬日。忽生故園之思。抗手

分襟。祇增淒泫。時余老病連蜷。未能走送。填此以貽之。兼示子才明府。

春來猶未醒。歸人恁早。草草上行車。指點蓮峯外。芳草秦淮。金粉鬪韶華。隨園無恙。

同舊侶。款竹尋花。應回憶。南樓月夕。椽燭照紅牙。堪嗟廿年贈紵。半載題襟。正幽懷未寫。况病中。懷人送遠。難折疏麻。垂楊不綰絲鞭住。背灞亭。迴鴈橫斜。今夜夢。相隨先到棲霞。

金縷曲 送壻嚴瑞唐南歸

醋醋紅於火。灞亭前。幾行風柳。又驅鈴馱。華岳千重關四扇。望斷青厓紫邏。虛後約。東牀高臥。飛絮簾櫳。仍如雪。卻無人。清詠珠生睡。時女粹卿先歿。仗短劍。向江左。

石公溪畔。停單舸。溯空齋。妝臺蠹篋。蝸涎蛛裹。蕉萃青衣爭忍見。謂侍婢繡兒。况見瑤環倭妥。已兩載。瓶沈鏡破。短夢輕塵。三生事。覓鸞膠。取次同青瑣。休憶舊。淚頻墮。

驀山溪 題史誦芬秋樹讀書樓圖

三高祠外。誰在層樓住。畫裏小簾櫳。趁清秋。吟湘賦楚。支頤跂脚。款竹更無人。擁筠牀。開錦贖。俯仰懷今古。須得閒身。占取閒亭墅。如此好溪山。恁年年。征衫塵土。吳淞鷗鳥。一樣舊盟寒。問何時。攜短櫂。共聽垂虹雨。

水調歌頭 中秋夜翫月同史誦芬楊簣山余伯扶作

誰伴老夫病。端愛素娥幽。娟娟三五清宵，況是值中秋。退了一襟殘暑，收了一痕殘雨。涼意滿簾鉤。風露浥仙桂，芳韻勝香篝。掩書幌，疏酒瑣，聽更籌。珠杓銀漢，空教賓從詠南樓。憶得曾填小令，數盡生平悽冷。余在滇南曾賦望江南詞十二調記中秋時生平所歷之地又負五陵遊。歌管夜深寂，歸夢落賈洲。

龍山會 和汪少山家石華史誦芬金夔齋楊簣山諸君九日作

病起仍消瘦。雲密泥深。誰省重陽候。金鈴開滿甃。也不耐，相對簪花賭酒。哀鴈并寒蜚。更簷外，雨疏風驟。任吟朋，研箋齊擘，新詩同奏。年來慣愛清齋。題罷香餠，虛卻持螯手。余以戒殺不食蟹蠓蝓盈短牖。遺挂在，贏得淚絲黏袖。時姬人湘碧初亡莫勸去登高，怕望見，一彎蛾岫。况故園歸期又嘆，蓴鱸空負。

秋霽 將赴商州宿藍田館舍問輞川諸景云悉已蕪沒惟華子岡竹里館尙

存然路距二十里日暮不及遊壁間嵌輞川石刻圖頗工高令昱許搗以見

惠喜而填此

紫閣藍山正迤邐。西南一路葱峭。宅記延清。名標摩詰。竹里尙存餘照。郵程初到。欲尋遺蹟荒涼早。但聽取、水石潺潺。秋籟出叢篠。高情如見。歸自菩提。飯僧縛禪。終守嘯傲。念千秋、巖扉寂寞。溫經人在真同調。尙有青珉圖畫稿。幽賞未已。他時策騎歸來。踏殘紅葉。徧欵湖道。

壺中天 洵陽路曲折數十里至山陽葱蒨深峭雨後巒翠尤濃善畫者莫能寫而農村漁步上下幽寂宜古之高隱多出于商雒間也

峯迴路轉向商於東下。雨餘浮翠。洗得千重眉黛影。烏柏青楓分綴。峇簪橫舟。桔槔傍屋。欲畫知難擬。碧雲未散。和烟漸作新霽。正好候館蕭間。竹軒梅磴。香信來仙桂。應是畸人留剝啄。聊與風塵小憩。晚稻登盤。秋菘薦酒。不盡漁樵意。殘霞纔捲。半蟾已挂松際。

買陂塘 回過藍田憶張漁川昔日其姪爲買水田四十畝作歸老計漁川填

詞一闕誌之後久客竹西而水田亦已易主蓋至今二十七年矣秋宵感舊
賦此愴懷

念幽人性耽詩酒數椽久寄江北花場月地多清興祇嘆秦關遙隔憑鴈翼幸阿買
關情先作幽棲室一區可得儘荷篠春深帶經早起歸隱定能必年華換子弟徒
勞相憶椒園杏館虛葺篋中詞卷空吟諷孤負當時籌策霜鬢積想我亦何時乞取
勞筋息秋懷悽惻計勝地蒼寒昔賢瀟灑此樂本難及

長亭怨 過開封秋帆留飲酒罷追憶終南仙館中舊雨惟稚存一人相顧黯

然時丙午臘月初三日

正寒夜六么聲絕酒罷歌殘蠟釭紅泣如夢如塵山陽何計寫幽怨青綾帳外看猶
是詩囊畫卷但覺殘年風景異舊遊雲散悽惋年來歡聚處常得朝游晚宴傳柑
爆竹可仍似終南仙館况天南絕少征鴻又誰遞數行芳訊便他日重來已怕恆沙
難辨

摸魚子 有贈二鶴者畜于佇月廊未幾鶴病因送歸化寺育之以爲他日之

約

看金江朝來孔翠無從更睹仙羽筠籠攜得雙孳尾點綴畫堂容與開放處計梧竹
長廊苔石供微步一枝堪住正小塾香茅時分玉粒照影對花嶼嬉游慣真可凌
雲嘯雨慳慳又及嘉侶紅塵只恐銷清興使伴禪燈佛鼓君可悟待逸翮脩成應和
迦陵語我將歸去想遙指華亭連蜷共起還警海濱露

應天長 戊申四月因驗騰越城工復至大樹園總戎劉君之仁留飲時緬酋

入貢已抵近關

蠻江一綫翠嶂千層又來叱馭登陟雉堞新成更爲誅番壯邊色懷前歲剩舊蹟望
銅壁關山路直榕陰地下瀨傳烽噩夢都息叢竹尙如初昔雨依依猶勞薦青碧
酒名聞說金沙江上獻琛已馳檄慶中外邀平格正好是凝香宴客微酣後難忘當
時佩刀籌筆

瑣窗寒 小雪日泊潯陽問匡廬瀑布凍已旬餘薄暮微雪陳觀察蘭森使人

饋安化芽茶

斷浦凝雲孤筴吹葉吟肩微聳。江潮欲退留得楚天雲重。又隨風收帆圍鼓登登已破船窗夢。只征鴻隊外依稀如見珠簾畫棟。遙空飛花送問廬岳蒼寒懸流早凍。西林鐘動圓月清光未縱。聽瀟瀟吹遍殘蘆此時擁鼻誰人共喜多情雀舌貽來香茗資夜供。

三部樂 己酉夏初過徐州叔華來驛舍翦燭夜談至漏下三刻而別

戲馬臺高是往日雲龍舊游勝處。重來清夏又見濃陰滿路。祇是身似浮雲問斷蓬蹤蹟也盡難訴。不堪把盞更聽彭城風雨。尙聞清氈安穩道傳經設禮多依杖履。黃樓至今猶在山水如故好登臨吟商賦楚望常寄長湖魚素共嗟遊倦知何日偕老農圃。

霜天曉角 次東阿因憶竹垞先生詞亦賦一闋

曉日初紅。近名山岱東。指點陳思祠宇。殘碣在。沒荒叢。
西峯神女宮。雲雨暗芳蹤。
欲聽冰絃舊曲。響清籟。起松風。

解連環 題寒閨吟席圖爲羅兩峯作

竹西鼓吹。恁寒閨蕭寂。別饒情味。應並隨。綠淨芳標。謂徐夫人德音厭繡度金針。箏
調銀字。障了青綾。都安著。筆牀翡翠。把簪花妙格。飛絮清詞。共課幽思。朝來焚香
掃地。對寒銷九九。雪梅初試。嘆彩雲。容易飄零。便寫入新圖。春憔悴。此去江鄉。料
只是。孤吟山鬼。惹三生。招魂翦紙。麤蕪清淚。

徵招 春暮夜寓秦淮雲深無月風色瀟然幾如秋晚錢學淵家若農來晤有
作

雞鳴埭外彎環水。春餘尙縈桃葉。十載又經行。嘆鬢絲重疊。烟波渾是夢。喜小阮。天
涯還集。書劍飄零。琴樽寥落。綈袍誰給。博士少從容。耽古藝。鄭服兼通。鄒夾。首藉
一槃寒。好著書盈篋。盛衰今古事。且莫怨。秦淮殘劫。明晨去。爲寄雙魚。趁進潮風急。

瑣窗寒 題龔半千山水半千有絕句云畢竟山家氣味清竹牀安穩几寬平

風多閣上無燈燭瀑水中宵似月明半千明賢本崑山人國初常居白下

友結東堂半千與山東孔東堂尙任友善沒後料理詩畫皆得其力畫宗北苑天然

高勝一匳遺墨常有霏微嵐影正盈盈夏日初長瀑泉翻作冰霜冷待秋來更轉銀

灣自記夏杪作遠瀉棲霞高頂清迴蒼苔徑見落葉先飄是無人境幽蹊斷阜誰

識此中風景况如今香草俱荒半千有香草堂詩山家氣味又誰省想夜深竹密風

多禪心還獨靜。

催雪 長沙小除夜有寄

石炭凝紅銀樽湛綠又是小除時節看履齒春泥牆腰霽雪不似燕山風景誰伴取
寒窗還此別。恩恩燈火淒淒絃管旅懷難說。愁絕最蕭屑。記詠絮傳柑博山同爇。
恁蕉萃天涯丁香空結。鴈過瀟湘斷也更難望京華雲千疊。須盼到堤柳微黃小巷
纔停征轍。

數花風 辛亥春過西坪宿明日爲穀雨而桃李已謝風景蕭然

棟花開處隴外黃雲千頃。滿篝似慰老農請。竹屋清烟幾縷。山廚烟暝。好乞取、半盤香餅。昔年曾記最愛粉牆帘影。鞦韆笑語遠相應。此景而今何處。柳稀人靜。料獨有、鳴鳩知省。

西江月 題程荆南松寥山館集

詩卷慣吟樊榭。家居卻對松寥。湘烟楚雨更迢迢。坐愛溪山清曉。一自吳箋移贈。十年夢斷魂銷。種花常憶舊風標。誰識玉樓先召。

又 元夕獨坐

雪影未消鴛瓦。月明斜上雞窗。少年情思未全降。曾遍花街柳巷。幾處柑傳羅帕。誰家香炷蓮幢。老來清坐伴殘釭。愛聽鄰鐘微撞。

霓裳中序第一 停空鏡予在關中得之鏡銘云鍊形神冶瑩質良工如珠出匣似月停空當眉寫翠對臉傳紅綺窗繡曠俱函景中凡三十二字在篆隸

之間當似蘭成詞意有謂蜀後主所作殆未必然但鑄非一次輾轉傳摹故其間字畫少有異耳

菱花光似雪。誤說蜀宮妝閣設。慣伴鈿箱脂牒。鑄得芳華。詞穠意密。舊情難說。想現影、雙雙清徹。可記取、塗黃傅粉。圓印比明月。應出。庾郎詞筆。只鼓橐、良工頻易。覓裳桂露會溼。繡纈何存。玉輪未闕。勝姻歸往劫。非杜宇、題紅已滅。嬋娟好、樂昌如見。攬袂定嗚咽。

小重山

題儲玉函花嶼填詞卷

屈曲屏山晚寂寥。石牀閒選韻。舐仙毫。茶烟鬢影自推敲。憑誰譜。擬付紫鸞簫。翠袖按紅幺。詩人猶未老。燕鶯嬌。風懷晒我已全消。香燈裏。吟坐對團蕉。

一萼紅 題九九消寒圖

此圖始于宋代。畫梅一枝。上有空白八十一蕊。法以長至日曉起。挂妝臺左。取胭脂片點唇後。則如一點于蕊中。迄春分盡。凡八十一日。則寒消春滿。紅梅爛然。與

窗外梅花隱隱相對。故爲九九消寒圖。明弘治年間。秦藩青陽子刻在蘭州。歲久漸泐。吳中女士吳楚霞等重刻此圖。且各系七言一絕。真閨禱佳話也。

展吳綃。見南枝綻雪珠。蕊發春朝粉。蝶誰知。翠禽欲語。羅浮遠夢初銷。臙脂匣。妝臺乍啓。將玉指。微注小櫻桃。爆竹聲中傳柑節。裏日日親描。惆悵西秦遙遠。但研朱滴翠畫筆。誰調雲鬢梳成。銀鬢理罷。重摹韻事偏饒。更相約。瑤京仙侶。霽香麝。擅袖染纖豪。留得歲寒風景。常對眉梢。

擊梧桐 癸丑初冬舟過玉峯題葉書城繡餘詞草明葉文莊公盛曾孫女文敏公方靄姪女也吾邑王編修素巖以駢體序之

半繭今何在。半繭爲玉峯文敏園陳其年有賦留一卷。猶伴青箱黃嬾。柳絮深閨早。同姊妹。終是謝家丰采。小窗聽雨。小樓望月。更寫柔情如畫。多少銷魂地。喜吟罷。尙有解人能解。其配闕宗寬文學有名。苦憶當年。東家俊侶。已似明妃遠嫁。腸斷書頻寄。風雪路。薄命偏歸紫塞。書城與同里。周青禽相善。後流落北方。以沒那及故鄉。

安穩熏香。擘錦剩、綠窗舊話。又詞林、色絲幼婦。題句瀟灑。

國香慢 夜來香

銅雀臺荒。嘆靈芸久逝。薛靈芸一字夜來。猶剩芬芳。依稀楚蘭凝綠。珠露微灑。正值新荷出水。生香處。月上迴廊。晚涼雲鬢。數朵拈來。好助殘妝。羅幃風漸逗。想雙鬢墮枕。插滿釵梁。銀絲開遍。此際真伴荀郎。回憶少年情事。今贏得。佛火禪牀。何人再同夢。待與素馨。並供西窗。

百字令

重過修竹吾廬。其前本有詠月亭。今圯。廬額亦素巖編。修隸書尙存。

吾廬三徑。是玉堂。當日曾題翰墨。茵莛生香。花半頃。更有篔簹翠滴。往事全非。前塵空省。都化秋蕪碧。月亭久圯。此間猶挂遺蹟。相間豆架瓜棚。淺沙流宿雨。難停遊屐。少欲乞漿滋舌本。不見松爐芳溢。鳩杖枝輕。蟬紗袖冷。兼恐新涼逼。草堂資乏。誰爲好事重葺。

曲游春

訪張幻花先生舊居諸勝先生自華亭移居吾里。釐爲十景。見青浦。

詩傳中歿後三十餘載子孫零落十景分與比鄰同人攜酒過風漪草堂有
殘荷數十本餘地則皆屬之市買所居感而賦之

白髮人重到認陂塘三畝鷗鷺來往憔悴殘荷共風梳露浥蒹葭蕭爽好景誰知賞
齊歸與蛩吟蟬唱看幾番挂壁蝸涎盡染畫屏書幌此外亭臺下上又零落芸籤
都付宿莽記得從前有清流相訪題襟撰杖髣髴柴桑巷今賸得蘋花敗舫苦將詩
卷重開舊游難忘

木蘭花慢 訪江橙里西磧幽房

西磧在鄧尉瀕湖處明李長蘅欲作六浮閣未成而先爲圖以志之者橙里置山
房僅三十年今訪之竟無能指其處蓋又爲山農所占矣其南卽騰嘯臺石壁皆
廢但存湖南精舍扁爲明僧德清所題繆修撰彤八分書之南望漁洋法華諸山
縈青環翠于風帆沙鳥間而久無游客所謂吾笑吳人不好事更可感也

望澄波烟水翠嶂遠遍西南儘隴曲村迴峯懸徑仄香雪重嵐曾聞竹西詞客結茅

茨數架俯沈潭。喜帶竹爐茶竈。并攜筇杖蒿簪。何堪過眼似優曇。往事與誰參。但傳說檀園六浮未作。空記崇巖。畫圖久經零落。任樵兄、漁弟作叢譚。剩有臨湖石壁。法書猶染柔藍。

醉江月 家鄂舟將返南潯袖出新詞見示吟諷之餘念其吳越薄游心情寥落殊黯然也

兩番過我恁忽忽。空向荒齋留宿。落魄江湖知尤甚。誰省生涯。獨袖裏長箋。燈前小令。石帚真堪續。寒宵雅集。一樽共到醺醪。時衢州戴金谿在坐自愁臥病經秋。茶烟藥裏。枉撰歸田錄。殘雪孤篷還相送。聞少杜陵茅屋。乞米無從。牽蘿有恨。時寓居外家難盡愁千斛。春來且約清游同飲山淥。予將有道場青弁之游

步月 梅村爲弇州子士騏故居亦卽弇園遺址吳祭酒復作樂志堂梅花庵
嬌雪樓鹿樵溪舍愷亭諸勝秋日往訪則頽垣斷礎僅有存者裔孫履文出
遺像見示感而賦之

承露盤空臨春閣。圯前塵多少荒涼。不堪故里。本已歷滄桑。指瘦燈。霜高少葉。認殘梅。雪盡猶蒼。空傳說。水天閒話。綵筆重宮坊。茫茫。玉京去。湘絃留怨曲。腸斷清商。尙餘遺挂。不似在巖廊。湖蕭史。魂銷北地。念家山。淚盡南唐。傷心處。一樽重爲炷名香。

雙頭蓮

題王弇州虎邱觀月圖同游者爲錢罄室而張君度圖之

歸自瀟湘。便桐帽棕鞋。山塘遊賞。綠陰薦爽。澄霄外。漸見嬋娟旣望。菰蘆小友偕來。對花宮雲幃。郎當響。鶴澗微行。不藉徵歌傳唱。層層塔影橫斜。愛茶牆酒市。殘燈猶上。清幽誰狀。但憑取妙墨。纖毫相仿。回憶經閣祇林。皆弇園內名勝。嘆名園宿莽。喜蕭齋。一幅輕綃。千秋神往。

孤鸞

曇陽仙子祠

靈旗香火。是小閣伶仃。仙姝婀娜。夙世塵緣罷。事驗三生果。風前六銖衣薄。尙依依。鬢雲偏左。應與西池南鶴。待平分仙座。記琅琊小傳。曾親作。想稽首飛鸞。宛同薩

唾。竟趁颿車去。見畫圖流播。弇州四部藁有曇鸞大師紀。尤求有白日升天圖。落花久經夢斷。又臨川誤傳珠唾。試看名賢往昔著詩篇。唱和湯若士有花妖木客之曲。論者囂然。然竹垞詩話已力辨之。而吳梅村陳確庵皆有過曇陽道院詩。並無譏諷。則其爲誣罔無疑。予撰太倉州志。石君中丞時在安徽。寄書來辨。故今祠中聯額爲中丞手蹟也。

露華 題婁江閨秀陸琳牡丹

調脂殺粉。是傳得閨襜。纖玉親運。零落繁華。偏許鼠姑獨趁。重重姹紫嫣紅。不使韶光易盡。閒窗啓翠。豪拈來。還寫妝影。春殘尙剩春信。與芍藥將離。綠階相引。濃豔幾枝。誰似徐家風韻。定知描罷吳綃。羅袖淚痕偷搵。婁水曲。何繇并瀉幽恨。

百字令 竹垞太史客津門時會倩曹秋厓畫竹垞圖長卷李武會高澹人諸

君咸有和作伯元閣學令工臨之屬予追和攜至鴛湖道中爲填此解

鴛湖放櫂。正春殘。兩岸楊花漂泊。一卷生綃重畫取。彷彿前賢栖託。菲屋彎環。蓮漪

澹沱空負幽居樂。潞河羈旅。潮生還看潮落。料得投老歸來。叢篁影裏。昔雨同絃酌。記向竹西頻話舊。惆悵苔荒井幕。耆碩凋零。雲初衰謝。喜更開邱壑。丁丑戊寅間。余與稼翁先生同寓邗溝。又與伯承同年同官陝右時。語南北堦蕪廢悵。久之。今稼翁早歸道山。伯承下世亦十餘年。而伯元能修復之。是可喜也。他時過訪。青鞋還蹋籬角。

綠意 駱佩香畫白芍藥小幀見贈

橫斜小朵。是沈香別種。初放瑤圃。似有幽芬。隱隱生來。不到鬧紅深處。豐臺春杪。曾遊賞也。誰見者。般眉嫵。想愛陪。萼綠妝樓。懶把胭脂輕注。坐對遠山浮玉。曉窗涼似水。仙管容與。掃盡鉛華。自寫孤標。誰分鶯歌蝶舞。采蘭人去。尋芳徑。只留伴。生綃翠縷。知良宵。月冷風淒。芳淚頻霑清露。

遠朝歸 歲云暮矣。倪米樓自錢塘來訪。留宿村莊。翦燈話舊。所謂風雨雞鳴。不覺悲喜交集者也。

鴉陣啼寒。正催作、殘年雪意。橋橫疏柳，不分仙舟來棹。相看一笑，還帶西泠風味。長
檠底。訴分攜兩載，舊侶天際。猶憶塵軟東華，在小閣平津，新詞頻遞。雲林憔悴，重
話吳城楚水。云有江漢之行老夫况病料此後圍鑪能幾情難已勸住到玉梅風細。

金縷曲

題汪對琴松溪漁唱卷松溪在歙縣蓋以寄其故山之思也

小舫停波面。正秋深、柳絲如縷，蘋花似霞。彷彿松明溪下路，兼有竹寮梧院。空記得，
韶年曾見。久別黃山清夢杳，仗仙毫，一一描東絹。看樓榭，隔雲巘。羨君本是南都
彥。但微吟側帽，鬢華霜泫。久識臨川工述德，况有雙芝葱蒨。謂兩郎君更頻進南陔
蘭膳。花月小秦淮一曲，數主持，風雅推專擅。休重憶，故林遠。

湘月

樂圃夜宿圃自宋元符中朱長文居其勝詳見吳郡志諸書屢經易主

扁額尙存池亭猶舊而當時所營十景松檜藤竹之盛無一存者近爲秋帆
制軍購得地在宅南將爲他年歸老計不意病歿楚中歸喪于此嘉慶戊午
初夏予宿圃中俯仰陳迹留題于壁

方池碧漲。是元符前詰。退隱親搆。往事前塵。步屣處。花砌苔闌依舊。短約三層。虛窗四面。更入名人手。坊通履道。暮年定可相守。誰知露電功名。笳簫歸日。空對停狸首。卻倚闌干。新雨過。荷芰田田如繡。璧月猶圓。卿雲已墮。悵望澆杯酒。今宵一枕。夢魂猶繞書藪。後樓五楹。秋帆新建藏書數萬卷。及書畫石刻之所。

霜天曉角

孫鑑之以秋山話雨小冊索題

秋嵐如沐。暮雨連松竹。閒倩練邴俊侶。圖爲嘉定張農聞作拈筠管寫僧屋。此間三友足。酒香兼茶熟。幾許巴山清話。小窗裏。翦殘燭。

青衫溼

題女史汪畹玉畫扇

秋蘭零落芳魂杳。誰賦楚詞招。一枝斜倚。分明悽怨。露冷香銷。些些渲染。黃添鞠蕊。紅暈梅梢。攜來便面。畫眉窗底。彷彿纖豪。

浣溪紗

帶得餘杭玉屑來。酒名紗幘團扇共銜杯。捲簾燕子正雙歸。斜日有花開白萼。斷

雲無雨潤黃梅。西山隱隱聽輕雷。

掃花遊 己未九日同張翼庭錢同人從孫繹如游橫雲并佘山知止山莊回

船月朗因共填此解

雨疏風細。是作出重陽。登高時候。已招勝偶。放扁舟穿過。斷蒲衰柳。路指橫雲。苦被雲遮翠岫。登岡阜。恁綠野平泉。多剩荒蹇。時王氏懷清堂張氏宿雲庵俱廢東去訪苕帚。喜金粟初殘。玉蓉如繡。高風難又。仲辭故宅白石山房苕帚廬皆在其左歎詞場詩座。早歸烏有。關權纔移。忽見銀蟾影瘦。同斟酒。祇孤負。持螯左手。宋詩天生左手爲持螯崑山朱厚章亦有此句時子戒殺不用團臍故云

雪獅兒 吳江郭祥伯於友人得螽書一紙空處皆作螽形鬚翅連蜷宛如粉

墨裝成小冊屬予紀之

漆園醒後。無蹤誰識。畫衣猶潤。蝨簡殘來。剩有佛龕友人別字能認。柳嬌花嫩。似未減。黏香傅粉。宛春日。羅帷開處。避風斜趁。脈望休嫌太忍。恁零星餘紙。轉增丰韻。

展向書窗。不怕圓睛偷進。裝成小本。儘銷得、佳人餘恨。憑配準。再翦祝英臺近。

玉京秋

庚申八月二十日敷文書院講德齋前桂花盛開與邵升泰吳梅梁

李光甫坐花下夜半而散

秋香馥。桂花著新露。正開金粟。風迴小扇。涼生單縠。晚集蕭齋俊侶。愛銀蟾、休翦銀燭。幽情足。呼來冰盃。共傾芳醪。連日編珠綴玉。定無愁、青袍立鵠。時方鄉試。况此宵、梧陰閒聚。茶鑿棋局。賦楚吟商。算好景、仍似西窗夜讀。寒蛩促。終遜後堂絲竹。

西江月

柳圃時聞犬吠。莎階已絕蛩鳴。西風落葉上衣棱。陡覺薄綿衫冷。橫卷已收黃鶴。長箋猶看青藤。明蟾如到小窗櫺。不怕書齋秋暝。

綺羅香

清風閣同入祭太鴻徵君

雉堞連雲。虹闌印水。香火又開禪宇。見說詞人零落。尙餘桑主。刻商羽。舊譜猶存。問雲初。故廬何處。算朝來、留伴涪翁。小窗相對尙應許。往時况有鴛侶。還踐雙棲約。

松龕移住。貝葉蒲團。勝似孤墳秋雨。從此溯北郭清風。也不羨、西溪古渡。還須向、桂魄梅魂。瓣香陳綠醕。

霜天曉角 題溪山秋霽圖

泉枯木落。翠壁清如削。人在斷橋深處。知倚杖、曉行樂。林壑耽寂寞。草堂隱叢薄。欲寫空山幽致。琴可抱。倩菱角。

聲聲慢 爲張金冶題紅椒山館長卷

只談風月。宜著山巖。卷中雅興誰同。家在城西。名園水石玲瓏。鶴沙舊蹟已渺。塔射園爲許鶴沙宮詹故宅剩後賢小置房櫺山館外有竹凝烟綠椒綴霜紅應是名如蓴綠李長吉詩本是張公子曾名蓴綠花恁宮花苑柳不愛春叢領略清秋偏耽茗椀詩筒憶會攜筇過訪眺雲林塔影重重甚時再點書鐙還聽夜鐘

清平樂 題陶寧求紅豆相思卷

無人采擷。留伴閒枝葉。只待同心雙綰結。領取相思親切。絳雲樓閣消沈。錢氏山

房在虞山東禪舊巷誰尋。惠氏山房在東禪寺好與紅兒記曲。蠟珠垂處微吟。

探春慢 澗綠樓聯句

么鳥穿林。疏蟬抱葉。人在翠雲深處。德甫拂地簾低。鋪池荷小。銷盡人間煩暑。寧求
篩亂斜陽影。被一徑、檀欒遮住。德甫水窗占得風多。細香吹上詩句。寧求 俯仰偏
愁日暮。記白袷烏紗。東華塵土。德甫棐几橫琴。石闌點筆。且領此中幽趣。寧求 一榻
追涼好。華胥引、夢魂飛去。德甫喚醒芭蕉。綠天幾點疏雨。寧求

三姝媚 孫雲鳳及妹雲鶴孫令宜女有春草閒房侶松軒兩詞集取法南宋

風韻蕭然而所適皆不偶。故多幽怨語。其第三妹□□亦能詞。猶是匏瓜無
匹也。今宜爲予辛未禮闈取士官。至四川按察使歸。卒錢塘許周生以其詞
見示。琢此題之。使留心彤管者共知憐惜云。

三珠誰得似。想風月湖山。深閨連理。滴粉搓酥。向西冷並作。掃眉才子。減字偷聲。近
稍播。茶檣酒市。豈料前生。五角六張紅絲誤繫。常向篷窗憔悴。羨徐排多情。秦嘉

上計。詠雪中庭。又孤鸞獨舞。季蘭小妹。鏡約荒涼。只恐老青裙縞袂。應付蜀鵲訴怨。夜啼清淚。第三女令宜按察蜀中時所生

瑤華慢

山礬本名瑒花。取其葉和以礬染絹。則嫩黃色極佳。故山谷更以山

礬名之。南海普陀此花最夥。梵語小白花也。蒲褐山房池上忽見此花。高四

五尺許。幽素香潔。蓋吳中所少。

水仙久謝。梅葉初垂。又輕花點點。蘭碕竹塢。春已去。常有異香掩冉。涪翁使在。便喚作。弟兄何忝。正香光欲證。莊嚴尤喜。風迴曲檻。芳根本出海南。常潤擁慈雲。遙對激澗。品占雪月。更何論。縑素嫩黃能染。優曇散盡。卻好配。旃檀閒澹。當不減春桂。微芬吹上書牀鉛槧。本草云有草本山礬一名春桂能辟書蠹

瑶

想

詞

運



王芑孫（雍正一三——嘉慶二）

字念豐。號惕夫。江蘇長洲人。乾隆五十三年召試舉人。官華亭教諭。工詩古文。爲南北時望所推。館閣巨公均延致其家。故雖未掛朝籍。而朝廷有大典禮。文章之事。多出其手。著有碑版廣例。淵雅堂集。

瑤想詞

長洲王芭孫念豐

浣溪沙 屬吾友沈芷生點定詞藁而自題其上四首

欲向珠宮作散仙。至今身在藥鑪邊。不婚不宦過了年。寓意莊生篇內外。置心周昉畫中閒。美人芳草思絲絲。

不守辛蘇杜撰禪。不從周柳覓蹄筌。自爲鐵體者些般。筆力漸看成老硬。詩腸無奈自纏絲。花間一集費丹鉛。

書徧羅紋五色箋。綠春詞外又新編。鶯聲下上十三絃。才子下場多變佛。仙人離劫轉成顛。粉鋤香耜種瑤田。

院本吳興二妙專。孝廉讀曲不曾廉。謂芷生兄贊漁五官鄴下又翩翩。芷生行五問姓便知身瘦削。填詞不礙舌綿蠻。芷生舌本調調刁刁然而詞甚儂麗故以戲之爲余刪正付雙鬢。

清平樂

攜簫自譜。月底知心苦。殘月未修成缺斧。虛注三千人戶。憑誰話與纏緜。心香銷作空煙。若是此情雙得。銀箏底只三絃。

鷓鴣天

紫玉情多卻化煙。相思無據託危絃。當初月淺燈深地。又到香濃雪泐天。癡獨坐。鎖孤眠。者番羸作斷腸僊。玉簫縱踐深深約。爭耐而今十幾年。

江城子

一闌紅雨畫清明。是東君。作陰晴。偏教落花多處著儂身。睡盡繡絨看燕子。雙絮聒。不中聽。

前調

玉羅窗。榻月低痕。換鑪熏。欲三更。移燭海棠廳。事佇伊人。飛起青鸞驚一餉。驚錯了。護花鈴。

臨江仙

蕙意雪中潛。梅心風外伶。如何昨事已前塵。帳欹花一角。闌摺月三層。頻嚮東皇致語。夜來新夢無因。擬將瑤瑟訴殷勤。殷勤彈不盡。濃墨寫燈屏。

蝶戀花

夢斷紅牆烟隔路。不分年時。花底人相遇。人在曉鶯聲裏住。門前一樹櫻桃樹。鳳意鴛情天不妬。繡榻斜行。早逗相思句。杜牧尋春春未暮。來遲不算三生錯。

臨江仙

硯北香南緣分。鶯前燕後年庚。與他商略好心情。喚貓銀杏樹。擒蝶牡丹棚。歡極例增惆悵。從前何事因循。便攜紫玉譜雙聲。鸚哥常獨自。多恐妬難勝。

清平樂

寒多春硬。疏箔花低映。小小繡牀安玉鏡。鏡礙花梢未正。畫屏無數關山。畫中郎底忘還。最是損人眠食。殘鶯亂絮中間。

浣溪沙十首

蝶夢當中借一年。幽歡曾記小游仙。無題古意積篇篇。
雨試燈天。一時思發在花前。

鈴脆相風調。鴿地幔低防。

鏡閣書堂接對頻。宋家東角阮西鄰。大家惆悵可憐春。

薛女五言星伴句。謝家七

字雪催吟。卻教忍俊恐難禁。

月底人拖月色衣。來聽坡讀是耶非。回身曾露影些微。

寫韻軒中鸞未偶。臨邛道

上鳳孤飛。聞聲對影只依稀。

柳拒東風不肯斜。幾回壁月墮窗紗。暫酬交甫玉無瑕。

鏡閣有書皆詠絮。繡奩無

帖不簪花。三生夙慧結因芽。

食譜茶經事事能。篋師棋史又鍼神。畫蘭不畫顧眉生。

燕子悼亡親作輓。鸚哥藁

葬自爲文。青琴挑月弔湘君。

松下清齋禮玉虛。自言福慧合消除。他生端要作麻姑。

翠羽明珠妝太好。瓊枝瑤

草寫成圖。此生先作洛神無。

黃絹詞成悵悵多。孝名今代亦曹娥。秀才誰似女陰何。

賸有苦心常對藥。漸衰佳

貌怕當花。一春翻藉病消磨。

吐盡紅心點玉壺。醫花無計倩花扶。鴉堆三日未曾梳。

八六子詞嫌與折。十三行

搗厭糊塗。自除條脫學歐書。

箋怨疏愁脫稿遲。多煩次第錄烏絲。道郎詩格似微之。

累爾銷魂非但別。道子落

魄定緣詩。穀人消受是斯時。

消渴難分莖露餘。遠山眉下看芙蕖。不論詞賦亦相如。

身作費郎稱漢使。歸來守

令效前驅。只除此事我應輸。

生查子

羞郎復恨郎。作夢仍郎處。絮絮囑東風。不若和伊語。

雙雙紅豆枝。枝上花心吐。小

立又黃昏。燕子歸春雨。

烏夜啼

層寮曲避花欹。月和伊。記得不分明處許多時。親未可。拚難得。兩矜持。難道不會真個不相思。

虞美人

銀泥紈扇郎書了。著意薰龍腦。秋宵團坐玉相欹。記得水風涼處互攜時。簪花題帕留精楷。題字人何在。費他鉛淚幾回紅。好遣一同裝拓素屏風。

眼兒媚

杏花留罽露人兒。心事蝶應知。一頭紅雨。半身碧霧。立了多時。蓬山天遠無重數。眉語未通辭。如何忘得。煙梢逕路。月樣門兒。

一翦梅

月罽煙稜香霧交。燕借樓僑。鶴傍廂調。嫩晴三日賀花朝。碧響篔簹。紫響檀槽。添助春聲一倍嬌。防煞鶯捎。耐煞蜂驚。費春多處是緗桃。蝶慰花勞。鶻豈春刁。

三字令

花隱現。月微茫。是山塘。鶯白掠。燕三商。賣茶館。散花場。玉蘭房。
攬宿鶯。罩垂楊。爭雨隙。就煙當。閨門估。蕩湖孃。共風涼。

隔溪梅令

梨花明白護窗陰。凍流雲。人在花深深處。坐調笙。繡衾寒過春。
水晶簾子蒜垂銀。卷綉紋。多事春風相識。愛相尋。杜鵑紅一廳。

賀聖朝

香銷銀葉更三五。最無慘心緒。一般梁月。幾回窗雪。多番簾雨。
梅花無恙相依苦。怕花飛。賸我與誰消遣。燒燈時節。聽歌去處。

南歌子

銀葉熏從歇。銅壺滴又長。井梧作意攪人腸。蕭瑟夜來。滋味不堪嘗。
結願盟猶在。遊仙夢亦香。只言相伴佇新涼。不道新涼時節。更淒涼。

瑤想詞

憶王孫

關心遙識獨含愁。小字冰紈寄墨鉤。隔斷紅牆十二樓。兩悠悠。滿載離情煙外舟。

更生齋詩

餘二種

蓮囊




洪亮吉（乾隆一一——嘉慶一四）

又名禮吉。字君直。號稚存。江蘇陽湖人。乾隆甲戌一甲二名進士。授編修。歷任貴州學政。咸安宮總裁。實錄館纂修官。以言事謫戍伊犁。翌年即待旨赦還。因自號更生居士。詩文有奇氣。尤長於經史訓詁及地理沿革。著書二百餘卷。

序

主人少喜填詞。壯歲後恐妨學。輟不復作。卽偶一爲之。終歲不過一二首。歲戊午。自京邸乞假回。車箱無事。輒填至數十闕。及自塞外回里。亦時時作之。遂滿一卷。名曰冰天雪窖。從其後言之也。少日所作。亦不忍棄。并裁作一卷附焉。機聲燈影詞是矣。



更生齋詩餘

陽湖洪亮吉雜存

冰天雪窖詞

臨江仙

綠鬢學仙愁已晚。卽今況復蒼顏。天空鳥去不曾還。未知雙蠟屐。再入幾名山。半世著書難得了。硯臺肯放清閒。酒人相約掩蓬關。臉從花索笑。心與石爭頑。

憶王孫

涼風吹綻一天星。約伴時時過水亭。說鬼宵深不可聽。掩疏屏。小婢齊聲唄佛經。過汀故說愛新涼。躲過前頭姊妹行。私語喃喃已不妨。卻提防。移得鸚哥出畫廊。兩重門內忽相逢。一串花香出袖濃。剛賭秋千氣力慵。且從容。眼角回青頰轉紅。傷春長自下簾鉤。杏葉扶疏柳葉柔。三月花前雨不休。沒來由。私語催人上小樓。

滿江紅 陳其年先生填詞圖爲伯恭學士賦二首

卅載填詞。香一瓣。敬酬陽羨。可可是家山百里。畫中頻見。前曾見先生四十畫像。涉筆偶描秋士影。關情別有春風面。笑青衫。五十尙沈淪。工排遣。將擗笛。先施鞵。乍展卷。仍安硯。仗卿卿。壓盡等閒釵鈿。別夜最憐天似水。當頭吹落雲成片。算個儂。風味有誰窺。梁閒燕。

試問熙朝人物在。宋元之右。只己未宏詞一榜。尤稱淵藪。前輩愛才真似命。昇平樂事吾能究。趁閒來。歌板兩三聲。消清晝。竹垞老。梅村叟。招玉叔。攜紅友。且不知秦七。何論黃九。翡翠暫停三寸管。新腔已落千人口。羨當年。風月最清華。誰能又。

雙調江城子 紅豆詞爲禮親王世子作

深秋門巷動涼颺。掩關遲。雨如絲。折得一枝紅豆立多時。天上亦添新別恨。人不見。渺相思。拈來枝葉影參差。意誰知。酒難辭。且與梁園賓客譜離詞。只有文園消渴甚。賦不到。九秋枝。

十六字令 初冬

風一夜千林葉墮空。開軒望斜月正中峯。

減字木蘭花

香濃月淡。幾朵露蘭光欲泛。行過房櫳。福橘栽燈墮小紅。茶甌清冽。留得那年元夜雪。說夢聲低。偏惹簾前鸚鵡疑。

唐多令

真氣本無前。豪情忽欲顛。一百番沈醉酣眠。亂摘九天星與斗。權當作酒家錢。寥廓約頑仙。踏紅雲種田。待秋成。歲月三千。擬釣六鰲滄海去。雖不飽。且烹鮮。

眼兒媚

杏花樓上杏花香。無語斷人腸。干他甚事。鶯鶯燕燕。咒盡年光。依然簾幕依然鏡。依舊隱斜陽。如今再要。當時人面。卻費商量。嵌心百事總難忘。閒處一端詳。鮑姑紈扇。柳娘羅襪。謝姊縑囊。愁多不合住江鄉。夢少也千場。笙歌元夕。鶯花上巳。簫鼓端陽。

轉應曲

雷鼓。雷鼓。打過春三四。還虧列闕豐隆。催得前村挂龍。龍挂。龍挂。一幅水鄉圖畫。
蝶戀花 時欲乞假南回書示子弟

十二闌干紅半曲。桃杏將開。一雨先舒萼。多分散人真有福。半春好夢無重複。卅
里迢迢煙草綠。欲望江南。遠樹偏遮目。好水好山生計足。汝曹莫恨歸期促。

賣花聲 春分

草綠未成茵。柳線難勻。等閒鶯語幾曾聞。只讓杏花同燕子。占盡春分。心切望朝
曦。霧暗連晨。關心西北有征塵。日日玉堂天上坐。卻是閒人。

謁金門

誰決策。除是劉琨祖逖。一事差堪羸越石。承平非狎客。又手巡行今夕。放眼追思
疇昔。好友緣儒都入墨。寥寥心孰白。

相見歡

黃昏獨下珠簾。病懨懨。差喜眉頭常苦。夢常甜。三叉渡。三生路。白雲尖。恁悅長林。斜月影纖纖。

鳳棲梧

畢竟春來饒氣勢。萬鳥啼春。萬夢隨春至。惹得玉梅添意智。花開又豈干春事。白
拾春衫。聞已製。輕暖輕寒。春轉無倫次。何是與秋非一致。春人只把情懷試。

滿江紅

譚子受英雄兒女圖

大纛高牙。問此是誰家年少。只互互。倚天長劍。勢將離鞘。千里偶追流電影。萬金願
買傾城笑。算渠儂。二十五年前。堪同調。且緩緩。金樽倒。更草草。離愁攪。看車前努
目。急思投効。兒女情懷何者是。丈夫志業誰能料。問卿卿。何日定天山。紅旗報。

菩薩蠻

玉皇宮殿高無極。東西龍虎更番直。天上事偏多。仙人鬢亦皤。麻姑空一笑。偶自
舒長爪。招破碧桃花。花光照萬家。

減蘭 寄舍弟

吾家阿弟。先我一年辭帝里。玉版銀鱗。飽啖江南二月春。小桃開落。穩坐卷施東畔閣。應念衰翁。騎馬朝朝冒朔風。

應天長 直廬卽事

搆巢招得雙鷓鴣。激水養成千屬玉。長林麓。橫溪曲。卻向此中開竹屋。閒官殊不俗。所喜更無拘束。昨賜萬條官燭。寫三朝要錄。

江南好 時將乞假南回作此寄里中親舊

鄉園夢。昨已到雲溪。生小樓臺三徧換。柳邊門巷亦全非。新綠浸簾衣。

鄉園夢。昨已到花橋。對舫乍憐詩社歇。陸祁生每與丁叔候兄弟及兒子韶孫等聯吟時並遠出隔河添得酒旗飄。燈火徹清宵。

鄉園夢。昨到橫舟亭。小港蓄魚橋半圯。荒庵燒筍戶全扃。僧老厭繙經。

鄉園夢。昨到放生池。煙柳綠交楊令宅。楊大令西河宅在池側水雲碧。畧謝家祠。清

景待題詩

鄉園夢。昨到驛樓前。障眼市塵高百尺。關心鄉語別經年。真個說歸田。
鄉園夢。昨到石橋村。高隼欲盤雲外塔。神魚時拜竹間墳。松子積臺門。
鄉園夢。阿弟屢邀呼。新築水亭招社燕。別營山冢葬童烏。猶子明男近瘡作達且提壺。

鄉園夢。好友遞將迎。木杪軒中搜逸句。竹初庵內證長生。奇論尙縱橫。
鄉園夢。外舍最依依。榆莢綠迷穿徑水。薔薇紅隱上樓梯。花發子規啼。
鄉園夢。羣從亦翩翩。坐我小樓敲句好。輸卿長日枕書眠。屋外水周天。

又 抵江南境作

江南地。一碧已無塵。小市雨晴初試馬。長隄星暗乍逢人。猶剩一分春。
江南月。不厭徹宵看。無奈乍圓還乍缺。未妨輕暖與輕寒。長凭玉闌干。
江南岸。屈曲漾蘭橈。舊事乍思情漠漠。夜程初急雨瀟瀟。已過驛西橋。

江南艇。鷓鴣與同飛。待得柳稍殘。月出水禽蹤跡已全迷。留得夜烏啼。
江南屋。低小只如船。一樹石榴初吐豔。四更銀燭尙高然。隱隱笛聲穿。
江南路。從此遂幽尋。韓偓豔詞容寄意。陽城下考亦甘心。別念撫孤琴。
江南夢。日昨已全醒。黃卷誤人頭欲白。綠楊窺客眼猶青。閣小戶仍扁。
江南客。天末溯歸蹤。漁唱便須蘆笛和。芰衣仍待柳絲縫。鷗鷺且從容。
江南侶。說著已銷魂。松柏徑中尋舊友。鵲鴿原上指新墳。尤歎此衰門。
江南節。屈指已天中。絲柳乍青蒲葉綠。楊梅初紫杏丸紅。水淺試雙龍。

虞美人

黃昏獨坐闌干左。竹葉深深鎖。橫陳玉體見何曾。知道紅窗六月、不燒燈。夢中嗟
語。愁人覺。小婢都辭卻。無聊長自睡。膏騰。懊惱一鉤殘月、鬢邊升。

江城子

生疏廊屋幾曾經。意忪惺。步伶仃。偏是半邊團扇、有流螢。縱向曲闌深處躲、防照見。

一星星。

紅闌干外路三千。病懨懨。說當年。贏得半生憔悴、半生眠。只有畫籠鸚鵡好。渾不記。有從前。

采桑子

別來已覺無情緒。放了風箏。過了清明。總向閒門冷巷行。何時約略三春夢。多比流螢。少比疏星。春睡瞢騰白晝醒。

轉應曲

天上。天上。誰把兩丸安放。東西滄海漫漫。出沒真如轉丸。九轉。九轉。天也有時不管。明鏡。明鏡。看了有時仍聽。吉祥善事多般。頓覺愁顏喜歡。歡喜。歡喜。儂與鏡兒知己。春夢。春夢。誰向小窗分送。夢中說夢尤疑。身外分身絕奇。奇絕。奇絕。魂共燭花凝結。千里。千里。只在離人足底。別來吳苑花香。又復燕臺夜涼。涼夜。涼夜。酒薄衾單多謝。

虞美人

更生齋詩餘

人人愛說芳菲節。更愛團圓月。個儂心事獨嬌憨。卻喜花看春半。月初三。長安道上金貂集。青紫容人拾。到來生怕說頭銜。只戀年時憔悴舊青衫。

昭君怨

原是一般年紀。可算他作弟。記得小名無。衆中呼。入夜畫樓先鎖。百計要將人躲。何意學生疏。上頭初。

柳梢青

纔賭千秋。又邀鬥草。且漫藏鉤。衆裏聰明。個中機警。格外溫柔。日斜剛下妝樓。招女伴。更番出遊。鳳尾墩邊。鵝毛洲上。龍嘴灘頭。

西江月

夢裏鶯花繚繞。愁中風雨廉纖。一般時節症懨懨。相對燭花呵欠。小膽疑聞鬼語。細心時卜神籤。病兒生怕不增添。百計把人排陷。

減字木蘭花

乍談心曲。何事小名呼小玉。彈指年華。未比梅花比杏花。最憐同調。八字果然生剋肖。判與他生。自有麻姑肯玉成。

蝶戀花

閒日偶從妝閣偵。聞說驚鴻。險被袁宗聘。私語又防人竊聽。團圓只指隨身鏡。情短情長何自定。除了今生。更把來生訂。一晌遲疑還未應。喃喃只說心腸硬。

酷相思 贈俠士

日晚黃塵都似織。徙倚徧樓南北。便四海無家歸未得。一劍也、千金直。一騎也、千金直。恥向人前稱羽客。況肯□談天釋。任醉眼昏昏青轉白。天上也、誰相識。地上也、誰相識。

醉春風

好把春衣換。更舉離觴勸。眼前誰可寄相思。算算指上先掄心頭久嵌。口中難喚。合是人天眷。莫更情懷亂。個儂只怕太酸寒。看看爾許年華。這回風格。那般詞

翰。

羅敷媚

年來情事誰能識。神也瞞他。佛也瞞他。小婢依微道着些。無端兩地難牽合。心在誰家。身在誰家。夢裏時愁去路賒。
秋千架下分頭走。姊住東谿。妹住西谿。只望秋千影不迷。更闌重到秋千下。月也低迷。露也低迷。畫索斜拋烏夜啼。

長相思

風蕭蕭。雨蕭蕭。窗裏無人響玉簫。紗燈壁上搖。夢無聊。醒無聊。窗外荷珠落亂跳。游魚蹴浪高。

木蘭花慢

秋夜重憩團圓書屋示蔣二振三

只團圓書屋。仍一片。挂斜陽。算杏已摧紅。蘭先殞紫。桂尙杼黃。惜惜那邊門巷。歎簾衣。何短草何長。百徧欲尋歸燕。幾番試問寒蟄。十年羣從半淪亡。頭白剩蕭郎。縱

見了桃根尋他菱角也費猜詳。平時枕書眠處。是何人、重與擺繩牀。酒醒佛燈藏幔。夢回鬼語沿廊。

又 太湖縱眺

眼中何所有。三萬頃、太湖寬。縱蛟虎縱橫。龍魚出沒。也把綸竿。林威丈人何在。約空中、同凭玉闌干。薄醉正愁消渴。洞庭山橋都酸。更殘黑霧杳漫漫。激電閃流丸。有上界神仙。乘風來往。問我平安。思量要栽黃竹。只平鋪、海水幾時乾。歸路欲尋鐵甕。望中陡落銀盤。

念奴嬌 生日東西家

半秋纔過。不多時到了。初三新月。八字雙飛胡蝶好。生與菊花同日。剛欲題糕。仍邀說餅。且把書聲歇。齊肩齊歲。那人先占佳節。猶記七夕樓頭。穿鍼簾底。腰瘦頻頻折。知道個儂勤頂禮。偏喚小名何必。笑靨方開。愁眉更斂。梁燕防饒舌。燈花解事。雙雙紅蕊偷結。

菩薩蠻 贈俠客

偶然來預朱門宴。身輕只比梁閒燕。驀地出人頭。燈前尙閃眸。
一腔填恨血。匕首懷中熱。座客酒遲乾。先防冷眼看。

木蘭花慢

己未中秋內城南池寓舍作

歎八年此夜移八處。看陰晴。算幾載持衡。兩番入直。一度歸耕。西風欲催人老。趁乍寒。刮得鬢星星。已被月中人笑。從今莫更多情。依然薄醉擁桃笙。如水玉階平。只三十年前境。難依約。夢不分明。沈思那回塵劫。把深杯。都向夜臺傾。一例碧虛解事。半宵霞采橫生。

臨江仙

恭纂高宗純皇帝實錄第一分進呈擬欲乞假南下偶此書事

人說綠蓑青箬好。可容仍殿朝班。玉堂官燭影闌珊。昨朝書已奏。明日棹當還。天上樓臺曾小住。明湖如帶回環。夜涼偏欲夢鄉關。屋前雙壘港。屋後一堆山。

琴調相思引 歸燕

一樣樓臺夕照昏。杏無心緒入朱門。欲飛還止。銜得舊時恩。差喜故巢同海上。好春仍得話溫存。倘逢精衛。可許代招魂。

減字木蘭花

夜涼人定。正好明心同見性。一縷茶煙。透到梅花小閣邊。休休莫莫。夢好正嫌無着落。與我周旋。莫鬥眉梢眼角禪。

滿江紅 贈崔三瘦生

十八年前相見在。謝家庭院。驚一揖。玉梅花底。與花同顫。葛塢東西山水窟。劉綱夫婦神仙眷。便匆匆。從宦向湖頭。湖冰泮。茗雪上。頻開讌。荆郢路。頻傳箭。只悠悠。七載幾曾謀面。蔥嶺南頭時入夢。蒜山北下仍相見。歎人生。聚散總無端。空中電。

昭君怨 苦雨

窗隙與誰同坐。咒雨鶉鴉兩個。兜起卅年愁。舊南樓。暫向曲屏高臥。夢又把人顛簸。睡覺夜燈青。影伶仃。

滿庭芳 雨窗簡蔣振三昆仲

撇卻千山行完萬水。偶來茅屋勾留。又教聽雨。日日捲簾鉤。畢竟誰人過訪。三兩客、兼雜鳴鳩。門扃響。奚奴睡熟。親爲點茶甌。颼颼風乍急。紙窗搖動。無異扁舟。擬乘流徑去。隨分清遊。東海波臣尙笑。曾見汝。大漠西頭。祁連冢。何時築就。埋骨此荒丘。

念奴嬌 元夕醉中復至城東憩巽宮樓

餘生何意。擘蠻箋重寫。孝侯風土。醉我百杯元夕酒。更聽一堂簫鼓。我醉還歌。歌仍引滿。說盡邊亭苦。妻孥雨泣。去年投畀豺虎。殘夜出戶閒行。城門東去。彌望多平楚。一領綠蓑收拾好。恰稱瀟湖漁父。踏曲歸來。兒童指我。眉目皆飛舞。爲言此客。與樓與月千古。

又 錢竹初松菊猶存圖二首

十年歸計。只剛剛長就。滿籬松菊。買得半園工位置。儘可賞心娛目。忽悟浮生。因求大藥。并禮西天竺。回頭自望。鬢毛鏡裏先禿。差幸服食祈年。迷途未遠。末路仍堪

贖。莫待扁盧俱束手。醫雅難于醫俗。一逕香清。一簾花好。一味茶初熟。這回休誤。白
駒頭上行速。

因而自省。笑先生曷不工于責己。萬里歸來行樂好。何以埋頭不起。幾尺牙籤。三分
燈影。一寸書堆几。蠹魚規客。先生今盍休矣。倘冀後世名乎。三唐兩漢。試問誰堪
擬。況是傳人皆有命。不朽古來能幾。文仿淵雲。經研鄭賈。詩筆還蘇李。君應謂我。愚
公愚更無比。

沁園春

喜趙味辛乞假歸里卽送之青州司馬新任依原調二首

司馬江州。從事青州。頭銜若斯。歎機庭綸閣。鳳池遽奪。治中別駕。驥足安施。竿上綠
魚。磨中旋蟻。可是先生宦興詩。呼驢問。儘才堪令僕。汝好爲之。雖然樂已難支。只
白髮高堂健飯時。算阿奴碌碌。無慚令弟。深源咄咄。尙有佳兒。跨鳳清才。乘鸞仙客。
君諸壻皆有才名。都唱微雲山抹詞。掀髯笑。趁唐灣風月。且倒金卮。

三十年前。稱詩少年。惟君不狂。看元卿三徑。招邀二仲。謂黃仲則左仲甫弘農別館。

款接他楊。楊介祉蔚之元之叔姪。少時過從最密。西廡則系出山陰。故以他楊例之。陌
上班駢。堤邊畫舫。新樣蠻箋。古錦囊。今消歇。已半登鬼錄。半下名場。別來萬里投
荒。幸絕域初歸。鬢乍蒼。便依然花鳥。何時索笑。依然樓閣。何地傾觴。蔥嶺煙雲。祁連
冰雪。夢裏都憐徹。骨涼。君知我。是愁多易老。恩重難償。

金縷曲 題萬大令廉山請纓圖。圖作于大令年十五時。後二十年大令隨畢
秋帆尚書。姜杜香侍郎。剿辰州紅苗。最著勞績。

此客真先識。趁升平、時時留覽。九邊阨塞。試問請纓何太早。髮正垂垂覆額。天下事、
引爲己責。手理韜鈴。仍躍馬。果湖湘、陡建非常績。勳勒徧壺頭石。丈夫自信饒奇
策。況生平、服膺所在。劉琨祖述。如許少年能十輩。分置楚南川北。談笑盡、萑苻之澤。
只我感恩思効死。便歸耕、尙枕投荒戟。隨爾去、殺殘賊。

鷓鴣天 秋杪雲溪曉望

谿光未是廿年先。一樣闌干到眼前。風急萬鴉爭古木。露寒獨鶴舞長天。情漠漠。

淚綿綿。舊家仍倚白雲邊。尋春去問堂前柳。破夢來穿渡口煙。

滿江紅 中秋夕雨

窮海歸來。正盼望。此年此夜。還準擬。半宵燈市。半宵水榭。三徑久憑風伯掃。萬錢欲向天公借。更持螯。左手右持盃。人閒暇。雲驟暗。重簾罅。雷驟起。層檐下。忽蕭蕭。瑟瑟瓦溝如瀉。移樹鵲驚巢。乍圯走橋人。嬾妝先卸。歎街泥。滑處約良朋。稱多謝。

西江月 九月初七日雨窗遣悶

門外愁霖似潑。帳中清淚同揮。一年多事上心來。不飲已防先醉。明歲重陽何處。去年此夕方歸。人言死別復生回。今日正當周歲。

鵲橋仙

日斜時候。日斜年紀。又是日斜風味。斷腸言語不須多。況正值斷腸天氣。前宵牢記。昨夜更須牢記。半生最怕說銷魂。敢再到銷魂田地。

江城子

柳絲南北罩通津。水波勻。月痕新。卻到晏公祠畔，暫逡巡。偏是畫船紅燭影，頻照見。夢中身。

播錢堂上記還真。是穠春。是花晨。依約別來，如影復如塵。安得學他雙燕子，來與去。不隨人。

壺中天 和女史歸佩珊韻卽寄令叔方伯伊犁

從天試問。恁詞華、只付掃眉才子。百歲含愁容易過。經得幾番彈指。未盡名心。先拋世味。且復營書史。回看海水。比來清淺如此。猶憶絕塞歸來。君家癡叔。憔悴何能死。寥落雁鴻千萬里。憑寄阿兄數紙。并說中閨。尤憐嬌女。詩思清如水。比來相見。怪他風味都似。

又 贈僧鐵舟

浮生如夢。記忽忽、滬瀆城邊小別。石爛海枯重握手。相對各驚華髮。瓶鉢隨身。才名蓋世。詩畫書三絕。鋼經百鍊。鐵舟果否如鐵。今日短簿祠前。長洲苑外。客路將鋪

雪一領。袈裟渾欲破。賣字依然得活。極目天南。關心鄉國。鞞鼓聲纔歇。何時飛渡。醉眠黃鶴樓月。僧漢陽人

浣溪紗

病後般般總率真。見時故故不溫存。已教銷盡昨宵魂。開士心情居退院。美人顏色賦長門。年來偏重過時人。

鷓鴣天

百罰深杯總不辭。忽從酒半透微詞。前房阿母都瞞卻。只許青溪小妹知。重攬鏡。更添衣。衆中偏覺語支離。不知天上頻攜手。故說人間會面稀。

臨江仙

六月二十日詣學宮觀諸生釋菜并登尊經閣遠望

憶向校官稱弟子。春秋祀屢追陪。仲丁六十又三回。舊題名已暗。明倫堂有進士舉 實題名余皆預焉。親爲拂塵埃。尋徧講堂兼學舍。兩株列柏誰栽。尊經高閣暫時開。青衫皆後進。紫燕亦新來。

浪淘沙 壬戌中秋夜起望月不見時在洋川書院

纔歇雨冥濛。月甚朦朧。玉階處處有吟蟲。咫尺好山都不見。說是秋中。少壯去如風。老尚飄蓬。別家還喜住江東。金粟玉簪開已徧。閒卻簾櫳。舍間應事側多此二花

蘇幕遮 醉題焦山月波臺

屋禪關。樓法界。十仞高臺。更在危樓外。奇氣尙能除百怪。穩坐蒲團。且受江豚拜。舉杯遲。吟句快。乞篆題縑。總仗孤僧介。一日已償詩畫債。興來不學前人派。

瀟湘夜雨 汪秀才次玉屬題夜意圖時余悼亡日近與君同病爰率賦此寄

意

悟徹前因。銷磨塵劫。又來樓上孤眠。微黃燈影鏡臺偏。聲慘慘。寺鐘初動。光黯黯。簾幕斜褰。無聊境。我方匝月。君已三年。兩愁相校。望夫山外。愁更堪憐。只投荒歸日。病正纏綿。渾欲訴。金戈鐵馬。念誰禁。激管哀絃。忘情好。他時同穴。百歲鎮隨肩。

八聲甘州 夢亡婦

向空房。盡處瓦燈昏。缺月影橫陳。算傷離感逝。殘冬既爾。何況經春。打疊半牀衾枕。時爲拂纖塵。匳鏡都安好。與照歸魂。畢竟瞞卿何事。只夜臺相值。問尙殷勤。歎襄王孤館。久已斷行雲。想闌干。東西十二。便夢回。總欲一周巡。梅花句。從今不賦。防要含顰。

又 常熟訪吳祠部竹橋賦贈

又匆匆。扶醉入山城。雪意釀寒更。算玉芝堂朽。赤厓閣圯。紅豆莊傾。今日劍門吾谷。都已屬先生。壓徧江南北。壇坵崢嶸。小弟頭銜一品。但才名豔絕。似遜難兄。羨盈門弟子。分日鬥心兵。更傳聞。量才尺好。隔絳帷。親授與雲英。憑誰有平生奇福。來入詩盟。

小重山

夢不分明醒可憐。小樓簾半卷。月初弦。喘聲低緩。髻斜偏。朦朧坐。誤認卜金錢。衾薄忍添綿。舊曾揮淚處。錦仍鮮。擁來都恨。夜如年。無眠客。今轉羨長眠。

如夢令 十三日侵曉過碧浪湖

龍氣出波冉冉。鵝鷺鷺絲皆閃。海日未升時。幾片斷霞如斬。休喊。休喊。驚破一羣鵝膽。

剩得曉星數顆。芒角出同諫果。尙未破天光。水碧盡將魚裹。孤坐。孤坐。千尺浪中一我。

菩薩蠻 十四夜過南潯鎮

高高下下游鱗繞。侵人不已侵巢鳥。一碧作魚天。空明不起煙。東西樓似織。出水高千尺。玉手盡垂空。長廊接斷虹。

減字木蘭花 十五日五鼓過平望湖

偶開窗扇。破曙鵲聲波上亂。百頃湖光。捲上先生六尺牀。雪花難集。倔強水蟲多不蟄。落月團圓。東海魚龍尙愛看。

昭君怨 吳江道中夜行

惹得夜烏難住。萬點鬼磷穿樹。似復有人行。散如星。鴻鵠鷺絲屬玉。齊傍水仙祠宿。宵半忽爭鳴。學巡更。

清平樂 湖中迷道

風風雨雨。且向前湖去。欲問來船船不遇。進退總愁無據。忽然香氣縱橫。半空舉手將迎。岳瀆貴神抗禮。算來只有書生。

浣溪紗 萬頃橋

萬頃湖頭萬頃橋。雨蓑煙柳共飄搖。水從天外綠周遭。宿火照將鴻雁暝。曉霞烘得鷺絲驕。是誰來伴客無聊。

鳳棲梧 戊子秋杪至虞山赴邵先生荀慈之喪時亮吉結禱甫三日今復以事來遊則距倬亡日甚近也感而賦此

憶昔來遊才合卺。新婦三朝。尙向紗帷隱。小別乍歸爲整鬢。對人言語尤奇窘。三十三年真轉瞬。未比松筠。早向深秋殞。紅豆莊前紅淚隕。回途魂已銷將盡。三

虞美人 寶帶橋

蒲帆過盡危橋百。徑縱無千尺。便將蟬螭屈成梁。可惜都無寶帶、一般長。泠泠橋外光如電。雲朵裁成片。頃傳三萬六千寬。聞說真仙不設放漁竿。

憶秦娥 殘冬甚暖夏蟲並出感而賦此

羊裘熱。營營案上蠅聲出。蠅聲出。醉螿當灑。凍魚須徹。煤逋藥債都應逼。商量草草營除夕。營除夕。年年共命。此年獨活。

清平樂 孫解元子瀟屬題雙紅豆卷子

夢回永晝。滿地春光皺。半領綠衫花氣透。胡蝶趁香來嗅。文窗特與丁寧。東風格外垂青。欲配一雙紅豆。除非天上雙星。

浪淘沙

夢入小紅屏。露灑簾衣。鏡奩殘月影微微。偏是獨眠人帳外。胡蝶雙飛。小膽更多疑。怕踏層梯。畫屏深處認依稀。七尺紫檀香案上。誰共扶乩。

斜照鬼門關。落月彎環。夜臺可有望夫山。生怕瘦魂扶不上。添箇紅闌。推枕漏初殘。朱淚斑斑。寒宵何止夢能還。地下若無埋恨處。仍到人間。

十六字令四首

拚。歷徧長廊耐曉寒。梅花瘦。不厭百回看。
聽。一雁寥寥下遠汀。荒寒境。月黑鬼燈青。
休。斷送春人不上樓。三更夢。和月挂簾鉤。
遲。已是疏鐘報曉時。山禽影。蔌蔌落高枝。

念奴嬌 未至常熟四十里值大風雨

三更向盡。忽驚呼飛去。蓋頭竹笠。鐵馬金戈聲乍沸。波峭半篙難入。絕壑魚龍。陰厓神鬼。空處通呼吸。推篷起望。一湖湖水全立。只有卅里遙程。前舟顛簸。側搶回須急。□□□□□□□□□□□□□□□□病羽樓頭。秋蟲砌下。纔復商量。蟄愁人無寐。殘宵短夢千摺。

水調歌頭 自吳江常熟回舟欲至婁上作

性既不談釋。又不學神仙。半生纔一彈指。何苦慕長年。卿自埋憂地下。我欲寄愁天上。索醉向雲閒。自有十洲客。供我八方錢。胥江口。雪溪畔。尚湖邊。回頭三十三載。舊事散如煙。昔日蘆簾紙閣。今日梅花紙帳。清冷耐孤眠。短夢乍回處。殘月影牀前。偶厭玉虛住。屈作世間人。人生誰最快意。良夜與良辰。我欲花開地下。更使水流天上。耳目一番新。倘荷化工允。寧懼俗流噴。又誰願朝列闕。叩羣真。百年三萬多日。臥足幾回伸。九野分鋪列宿。五岳填平四海。從此罷揚塵。萬事等閒耳。無鬼亦無神。

點絳脣 題折枝圖贈友

遠恨新愁。半春已覺難消受。海棠花瘦。鴝鵒雙雙咒。十二紅闌。春氣應全透。關心否。鶯前燕後。定有人垂手。

賣花聲 過三叉河贈練塘僧

洲樣亦如瓜。淺泊江沙。二分月已透窗紗。留得雪泥鴻爪影。都爲梅花。稍遠市樓。

譚。港到三叉山。僧親爲煮山茶。白髮一龕忘世久。與證年華。

浣溪沙 梨花和金手山秀才

一棹春遊蘇小家。紅紅紫紫信方賒。玉闌干外幾枝斜。仙子衣裳原縞素。美人顏色本空花。淡雲流水證年華。

望江南 過京口訪駱佩香女史率成二首

忘世事。只有杜蘭香。焚得一爐煙未燼。萬帆門外去來忙。吟客鬢都蒼。

淒冷處。招得女生徒。女徒殷姓其姊爲故尙書和琳。側室琳死。姊以身殉。其妹流落無歸。因依佩香以居。桃李盛時顏寂寞。海山佳處語模糊。猶憶故尙書。

機聲鐙影詞

蝶戀花 題畫

絲雨絲煙湖上道。夢裏年華。深淺誰知道。天上玉梅開過了。又教人世東風早。春事及今偏草草。有分披圖。月與花枝小。獨立數峯吟句峭。乾坤分半輸懷抱。

鷓鴣天

學畫敲詩興轉闌。更從花裏響銅環。雕籠出語偏生脆。翻遣鸚哥課小蠻。顏冷落。致闌珊。萬重密意總相關。鄰家姊妹邀同坐。說夢先消春晝閒。

點絳脣 春病

隔箇紅窗。強將八字排來看。自憐魂斷。欲把他生算。支枕應難。且復憑詩案。誰相伴。喘聲低緩。虧得鸚哥喚。

風入松 題春山獨往圖

翛然一境迴難攀。幾家人住谿灣。疏籬敗壁憑誰補。借亭亭、隔岸青山。小史亂頭粗服。先生雨笠雲衫。生綃忽破酒人顏。清夢置其間。谿塘正好營高閣。待他時、風月人還。仲蔚蓬蒿須補。劉安鷄犬都刪。

醜奴兒令

海棠小院春深見。一晌難描。千種無聊。容易將人挂眼梢。低徊不解傷春句。一卷

離騷。纖手難拋。自把蠅頭小字鈔。

紅林擒近

紅錦香猶淺。白間春正長。睡起懶無事。鬢花礙釵梁。春衫攜來早皺。呼小婢熨沈香。屈指挑菜年光。待畫艇尋芳。麗句傳鸚母。名絲繡雁娘。妝樓無事。鏡邊更展縹緗。算傷春未敢。閒愁無據。背人私自禱海棠。

點絳脣 送春

又是春殘。海棠花外游絲亂。淚珠成串。待把年光換。惜別匆匆。鎮倚閒庭院。闌干畔。綠愁紅怨。約略傷春券。

漁家傲 題陳野航畫竹

午餘睡起茶初熟。一竿愛寫玲瓏玉。葉葉枝枝濃淡各。還須屬。三更窗外秋聲莫。娟娟穩稱輕綃薄。圖成好置闌干角。待得晚涼新雨足。天如沐。月痕倒挂梢頭綠。

酒泉子

驀地行來。一樹好花離地。出雕闌。排玉砌。陟瓊臺。四更玉笛聲三弄。肩上露華堆重。與雲飛。隨月上。逐風回。

探春令 題侍女屏風

晚妝初罷怯春寒。約伴花閒步。正一縷、愁來無著處。把十三、絃偷訴。玉簫斜倚林間路。想箇儂丰度。到宵深霜月空濛。錯認作、梅花幾樹。

醉桃源 前題

薰風池閣簾微亞。日暖豪犀偷卸。行到綠沈窗下。一樹榴花謝。滿樽蒲酒人初暇。結伴消他長夏。采戲又還輸卻。些事關心者。

紅窗聽 前題

一院飛花空白晝。看結束、春弓閒走。隄畔盈盈堆絮厚。襯得鞋幫瘦。簾幕深深垂錦繡。闌干外、總燒金獸。昨宵霜冷。今宵風驟。屈指剛三九。

買陂塘 題錢孝廉澍川鸚鵡媒傳奇

爲多情。青衫血淚。生生判向愁老。冰絃誰把傷心譜。又早別懷縈擾。幽會巧。君不見
茫茫碧落相思鳥。芳心寸拗。待密約重圓。愁盟暗續。一一淚珠織。銷魂處。我亦青
鸞信杳。年來暗損懷抱。江南江北傷春恨。付與斷腸衰草。辜負了。是舊日金釵。鈿盒
情多少。閒愁待掃。又一兩三聲。無端逗起。清夢隔簾悄。

河瀆神 迷藏

遊戲共登壇。窄靴小袖衣單。身輕總欲避遮攔。空裏時時指彈。同是曲欄何處躲。
慧心先向偏左。女伴盡皆藏過。百忙何苦尋我。

清平樂

楊花凭早。不待春歸了。可惜玉人渾未曉。逗點與他知道。晝長人倦敲詩。畫屏一
枕閒支。睡覺數聲搏黍。消他春日遲遲。

點絳脣

花事關心。東風吹到茶蘼架。燕兒多謝。呪得春成夏。不放春歸。斜日簾微亞。秋千

下。游絲無賴。又向荷錢惹。

鵲橋仙

玉鉤響斷。玉簫聲斷。更苦玉人音斷。清明上巳總無聊。欲飛去、晴江南岸。小園春半。小窗月半。尤喜小樓天半。黃鶯紫燕不曾來。只蝴蝶、與人作伴。

望江南

幽夢破。斜倚小紅樓。又是卷簾人不見。滿街絲雨糝春愁。綠暗幾重流。

昭君怨 江行

帶得綠蓑鐵笛。消受短篷秋月。帆影入江流。小于鷗。目極楚天遙甸。潮接海門如線。一點着林梢。是金焦。

減字木蘭花

垂垂一樹。曾見個儂珍重處。已分成陰。頭白蕭郎恐不禁。還憐飛絮。一樣東風飄泊去。郎已沾泥。莫趁流鶯是處飛。

相見歡 夢中作

無端踏卻輕鷗。共清遊。夢裏居然東海向西流。雲中屨。風中麤。不能收。幸喜天雞初叫始回頭。

一叢花

林禽喚我作春遊。煙景逼南州。藍輿卸處幽吟好。尋僧話。又引閒愁。無事銜盃。有山埋骨。此外總悠悠。消沈白了少年頭。青鏡惜風流。江山勝處余歸也。等幾度。白玉成樓。悟徹孤花。彫殘心字。春總不如秋。

青玉案 十三夜玩月

東風又把細梅染。看靜裏、簾斜捲。追取十年前事轉。亭涼月暗。漏深花滿。兩兩傷春券。如今細雨沿門糝。幾陣落紅愁欲浣。鐵笛五更吹更慘。任他風雨。任他憔悴。再也無人管。

千秋歲 瓶梅

更生齋詩餘

春來心性。花與人同命。香未拆。愁先進。一枝聊供汝。五夜誰相訊。最好是。百花頭上。懨懨病。晝永寒先警。骨冷魂尤勁。花總謝。香難並。幾絲芳意織。一瓣心香永。拚得是。閉門風雨無人省。

買坡塘 邵二雲姚江歸棹圖

黯黯歸。一肩行李。春風不遣人住。姚江雙漿悠悠去。去也更休回顧。天意苦。要汝是名山。夜雨成千古。功名射虎。只互互平生。才皆中下。李蔡豈君伍。當年事。千佛名經曾數。一枝原最高處。衫青袍紫都閒物。惹我酒閒起舞。君莫誤。君尙有數椽茅屋。秋風浦。萍蹤語汝。恐又引先生。酒闌燈燼。清淚滴殘炷。

天仙子

溪上鷺絲忙報客。玉人遺透春消息。怔忡相送已嫌遲。無可說。祇相憶。門外瀉湖千頃碧。

蝶戀花 落梅

白白紅紅開未止。一擅孤標。卽兆飄零始。如此人生剛半世。問年一樣輸餘子。入
夜春愁爲翦紙。屬汝重來。休昧初來旨。多分柔魂猶在水。五更吟斷梅花詠。
窗外游絲空復漾。十見花殘。那得人無恙。莫向酒閒矜跌宕。春風已把飛瓊葬。
未開時愁已釀。寄語桃根。春到休輕放。人世有情還有障。招魂供汝青綾帳。花

賣花聲

獨客正思家。到曉啼鴉。灑窗寒雨又如麻。不放南枝開到好。春有些差。客裏事堪
嗟。似錦年華。幾人紅淚隔窗紗。燕子平生眞恨事。不見梅花。

倦尋芳 春星

寂寥銀闕。怪底瓊妃。媿他數個。三五春宵。可許玉階同坐。人說高寒。應讓汝。九重天
上還難妥。笑風詩。只詠到衾裯。被他喚做。也知我。殷勤看爾。駐向樓頭。幾番難過。
錦樣連錢。一例被風吹墮。仙掌夜過防暗摘。月盤露冷。愁輕簸。寄新詩。先問汝。點頭
也麼。

荷葉杯

病到幾番委頓。誰問。曲闌旁。畫眉頻喚不能住。猜是甚心腸。

蝶戀花

啼鳩和伴則

草繡平堤花繡樹。如此江南。隻影堪飛度。畢竟塵情猶未悟。雨晴簾角聞呼侶。倚樹鷓鴣爭笑汝。三度營巢。依舊無家住。幾日酒痕兼墨污。樓頭催澣春袍袴。

前題 鷓鴣

莫向天涯棲苦竹。只遇啼鷓。歸計須頻屬。望帝愁魂魂已續。此閒樂亦應思蜀。何事啼聲常傍屋。解喚哥哥。引起春人獨。花到黃陵千度落。這回尙憶詩人谷。

憶秦娥

春時節。春人住處春光別。春光別。膩紅花朵。膩黃新月。濛濛膩綠千條結。樓梯欲上愁三折。愁三折。文簫聲動。剪刀聲歇。

柳梢青 新柳次高東井韻

向曉層巒。將煙做霧。釀雨成寒。鬢綠衫青。眉長眼瘦。于女何干。一枝折了重看。怪徹底、春愁總諳。柳宿前身。萍花再世。我亦差堪。

沁園春 題萬黍維持籌握算圖

儒林傳耶。貨殖傳耶。君因併書。嘆百不如人。一籌遠展。十嘗九誤。些子都輸。業可拋經。讀宜從律。且把蒼生經濟儲。他年看。看致君事了。更累錙銖。滿盤算了還虛。怕仰屋他年更苦劬。只田從玉局。須求陽羨。家從杜牧。更創吾廬。我謂先生。歸謀之婦。料理牀頭阿堵鋪。先生笑。有五銖七幣。盍往觀乎。

摘得新

難得來。休教到便回。屋頭雙喜鵲。久徘徊。紅窗故啄墮青梅。勸銜杯。

玉珥墜金環

晝永窗虛。嫩寒先把花朝做。幾番凝恨上重樓。樓又教人鎖。長自雨篩風簸。把春陰、當成功課。沈思往事。判盡浮名。換他真個。寂寞深園。小桃也肯留人坐。細拈春夢。

寫春愁。夢又將人躲。知道枕衾孤臥。算風光、幾曾到我。年華誤盡。到了今番。更教難
妥。

東風第一枝 桃花

團淚成花。搓煙做骨。商量不遣春瘦。幾番醉了重蘇。依然十三時候。前塵誤汝。應一
例。向風回首。笑無端、占了珠簾。肯放玉人垂手。只花也、憐人非舊。問此度、探春何
後。簸錢堂上重來。不似那時清晝。芳心易逗。算薄命、永供人咒。待拈他、花片緘來。付
汝一春消受。

八聲甘州

又西風吹雨上空樓。點點雜更聲。正涼隨雁至。宵同燭永。夢與年更。十二鏡雲何處。
江館聽吹笙。多分樓前約。不記啼鶯。一半塵封玉鎖。看碧紗籠處。墨雨縱橫。只蠻
箋消息。何事苦難憑。相蕭郎、傷春恁遠。料夢魂、逗不上銀屏。須知我、青衫泪溼。不爲
浮名。

南鄉子 自雲溪放舟至青山莊二首

藥王廟晏公祠。北關剛值午晴時。三折水程欣已到。都贊好。門外水田門內沼。
花塢曲。月廊周。半塘煙雨幾時收。百步小橋隨鶴過。思久坐。翡翠北軒晴日墮。

長亭怨慢 蟹

猛霜風。漸肥郭索。是處橙香。薦他黃玉。記得年時。酒徒醉月小樓曲。深盃浮綠。陡地
向天公祝。臣願把浮名都付與。蟹螯添足。稻熟。漸燈明深港。糝破一溪寒綠。鱸魚
便美。怎占得九秋名目。等一是。左手須閒。怕明日。故人相速。只紫蛤紅螺。風味幾堪
作僕。

金縷曲 寒夜重光齋頭看秋海棠因言前曾于花下掘得古櫬發之儼內妝
宮嬪也。余感其事。因併賦之。嬪蓋齊梁時宮人云。

燭冷人初醒。正虛廊。角聲吹徹。商聲又警。籬落寒花開自好。露點欲斜。仍整。妝慘淡。
玉人微病。不向春園誇勝事。伴草根。菜甲。三秋永。其下有波如鏡。千年舊事思量。

猛。被西風、吹將世換。泪珠紅併。一半齊梁遺蹟在。漠漠土花填井。待說與、古懷誰省。落月微黃天乍曙。向闌干、逗出銷魂影。重認取、劫灰冷。

玉燭新

窺簾新月小。卻數朵花枝。照人寒峭。新詩寄與、雙環巧。故把幽期漏了。文鴛堆枕。密意取。夜香薰好。又早是、玉漏星星。門前乳鴉啼曉。紅箋付與殷勤。只此恨平分。幾時堪繳。歸期及早。重到也、不是玉簫年少。萍浮絮裊。試逗點、與他知道。須記取、錦瑟年華。暗中易老。

鶯啼序 關神武廟後有隙地里人別構諸葛忠武祠落成謹賦

丞相祠堂看古柏。陰陰翠繞。重來處、一瓣名香。空裏晴絲自裊。黃石兵書吾懶讀。青田洞府愁難到。只先生志業。今古幾人同調。憑高回首。炎精中燼。天意殊難曉。聞說定軍山下。翠羽靈旗。山昏月黑。鼓聲猶惱。陰平貽誤。夔門敗踵。滿盤都錯。何須說。更譙周、黃皓知幾早。相鄰壯繆遺祠。未了忠心。此時重表。茲地當年。紫髯虎踞。更

周郎年少。奈江山、數著殘棋。着手便教輸了。把荆梁、十郡名區。輸織履。小兒坐嘯。尙躊躇。北定中原。南清江島。當途高也。往日紛紛割據。算曹瞞尤狡。匹馬過秦中。早雞筋全拋。虎鬚重燎。巾幗謀臣。彈棋胄子。一揮羽扇。愁俱倒。只遺恨。在五原秋草。十年深計。擬將赤帝關河。重藉手還高廟。

法駕導引 補赤城韓夫人詞四首

天上樂。天上樂。博戲更藏鉤。怪底燭龍呼不醒。兩九日月覆金甌。螢火照清秋。雲漠漠。雲漠漠。飛渡赤城梁。摘取列星歸北斗。倒傾銀漢入西江。天闕費平章。銀漢畔。銀漢畔。織女起高樓。玉作簾衣花作座。海雲爲佩月爲兜。縹渺坐牽牛。偕勝侶。偕勝侶。仙閣坐虛無。一賦玉樓猶未竟。人間甲子總模糊。長爪比麻姑。

點絳脣 次黃仲則韻

尺五荒墳。小桃一樹傷心豔。寄將花片。沒個人兒便。芳草多情。引他歸騎尋教遍。模糊見。月殘如線。霧隱傷春面。

如夢令

簾外日遲風簸。簾內粉消香灑。未慣是樗蒲。輸了更拋金鎖。還我。還我。莫被小鬟猜破。

摸魚兒 清風亭故址

又斜陽晚林一抹。天空飛破歸鳥。危亭覓遍蓬蒿徑。咫尺謝家山到。吟未了。算好景如前。好句還輸眺。初三月早。看一縷吟魂。寒鴉爭瘦。逗去碧波小。當年事。此地放歌孤嘯。狂來幾側烏帽。詩名天地成何補。身後一椽誰保。吟愈峭。把長句風前漫博。先生笑。思君欲老。怕騎鶴還來。此間亭上。留得醉中草。

青玉案 過凌敲臺故址

凌敲臺剩荒基也。雨洗石。苔侵瓦。到日短衣尋客話。庾郎年少。衆中爭羨。不醉看盤馬。孤城陡築寒山罅。城裏猶聞暮潮打。休怪客愁容易惹。那邊人語。者邊雁叫。月照荒荒野。

減蘭

聞遊采石。早起披衣看曙色。不敢窺簷。烏鵲南枝夢正甜。酒衫芒屨。二十男兒工
跳躍。一縷吟魂。先向風前逗早春。

金縷曲 清風亭夢李白

天與人俱老。又何爲、一千年後。此間憑弔。一半江山歸李白。一半分還謝朓。我到也、
祇餘衰草。畢竟微軀容易盡。覓些須、身後名纔好。勤打疊、零星藁。青衫百計供人
笑。只悠悠、非公知我。恨和誰告。金粟前身真小劫。墮作五湖年少。有夢也、不離蓬島。
猛憶人生何者是。只浮雲、偶寄孤飛鳥。殘夢破、余歸了。

又 再次汪劍潭韻

花是明朝放。只萋萋、滿城芳草。已供凝望。多病年時誰付與。綠酒紅愁同量。且小立、
雨中悵惘。若許鶯花還再世。拉春人、早向春風葬。簾蒜揭、心旌蕩。樓高總伴閒雲
上。有當年、鏡盟衫誓。篋懷琴況。可惜韶光都健在。春到也、須微恙。莫輸與、箇儂門巷。

我比絮泥心更定。背天桃、穩坐青綾帳。塵夢覺、釵鈿響。
蠟屐嫌疏放。任些時、殘紅剩紫。幾曾凝望。廿載可憐青鬢改。江水未勝愁量。春付與、
別人惆悵。我慕蠹魚能再死。趁餘香、好伴殘編葬。渾未管、流鶯蕩。聽歌人在青雲
上。只年時、招邀勝侶。尙牽游況。杜牧揚州人已換。只有月還無恙。照慘慘、幾家門巷。
尺五桃潭三徑草。瓣心香、供汝青綾帳。添一線、春潮響。

又 倒次汪劍潭韻

夢遠金鈴響。正無聊、紅窗睡足。倚帷牽帳。羅襪閒行花露重。頗怯曉風深巷。渾悟到、
玉人春恙。薄酒多愁眠易醒。問樓高、更有何情況。梯隱約、難重上。傷春早怕春飄
蕩。把泥金、書成梵字。伴花同葬。一例有情應解取。花也對人惆悵。已開滿、十分春量。
此度見花應背面。誤人人、簾底三年望。屬來歲、休輕放。

蝶戀花 爲孫大和婦王采薇韻

日午麴塵何處避。斷粉零紅。且自由天地。三十年華愁也未。不回頭負春人意。情

到九原須更記。骨冷灰飛。灰冷情還膩。幽夢壓簾魂壓被。醉醒怕沒絲兒氣。

浪淘沙

路遠小樓低。花朵分飛。依然銜恨上重梯。何止舊人尋不見。梁燕都非。愁裏闌窗。屏。殘月剛西。畫簾風破鏡臺欹。只有曲屏風六扇。猶罩羅衣。

點絳脣

鬥草歸來一窗好夢非無據。筆牀茶具。且復安排預。強自支持。鬼病終難愈。誰來覷。藥爐煙畔。只有風飄絮。

憶王孫

山坳池閣水邊樓。一雨銀塘便覺秋。長日無人掉小舟。水分流。胡蝶閒來立鴨頭。

青玉案

算來未到銷魂地。偏是識愁滋味。欲寫紅箋珍重寄。隨肩小妹。隨身小婢。多恐難回避。幔垂不放通花氣。又早早斜陽把門閉。莫道文窗蹤跡秘。黃鶯紫燕。畫眉百舌。

個個知人意。

浣溪沙

玉腕偏憐金釧寬。鳳釵頻撥獸煙寒。萬重心事壓闌干。
杜牧已留來世約。蕭郎不作
路人看。雖然猶覺恨無端。
背面難禁萬種愁。見時無語只凝眸。初陽一線下簾鉤。
百計未能通一語。暫時曾
許共扁舟。淚痕和露咽心頭。

傷春怨 劍客

匕首飛將過。到處人頭疑墮。日昨詣叢祠。土偶居然離坐。
旋空中如磨。電影終難
挫。驀地指晴空。一道采虹中破。

金縷曲

僮窺園從予八年矣。體弱善病。今年予秋試被落。忽爾辭去。念事傷離。不能
無作。命沽酒歌此調以送之。

衣薄還如紙。最淒涼。前宵羶穩。今宵送爾。八載追隨。無別事。傷病傷離。傷死。總誤爾。朝飢飲水。苦訪蟲魚。摩篆籀。但論才。爾便成佳士。休更作。朱門使。無家我共僧居。寺。只蕭蕭。寒雲丙舍。尙堪南指。入夢總從吾父母。醒處怕逢妻子。況薄命。久無人齒。明日出門。誰念我。就飄蓬。斷梗商行止。爾去矣。淚流駛。

又 重九日陶然亭作

車馬長安道。有誰憐。中秋雨暗。重陽花少。尺五閒亭。三徑柳。亭徑尙餘秋草。更難得。紅塵似掃。半舫斜陽。新月影。借團蒲。穩夢仙人鳥。算懷抱。此時好。玉山莫向壚前倒。只空囊。俸錢難假。酒錢輸了。門外鐘聲催客去。衣上薄寒清峭。料理是。餽糟代飽。無數樓臺。凝醉眼。訝籬頭。果大星辰小。歸尙有。未棲鳥。

又 懂得前詞泣不忍去復成此闌

暗裏驚聞泣。一聲聲。無端惹我。青衫又溼。多病經旬。誰得似。欲共候蟲秋蟄。爾似燕。鷺巢還入。典盡衣裳。頻擁絮。更同扶。瘦影當風立。渾不怕。霜華襲。八年侍我肩差。

及笑囊空、新詩屢付。傭錢未給。費爾一杯村落酒。爲我解除狂習。說月好、今宵初十。樓上三更雲氣淨。看星辰、如豆天如笠。吟正遠。催歸急。

青玉案 十一日同人飲長安酒樓

臨街樓上泠泠語。醪味薄、催添糯。一院酒人揮不去。持螯手冷。潑醅顏熱。繞著筵吟句。臨街樓外疏疏樹。已覺秋聲落無數。一院酒人招不住。來時天慘。去時月暗。繞著城徒步。

憶秦娥 寄季仇

鐘已動。一聲破我長安夢。長安夢。世情未了。鬢絲先種。書乍捧。故人遲我華陽洞。華陽洞。丹沙填壙。碧山成家。

浣溪紗

薄暝微醺枕酒瓢。病心一縷逐風搖。夢無來歷入鴉巢。初八夜星還照曉。十三涼月卻終宵。瘦魂尤避出林鷗。

買坡塘 送繆公子笠莊至江浦

趁霜風沿林飛徧。巢荒去住無據。雁聲卻有東歸信。切莫更留征羽。淒燕語。道千里同來。千里應同去。霜鴻未許。算我願隨陽。卿尤避熱。各自歎羈旅。天涯路。來日風風雨雨。別離頓起愁緒。江南兄弟誰能健。羨爾雁行有序。須記取。只紫塞重逢。可識前時侶。天空欲舉。穩待爾重來。春風三月。共看滿林絮。

漁家傲

宣武坊前清酒美。多錢約客誰來會。日午闌窗人似海。孤劍在。萬金難買心無愧。畢竟浮名猶可待。少年莫學呈身銳。鼎鼎百年君誤再。棺已蓋。幾時贖取從頭悔。

一萼紅 龔孝廉克一寓居晉陽庵側因屬余顏其齋曰聞鐘并係以詞

傍禪關。構閒亭似舫。四面啓疏櫺。十五良宵。一雙人影。三千里外鐘聲。有多少。春人心事。奈秋窗。黃葉已先零。借了蒲團。繙殘梵頁。悟徹鐙檠。我亦能來聽此。只青衫似夢。百倍淒清。苦竹疏蘆。幽花淡草。此身如在江城。況惹起。寒蟲鳴砌。又丁丁。蓮漏

滴殘更。待得蕭齋響寂。人語還生。

摸魚子 龔克一邀遊夕照庵卽展其令弟紫樹殯

正無衣。壩頭索醉。油車忽引君到。愁中天氣還如霧。咫尺遠山舒眺。煙柳道。算怕是逢人。只是逢僧好。無多落照。但挂近禪房。和將夕磬。便有暮雅叫。荆高市。酒人一樣潦倒。塵沙埋盡年少。江干舊侶今誰在。癸巳秋予與劍潭紫樹同客姑孰至宣城始別可惜龔生竟天。渾未料。看冠蓋如雲。更有閒人弔。高原古廟。但肯費茶瓜。時時款客。我輩不須召。

荷葉杯 自夕照庵步至萬柳塘

三里望中依約。樓角亭館太荒蕪。萬株楊柳一行無。風急戰菰蘆。林際黑歸一片。雅點。隔寺暮鐘聞。寂寥城上去閒雲。雲薄帶斜曛。

小重山

舊日紅闌已作薪。玉蘭花滿樹。曬春裙。經過燕子亦嫌貧。呢喃語。故故入西鄰。寂

實掩重門。小樓三面暗。易斜曛。屏風吹淨十年塵。中還有兩小舊啼痕。

謁金門 送龔曉升南歸卽題其長松片石行幃

歸亦得。卷裏天青雲白。不誤今宵歸計決。誤前時爲客。屋三閒。醒夢適。何止長松片石。七十二峯晴歷歷。在先生窗隙。

梧桐影 將至仙遊潭迷路二首

馬獨來。南山麓。厓上石樓纔一閒。推門且抱神龜宿。玉女泉清無極。雲外木魚聲不停。三更月向東峯直。

臨江仙 溪山秋曉卷子

十里空濛雲外水。水雲光隱回汀。最無人處小舟行。到來谿館冷。秋燕語分明。渾異踏青前度至。滿坡花氣將迎。剩他幾樹綠無情。四更山曙早。紅葉點疏星。

蘇幕遮 寒禽枯木卷子

綠初離。紅乍失。白釀層雲。黃澹初升日。空裏數聲禽語切。似說宵寒約略明朝雪。

凍絲黏冰線結。莫折高枝。恐有東風出。轉向竹梢深處歇。玲瓏石愛蓬山骨。

臨江仙 蘇州

紅鶴谿山烏鵲館。金閶從古繁華。三分樓閣二分花。一分留隙地。隨分種桑麻。海
物新奇爭入市。晨餐都厭魚蝦。等閒吳語六時譁。笙歌叢作隊。脂粉瀉成洼。

玉樓春

園空膽小愁無侶。錦幕時時風欲舉。生憎梁燕不歸來。銜得徑泥何處去。三更又
是瀟瀟雨。剩得燈光青幾聚。小樓西畔宵無人。一片落花浮鬼語。

點絳脣

傅粉攤書。硯旁小匣先安鏡。梅花同命。瘦到年時影。小別生疏。問語都愁應。更初
定。爲憐春病。偷向牀頭省。

好事近

抱處恍如無。奈小語心尤怯。夢裏有誰知覺。紅上雙雙頰。三更碧月淡紗帷。涼把

重衾壓。欲訴二年情事。和淚開吟篋。

金縷曲 元夕柳子廟道中作

綠鬢還如舊。又依然、長隄風細。碧空雲皺。草草柴門元夜到。催送斷腸時候。幸濁酒、數杯還釀。愁欲成癡眠轉醒。怕相思、一夕人天瘦。欹枕處、淚痕透。樓高往日長垂袖。摘疏枝、殷勤記取。柳邊花右。分半紅窗堆卷軸。多付個儂消受。渾可惜、此生難又。欲倩雪衣爲懺悔。更煩他、百舌聲聲咒。春夢破、月如晝。

霜天曉角 讀天寶遺事

開元政倦。無逸圖先換。頒到秋來羽扇。無多日、賢臣竄。戚晚。更相煽。羯奴先兆亂。河北河南皆叛。何須責、哥舒翰。

河湟使典。宰相居然忝。天子更思康晉。還應惜、無人薦。傳箭。出郊甸。馬嵬軍又變。啓靈堂開月偃。休專怨、長生殿。

臨江仙 八月十一夜雲谿晚步有感

猶記石橋橋畔路。死生離別匆匆。綠波搖月去如風。唾痕都作血。岸柳不曾紅。留得一行臨別語。幾生重得相逢。夜臺沒個寄書鴻。廿年如夢過。來聽渡頭鐘。

減字臨江仙 十二夜步月葛仙橋

十日秋陰情緒減。乍眠卻喜新晴。紅牆千尺月華生。水明鐙暗。依約卷簾聲。谿口寂寥尋渡少。酒徒多分飄零。柳絲笑客眼猶青。好天涼夜。祇剩一人行。

烏夜啼 十三夜二首

水邊門掩重重。海棠紅。不信者般顏色墮西風。相扶醉。相偎睡。意惺忪。正好一鐙

私語伴秋蟲

中年一種情牽。病懨懨。欲借舊家樓閣訴當年。黃庭卷。丹爐畔。學飛仙。留得一絲

兒恨未生天。

小重山 十四夜無月三更後微雨

一種閒情那得知。乍眠還又起。出門遲。秋鐙替月已多時。三橋走。衣袂雨絲絲。空

外影參差。西風吹不斷。柳絲兒。呢他燕子說相思。還生怕。燕子笑人癡。

滿江紅 十五夜坐雨

百事輸人。祇贏得、幾番沈醉。又苦是、宵燈替月。秋霖成歲。說餅齋拋荒徑外。采菱舟冷。青溪內。倚闌干、聽雨到更殘。何曾睡。風轉處。枝枝背。檐漏處。聲聲碎。只無端、兜起舊愁無奈。白玉盤埋雲慘淡。黃金花買秋憔悴。擘蠻箋、題恨寄花前。花垂淚。

人月圓 十六日願唐橋步月

昨宵細雨沿門糝。深巷掩重扉。繞砌寒蟲。滿廊歸燕。秋思依依。今宵暢好。橋邊樓上。人月雙輝。曉漏將殘。夜烏啼徹。直自忘歸。

醉太平 十七夜庭桂甚開鄰人復有貽秋葵野菊者獨飲偶賦

葵芳菊芳。蜂忙蝶忙。小庭節近重陽。是秋花總黃。疏枝貼窗。濃陰滿廊。人間月午清涼。比天邊更香。

金縷曲 送唐大令蔗園之嶧縣任

衣上春雲起。記征程、錢唐到日。好花開矣。兄領三州君作縣。穩稱陸家難弟。只手版、也須隨例。昨夢越江東去好。是紅塵、不到天光膩。官事少。看山未。京華往日曾聯騎。憶匆匆、斜陽古道。柳絲同繫。丁未春偕君及孫淵如計偕北上一幅東風吹上了。兩兩金門高第。偏剩得、杜陵書記。捉鼻功名知不免。笑他時、我亦神仙吏。輸一著、早會計。

買坡塘。送莊舍人植三南歸並寄蔣太守星仲趙舍人億生莊進士葆琛。又懜懜、幾番煙月。東風吹過年少。寂寥三徑尋遊侶。只有阿蒙還小。忘不了。是當日曾經、擲果蘭陵道。一官亦好。看衣桁簪花。佩囊橐筆。渾稱此風貌。夷門路。金尊昨日頻倒。天涯尙未生草。同來恁不同將去。撓亂數旬懷抱。歸正巧。算翦韭烹葵、煮筍都堪飽。寄聲短趙。更瘦蔣風流。攢莊緼藉。相憶令人老。

虞美人 二十夜楊孝廉敬之招集騰光館看桂

草元亭在雲溪北。暇日能邀客。寂寥深院倒金尊。添得幾絲疏雨、易黃昏。廿年前

記題詩處。花壓闌干住。故人多半起雲霄。只我閒居，尙赴小山招。

南歌子 古州道中

似柳應同韻。疑花未解羞。慣拋白足上危樓。喜折連枝果葉，插入頭。生熟居然異，形聲迥不侔。怪來行立總如猴。拗得脆蛇，寸寸啖同遊。生苗有能啖蛇者

人月圓 黎平試院作

蠻中三月春光好。新雨又新晴。纔離豚水，仍盤獅嶺，又抵黎平。昨宵上巳，今晨寒食，來日清明。釀碧成蒼，催紅做綠，有甚心情。

浣溪紗 楊太守席上看牡丹作

雲作簾衣絮作塵。向前還有幾多春。豔陽天氣說生辰。圓比十三將望月，嬌如二八上鬟人。晚蘭香味玉精神。

又 杏花

一晌花枝欲上樓。東風先爲揭簾鉤。和煙和露搭牀頭。百五時光容易過，十三年

紀不知愁。初陽籬落悄凝眸。

菩薩蠻 淇縣道中贈譚上舍子受

青泉落處紅雲碎。馬啼亂踏林聲脆。十里繞淇泉。愁無青竹竿。遲行雖數里。已覺吟聲起。知欲回車來。朝度曲徐。

桂殿秋

飯已熟。忽呼茶。滿盤堆得雨前芽。瓷杯到手復揮去。獨自開簾看杏華。

三字令

天上月。枕邊來。似追陪。香一盒。貯玫瑰。襯珠蘭。和玉蕊。髻旁堆。羅幕外。燕疑猜。蝶徘徊。鐘已歇。漏仍催。婢朦朧。窗隙報。渚蓮開。

曼香詞

蓮香



吳翌鳳（乾隆七——嘉慶二四）

字伊仲。號枚菴。江蘇吳縣人。諸生。客遊楚南。垂老始返。築室曰歸雲舫。著書奉母。一時文士多從之遊。工詩詞。著有與稽齋叢稿。國朝詩文徵。及箋註吳梅村詩。

序

謝家團扇。慣畫秋雲。白氏青衫。曾黏鉛淚。望柴桑之故里。路絕三千。類鷗夷之浮家。歲經二十。吟騷郢國。難招屈宋之魂。賦雪梁園。莫問鄒枚之宅。滕閣則粉圖盡矣。鶴樓則玉笛闌如。以此蕭寥。助余感慨。追憶綺年之結習。曾從白社以聯吟。跌宕多情。娉娉善舞。陸放翁之菴內。積稿恆多。玉田生之山中。倚聲尤數。或模山而範水。亦感物以懷人。花下曼詞。鐙前小令。杯行折柳。新歌悉是離愁。燭跋留髻。樂府詎能莊語。無何酒人一去。鬼哭秋墳。矧乃羈客重來。心傷旅雁。短笛休歌。紅豆蕭齋。只種白楊。生也非狂。天乎易老。展屏風之六曲。仍寫吳山。渺湘渚兮一彎。新添楚水。伊人天遠。欲憑鷗鷺招來。綺緒絲抽。都在闌干橫處。休催銅鉢。才情無此飛揚。但拍紅牙。英雄笑其兒女。再續夢窗之舊譜。一洗草堂之陋音。歲月既長。卷帙遂衍。疊牋細寫。準譜橫吹。大氏文生于情。不覺哀多于樂矣。嗚呼。舊時明月。曾照梅花。今日春風。空留燕子。錦筵席上。難酬顧曲之人。梅雨江南。誰和斷腸之句。嘉慶十一年歲在丙寅夏五。

曼香詞序

月淮川寓館之與稽齋書

曼香詞

長洲吳翌鳳伊仲

臨江仙

流水年年別意。停雲冉冉離思。杏花開到過牆枝。峭寒衰鬢覺。心事玉闌知。隔院笙歌都散。小窗時擘吟顛。閒眠淺醉總相宜。洞天春自樂。殘夢夜迷離。

思越人

酒初醒。香乍冷。石牀弦柱停揮。曳杖疏林誰笑語。看梅西崦人歸。無慘獨坐南窗下。日光斜漏窗罅。準備短篷明日駕。青山一桁如畫。

浣溪沙

乾隆丁亥之秋。余自梵門移寓紫薇山館。明春將去。此佗適矣。館據土阜之上。高可瞰遠。西南隅有小舫。曰岸上住。與申相國祠僅隔一垣。古樹蒼藤。互相掩映。夕陽西下。簾隙微黃。暮鼓昏鐘。遠近閒作。酒闌客散。待月太湖石畔。

冷泠風露冷不可支。必三鼓始就枕。蓋余居是齋者僅兩閱月。而所得幽景爲獨多。十月之望。故人余一匏自海陽來。談黃山白嶽之勝。坐有小史。意致閒雅。吹笛侑觴。夜漏下乃別。獨坐廣庭。月明如晝。萬籟俱寂。幾不知身在軟紅塵矣。以詞寫之。

一縷柔絲裊玉鑪。碧雲飛盡小蟾孤。海棠香冷未全無。短夢欲隨殘漏斷。吟魂待倩曉風扶。人生容易得歡娛。

玉樓春

空園數日無芳信。側側殘寒猶未定。柳邊絲雨燕歸遲。花外小樓簾影靜。憑闌漸覺春光暝。悵望碧天飄去盡。滿隄芳草不成歸。斜日畫橋煙水冷。

菩薩蠻

濛濛細雨穿簾額。畫屏風上春山碧。花外有高樓。夜來人正愁。乳鑪香氣盡。夢冷鴛鴦錦。莫去倚闌干。曉風無那寒。

減蘭

東風無主。門外飛花兼落絮。倦倚妝臺。滿鏡春愁吹不開。馬嘶人遠。冷落年時芳草岸。六幅銀屏。消受蘭缸一穗青。

瑤花 青鸞館緋桃一株鮮麗可愛年時載酒作洗花之宴忽忽不知其樂也
步屨重來春風非昔感而成歌

疏煙掃逕。宿雨收晴。過禁城寒食。尋芳攜酒。歸已晚。愁上吹香房陌。流光易度。問誰見。翠苞紅坼。早盼到垂柳陰中。一片池塘自碧。玉笙聲裏殘寒。想燕子歸來。東風猶識。采雲飛去。斜陽外。閒卻紅闌幾尺。苔陰小立。試重問。玉鈿遺跡。念惟有冷月籠煙。照我夜分吹笛。

月下笛

丁亥七月。柳橋杜十丈自武昌來。轉客南譙。余送之江上。別後賦詩寄懷云。
滌陽一去絕書函。歲暮懷人總不堪。想像亂山雪風裏。白頭人正望江南。亦

可悲也。今秋復有廣陵之行。詣余言別。有出門惘惘之態。柳橋老矣。且久客。余故不忍其去也。歌此曲送之。祖道數人。皆潛然淚下云。

一笛西風。暮潮漸落。亂颿何許。河橋送遠。猶有年時舊鷗鷺。滄波極望。寒煙暝。但秋在。斜陽高樹。盼孤雲冉冉。斷鴻聲裏。舊愁來處。君去。知最苦。歎我亦飄零。厭聞津鼓。茂陵病久。竹西佳麗。誰賦。縣知倦客。淒涼甚。對水驛。秋鐙無語。恐翠被。正宵寒。那聽荒江夜雨。

清平樂 東齋病起作

歡情別意。消得愁滋味。滿院斜陽簾影碎。細裊藥鑪煙氣。倦餘嬾展殘編。奈他酒後鐙前。一陳落花飛去。石牀吹響琴弦。

更漏子

玉玲瓏。金鎖碎。冷落畫堂春思。閒雁柱。下蝦簾。頻將銀葉添。嫩寒多。輕暖未。試徧越羅衣袂。花不語。月無聊。鏡中眉黛銷。

訴衷情

余年來不多作詩。而慢詞小令。時一爲之。辛卯七月。宿二雅水亭。作此闋。可堂答余無益。然心之所好。不能已也。

菰蒲風起浴鴛鴦。細雨過池塘。柳外月痕猶溼。冉冉藕花香。溫石鼎。試繩牀。夜初長。疏鐙一點。殘醉初醒。孤負新涼。

長亭怨

壬辰春。旅寓鹿城。況味寥落。有懷舊遊。沈贛漁自都門以詩來云。倚徧闌干。冷不禁。洛川舊夢苦縈心。海棠莫便風吹卻。留待銀缸照夜深。三千里外亦同此感也。

經幾度。畫檐疏雨。柳下人家。燕巢先冷。潤絕琴絲。落紅庭院晚風勁。旅懷疇省。知消減。看花心性。夢破黃昏。又聽到斷鐘零磬。春盡問吟魂。何自猶戀舊時芳景。銀屏夢醒。誰扶上。江南煙艇。想當初。羅襪侵階。有幾處。霧深花暝。到人去庭空。一片露華。

涼浸。

燭影搖紅 雪意

雲葉低垂。饕風只戀庭前樹。空階飢雀啣冰苔。一陣過牆去。猶是花藏玉護。空目極、平橋野渡。模糊卻似。小米雲山。大姚邨隴。猶記年時。一枝照水銅駝路。孤篷敲枕倚初宵。早覺春情度。此日殘氈擁處。幾誤我、巡檐索句。待拌一醉。酒價都無。漫攜尊俎。

木蘭花慢 湖上早春

玉笙寒乍徹。人已上、裏湖船。漸暖沁蘭心。春回柳眼。芳事爭妍。東風鏡奩展綠。早鴛鴦兩兩浴晴川。坊陌燒鐙期近。樓臺處處輕煙。何緣好景恣留連。梅月影嬋娟。笑負卻花叢。十年清夢。冷落詩篇。孤山一痕新翠。有吟情。都在斷橋邊。莫問高城魚鑰。夕陽酒旆紅偏。

點絳脣 六一泉

翠影浮空。幽人去後存寒澗。來攜茗盃。只是無吟伴。地近孤山。得與逋仙款。閒亭畔。鳥啼人散。落日闌干半。

燕歸慢

西湖葛嶺爲賈秋壑故宅春遊過此落日啼烏葵麥彌望又何處尋

玉津聚芳遺迹邪徘徊久之大書石上以寫幽懷

極望松楸。是平章舊第。當日嬉遊。看花圍繡幕。聽雨上紅樓。珠歌翠舞幾會休。早蟋蟀聲中。一片秋繁華盡銷歇。賸衰草伴荒丘。龍北去。人南竄。千古恨。總悠悠。白塔荒陵何處所。一例土花稠。笛聲吹起月如鉤。蕩十里煙波動。客愁興亡更誰管。只柳外。舊沙鷗。

甘州

湖隄暮歸過楓香別館更闌翦燭倚聲成句

漸迷離。淡月白芳洲。一片冷煙浮。正翠崦收鐘。重城吹角。散盡蘭舟。迤邐六橋深處。更誰家。水調唱歌頭。橋外東風急。驚起眠鷗。一自賦情人老。早尊前扇底。冶意都休。無那三生杜牧。好夢又句留。數芳程。暗催吟屨。鎖花枝。知第幾層樓。空凝望。兩三

燈火正恁含愁。

阮郎歸

癸巳二月不盡三日與趙暉生同宿湖樓夜靜無慘若有所夢

謝家庭院碧雲西。風前楊柳絲。屏山宛轉鎖葳蕤。鑪香澹澹時。絲別恨。惜芳期。春寒翠被知。起看樓角玉繩低。隔城聞馬嘶。

浣溪沙

翦翦輕寒到小庭。微風一縷颺簾旌。松釵落向綠苔聲。花影幾曾留夜月。露華依舊冷銀屏。曲闌干外莫深凭。

臺城路

余與藥坪別已六年矣春暮懷人不勝停雲之思因成此解

桃花不管人惆悵。繁紅亂飄如雨。隔幄傳香。單衣試酒。寥落探芳情緒。離懷正苦。聽深樹啼鶯。更添淒楚。猶記分攜。盈盈淚眼兩無語。傷心時已歲暮。向水邊擊馬。買櫂孤去。水驛煙深。桐橋雪暗。此後又知何處。將書寄與。怕芳草天涯。易成間阻。望極燕山。雲寒無雁侶。

徵招 抱珠水榭中。自主人去後。蹤迹久稀。今春再過。其地閒花半落。幽禽自啼。惜春色之將闌。嗟倦遊以何日。撫時念遠。爲賦此詞。

梨花落盡風猶峭。池塘一痕新霽。春色雨中過。問別來會幾。盟鷗無伴侶。漫贏得、盈襟離思。夕照閒門。暮寒深院。角聲吹起。別館謝橋彎。芳隄曉。當年玉驄遊地。飛絮撲晴空。似飄零身世。華年同逝水。縱心事、萬千難寄。楚天遠。歸夢無憑。奈月明千里。

十六字令

愁。鴻雁聲中獨倚樓。人如夢。瘦影一燈秋。

長相思

花半牆。月半牆。花月疏疏滿院涼。簾開聞暗香。宵初長。夢初長。夢倚紅紅曲檻旁。風前小影雙。

側犯

金鋪鎮掩。午鶯啼破花陰峭。風小。度一縷鑪香瘦。煙裊。篋中錦字在。最覺縈幽抱。天

杳。記斷夢。飛回楚雲杪。謝家院落。側近城南道。春老。又楊花、撲地更誰掃。開到薔薇。歸來也好。忍把別思。誤他年少。

琴調相思引 青溪小姑祠

流水涓涓匯碧溪。垂楊影裏闔雙扉。凌波歸晚。苔色冷侵衣。彈斷空侯留不住。中橋涼月夜迷離。碧桃花下。何處夢雲飛。

臺城路 秣陵歸思

蘋花不暖鴛鴦夢。江南幾番秋雨。門草人歸。辭巢燕去。冷落瑣窗朱戶。冶城倦旅。是第一關心。故園尊俎。縷縷殘飄。淒涼慣逐夢魂去。文園近來多病。風懷都減盡。秀句難賦。桃葉江空。回潮似咽。目斷水天歸路。秦箏漫撫。對曲曲屏山。水沈一縷。夜色閒庭。露涼葢自語。

探春慢 毛意香尋春歸晚圖

柳暖生雲。花深欲雨。春郊極望如繡。野艇迎將。雕鞍教送。豔影盡歸吟袖。次第探芳

信知冷卻移橙翦韭。殘陽深掩閒門。冶遊人正歸後。十載隨香趁燭。便管領閒情。
忍負詩酒。夢鶴同孤。涼蟾與白。那禁惜春懷舊。畫鼓嚴城發。翠簾外。晚寒偏驟。鏡暈
茸窗。吟魂時度高岫。

高陽臺

嚳城王介翁以明經試吏不得志歸。年冉冉老矣。營菟裘于石湖之濱。將移
家終焉。今春復有錢江之行。余餞之郊外。酒半索余度曲。夫石湖爲范文穆
棲隱地。而白石老仙遊衍佳處也。年時嘗與二三友蕩舟其間。渚煙汀草。彌
望無際。山花自笑。水禽亂飛。悅與詞客吟魂相酬答。惜采雲飛盡。無復作山
靈主人者。今君以風流宏長。繼主其地。他時吟屐歸來。草堂無恙。余將駕短
篷。道橫塘。款關訪君。授簡徵歌。有足樂者。故倚聲賦此。以當折柳贈行之曲。
帽影欹花。鞭絲拂柳。離懷況是殘春。燕子人家。斜陽卻照閒門。茸茸亂草和煙碧。浸
涼波。一片愁痕。又黃昏。畫角春城。吹冷香塵。憑君莫上長橋望。有湖光戀影。冷翠

留人彈指東風。十年寥落吟魂。暮潮一舸西泠路。聽簫聲、吹入寒雲。客愁新。數點殘紅。飄落金尊。

留春令

花香庭院。粉香簾幕。玉人曾住。剗地東風換韶華。怕說著、分攜處。畫屏塵滿銷魂句。況是青春去。一曲回廊小紅闌。添幾陣、芭蕉雨。

解佩令 送蔣儵園之官廣西

馬頭荒驛。城頭涼月。最愁人、角聲催別。雲暗榕陰。遮短夢、欲尋無迹。上行杯、且傾春碧。鬢絲易白。鴻泥難覓。歎年來、歲華輕擲。一領朝衫。又重向、天涯爲客。倚雙松、醉讀吟幘。

八歸

空階夜滴。朝煙迷徑。人倚小樓無緒。柔波冷蕩。闌干影、驚散一羣花鴨。拍水浮去。壁。上蝸牛濃作篆。消永日、水沈香縷。又早是、梅子黃時。怕詠斷腸句。孤枕蒼鶩睡起。

雕梁燕兩兩相依新乳。遺愁何計。翦紅裁綠。賸有笛家簫譜。料荒橋斷渚。那更拏舟訪桑扈。鎮無賴、鉤簾凝睇。暮靄沈沈。遠天都是雨。

梅花引

紫騮驂。錦書函。鵲去難將心事占。憶江南。夢江南。羅帕淚痕。遲窺青鏡斂。庭前飛盡花梢雨。門前吹盡枝頭絮。待鉤簾。莫鉤簾。低語侍兒。還將半臂添。

明月引

竹垞老人小紅樓上一曲。膾炙人口。釋其音調。閒與草窗舊譜不同。竹垞或別有所本邪。茲依費洲漁笛譜填之。然草窗謂此調卽梅花引。未知是否。

碧波如黛沒平沙。柳初斜。雨如麻。十里長隄。何處紫鸞車。閒踏青莎歸去晚。生怕得溼春衫。畫扇遮。深紅淺。紅牆內。花是王家。是謝家。銅鑲雙闔高樓角。露碧窗紗。銀甲新聲。誰弄玉琵琶。彈得天邊開霽色。鈴鴿起。趁晴風。入斷霞。

虞美人

曼香詞

子規已是催春切。細雨絲絲密。晚晴一賦畫難工。又早落花飛絮太恩恩。佳人命薄才人老。彊把春情道。從今萬事任榮枯。學得霑泥心性睡工夫。

少年遊 二分明月女子墨桃爲萊陽姜仲子畫金鄂巖屬題

一枝低亞可憐春。誰是種桃人。燕支落盡。臘螺染徧。留取墨痕新。生成薄命花相似。羅綺總成塵。蕤圃春殘。揚州月冷。煙雨又清明。

秋霽 得問花人書知歸計未卜時余亦將買舟西渡浮萍斷梗會面尙遙漫

賦此詞寄之

過盡東風漸綠到江南。幾處芳陌。曲院看鐙。小樓聽雨。沈沈故園寒食。探芳未得。畫橋煙冷聞吹笛。念此日尙有東華塵土未歸客。閒凭翠檻。自笑飄零。黯然神傷。還又輕別。掩紋紗。餘寒猶滯。翦燈誰與伴幽寂。此去片颿江水碧。鎮斷魂處。最是一枕春潮。酒醒人遠。夜涼荒驛。

南樓令 夢草園池上

絲柳弄烟霏。回塘遶曲隄。步閒階、蹴損苔衣。一片柔波風乍定，只幾點、水螢飛。記
得素琴攜。闌干西更西。惜芳華、澹墨難題。愁見鴛鴦深處影，有明月、照雙棲。

綺羅香 題馬掃癡秋窗待月圖

柳點疏雅。香寒睡蝶。待月湘簾齊卷。屋角星河斜耿。黃昏花院。閒竚立、帽影欹斜。黯
凝望、秋容清淺。早何處、飛墜疏鐘。冷風吹送斷鴻遠。幽人心事幾許。那更鄰砧急
擣。蟲又淒斷。料得清輝未減。良宵月半。想深閨、爲怯涼颼。有幾處、慵排香案。盼遙天、
澹到魚雲。瑣窗人已嬾。

臨江仙

客睡厭聽深夜雨。瀟瀟徹夜偏聞。晨紅太早鳥喧羣。霽痕纔著樹。山意未離雲。梅
粉堆階慵不掃。等閒過卻初春。謝橋新漲碧鄰鄰。茜衫氎笠子。已有聽泉人。

霜天曉角

酒病花顛。更春愁可憐。難遣寂寥情緒。思舊事、展雲箋。峭寒生翠簾。吳絳衣袂添。

依約去年花月。風似翦，月如弦。

秋藥香

愁聽蟬吟高柳。人倚小樓時候。白雲飛去青山瘦。一抹晚霞紅透。門前記得雙鳥柏。橫街口。闌干十二休垂手。今夜露涼依舊。

滿庭芳

花氣浮春。鶯聲醉曉。芳隄愛是新晴。畫船雙槳。時節近清明。燕蹴飛花紅雨。東風急。吹過高城。銅鳧燼。鬥茶人散。愁對曲屏青。生平消受處。夢餘斜月。醉後華鐙。任柔絲脆管。不負閒情。十載雅歡都廢。朱樓在。重到須驚。空贏得。吟箋賦筆。展看可憐生。

青玉案

西風只攪梧桐葉。聽窗外、聲蕭屑。待把青尊情脈脈。孤鐙欲地。紅潮微退。夢繞屏山碧。風流頓使成輕別。一寸柔腸萬千結。短髮休添今夜白。一天清露。半規涼月。付與秋蟲咽。

天仙子

春去心情無一可。騰雲不展眉峯鎖。濃陰庭院乳鳩鳴。桑葉大。蠶眠過。日長慵倚雕闌坐。

步蟾宮 紅蠶書屋與枯匏意香分韻

東風漸覺春情洽。乍雨過、雲歸蒼峽。曲塘新漲與橋平。鬧多少、啜花羣鴨。新詞韻險還慵押。卷翠幔、燕兒歸恰。芭蕉綠上粉牆陰。又早被、闌干紅壓。

鬲溪梅令 江行遣興

白沙江上海雲東。有秋風。一帶高樓都在、雁聲中。浦橋聞夜鐘。青鐙別舫語惺忪。悵孤蹤。舊夢天涯何處、覓芳叢。水長山又重。

蘇幕遮

片颿張。孤櫂擁。渺渺長波。只有青山送。衣上花枝釵上鳳。月冷香銷。都付秋衾夢。養魚苗。量鶴俸。生怕相思。紅豆休輕種。借酒澆愁開宿甕。一掬西風。淚落頗黎凍。

玉樓春

紅樓昨夜笙歌散。漸覺玉階寒意淺。涼蟾空挂落梅邨。殘雪盡消芳草岸。庚郎對酒腸先斷。青鬢流年暗中換。舊情都化水邊雲。一縷悠揚時近遠。

喝火令 聽雨

心字鑪熏斷。回文雁影遙。一天涼雨挾殘飈。攪得愁人無寐。欹枕坐清宵。別館人初去。衰顏酒未消。蕭疏一陳已無聊。何苦侵階。何苦滴芭蕉。何苦青鐙簾幙。徹夜響瀟瀟。

八歸 武昌使院送李質山之廣陵家也。愚楊五橋宋念莪之湘南。

翠螺亭上。飛花落絮。佳期催度寒食。惜春春已。恩恩去。又早酒趁哀弦。月照吟席。畫鼓鞞蘭燼。炮且軟語。淹留今夕。試細數。葉葉征帆。幾片到鄉國。須信萍蓬無定。郵籤津埃。仍是天涯爲客。黃陵月冷。揚州鶴怨。往事低回重說。想吟湘賦楚。短髮新添幾絲白。應還念。故人天際。一樣相思。江南春夢闊。

漢宮春 楊花

綺陌初晴。怪因風都起。隨處飛揚。壚頭買醉。尙記滿店生香。燕迷晴雪。轉花梢、難認雕梁。春夢懶。朦朧欲度。祇應愁隔紅窗。底事擘絲縈絮。總平鋪池水。不暖鴛鴦。東風慢無管束。任卷春芳。不辭點鬢。笑旅愁、老盡潘郎。爭願得。化浮萍去。隨波直到橫塘。

南浦 友人出示春山圖無名款年月索題此詞

春山小景。是何人揮灑。上雲箋。山下波紋如縠。修竹澹含煙。竹裏斜橫略約。有幽人、小立夕陽邊。想遙天雨霽。黃庭讀罷。倚杖聽流泉。回首吳山點點。只楞伽、蒼翠俛清漣。莫是停雲妙筆。皴染入孤妍。我待夢魂尋去。早東風、一白柳飛絲。甚水邨斜角。渡頭沒箇木蘭船。

蝶戀花 桃花夫人廟

楚雨湘雲迷處所。翠羽明璫。廟貌臨官渡。花落鶉啼春不語。淚痕點點斜陽暮。肯

信嬋娟顏色誤。故國興亡。遺恨空千古。開到小桃花一樹。門前依舊東風路。

臺城路 掃癡生垂問近況賦寄此闕時己酉二月漢川舟中

十年不上吹笙路。相看俊遊都老。小徑無花。閒門有燕。愁入故園芳草。燒鐙過了。問隔水人家。冷煙多少。負盡年華。擢歌聲裏度昏曉。殊鄉吟興漸嬾。春衫都試徧。猶自寒峭。破夢鐙痕。戀衣香氣。消領舊時懷抱。綠窗深窅。知柳外花邊。幾番殘照。寄語盟鷗。甚時歸去好。

沁園春 陳藥洲方伯屬題雙鴛圖是冒辟疆姬人董小宛所畫辟疆題贈汪蛟門者上有真定梁蕉林題句

水暖春江兩兩文禽雙棲並飛。有秣陵女士。描將采筆。雉皋公子。界就烏絲。舊雨關情。新圖寄與。煙月揚州古竹西。蛟門江都人。添吟與。認蕉林題句。玉屑珠霏。年來往事都非。歎水繪圖荒煙雨淒。牘雅啼衰柳。難尋畫閣。波回新漲。冷浸苔磯。只有風流。猶傳縑素。寄意同心錦翼齊。分題處。怕粉香飛出。重護簾衣。

蝶戀花

冶葉倡條空自好。酒淺鐙深。疊鼓垂垂早。寒食清明都過了。怨紅流入相思調。賦
恨江淹今已老。怕攪離愁。不上城南道。夢到疎林歸路杳。更無人處生春草。

采桑子 武昌城東看桃花

小桃開偏城東路。紅滿牆頭。坊陌通幽。寶馬當當去未休。禁烟過了寒初斂。吹面
風柔。卷上簾鉤。一簇朝霞擁畫樓。

滿江紅 辛亥上巳劉純齋觀察招同太倉張吾山王滿夫蒲圻張薇軒吳縣

張映山陳小梧歙縣方子雲崑山張少安宣化楊緒堂天津王寥野陽湖楊
西和餘姚沈春林南城吳白广上元周夢溪孫蓮水王春波商丘陳叔魯江
夏僧鐵舟暨令弟瑟堂修禊借園分賦二首

曲水蘭亭歎千古。風騷銷歇。喜今日。名園禊飲。詞壇重闢。佳客盡逢湖海士。主人況
是文章伯。只疏狂。不稱曳春衫。來分席。簾波靜。燒銀葉。苔紋淨。搗文石。愛青山一

折亂雲千疊。琴弈未堪追勝侶。畫圖容我歌吟。看襄陽、耆舊續遺編。傳芳蹟。
開到桃花。又如此。江南春色。偏則是、妒花風雨。亂紅狼籍。對鏡自憐青鬢改。當杯莫
惜金波溢。最難逢。上巳祓除辰。清明節。笑五載風塵客。只此會風流劇。便題襟漢
上。何殊今昔。芳事無多容過眼。歡場有幾休輕擲。怕他年。萍水與蓬風。思今夕。

卜算子

砌草雨餘香。一霎風光過。深院沈沈裊篆煙。鎮日低鬟。有約幾會來。獨自鉤簾
坐。只有雕梁燕語雙。寂寞成三箇。

踏莎行 玫瑰花

豔影團霞。濃香醉蝶。露痕未斂先輕摘。好花不向樹頭看。朝來賣徧薰風陌。慵插
釵梁。愁填鬢側。紫羅囊亦輸顏色。細揉花片配糖霜。江南風味猶憐惜。

玉漏遲 茉莉花

素葩渾未放。攀枝檢摘。春纖親數。貯向冰瓷。一霎芳心齊吐。漱豔蘭湯浴罷。髻雲挽。

翹簪釵股。臨睡去。卸來猶惜。拈安簪具。記湖上每招涼。有粉面兒郎輕搖柔艣。小結花籃。遞挂畫船斜柱。夜闌羅幃映月。夢回處。未殘宵鼓。紈扇舉。霏霏細香聞取。

月華清 落梅

檐隙捎風。徑彎籠霧。小窗誰伴幽獨。暮雀飛來。踏碎一林寒玉。忍更遶漠漠苔階。但冷翳紛紛殘馥。樓角有夜帳清鐙。苦吟人宿。休更亂吹羌笛。早野水孤邨。霏霏相續。縞鶴空歸。一片蘚痕迷綠。憑楚些。招得芳魂。恐夢斷。月斜荒屋。橫幅倩徐熙妙手。傍他修竹。

疏影

己酉春襄陽旅次與葵圃華池載酒徵歌忽忽又三年矣今春復有宋

中之行扁舟過此漫成此解蓋不勝今昔之感也

短篷斜繫。愛水浮鴨綠。山環螺翠。小雨初過。收了花鐙。恰早嫩晴天氣。東風不展垂楊線。隔疏林。酒旗搖曳。縱冶遊。得似當年。可惜舊歡難繼。重數銅鞮遊迹。青衫塵泥。徧猶漬清淚。昔日秋孃。花豔驚人也。恐玉顏顛顛。宵來水驛孤衾擁。只冷月照人

曼香詞

無寐。更明朝。紫陌雙輪。好夢幾時能理。

三姝媚 許州驛館戲調勸齋

看花城北夜。愛羅幃圍春。粉香飄麝。道著芳名。訝不用、馱來細馬。迤邐迎歸。白紵停歌。采鸞重跨。情話難得良宵。只巫雲峽雨。總難輕舍。恨殺銀蟾。玉驄嘶也。

綺羅香 商丘宋氏海棠一株繁花豔色爲

宇悉爲郡僚行館隔牆眺望愛翫不已。主
金屋燒鐙。玉環破睡。芳樹戎戎含豔。似斂還開。盡
蛾眉。暈生嬌臉。怕宵來。涼雨疏疏。淚珠點滴碎紅
東風都欠。步履重來。此日角巾初墊。最難得。綺影
情人扶。深杯浮漱澗。

東風第一枝 陳季馴招同勸齋少峯芙初往朱家集看牡丹余賦斷句八章

歸書粉壁復索度此曲以綴其後春事將闌勝情難再同遊諸子幸垂和焉
柳擘晴絲花飄膩粉藥闌芳事如許。一叢豔色留春十日好春堪駐。玉驄微步也惜
取滿枝清露。最憐他幾棱花田誰把錦幃深護。是難得冶遊俊侶。試賦就清平秀
句。寄聲醉蜨酣蜂漫啄芳心低度。闌風伏雨怕一霎采雲飛去。買燕支付與邊鸞繡
入洛陽圖譜。

秦樓月 和芙初韻

愁無那。小園幽事期常左。期常左。晝長人悄。掩書閒坐。玉簫聲冷知誰和。殘花都
被鶯捎妥。鶯捎妥。綠陰庭院。竹扉半鎖。

七娘子 歸次樊城回憶睢陽舊館

薄晴天氣催歸楫。疏疏月照荒城堞。激澗杯深。迷離夢接。驛樓生怕更聲疊。朱門
歲歲空彈缺。飄零又是重陽節。舊館荒苔誰尋行迹。寒花付與紛紛蜨。

鬢雲鬆令

酒霑脣。香染袖。竹檻鐙窗。人定黃昏後。點滴銅壺催玉漏。纔得相逢。只是相離又。錦蕨蕤。紅荳蔻。一寸柔腸。付與風前柳。冷月照人還似舊。人便多愁。月更知愁否。

石州慢

人去亭皋。老了歲華。雙槳遲發。風流莫問當年。縱有海鷗難說。東風小院。分明昨夜尋來。夕陽斜照春蕪碧。柳絮總因風。撲窗紗如雪。消息杏梁紫燕。會傳墨色。殘痕全別。無限離情。付與亂絲叢笛。謝公哀樂。臆須陶寫中年。尊前卻恐兒知得。倚扇幾遲回。滿西樓涼月。

謁金門 東湖小憩依依有故園之思

湖水碧。欲展縠紋無力。一桁西山倒影入。鏡奩添黛色。略約緩尋吟策。驚起一雙鷗鷺。記得石湖煙雨夕。釣船春弄笛。

買陂塘 白广石湖課耕圖

過橫塘。水雲深處。昔賢此地曾住。石湖仙去。今千載。冷落田園詩句。君且去。向茶磨山頭。重縛香茅宇。幽風漫與。只幾稜瓜田。一畦麥隴。便是半生計。疏狂性。不合長聽官鼓。紅塵擾擾。如許。烏雞穩繫松根下。正足一犁春雨。君記取。但覓箇樵青。點檢農桑圃。招要鷗鷺。笑我亦吳儂。片帆歸後。來作耦耕侶。

倦尋芳 和陳西岑

孤芳一點。小綴花叢。便催春信。難掩清香。那禁蜨交蜂趁。苦被東風狼籍了。橫陳玉砌蒼苔印。恁淒涼。縱補得香瘢。壞妝難整。懊儂曲。新聲會倚。綠慘紅愁。忍付清聽。月冷闌干。一片斷魂誰省。芳草王孫何處所。柳風吹絮。寒成陣。判從今。掩翠幕。罷尋花徑。

山花子 孺子亭在東湖之陰相傳卽徐穉故宅

海燕辭巢鷺宿汀。高人故宅已飄零。芳草一茸斜照裏。賸危亭。故事空聞曾下榻。孤蹤何處不浮萍。只有東湖春柳色。眼還青。

賣花聲 滕王閣

飛閣俛寒洲。紅葉驚秋。章江如帶斷腸流。賸有滕王圖畫在。付與閒鷗。七載客中遊。淪落南州。酒痕淚點幾曾休。一領青衫都溼徧。怕說登樓。

南鄉子 甲寅正月八日舟抵吳城賦此

斷雁落遙天。小市風光亦可憐。隔岸叢祠簫鼓沸。新年。春在疏林野屋邊。無緒拂吟牋。客思鄉心耿不眠。茶盃未拋酒盞歇。淒然。千里歸人暮雪船。

無悶 詠錢

阿堵堪憐。蚨化蜚飛。何處銅山又起。笑羞澀空囊。儘留生計。試喚沈郎起舞。早暗擲。榆陰紛紛墜。清明過了。閒分白打。那家猶意。芳市數來姹女。漫幕分明。選時會記。便本草嘗來。也多情味。一自搖空撲滿。最怕見。開元銷魂字。莫更逞。夷甫清談。十萬買山誰寄。唐張說有錢本草

鵲橋仙

錦牋書怨。瑤琴停軫。愁緒暗催雙鬢。家山萬疊。楚雲東。空盼斷江南芳訊。 餽簫聲歇。酒旗風緊。屈指春期將盡。連天芳草已銷魂。又何況。落紅成陣。

月下笛 楊永叔自寫亡姬琴南小影。課余題句。姬閩人。

斷碧分釵。冷紅凋錦。妝臺塵掩。瑤琴七柱。響絕冰弦。廣陵散。榕枝有分成連理。但結得。天涯愁伴。歎恩恩歸去。留春無計。斷魂遙遠。遊倦。嗟何晚。賸江上秋風。荻花淒怨。香顚粉頰。幽恨今生難遣。祇餘篋底殘螺黛。寫紙上。眞眞活見。更誰妒。卷中人。日日鎖長相見。

金縷曲 漢陽劉氏齋中牡丹多異種。穀雨後三日。偕周夢溪胡靜人渡江往看花事已盡。憮然賦此。

說著看花喜。漢江邊。朱圍繡幕。亂垂紅紫。急喚桃根雙槳渡。過盡吹簫坊市。況復有。偕行趙李。落絮遊絲風不定。好林園。一片啼鶉裏。芳事盡。且休矣。賞心難得兼良美。惜恩恩。幾番風雨。珠鈿輕委。簇蝶湔裙都過了。傾到深杯婪尾。又何怪。玉顏顚顚。

比似尋春狂杜牧。恨來遲。密幄陰成翠。書花葉。更誰寄。

解佩令

茂陵遊倦。燕臺句老。把平生、冶意都銷歇。落拓吟情。盡付與、短簫殘笛。倚東風、玉龍吹裂。吳絲初卸。湘屏乍展。笑徵歌、又過蘭陌。解說相逢。恰正似、前期初七。畫樓西、一鉤新月。

南樓令

甲寅春羈迹。沙羨日尋藥。裏忽忽不知春事已盡。友人載酒過從相

慰。岑寂酒闌。客散客夢已栩栩。飛度石湖煙水間矣。

風信到茶蘼。斜陽闔短扉。悄無人、綠樹成圍。一片子規啼不住。只幾日、又春歸。香氣減行衣。江南音信稀。料煙波、空浸苔磯。數點落花雙燕子。何不向、故園飛。

滿江紅

癸丑上巳。劉純齋觀察重修禊事于借園。同集者三十一人。各集右軍蘭亭序中字爲詩。王蓬心太守繪圖。夢樓侍講臨禊帖于幀首。極一時之盛。時余

適客章門。未與其會。明年春來鄂。公子袖海出圖觀之。棖觸往事。仍填滿江紅調一闕。志之卷尾。

波暖塵香。又早是。祓除佳節。鄂城畔。林園似錦。重鋪吟席。嘉侶盡敷軟草坐。清尊倒影晴山碧。惜畫圖。不爲白頭人。添笻屐。記前度。張燈夕。也會與。嬉春列。忽三年如夢。事分今昔。楚水煙波遲釣艇。章門孤館淹愁客。算多情。一樣畫闌邊。初弦月。

憶舊遊 追感水邨雅集賦此

記通波舊館。碧水回環。斜拓窗櫺。絕好盟鷗伴。凭烏皮曲几。讀畫調琴。更深酒人未去。涼月上銀屏。又拍按紅牙。鬢洲譜就。教盡雛伶。而今事都過。似散漫楊花。各自飄零。有幾西園客。早鮑家墳上。詩冷秋螢。料得東牆題壁。澹墨贖星星。怕惹起相思。愁來倒盡雙玉餅。

東風齊著力 泊舟巴陵

冷浸樓臺。深迷津渡。薄暮湖天。恁恁繫纜。幾樹晚楓邊。空裏倦帆飛盡。君山小。一點

螺攢吹龍笛。家家夜雨。去住都難。往事幾留連。漂零苦者。番一倍堪憐。暮愁空闌。隨雁落寒煙。想得涉江人去。疏麻折。難問嬋娟。緜緜道。洛蘭香遠。嬾鼓湘弦。

蝶戀花 又一邨南軒作

深院日長消翠茗。一局殘棋。隔水聞清磬。蝴蝶不來花氣冷。斜陽自轉闌干影。風帽欹斜慵未整。搖曳金鈴。喚起江南恨。欲寄新詞無雁信。雲箋香冷芙蓉粉。

采桑子

綠蘿深院東風峭。檐馬丁東。夜色朦朧。露點千珠月一弓。不堪往事重追省。酒薄愁濃。賸有詩筒。十載閒情賦惱公。

菩薩蠻

驕嘶白鼻長亭路。江南三月韶光暮。帽影受風偏。落花吹滿天。衝花雙燕子。掠過橫塘水。塘上有鴛鴦。一春流水香。

倦尋芳

亂雲向夕。獨倚危闌。芳思如織。側側寒輕。可惜謝池春色。涼雨又催花事去。東風只有重簾隔。燕歸來。認巷口斜陽。好春無迹。又誰向、尊前起舞。爭奈枝頭。聲聲啼鴉。折取殘英。笑與彊簪巾幘。芳草天涯。幽夢遠。夜來還照西樓月。掩重門。那更聽一聲鄰笛。

更漏子

閣東西。窗向背。曲曲屏山相對。月照影。雁橫秋。夜來人正愁。惜芳叢。牽別緒。塵滿斷腸詩句。鐙黯澹。夢惺忪。隔城聞曙鐘。

祝英臺近 八月十六夜

雁初飛。鐘欲動。雲意已先斂。卵色魚天。似倩黛痕染。宵來幾處紅樓。重熏鑪炷。擁翠袖。又凭風檻。衆星澹。忽看涌出冰輪。團圓未曾欠。只有吟情。似比昨宵減。且將冒絮蒙頭。愁他清影。偏照出。鬢霜千點。

四和香

縷縷閒愁誰得似。不斷春江水。滿架綉芸空自祕。不載我、心中事。多少茶檣還酒市。歷歷猶堪指。數徧遠鐘敲野寺。怕夢到、銷魂地。

酷相思 湘南除夕

楚客辭年簫鼓沸。只孤館、門空閉。漸向晚、庭前風色起。梅花也、飄香細。雪花也、穿簾細。小小舢船鐙影裏。未飲心先醉。笑數載、萍蓬成底事。歲去也、留無計。人住也、歸無計。

三犯渡江雲 嘉慶改元二月二十七日瀏陽舟中

山雲晴乍斂。東風晚起。春溜滑于油。倦篙爭石隙。屈曲回巒。危翠壓孤舟。旅懷誰省。灘響急飛盡眠鷗。兩三家、欹斜茅屋。寥落水雲洲。悠悠遠天如夢。津鼓頻催。早黃昏時候。最愁人、斜陽滿目。野鳥鉤輶。故園又過鶯花節。想冷月、蕭照如秋。天影闊。歸鴻自度南樓。

清波引

冷吟孤嘯。誰牽率、軟塵古道。歲華空晚。故園夢中到。釣渚倚衰柳。臆挂微微殘照。怪他一領征衫。淚點多、酒痕少。歸期預料。掃荒徑、先薶露草。五湖春早。煙波雨餘好。樵青共漁婦。撐箇檝頭船小。試問渡口桃花。幾枝開了。

浪淘沙

楊柳小彎頭。風細波柔。銀河漱豔月如鉤。記得鸞笙吹一曲。柳外層樓。又是可憐秋。雲影都收。白蘋香裏樣蘭舟。只恨清溪三尺水。不向東流。

桃源憶故人

尉廳池上作簡蓴輝
鸞環十二紅闌曲。靜漾泠泠寒玉。纔是一痕舒綠。早有鴛鴦浴。青山如玦挂檐端。掩映遙峯飛瀑。輸與仙人金粟。把卷臨池讀。

臨江仙

隔岸青山如欲滴。春沙猶帶潮痕。東風驟急暗朝暾。酒香人去。微雨杏花邨。綺語而今都織盡。無憀一倚閒門。歸鴉擁樹不成喧。溼雲徐斂。新月破黃昏。

臺城路

霽痕綠徧池塘草。香泥盡抽纖筍。水檻春溫。冰弦調滑。彈出思歸新引。清明期近。看挑菜。湔裙。何心閒趁。老矣樊川。亂紅莫更點吟鬢。紫懷底事尙切。有泉石吾山。莫負遊興。童子攜壺。名僧扶杖。屐齒不妨徐進。東風又緊。甚吹月都昏。更添重暈。漫檢春衫。明朝晴未穩。

虞美人 丁巳春盡

前年黃鶴樓邊路。香絮飛無數。去年無賴又長沙。爭似辭巢燕子。啄殘花。今年落拓清瀏道。鬢髮垂垂老。送春三度立斜陽。依舊綠波芳草。是他鄉。

滿庭芳 寓齋十姊妹花盛開少白有詩余填此詞

桃雨飄脂。梨雲墜粉。間庭春事都闌。窗紗斜拓。牆角碎紅攢。露重愁含秀鬢。嬌酣甚。不耐朝寒。珊瑚態。慣雙頭並蕊。葉接枝駢。昭陽臺殿冷。銀鐙擁髻。說盡悲歡。又楊家秦鏡。翠鈿偷安。一樣芳心。渾不妒。垂珠絡。淺笑風前。雙蝴蝶。花陰夢醒。飛過曲闌。

邊。

買陂塘 題葉遜菴桐陰書屋圖遜菴崑山人嘗著同字異韻考

覆幽齋清陰如許。銀牀聽徧秋雨。舊家巖壑疑圖畫。最好玉山深處。編韻府。尙磨牘
險麤重續閒居賦。扁舟容與。又北渡津門。南浮湘浦。拋了故國去。憑豪素。譜出騷
人庭宇。碧雲葉葉遮戶。鄉心一樣難消卻。我亦天涯倦旅。胥水渡。料鶴怨猿驚。松菊
都非故。五湖歸路。儻同挂雲帆。閒階掃葉。遲我共題句。

憶秦娥 遜菴將如衡山爲作雲山小景便面並題一詩云泉聲落澗樹猶溼

嵐氣侵衣鳥不聞。昨宵夢到上封寺。七十二峯多白雲。瀕行復綴此詞送之。
鬢絲白。十年老作江湖客。江湖客。天涯芳草。落花時節。布帆斜趁東風力。輸君又
看衡山色。衡山色。峯峯倒景。湘江弄碧。

百字令 送少伯之長沙

短篷斜繫。又離亭羌管。數聲催別。落拓青衫綠底事。廿載天涯爲客。雲鎖金臺。草荒

雪苑難繡平原出。頭顱如許。與君鍊取詩骨。此去正值端陽。湘春門外。淒絕巫歌咽。騷客精靈招不返。浪起空江如雪。想得憑高。遠波遙嘯。一片模糊白。清輝疑接夢。回時見梁月。

破陣子

又是端陽過了。晝長靜掩柴荆。蕉上雨麤三四點。柳外雷低一兩聲。午闌天正晴。團扇翻憐風弱。單衣未覺羅輕。一自碧湘人去後。那有心情付酒尊。閒愁約略生。

金縷曲 寄答故園諸子

望遠同天際。已恩恩、故園十度。東風紅紫。賦就停雲纏絲句。寫上蠻牋誰寄。況不盡、相思心事。抱影虛堂鉛淚瀉。又黃昏、聒入愁人耳。風角斷。雁聲起。年來益復添顛。頓鬢毛斑、鷓鴣裘敝。未成歸計。若不懷歸如江水。聽到鄉音猶喜。把十二、闌干都倚。芳草萋萋愁不斷。更洞庭、日落天連水。青山夢、幾千里。

疏影 落葉

秋深旅舍。奈舞風倦葉。悽悽時下。隔隔人家。收盡寒煙。漏出夕陽紅罅。堆階正苦啼
螿急。又蕭疏。雨飄鴛瓦。想洞庭、人去波激。楚客別情難寫。莫記題紅舊事。御溝水
自繞。幽怨空惹。斷續商聲。策策頻驚。爭禁酒醒遙夜。空林不庇寒蟬影。卻添了、山容
如畫。只故園、一片霜蕪。誰掃冷雲吟榭。

婆羅門令

看得不得。一繩低雁。聽不得。送隔牆鵝管。待較深愁。除得是、長江練。愁無限。只怕長江
淺。芳菲陌。楊柳岸。計當初、那許遊情倦。風花縱得紅如舊。人別後、奈霜鬢千點。燕
書難寄。蝶夢空戀。日近江南。偏遠試檢春衫淚。已灑春衫徧。

聲聲慢

余酒邊花下喜爲長短句。自浪迹江湖。閱數寒暑。每以此消遣愁緒。

邇來淮川。雖況味寥落。猶時時倚聲爲之。惜山中無賞音者。亦聊用自娛而已。

亂山遮夢。帶水縈愁。漫言小住爲佳。人去庭空。孤吟自遶苔階。碧天雁鴻歸盡。月無

聊照到幽齋。微露浣。寫江南舊恨。調苦難諧。唱徹尊前金縷。便清真白石也。則塵
蕓短拍頻催。何似度與鸞釵。風人近來漸老。悠揚夢。怕繞天涯。待去也。倚東風。疏影
瘦梅。

春從天上來。答兩峯見懷之作。自乾隆癸巳春與君會于西湖。後聚散不常。
別來又復十餘年矣。余流宕湖湘。君亦羈棲吳下。停雲念遠。不勝黯黯。

白鼻驕驕。記鞭絲徐裊。帽影欹斜。十二橋邊。夕陽小閣。花外盡掩紋紗。眼底縣縣舊
恨。都付與。數點歸鴉。最堪嗟。是潮生潮落。撥送年華。天涯庾郎蕭瑟。那更聽宵來。
隔院琵琶。人去孤山。鶴歸甚處。依然春到梅花。夜屏待和紅牋句。如鉤月。飛挂檐牙。
夢魂賒。問舊時鶯燕。幾處人家。

淒涼犯

牙樞有坤寧宮提鈴癸第二八字案。陳棕天啓宮詞注云。宮人有罪。罰提鈴
唱夜。自乾清門至日精門。月華門。仍還乾清門而止。徐行正步。高唱天下太

平四字聲緩而長。與鈴聲相應。雖風雨不敢避。此疆乃其遺物也。三十年前嘗見于鄭迂谷丈紺珠堂。索賦詩未果作。因補綴此詞。

宵深和淚。郎當韻。淒清更雜風雨。沈沈永巷。迢迢長夜。纖纖微步。恁般哀楚。比蜀棧啼鴉又苦。五雲中。銅壺徐滴。兀未歇歌舞。規樣牙樞在。癸二分。明問誰約取。太平四字。曳春絲。曼聲如許。舊物空留。弔芳草。宮斜甚處。是會親。玉指恨血帶幾縷。

法曲獻仙音

鮑綠飲賦夕陽詩甚工。余嘗和之意。有未盡。復填此詞。

難繫長繩。亂催清角。紗窗一霎紅淺。遠水浮光。落霞成綺。明到荻蘆江岸。正返照。柁樓赤。菱歌欲淒斷。漫依黯。問東風。幾番紅翠。又巷冷。烏衣舊家池館。一片古今愁。但寒煙。廢綠空晚。不忍登樓。恁蕭疏。偏引望眼。對千山黃葉。歷歷斷鴻聲遠。

鷓鴣天

珠絡銷香鈿退金。無人池館畫情情。橋邊新漲三篙暖。門外飛花一尺深。空悵望。幾沈吟。十年春事十年心。夢餘斜月鏡前雨。纔著思量便不禁。

鳳皇臺上憶吹簫 題柳蘼蕪小像

紅豆無花。白楊作柱。燕歸難認華堂。恐麻姑雙鬢。都已成霜。莫說南朝家令。天邊月、閱盡滄桑。傷心是、草荒半野，堂名衣疊空箱。淒涼墮樓遺恨，賸圖畫春風。省識紅妝。問琴湖一曲，何處鴛鴦。只有絲絲殘柳，蕭疏影、淺蘸波光。吳綃黯、宵來漫熏沈水濃香。

解連環 賦得春聲

鬧鐙街冷。又瀟瀟卻下。釀花疏雨。聽燕子、絮盡春寒。小鶯趁新晴。曉啼芳樹。點屐弓弓。早人在、花陰笑語。怪誰搖鈴索。驚他蝶夢。短牆飛度。紅窗簸錢幾處。破梨雲一縷。暗愁延佇。盼遠水、雙槳歸來。任吹徧錫簫。寂寥溪渡。簌簌花飛。倩淺水、半篙留住。爭禁他、響碧涓涓。溜將春去。

東風第一枝

蜀綺裁紅湘屏疊翠。西樓煙月如畫。扇紈不礙歌塵。舞衣暗飄沈麝。芳叢尙淺。早已

覺燕嬌鶯姘。縱東風不護幽香。怎忍細揉花打。遊欲倦。玉鞍纔卸。人已醉。畫橈催
駕。爾時忒殺恩恩。此後亂愁難寫。草荒積瓦。一又炬劫灰飛者。問翩然。何處驚鴻漫
憶當年春社。

一翦梅

蘭香庭院。俛漣漪。倚翠闌干。進玉東西。新詞脫稿半無題。不是傷春。卽是傷離。江
南天遠碧參差。小度幽魂。又被風吹。驛樓星月斷腸詩。飛盡閒鷗。說與誰知。

瑞龍吟 和清真韻

斜橋路。猶記戲蝶芳叢。藏鴉春樹。東風不隔珠簾。有人更在。簾陰深處。久延佇。曾
是翠鳥留人。素蟾窺戶。高樓疊鼓催更。翦殘蘭炷。依依細語。自度天涯芳信。祇餘
絲柳。迎風低舞。多恐渡頭桃花。顏色非故。壚邊倚醉。待寄濤牋句。知一樣。闌干倚徧。
無聊閒步。夢也無由去。鏡前抱影。傷離意緒。鑪又銷香縷。響幾陣。淒涼敲窗飛雨。一
雙語燕。畫梁空絮。

淡黃柳 乙巳秋別五橋于石湖丁未九月余在武昌使院五橋適來相會明年別去嗣余自潭州轉客淮川聞五橋由山右來湘無所遇遂不得其去住消息賦此寄懷

題香賦玉人道疏狂客。小艇鷗邊閒弄笛。憶起十年前事。一葉銀牀又秋色。悔輕別。難尋舊蹤迹。雁聲苦。夜偏急。記南樓。夜雨同蕭瑟。一縷閒雲。去來無定。惟有湘波自碧。

憶王孫

桂香小院嫩涼天。鵲尾鑪熏裊篆煙。月色今宵倍可憐。石闌邊。直自初弦盼得圓。

瀟瀟雨

吟堂秋夢冷。趁西風。斷雁落邊城。記江皋臺榭。花濃露重。柳密煙昏。一片天邊皓月。照足十分春。多少探春客。銷盡柔魂。爲問春歸甚處。早琵琶紫塞。淚溼羅裙。賸有三生杜牧。雙鬢又星星。想重門舊會來處。只梧桐。夜雨鎖秋聲。緜緜恨。問何時得。吹

轉雛鶯。

一枝春 黃耽岷許贈靈壽杖久之不至賦此促之

墜瘦寒藤倚牀頭。最愛嘉名堪取。相扶小柱。耐久惟君爲侶。年來老矣。縱孤往。慣愁行步。頻盼望。足下殷勤。舊日一枝曾許。非關鄧林爭鶯。待橫來膝上。秋宵聽雨。橋邊雪霽。更好探梅芳嶼。何人月市。慣敲徧。酒家門戶。憑寄得。拖了看山。撥雲便去。

夢玉人引

送行人去。秋風幾落榆莢。芳信誰探。憑語夢中癡。畫角飛來。又一輪月照。荒荒城堞。忍憶幽歡。檢冷紅吟帖。飄然孤槩。匣滄江障綠。萬千疊。解佩人歸。淩淩誰更深涉。樂事秦淮。猶自記迎接。又添幾尺新潮。試問桃根桃葉。

好事近

蕭瑟晚寒生。鼓角城頭鳴咽。竹影搖搖清夜。滿風簾涼月。愁人無那夜三更。古砌亂葢急。只有一杯濁酒。怎消除今夕。

曼香詞

四十五

霓裳中序第一 送小匏歸吳因動故園之思黯然賦此

愁雲鎖怨雨。小艇隨波人自去。孤坐卻無意緒。正鄉國夢回。征衣催絮。闌干漫撫。歎斷魂、心事誰語。斜陽外、遠山數點。目極水天暮。看取鬢毛堆素。任冉冉、流光暗度。相將寄愁何處。枕上關山。畫裏煙樹。柳風吹幾縷。想折處、殘枝倦舞。歸鴻盡、一九冷月。獨自照羈旅。

六州歌頭 題沈石田畫卷用蛻巖詞中孤山探梅韻

山深氣古。老樹盡查牙。回峯仄。清溪畔。杏初花。筍抽芽。谿盡茅堂出。傍叢竹。開白板。中有客。且賓主。酌流霞。竹外高樓。莫是春寒甚。尙掩窗紗。看連峯馳影。渺渺雁程賒。一片雲遮。甚天涯。向香溫處。茶熟候。空看畫。坐冰衙。風又起。也吹得。柳絲斜。意些些。願結探春伴。問那里。酒人家。欵簷笠。倚筇竹。數歸鴉。聽說人生行樂。休孤負。似水年華。奈年年落拓。蹤迹類搏沙。淚落悲笳。

多麗 乾隆辛丑壬寅間虞雨蕉爲湖山主人余與孫澹于毛意香諸子主其

家薄遊湖上意緒甚樂。今孫虞先後物故。毛生亦落拓無聊。追憶舊歡。悵然

成詠用蛻巖詞中韻

倚瓊簫。柔波暖送雙橈。過橫塘。山圍碧玉。輕颿吹過長橋。雨初霽。化垂紅淚。風偏軟。柳舞青腰。詩思縈雲。酒香入夜。滿湖鐙影。碎光搖。月斜後。帽簷花朵。猶自顫餘嬌。記歸晚。蠻牋共擘。春意難消。自前番。恩恩折柳。溪邊枯盡霜條。小門關。望雲深隔。吟魂斷。歌些難招。孫楚樓空。毛萇鬢老。微吟誰與度清宵。又況是。楚江羈客。孤館鎮無聊。空留得。舊愁新恨。分付秋潮。

南浦 秋水用碧山樂府韻

木葉洞庭秋。渚蓮收。又見柔藍紅染。驚起兩鴛鴦。橫塘路。菱歌晚來聲徧。一繩新雁。影寒斜映波痕淺。隔船玉笛吹未盡。飛渡閒雲幾片。春來記擢蘭舟。又滿鑑涼生。翩翩去燕。一色共長天。西風裏。開到白蘋千點。涓涓溜去。可能流盡題紅怨。倚樓遙望歸颿影。脈脈斜暉空遠。

最高樓

猶記簫聲院雨初收。河淡淡、夜幽幽。飛鴻欲度天邊影，嫩涼先到小簾鉤。藕花香、梧葉墜、可憐秋。賦不盡、江南詩十索。牘下了、畫屏山一角。芳思遠、倩誰酬。題紅欲寄東流水，奈他溪水只西流。問何時、消別恨、與閒愁。

六幺令

亂紅飛盡。春去已無迹。東風又吹香絮。萬點落晴雪。幽館愔愔客散。小展湘紋席。新詞稠疊。檀槽試點。蝶舞階前趁殘拍。昨夜蘭舟竟去。遠意愁難說。暗引一掬新愁。獨對屏山碧。聽得南樓喚燭。早是虛堂夕。不嫌寥寂。闌干斜角。照到江南舊時月。

浣溪沙

透砌苔生篆壁蝸。瘦弦寬盡玉琵琶。春郊閒殺紫鸞車。拆了秋千人使去。戲殘格五局偏斜。一庭香雨落桐花。

又

宋李若谷爲長社令。日縣百錢于壁。用盡卽止。東坡在齊安日。用不過五十。每月朔取錢一千五百。斷爲三十塊。挂屋梁上。平旦用畫叉挑取一塊。而以竹筒貯用不盡之錢。以待賓客。余邇來亦用此法。院齋上下四人。除薪米外。每日蔬供。以百錢爲率。有餘亦貯別器。不足則出以益之。覺比向時爲省。知古人雖瑣屑計較。皆可法也。

雨過虛堂綠映簾。倦餘正好展殘編。量薪數米亦堪憐。世事幻如蕉鹿夢。浮華空比鏡花緣。菜根滋味自年年。

青房並蒂蓮 枯荷

倦凝眸。早楚天秋老。湘渚蓮收。綠減紅稀。冷落舊芳洲。離披不罨鴛鴦影。伴寒蘆。瑟瑟鳴秋。更那堪。水檻宵涼。雨聲滴碎夢魂柔。當時碧筒勸酒。有水佩風裳。挽住蘭舟。縹緲凌波。甚處漫憶前遊。空令野塘夜月。尙留照。兩兩舊沙鷗。盼折處風欵采。蒨歌。欵水悠悠。

天香 龍涎香

鱸島寒噓。鮫人曉采。沙痕已帶濃篆。記擣花房。閒搜畫篋。臙翦腥雲幾片。銀猊淺炷。看舞翠、縈煙欲斷。蜃氣樓臺結得。依稀海風吹散。宵涼玉窗人倦。泥春纖、燭花頻剪。聽說酒邊風味。舊情猶戀。青翰仙舟甚處。怕繡被、銷來夢魂遠。待唱橋南吟。情又懶。

水龍吟 白蓮

蕊仙淨洗鉛華。天然玉質臨妝鏡。銀塘一曲。亭亭獨立。盈盈相並。碧蓋擎將。明璫曳卻。無言顧影。是誰家水榭。精簾卷處。對芳渚。翠闌凭。正好沙鷗小夢。被菰蒲、雨來催醒。粉痕點點。香絲縷縷。滿湖涼浸。月曉風清。還愁欲墮。漫浮煙艇。記灣頭、銷夏調冰雪藕。舊遊重省。

摸魚子 蓴

怪鮫宮、龍髯誰翦。絲絲疑帶煙浪。芳洲春冷先頻采。小艇缺瓜齊盪。盛翠盞。護浮膩。

冰涎試挹清泉養。罽來倦网。憐皓腕吳娘。股釵輕折。承手滑流掌。江湖客聽徧。蒹葭歌蓮唱。西風時憶曩。吳中故事爭傳說。且喜季鷹無恙。歸或儻。配枯鼓紅鹽。好共鱸魚餉。幽情已往。待千里朝峯。三潭秋摘。餘興寄孤舫。

齊天樂 蟬

午堂正續槐根夢。數聲又聞高樹。扇卻蒲葵。果浮瓜李。一片綠陰簾戶。弦桐七柱。賸嫋嫋餘音。和他絲縷。尙曳殘聲。遙柯遞響咽偏住。莫語齊宮舊恨。故鄉深不見。同抱悲楚。衰柳旗亭。夕陽水步。都是慣會聽處。餐來風露。甚委蛻餘形。不教仙去。喚起秋風。鬢霜添幾許。

桂枝香 蟹

江南水菴。趁月黑斷疏。幾輩爭入。尙記寒蒲縛取。餉來吟席。宵涼菊影閒庭院。酒初香。盃浮縹碧。故人同嗜。蜀薑親擣。吳橙分擘。甚此地。食單盡別。便擁劍招潮。也難尋覓。說與銅陽風味。更誰知得。汾河一曲吾家近。又蘆洲。落潮秋色。燭斜小舫。持來

左手夢中猶憶。黃山谷詩寒蒲束縛十六輩。畢卓銅陽人。

臨江仙

佛髻雲堆三疊。仙源路隔千重。酒醒人遠暮江空。水痕疑蘸柳。秋色欲來鴻。篆縷難燒心字。情絲時寄枯桐。朱橋碧野舊遊蹤。十年惆悵事。昨夜桂堂東。

慶春宮 和宋人韻

蘋末吹香。鷗邊分夢。晚涼先到簾波。慵理琴書。斜欹枕簟。旅懷如此秋何。懊儂聲斷。更無緒。尊前曼歌。湘屏休展。圖裏黛眉也。斂雙蛾。樓陰搖曳芳柯。絲縷餘香。暗染輕羅。雁度遙峯。天連衰草。暮愁高處偏多。回腸似織。那更聽。鄰機錦梭。宵來人靜。脈脈含情。坐對銀河。

有正味齋

詞五種

運彰



吳錫麒（乾隆一一——嘉慶二三）

字聖徵。號穀人。浙江錢塘人。乾隆四十年進士。由編修官至國子監祭酒。詩詞爲浙派後勁。駢體試律。尤能獨開生面。名重海內。有有正味齋集。

有正味齋詞

錢唐吳錫麒聖徵

佇月樓琴言

菩薩蠻

簾鉤小颭春風裏。薄陰畫就濛濛地。花細落櫻桃。不知人過橋。露下蒼苔溼。獨自單衣立。燒了女兒香。拜伊和影雙。

水龍吟 夏晚趙氏西池納涼

舊時喬木依然。一襟曾染詩人翠。斜陽小立。藕花飛夢。夢涼如水。過雨苔肥。留煙石瘦。俊游誰記。待招來鷗鷺。闌邊拍拍。還識我垂竿子。漸釀新秋情味。縵池心。玻璃風起。嘶蟬徑斷。鬪蛩簾換。幾消吟醉。暗惜年華。近來修竹。已無題字。但桃笙坐看。青天明滅。畫行雲意。

鳳凰臺上億吹簫

城東瓦子巷本南宋時勾欄夢窗玉樓春詞有云問稱家

住城東陌欲買千金。應不惜歸來。困頓殢春眠。猶夢婆婆斜趁拍。蓋指此也。今則委巷蕭然。知者殆寡。余以秋日經行其間。彌覺衰草夕陽。黯然懷抱。冷落鴉邊。淒涼葉底。一條古巷彎環。問冶春蹤跡。數夢都難。歎息琵琶仙去。流水外。別調誰彈。西風緊。蕭蕭草樹。暗起清寒。湖山故宮十里。算桂子荷花。儘足盤桓。甚小門閉後。斜照同閒。燕子歸時。應戀凭翠袖。幾處闌干。重回首。新愁舊愁。併作秋看。

西江月

門對枇杷舊樹。人吟鸚鵡前廊。一條情路隔紅牆。纔信銀河玉上。小雨疏花易淡。西風落葉先忙。可憐蝴蝶不知涼。偏愛秋衫相傍。

掃花遊

冬晚遊龍興寺同舒古廉紹言賦

遠鐘乍歇。賸幾樹蒼茫。已消煙翠。舊時梵地。歎荒街落葉。一寒如此。省識繁華。只有無波井水。夕陽墜。颺樓角峭風。鈴語吹碎。來問無盡意。聽屐響沿階。凍禽驚避。老仙去矣。甚光陰醉醒。不禁彈指。佛火黃昏。漫數春風九里。月來未照河橋。市喧徐起。

臺城路 富春道中

江流不管閒鷗夢。匆匆似隨帆轉。鬢短籠煙。衫輕浣雪。禁得天涯人慣。絲風乍捲。聽萬竹陰中。畫眉低嘯。鎮日狂歌。早催斜照墮天半。回頭山遠水遠。只依依霽月。無限情戀。短笛能橫。長魚欲舞。相對蓬壺清淺。空明一片。想深谷高眠。白雲都懶。釣火何來。隔灘流數點。

浣溪紗

隔樹新聲喚乳鳩。撲簾香絮墮銀鈎。無人尋夢到江頭。結局東風歸似客。消魂晚雨冷於秋。落花如畫滿衫愁。

摸魚兒 江上觀捕魚作

漲空江。一篙深綠。蒲芽煙際新長。東風幾處鳴榔急。撐出柳陰漁榜。沙岸傍。任拍拍鷗鷺。側翅閒來往。寒潮暗上。早跳雪噴珠。花黏魚口。帶雨薦春網。前灘近。指點高臺百丈。羊裘空寄孤賞。年年慣飽煙波味。只有白鷗無恙。情浩蕩。儘圍合青山。畫我

披葦樣。船頭煮釀。聽銅笛吹來。浩歌一曲。高激衆山響。

高陽臺

嚴江春盡日。旅館無人。惟聽雨聲。送花買醉。不得黯然於言。用玉田

韻爲社中諸子問

絮絮無言。花花似夢。幾曾料理歸船。未到離愁。送春只自年年。天涯近已傷春甚。怕春歸。斜照誰憐。更傷心。雨後亭臺。一碧如煙。茫茫細認裙腰路。料鄉關咫尺。一樣山川。爲問東風。可能留向尊邊。與春有約春偏去。惱今宵。燕子無眠。聽簷聲。直到天明。又接啼鶻。

醉江月

夜過桐廬。明月在空山。水澄映冷。然如濯魄。玉壺中也。

秋無邊際。看陰陰一片。初凝涼魄。借取半帆風力穩。爭向玉壺搖曳。舞鶴遼涼。眠鷗選夢。此度塵凡隔。勝音何處。遠灘漁火明滅。許我載酒來游。醉餘長嘯。千頃江波裂。采藥人騎龍背去。幾葉雲迷瑤宅。泉古鳴絃。山空響玉。彈破桐枝碧。蓬瀛不遠。夢魂還戀幽夕。

望湘人 旅感

乍商飈捲樹。零落冷楓。夕陽空際如戀。瘦入山尖。碧餘水面。一霎陰晴千變。借楊絃詩。倚樓吹竹。江天人遠。盪晚煙。十里蘆花。夢醒者時涼雁。閒把秋光檢點。已梧陰卸後。菊香吹徧。賸三分明月。帳裏欲寒羅薦。聽殘遠杵。惹來愁緒。不減絲絲衣線。惱鬢影。未到秋深。一鏡吳霜吹滿。

春霽 重赴嚴江留別社中諸子

多事啼鵲。怎喚我歸來。又早催去。一瓊紅醪。一枝黃笛。一般別離情緒。捉花弄絮。戀春春不留人住。好記取。今夜破帆搖夢落江渚。當此自笑。歲歲年年。影如浮萍。旋散旋聚。憶前番。嘗樓剝筍。多情會畫故園句。休悵旅程魚信阻。去也來也。早料此度歸時。鷺鷥頭上。藕花翻雨。

羅敷媚

臨湖小院儂家住。名是楊枝。愁似楊絲。怕見楊花渡口飛。波心聽打蘭橈去。夢也

迷離。信也依稀。過了春寒九九時。

臺城路 春曉登吳山見炊煙四起

綠楊城郭春如畫。濛濛萬家煙起。雨後偏遲。晴邊較淡。都化江湖寒翠。清明過未。換禁火光陰。一炊新試。悄地風回。市聲飛出白雲裏。憑高還動遠目。看朝暉四晃。搖蕩如水。歌板樓臺。錫簫巷陌。喚醒黃梁殘睡。餘痕裊細。漸半亘山腰。半屯林尾。颺到花梢。者番紅雨膩。

菩薩蠻

碧桃開放無人見。退紅簾子垂三面。不爲怯春寒。羞教柳眼看。無言低翠袖。酥腕憐消瘦。愁自在心頭。楊花不替愁。

西子妝

秋宇澄霽。遠近無煙湖上。山光動。搖涼翠萬狀。古廉邀余出錢塘門。

將之孤山遇黃相圃。模姚春漪。思勤宋筠洲。永黃玉階。基拉入舟中。循蘇隄入西泠橋。泊於裏湖幽處。山水旣佳。飲酒極醉。因用夢窗自度腔以寫其勝。

人外秋清鷗邊水遠。藕葉藕花無數。漁樵野局頻招我。酌西風、判誰賓主。狂歌醉舞。願身在、蓬壺常住。看涼波、帶年年山色、何曾流去。菱謳暮。一霎斜陽暗了橫塘路。算來千古幾斜暉。照詩人、共尋烟語。衣香舊句。且休向、西泠重賦。怕回頭、冷綠沈沈萬樹。

洞仙歌

新拋紈扇。乍寒生羅被。擘破萸房甚滋味。靠闌干、細數黃花。花浸月月影和秋都碎。烏衣今夕去。喚到征鴻。替箇人兒寫人字。樹底已霜飛。不待題詩。先換了、銅溝紅淚。悔煞對、西風忒關心。一線斜陽。繫情千里。

菩薩蠻

妾家皂莢橋邊路。問年恰恰逢三五。背唱月兒彎。素花秋兩鬢。不知愁裏意。已解愁滋味。名字喚真真。夢來思殺人。

虞美人

有正味齋詞

斜陽一角紅樓影。抵似關山永。蜜梅花下見來遲。更約天寒、上九試香時。薛家鏡子鉛波溼。不是團圓月。簾深何處捉迷藏。飛去玉釵、風裏燕雙雙。

玉漏遲 壬辰春余歸自嚴江得姚春漪游吳門留別之作悵然於懷賦此寄之

客愁渾未洗。偏憐去客。催愁還起。折柳歌寒。賸有吳箋寫淚。想見扁舟來去。看足了、蘇臺眉翠。烟月墜。天涯回首。滿空雲水。不恨別浦帆催。恨負卻春風。者邊吟醉。說與離情。抵似綠波千里。三十六鷗飛夢。更三十六鱗傳意。歸也未。樓頭已花殘矣。

望湘人 憶宋筠洲客粵東

漸雲寒逼硯。葉落敲燈。故人猶滯天際。一幅帆迷。一繩雁細。更帶聲笳起。十八灘高。六千里遠。江山如此。料幾番。歌到珠孃。不抵湖天吟醉。惆悵光陰彈指。已登高節過。怕凝遙睇。況飛雨吹愁。酒外不禁秋思。羅浮舊約。縱難拋棄。只是天涯滋味。待賸取。好夢歸來。夢向梅花香裏。

探春慢 宋宮洗鉛池在梳妝臺側今爲僧院

月樹棲鳥。花宮放梵。山空孤鳳無語。淺水波消。斜階沫濺。難得舊時春聚。鏡影團圓。在料無分。照伊眉嫵。但憑前嶺斜陽。額黃一點偷注。銅輦記曾來去。問幾曲欄圍。幾重雲護。流粉流香。映花映柳。那有浣人愁處。瀉盡繁華淚。麝化作。響衣寒雨。暝入僧樓。沈沈都咽鐘鼓。

西江月

密灑迷迷寒雪。斜吹翦翦東風。梅花不住水雲中。雲水替流幽夢。短笛樓頭一霎。輕帆江上千重。道郎回首卽簾櫳。莫費相思千種。

巫山一段雲

金粉鋪殘照。胭脂爛古苔。半春濃雨不曾來。今日小園開。裙色鴛鴦妒。衣痕蝴蝶猜。落花如雪。買輕釵。無語下香階。

雨中花

有正味齋詞

已繡得。鞦韆紅滿地。更嬾去。問桃尋李。攪不成春。飛都如夢。只稱楊花意。恨逐雨絲
風片裏。賸一段。別離滋味。坐樹鶯啼。當簾燕語。未穩單衾睡。

柳色黃 秋日同黃相圃姚春漪集曉春書屋

苔片陰生。春色一簾。旋換秋早。楊枝舊綠。花枝舊碧。半黃斜照。尋詩何處。但聽郭外
鐘聲。引來臨水魚烟悄。已信主人閒。更閒如鷗好。重到。曲闌頻倚。短髮低搔。故人
都老。無恙西風。只戀幾株紅蓼。吟蟲也歎。爲道莎草涼邊。而今野局漁樵少。我輩忒
疏狂。又簪香盈帽。

掃花遊 甲午清明同沈梅村亦然作

石泉句就。早送回殘夢。試茶風裏。夕陽似水。漾秋千小影。細搖花碎。帖帖清愁。一色
鞦韆紅繡地。矮簷底。賸柳眼窺人。人共春醉。春又過半矣。怕柳亦難禁。者般情味。賈
錫巷尾。尙餘寒料峭。小樓深閉。識得新烟。只有歸來燕子。定巢未。書燈照伊濃睡。

夢橫塘 春暮同舒古廉黃相圃姚春漪泛舟湖上時飛絮掠波散漫如雪因

憶壬辰三月與黃玉階坐跨虹橋上東風甚緊柳花渡湖而來玉階得句云
一年春事又楊花余味其意似甚有悽惋者明年玉階竟以病死殆詩讖與
此遊今昔雖異風景宛然舊感新情悲吟成調

捲還似雪滾不成毬晚風吹向流水舊路濛濛早隔斷斜陽千里已囀鶯餘才啼鵲
後一年春事付湖心鏡影攪碧搖寒相思恨和萍碎橫橋凭處闌干賸清愁難畫
絮語空記蝶趁鷗迷歎只似飄零身世念前度青衫綴好不道晴雲易飛墜待認離
痕未教成夢定先教成淚

臺城路 南湖感舊

夕陽多少閒鷗在會盟舊時秋水松墜枯釵柳迴淨眼換了袈裟初地陂塘數里歎
誰替詞仙石闌重倚遠暈煙蛾晚山低鎖一匳翠平泉都已割捨甚龍華發願難
掃文字酒被雲殘詩襟雪瘦夢老幅巾花底休提燕子問頭白僧歸主人知未獨立
蒼茫冷螢移暗尾

翠樓吟 乙未正月十四日姑蘇道中作

掃雪街晴。燒燈閣暖。楊枝已逗眉暈。烟波終古在。洗不盡、故宮脂粉。東風吹鬢。歎一
夢繁華。雲帆空引。低徊問。西施網得。幾人曾認。無悶。此度天涯。又紗籠盈路。火蛾
成陣。市喧聲未動。怕猶帶、吹簫餘恨。誰傳芳信。道有約團圓。蟾蜍應準。來宵近。水窗
吳語。坐灰蘭燼。

南樓令

一片水雲鄉。不知何處涼。算秋風、纔到銀牀。起換歌頭歌水調。有花露。溼蓮房。儂
小住西塘。花香夢亦香。驀人前、難學迷藏。側倚團團羅扇子。偷半面。看鴛鴦。

菩薩蠻

屐聲兜轉迴廊路。下階生怕沾香霧。不是惜蟬紗。鴛鴦機上花。怨郎歸太晚。千里
何曾遠。琴裏話瀟湘。玉絲三尺長。

月華清 閏十月乞假南歸夜宿在平旅居月冷燈孤清寒特甚悵然爲賦此

解

缺月分梳。癡雲弄絮。滿空浮動寒色。客枕孤清。夢繞一燈紅滴。只耳畔、鈴鐸聲閒。暗和著、荒街落葉。嗚咽。漸催來華髮。幾曾相識。莫怪今宵淒絕。更數到歸程。遠愁如織。千里高鴻。正訴山陰風雪。念往事、誰伴圍爐。有好句、畫灰吟得。相憶。盼梅花路杳。者情難說。

湘月

入毗陵道中風物清曠塵襟灑然用白石老仙自度此所謂鬲指聲者

以寫其勝

九龍迢遞。已雲中、暗逗嵐光如雨。滿眼烟波人不見。日暮打魚纜去。竹送陰陰。鷗迎悄悄。但聽搖柔櫓。豁然閒朗。此間饒有生趣。憑洗十斛紅塵。斜披風帽。欲往尋烟語。岸颭青帘沽酒近。行過蘆花明處。小汊通村。短橋跨岸。畫出江南路。清寒在水。老魚深夜能舞。

摸魚兒 平望

有正味齋詞

染輕帆。滿陂烟翠。艣聲隨意搖去。江楓落盡詩題少。一雁催來寒句。雲乍聚。向雪色蘆邊。界得斜陽住。篷窗款語。有琴畫前緣。蒹蘆舊約。吾欲問鷗鷺。光陰換。約略吳船喚渡。當時來往沙渚。可憐鶯脰湖心水。重照鬢絲如許。風颭處。認幾點青帘。挂在冥冥樹。漁歌唱暮。早清逼疏鐘。冷窺斷塔。新月一眉吐。

臺城路 青浦舟晚

柘西池館曾來往。松門甚時深閉。帆底看風。船頭候月。領取江湖滋味。烟波幾里。聽一笛漁船。一鐘僧寺。池黑蘆邊。照人閃閃逗螢尾。蕭然微下冷露。對空明萬頃。如遠塵世。鶴語天青。星搖水綠。消盡尋常詩思。閒鷗喚起。肯讓我高眠。白雲谿裏。夢向青山。滿身涼翠洗。

江城梅花引

枇杷樹下小門開。愛蘇臺。住蘇臺。只有柳枝三月稱身材。燕子纔歸燈又上。問名字。怕人前。喚夜來。夜來。夜來。情費猜。停繡鞋。理玉釵。喚也喚也。喚不下。尺尺香階。孤

負團圓。月子照蒼苔。知道藕花今夕夢。烟水裏。背鴛鴦。若箇諧。

思佳客 夕泊楓橋

薄月依雲畫不如。晚涼天氣雨晴初。鴉羣黑攏高高樹。螢點青攙短短蘆。塵盡洗
夢都無。水窗吟破睡工夫。鐘聲一杵無尋處。誰寫寒山夜半圖。

臺城路 項蓮峯朝菜講祭於吳門值余有邗江之役相與別去舟中悵然賦

此奉寄

吳波千頃流情去。離愁暗縈花草。舊雨來遲。停雲望遠。堪笑天涯泥爪。芳華易老。問
一徑靡蕪。采香誰到。悶掩屏山。晚亭無夢獨吟悄。東風會共小別。又碧荷扇外。相
促游櫂。酒笛邀風。鷗波坐雪。輪與者邊斜照。催人去早。只月影淮流。慣增清惱。暝色
搖燈。一天涼雨攪。

憶舊遊 無錫舟中望慧山

看風梢弄影。水葉搖涼。滿目斜暉。不見題詩客。只詩情一片。吹上山眉。望中塔稜縹

緜無數暮雲迷。正笛外聞漁。尊邊款鷺。人在蘆漪。相思舊游處。有雪巘蒙烟。凍樹藏曦。更踐蘋花約。聽鳴泉隔竹。如奏琴絲。欲尋煮茶風趣。幽夢落林扉。漸素月飛來。一聲水鶴天際歸。

又大風渡江

暮雲烟脫走。片帆如馬。高蹴層空。練捲千條白。賸吳頭楚尾。不了青濃。醉吟浪花堆裏。豪氣動魚龍。正海日西斜。三山翠色。吹落金鐘。游蹤。溯前度。笑梗泊萍浮。孤負長風。萬里江流壯。讓今朝濯足。踏碎芙蓉。只餘雪鷗飛處。掀舞一漁篷。料鐵笛狂吹。相期定在千仞峯。

臨江仙 金棕亭教授兆燕招同秦西巖前輩樊汪對琴比部棣家並山山長

珥紅橋納涼

橋外有堂堂外竹。竹間流水如琴。移來藤榻就涼陰。蓮花名士語。鷗鳥故人心。醉我清尊宜此地。渾忘日落遙岑。秋光回首竹西深。蟬聲孤磬。螢火一星沈。

漢宮春 鐵佛寺是五代楊行密故宅

匝地驚珠。歎禪關閉久，屐齒經稀。敲門有人訪古，極目斜暉。瞿曇老去，賸袈裟、壤色都非。前代恨，難消戰血，幾痕碧到楊絲。何論沙蟲猿鶴，付西風劫火，一片灰飛。山河欲尋故影，明月來遲。淮流遠咽，繞誰家、秋水漁磯。賸樹外，紛紛鴉陣，黑雲萬帳高低。

湘月 集歐梅花下草堂分詠揚州古蹟得秋聲館

秋無今古。問古人、聽得秋聲多少。今我重來秋色裏，畢靜一天斜照。住亦爲佳，呼之不應，獨曳蘆中櫂。涼花相引，水雲千里尋到。何似漁子家家，撈蝦斲蟹，幾曲烟波繞。畫向潮平風定後，纔信無聲秋好。江北江南，客來客去，枉被閒鷗笑。葦衣眠穩，小門深閉烟悄。

夢橫塘 平山堂

倚雲裁宇，剖月垂簾，醉翁前度曾到。一舸花紅，記邵伯、湖中來好。小妓傳杯，老仙命

句。那時斜照。歎風流不見。雨冷烟荒。裙腰路。迷芳草。偏留隔水烟鬢。恰平臨碧樹。秀影迴抱。不定江風。吹酒外。晚嵐飛悄。認幾樹。垂虹影裏。隱隱燈船送歸早。問向閒鷗。舊時歌吹。已荒涼多少。

芳草鳳樓吟 文選樓

問何時。蕭家帝子。層樓來占巢痕。能精文選理。一時教授。須策秘書勳。丹黃今縱倦。賸蟲魚。燈火黃昏。甚四面。罨罩。軟風吹滿游塵。休論翠華歸去。冷螢飛照。聽唱秋墳。舊時紅袖在。玉欄會倚處。已散氤氳。綺羅都是夢。只名流。標格猶存。看竹外。涼峯畫翠。書破江雲。

百宜嬌 題家並山香草詞

酥雪濃搓。玉波微澆。吟到者時尤俊。滿地斜陽。一天芳草。略帶六朝金粉。橋荒廿四。且莫譜。吹簫餘恨。傍妝臺。燈影搖毫。麝烟添上眉暈。會載酒。蘭窗細問。清麗許誰鄰。玉田差並。隔葉頻敲。倚花細按。耳底箏琶銷盡。雙鬢賭唱。料畫向。旗亭應準。甚瀟

湘千里春風付游仙枕。

霜天曉角

生小蓮娃。是紅橋那家。認得鴛鴦兩字。牽小夢、墮菱花。花耶雲易遮。雨來風又斜。日暮問郎不見。榴子意、更酸些。

國香慢 同人買舟擬游禪智寺因雨不果小飲三賢祠分得此調同作者閱

玉井華 江橙里昉 江玉屏立

水竹搖妍。聽梢梢古韻。暗墮詩邊。攀芳那人何處。秋滿菱船。一杵清鐘雨外。問僧楊、只借雲眠。微茫阻游屐。且覓天香。來證情禪。對花花不語。悵西風燕去。冷信先傳。吟仙鶴化。苔色漸老蒼烟。剩有天涯朋酒。不輸他、歌吹年年。臨波試窺影。旅鬢蕭疏。合受鷗憐。

看花回 秋雨初霽同人泛舟紅橋遊王氏園時桂花盛開年瘦生汝鄰爲余

作訪秋圖余填此調

喚艇向烟邊。覓語波心搖影。小山噤引吟興。送天際幽香。十分清冷。盟蘿款竹。待到斜陽人去靜。煩寫我、散髮疏林。雪鷗夢外譜涼韻。邱壑此間原畫境。更列岫。隔江遙映。省識前身老衲。慣金粟堆中。聽來秋磬。西風未歸。怕有閒雲故山等。且先參、無隱禪心。說與幽花證。

夢橫塘 集寒香館再詠揚州古蹟得螢苑

竹枝彈雨。柳葉棲烟。夕陰深黑何處。野草黏愁。幻幾點、枯螢來去。綃扇前因。翠簾餘恨。影和秋聚。記飛飛故苑。十斛星寒。繁華夢、西風路。飄零最苦。蕪城歎。銅盤折後。暗溼鉛露。坐慣羅衣。嗟此日、美人遲暮。照不盡、相思字字。枉伴明蟾二分度。冷咽胭脂。更招山鬼。對荒燐私語。

轆轤金井 玉勾井

草荒陰翳。闕仙關、可有露桃開未。一度春風。換一番塵世。明蟾萬里。幾曾照、玉勾天。地。寫影流雲。吹華滌夢。悄無波起。霞衣暗飄。孔翠剩窺餘鳥篆。紅沁苔字。素綆浮

沈引千年愁思。團圓鏡裏。轉不盡、轆轤寒水。落徧梧桐。瑤局靜掩。抱珠龍睡。

擊梧桐

秋風蕭瑟。羈愁逼人。疏烟細雨中。著屐出城尋大小。雷塘故跡微黃。

眷柳涼意可憐。古事茫茫。惟有田水聲足。與清吟相答也。

疏葉搖寒意。黃漸上。江口垂楊千縷。碎響忽吹來。灑飛雨。只在菱花瘦處。分明鏡裏。繁華照後。留照寒鴉古樹。有甚鴛鴦夢。賸水田一片。時翹幽鷺。簇錦輕帆。泥金小戶。總是一般塵土。欲說西風恨。問恁寫。曲折玉鉤斜路。但聽秋墳。新唱似愁。還怨按。後庭遺譜。閃蘆根。蕭蕭幽綠。螢影無數。

琵琶仙

江橙里招同汪雪礪。杰江玉屏游康山。

一簣山低。市喧外。宛似吹來眉暈。遙閃郭外斜陽。輕帆數難盡。纔過了。天涯風雨。好相約。短筇支穩。隔水聞砧。依雲待雁。潛遞寒信。論陳迹。未改當年。甚豪客襟期太。疏俊。訴與平生恩怨。惹琵琶。淒緊。人意與。黃花欲老。漸一簪。冷上秋鬢。早又蟾影窺林。晚嵐青襯。

浪淘沙令

廿四橫橋。尺八瓊簫。玉人行處顫花翹。道是古來歌舞地。柳學纖腰。夢也難拋。魂也都消。水香前浦路迢迢。唱罷采菱還采芰。月揭波高。

念奴嬌

題楊吳尋陽長公主墓誌拓本

墨花簾下。認春風舊筆。猶留苔翠。夫壻上頭名字在。卅六英雄誰是。五尺殘碑。二分明月。人說興寧里。眠蠶新樣。幾行會共香塵。想見粉碓脂田。沁園春好。幾日稱連理。夜雨棠梨千載恨。唱到荒墳秋鬼。諛墓金空。吹簫侶遠。誰寫瑤階意。楊花夢短。一場同付鵑淚。

霜葉飛

遊禪智寺

斷烟偏到繁華境。飛飛涼滿蓮宇。墓田霜草弄淒清。秋老斜陽路。聽幾度、零鐘斷鼓。垂楊凋盡闌干暮。便兜率天高。已一霎、飛花散罷。暗冷塵土。安得喚起詩仙。藤牀瓦枕。竹西同譜詞句。萬梢寒碧碎西風。捲亂殘鴉語。道片月、須留小住。憑伊來照荒

寒趣。只莫談，離宮愁。多少荒波。白鷗明處。

齊天樂 將還西湖留別韓江吟社諸君

遙空雁鶻隨雲遠。聲聲似吟歸興。夢倦旗亭，衫枯木葉，都是西風吹冷。江邊照影，帶殘葉蕭疏，寫愁鷗鏡。此去孤篷，一燈和雨閃涼暈。清盟前度許訂，向橫橋，廿四欄畔同凭。瘦入花痕，香銷酒袂，離緒與波無定。瓊簫細聽。早喚起相思，者般淒緊。不盡流連，片帆遙弄暝。

法駕導引 小游仙曲

蓬萊島。蓬萊島。海水綠波生。鐵笛一聲龍女去。桃花吹作碎瓊聲。鸞鶴正相迎。華鬢樂。華鬢樂。色界大難名。句引雨雲歸楚峽。脫逃星宿入衙城。兒女世間情。淒涼意。淒涼意。如夢復如癡。自奈人間悲織女。碧桃天上葬西施。淚雨太迷離。

石湖仙 題王蘭泉先生湘三泖漁莊圖

綃痕秋翦。帶紅樹蒼茫。沙澌清淺。尋夢到蘆花。只留得、鷗心一片。蒹香吹老。問幾棹、

采魚歸晚。雲斷認破帆，指塔遙轉。京華比年鬪住，話林泉，塵襟如浣。鱸蟹撈蝦，試檢鱸鄉舊券。笛冷吟龍，月高聽雁。夜燈楓岸。圖裏展，菰蒲剩響篷點。

壺中天 夏曉坐綠意亭納涼賦寄胡竹城應煌

一壺幽綠。寫零星碎月，都成秋意。翠扇低搖池影外，浮動藕花香細。曲閣遲燈，虛廊颭笛。夕氣涼如水。蟲絲絡遠，豆棚疏處輕墜。回問舊雨天涯，狂歌散髮，幾度風前醉。一段鄉心隨夢遠，悔被亂蟬嘶碎。拄杖看雲，移篷聽雨，此樂會能記。讓君吟獨，竹肌劃滿詩翠。

菩薩蠻

生生翠袖籠香悄。暮雲正向屏山繞。相約者時來。梅花三九開。羅帷寒乍透。緣得燈如豆。掌上拓鞋兒。要人兜底思。

臺城路 李宸妃妝樓

東風不管興亡事。隔樓漸催春好。柳意分青，山情送黛，一樣淡蛾新掃。鶯聲喚曉。定

銅鞮聽過。夢回偏早。畫出鬢痕。樹波低墮。綠雲悄。淒涼誰更訪古。便瓊華島畔。都長寒草。金盞脂消。瑤箱麝散。愁滿故宮花鳥。何人問到。只劃取南明。幾分殘照。陡觸簾旌。撲回釵燕小。

蘇幕遮

寫長箋。吟短語。風攪楊花。點點離愁聚。香送簾前三日雨。燕戶無聲。夢入紅梨去。欲拋時。難撇汝。穿過迴廊。重倚闌干暮。天上魚星期不誤。淚眼鰥鰥。灑盡相思苦。

陽臺路

聞曹忍庵自鎔在揚州以千金買歌兒載歸新安詞以訊之

鶻聲軟。盪冷紅一片。詩情吹滿。更柔清。暗膩銅溝。怕逐綠波齊遠。料理笙歌。唱徹夜蟾。二分清怨。冒珠換。費佛奴。纖紅親押香券。憶我竹西前事。只夢影。空留畫扇。晚雲銷黯。想草沒。冶春閒館。和歌吹送君歸去。十里梅花催徧。任教聽水聽風。暮帆移緩。

壺中天 夜飲蔣心餘先生士銓寓齋歸途同家香亭太常玉綸曹習菴宮允

仁虎陸耳山學士錫熊程魚門編修晉芳黑窰廠登眺月色澂映野風肅然

居僧淪茗供客情味清灑因賦此闋以誌一時游興云

醉拖履去向玉壺清處。濯來詩魄。風意不離蘆葉上。響曳幾枝殘碧。樹古邀雲。臺空
夢鶴。人是瑤池客。蕭蕭茶鼎。一僧孤立霜白。私笑雁爪天涯。尋菰覓稻。慣印泥邊
雪。望破寒烟燈火遠。能數誰家刀尺。搔首看天。披裘坐石。歸騎遲今夕。松杉橫影。畫
紗移上苔格。

長相思 以書寄西冷諸友卽題其後

說相思。問相思。楓落吳江雁去遲。天寒二九時。怨誰知。夢誰知。可有梅花寄一枝。
雪來翠羽飛。

望梅 春漪書來雜述近狀兼詢及余余謂長安風雪中蹇驢敝車宦況可想

而鶴巢梅花且開諸君觴讌其下吟香送燠弄影延月其樂何如因賦此調
寄之追歡舊游彌益淒眷矣

雁聲低墜。早天邊遞到。一函愁思。歎近來、瘦減青衫。只一曲琵琶。一襟秋淚。夢遠長安。道我亦、荒寒如此。正冰花壓帽。凍暈搖燈。雪滿天地。高樓往時共倚。問鶴巢曲處。梅信通未。記一枝、竹外低斜。更籬角何人。笛聲吹起。日暮天涯。怕雙袖、已消吟翠。賸窺窗、一丸冷月。照人獨睡。

壺中天 霽雪在樹返景眷林余養疴杜門適陳竹厂以綱沈匏尊心醉枉存
圍爐款談殊慰寒寂

裹頭吟倦。看簷牙凍雀。啄餘晴雪。風力峭添林影外。吹得夕陽明滅。破渴敲茶。消閒次墨。瘦鶴和清絕。款門人到。舊情同畫灰說。還念歲晚江湖。梅花不見。千里烟波闊。空向孤山殘夢裏。分取一痕新月。有約租驢。幾番勸酒。莫怪添華髮。玉龍催起。笛聲無數波折。

愁倚欄令

雙鷗雨。一箏風。畫橋東。弱柳繚繚千縷。間香紅。雪疊衫兒影薄。雲堆鬢子春濃。殘

夢櫻桃花外覓記相逢。

虞美人

楊枝彈碎清明雨。攪作愁和絮。春殘更苦是花殘。況到落花時節、有些寒。鏡中描出雙蛾瘦。人似當年否。淒迷一片夕陽西。只恐夢回、不待亂鶯啼。

月華清

九月望夜被酒歸來明月在窗清寒特甚新愁舊夢根觸於懷因賦

此解

鴉影偎烟。蛩機絮月月和人共歸去。愁滿青衫。怕有琵琶難訴。想玉欄、吹老苔花。枉間卻、扇邊眉嫵。延佇。漸響餘落葉。冷搖燈戶。不怨美人遲暮。怨水遠山遙。夢來都阻。翠被香消。莫話青鴛前度。賸醉魂、一片迷離。繞不了、天涯紅樹。誰語正高樓。橫笛數聲清苦。

琵琶仙 唐六如夕渡圖

林曳秋烟帶鴉點。一片蒼茫未了。來問古渡扁舟。篙聲出寒蓼。紅樹外、漁樵雜坐。寫

涼影不多斜照。幾尺荒波。閱人來往。能記多少。念當日、曾住楓江。慣寒暮沙汀。覓菱棹。收拾一天雲水。付林泉新稿。還想見、人歸月上。賸檝頭、閒立鷗鳥。最愛斜對柴門。一峯孤峭。

夢橫塘 題王竹所初桐西山紀遊

掃苔延屐。撥葉停筇。滿衣吹溼烟翠。歷歷斜陽。暗老卻、櫻桃溝水。鷗外留盟。石邊尋夢。一鐘蕭寺。任閒雲自去。翳竹迷松。微微露、紅螺髻。分明萬綠濃時。又清寒如水。半溼吟紙。四月空山。渾未了、落花情味。試揮手、琴歌一曲。響帶飛泉墮天際。野店燒春。醉偎芳樹。數清遊能幾。

摸魚兒 題許笠人孝廉事竹坡圖

黯濛濛、萬竿寒玉。碧烟吹滿空際。無聲詩裏秋難聽。暗聚一壺涼思。秋幾里。看照影橫斜。添入三分水。樵風又起。問老葉遮晴。危梢曳雨。鶴夢得圓未。湖天住。老屋數間而已。苔階空印屐齒。近來霽雪梅花外。誰賞此君清味。圖畫裏。歎燒筇年光。未許

成歸計。頻歛笠子。但歌到吳江。竹枝淒咽。怕減袖羅翠。

惜餘春慢 題美人圖仿唐人惜花春起早詩意

罷打鶯兒。旋驚鴛子。夢醒思量難說。餘寒未了。墮入蒼茫。纔卸柳邊殘月。道是新愁怎禁。偷撚香枝。莫嫌輕折。只簾旌遮住。東風欄外。落花如雪。聽幾度。歌唱橫塘。相思來處。料也雙心同袂。單衫瘦鞞。冷鬢濃堆。恰稱舊家標格。最憶紅樓那番。妝鏡初開。上頭時節。又啼鴉喚曙。梨雲無數。不會留得。

瑤花慢 風雪作寒寓齋岑寂擁爐孤坐偶歌此詞恍惚玉龍起舞也

爐熏欲燼。酒價新高。早北風吹雪。爬沙古怨。誰付與。幾柱冰絲淒咽。西山一角。騰天外。淡蛾明滅。喚玉龍起舞尊前。伴我晚來吹笛。亂雲似葉濃飛。帶數點。飢鴉歸影寒絕。湖天舊夢。聽不到。樹樹竹聲輕折。牆腰低亘。還誤認。夜深殘月。問者番。霽後園林。瘦卻梅花誰說。

極相思

繡金窗戶誰家。幽夢繞梨花。簾衣緊護。剪刀不動。今日寒些。二七良期纔過了。抱圓冰。卜向天涯。無言獨自相思。遲暮雪密燈斜。

卓金車子來遲。過了殺燈時。杏花纖尾。丁香茸舌。二月春期。多少惜香情緒。在拗折枝。繡到羅衣。簾前窺影。樓頭飛夢。蝴蝶相思。

菩薩蠻

怨春春亦憐人瘦。問人那得扶春手。三尺禁風旛。落花前夜寒。鶯聲啼徹曉。今日相思早。損了繡工夫。鴛鴦兩字無。

迎春樂

冶雲不斷屏山底。賸好夢、誰人記。釧圓如月籠酥臂。須識得、蟾蜍意。漸百尺、垂楊踈地。問幾日、愁春醒未。扇上花吹欲滿。獨自闌干倚。

憶舊遊

題李秋門寅熙鴛湖雨泛圖

認篷梢窄葉。艣劃圓波。半邇船來。過了楊花雪。想桃花細雨。鏡面新揩。暗添舊愁多。

少翦燭話天涯。問湖是鴛鴦。勾留鄉夢。幾夜會回。徘徊。溯前約。又黃雀風高。孤負帆開。唱到瀟瀟句。剩圖中笠影也。費鷗猜。勸君藉袈橋畔。歸買藕苗栽。只待我閒來。花前弄艇同舉杯。

消息 甲辰冬杪余將乞假南歸賦寄故鄉知好

雪掃斜街。冰敲破硯。故人知否。歲晚書愁。天寒寄夢。商略黃昏後。扁舟一霎。搖空雁艣。不肯水雲輕負。忍鷗鄉。年年別卻。草荒西子湖口。朝衫卸了。漁衫許換。不待蒹鱸時候。花落花開。燕來燕去。約醉櫻桃酒。相思試問。故園梅發。誰在笛邊回首。只今夜。先惹歸心。莫教拖逗。

八歸 沈梅村令南宮余迂道往訪天寒命酒追述余兩人少年事因出歸田

約示余西溪數椽棲映梅竹烟山之契渺渺兮余懷也賦此爲異日證

鞭搖夕照。村寒難避。孤堞隱見雲外。燒燈有約。吟官閣。休說沈郎憔悴。瘦寬腰帶。但說烟波湖上興。歎舊夢。閒鷗都改。算俊侶。只有梅花。歲晚一枝待。會記紅衣雪裏。

西溪呼棹。慣與漁樵同載。水邊花影。酒邊月影。不比嬋娟難買。好三閒卜築一角青
山鎮相對。吾先去。爲君料理。竹粉涼邊。描箇畫圖在。

菩薩蠻 在平道中

楊枝愁入行人唱。勒住青絲寒不放。上九是良時。春風鬢上知。弓彎驢背小。裙釵
鴛鴦倒。一幅幃蟬紗。送兒還塔家。

扁舟尋舊約

蓮子湖中居。人藝花者多以蘆爲界。余來時春水方生。蘆芽微
碧。彌望皆僧衣田也。買舟泝流如行曲港。約錢容臺本禮同譜此詞以寫其

烟水之概

葉葉成烟。花花入夢。一篙新碧初生。菱歌何處。采香無分。接天雲水縱橫。舟前誰導
我。算唯是沙鷗有情。中流風起。寒無蹤迹。暈向綠波輕。偏愛看。荒蘆圍繞處。似水
田衣闊。夕照鋪晴。山眉低映。單椒浮動。分明鏡裏人行。暗泉聽漸遠。倒飛落。峯頭笛
聲。老漁相待。柴門對酒邀月明。

翠樓吟 同汪秋白大經遊塔射園邀主人張遠春與鏞同作

夕照看山。新涼弄水。尋詩許頻來否。藕花香不斷。是風露、洗頭時候。疏林回首。漸塔影埋雲。鐘聲催入。愁孤負。抱枝蟬語。較人吟瘦。柳口引到烟波。看半迷烟草。半和烟柳。驢魚滋味好。道只待、詩人歸後。欄干招手。問燕子年年。記誰歌酒。新蟾又。一庭如水。綠陰窗牖。

月中行

行雲不肯峽中居。遞過雁兒書。畫眉人破晚工夫。新愁寄得無。團扇已拋紅豆落。賸照影、一半蟾蜍。屏山香冷夜啼烏。夢去採蘼蕪。

更漏子

漏聲長。燈影短。夢裏鴛鴦怎暖。看枕印。認鬢絲。問雲雲不知。心無盡。聲無定。秋到芭蕉難準。朝帶雨。夕兼風。往來愁殺儂。

摸魚兒 題友人柳陰獨步圖用汪柳湖應紹韻

擾長隄。濛濛密密。何人尋到烟趣。第三橋外聽鶯說。說與落花情緒。須小住。道圓卻
萍波。未了前生絮。丁寧認取。是青漆闌干。紅泥亭子。賭唱柳枝處。天涯怨。空憶舊
時纖嫵。蛾兒看去愁誤。料伊也倦回嬌眼。怕惹尋常歌舞。情一縷。只綰雨搖晴。畫出
西湖路。邀君更駐。正筍美魚肥。酒帘一角。夢入綠陰去。

瑤花慢

題陳默齋廣寧壽雪山房圖

宛然太始。如此孤清。記訪溪山口。羣峯玉立。俯竹裏。著個尋詩人瘦。蹇驢騎出。認林
缺。白雲相候。有峨眉老鶴歸來。說道峭寒依舊。翻憐泥爪天涯。賸蹤跡蕭蕭。曰夢
孤負。瑤華寄贈。問寫得。近日時晴佳否。山陰高致。更續向。永和年後。請一壺茅店沽
春。醉折梅花爲壽。

覽寰中序第一

題陳秋堂表弟豫鍾蕉林學書圖

幽尋試步屨。墜雨飛來響涼葉。釀就苔陰半溼。漸扇影生疏。衣香消歇。愁心萬疊。歎
綠天。前事難說。誰重把。好秋一片。料理人吟篋。清絕。晚螢明滅。照釵股。依稀如折。

相思人又賦別。牘破硯棲烟。孤筇倚月。草荒迷夢蝶。只幾度、碧雲暮合。潛教換、畫稿離披。水墨半欄雪。

眼兒媚

鏡雲吹墮一窩絲。霜影換蓮衣。紅闌十二。紅橋廿四。各自東西。當時枉織鴛鴦錦。無夢到寒機。底牽愁緒。青春易了。白月相思。

唐多令 棲水道中

野綠自成春。陰濃畫不真。幾家茅屋結比鄰。竹樹二分嫌未足。須遠水。補三分。酒旆樓招人。漁榔轉一村。夕陽破網曬當門。土步魚肥新筍白。樹老瓦。聚兒孫。

石湖仙 出五龍橋望含山松氣接雲塔光送雨行十里餘猶見黛眉隱隱烟際也

呼人幽鳥。導天末孤帆。烟際來悄。寒綠逗林疏。放春山。窺人欲笑。荒波無恙。記客鬢、舊時曾照。重到。歎白鷗、近已都老。青旗幾家矮屋。說消愁。烏程酒好。醉裏狂歌。惹

得龍公先惱。雨雨風風。短篷催早。暮雲閒了。和樹杪。一枝塔影斜鳥。

摸魚兒 渡太湖

盪鷗邊。者般荒綠。何人能忍孤冷。三萬六千餘頃闊。一色淨鎔天影。風未定。便樹上雲流。也有聲堪聽。斜陽又暝。看捲雪堆銀。浪花飛處。寒上鷺鷥頂。前林遠。微見疏罨掩映。蒼茫先結幽興。江湖慣識丹青意。畫出數帆端正。呼小艇。可載得全家。同向篷窗凭。烟波定肯。但劃港裁魚。分灘放鴨。夢已落清境。

慶春宮 不見方竹樓元鹿垂廿載矣今年春相遇於真州白髮飄蕭窮老可

念酒次出囊琴感舊圖屬題回首前塵宛乎夢寐毫楮所及淒然於言

流水前緣。閒雲今日。料難說與枯桐。膝上虛橫。囊中冷貯。者番又過春風。綠楊城郭。問誰繫。當時釣篷。沙鷗應歎。一別江南。廿載重逢。寥寥古調難同。白髮尊前。舊夢烟空。不了相思。便教相見也。憐絃語都慵。把杯徐勸。且休惜。衰顏醉紅。商量一曲。揮手招來。海月天東。

點絳脣

放過春光。亂鶯啼處花全落。斜陽樓角。驀地思量著。刻步香階。去踐烏衣約。東風惡。夢魂飄泊。翻怨梨雲薄。

海棠春

灰沈寶鴨飄殘麝。漸翠被、有些寒惹。明白坐東風。消受梨花夜。踏春準備來朝暇。早繡帖、妝臺收罷。芳草蝶先來。夢穩鞦韆下。

徵招 舟行潘封洛社閒晚雨極涼命酒獨酌

西風十里生蘆語。蕭蕭共人吟瘦。飛雨入秋繁。儘黃昏消受。清愁新釀就。歎短髮、也如疏柳。慣閱烟波。白蘋涼處。一鷗依舊。漁釣待重尋。移船去、分明聽敲銅斗。悵望隔溪山。賸孤雲留久。臨風開笑口。算贏得、天涯杯酒。早篷底、冷暈搖燈。是夢來時候。

慶春澤慢 松江郡齋酬李味莊同年廷敬

琴鶴隨身。桑麻滿眼。行春去策花驄。江水評量。料應官味能同。畫圖省識滄洲趣。預

留君一箸秋風。君有滄洲垂釣圖。恣豪吟。萬幅揮殘。割取吳淞。茸城舊是繁華地。自栽棠舍近。射雉場空。送到閒身。只除蝦菜關儂。追尋十載長安夢。怕東華、重聽晨鐘。但浮家、烟波許乞。來繫漁篷。

江城子 泊落瓜橋

片帆瓜步記乘潮。雨連朝。月連宵。冬瓜堰畔。昨日小停橈。一路趨人歸夢近。流水響。落瓜橋。

醉落魄

愁心吹碎。相思只在屏山背。銀河咫尺迷環珮。淡雨微雲。做盡涼花態。扇上青鸞塵篋待。流螢乾死黏裙帶。秋情容易垂楊改。一鏡青霜。各把蛾眉賽。扇上青鸞

調笑令

秋雨。秋雨。遞到芭蕉冷語。五更殘月來時。纔得天涯夢歸。歸夢。歸夢。一片蟲聲相送。

十六字令

有正味齋詞

愁。釀就淒涼雨後秋。心和月。蕩漾在簾鉤。

壺中天 雨後過荻港。蘆風四起。蕭寥無人。唯見楓葉曬晴。冷紅可念。

片雲移去。早帆外。高挂斜陽天半。可惜蘆中人不見。誰共渡頭漁飯。烏下烟青。魚跳浪白。十里楓林遠。紅衣如畫。隔溪閒佇。秋晚。偏是羈旅蒼茫。聽風聽水。使我清遊倦。野草離披蟲語合。也爲天涯微歎。怨蝶魂歸。啼鵲淚在。乍醒繁華眼。夜深月黑。暗泉還咽根畔。

玉京謠 吳興道中白石老仙所謂家家烟浦戶戶畫船者也

細雨樓臺遠。曉夢迷迷。暗度菰蒲去。翠老菱船。采香閒了兒女。問滿陂。草長王孫。恁冷落。鷗波無主。呼幽侶。蘆灣荻汊。聊尋烟語。青山約略呈眉嫵。倚篷窗。怕更吟舊句。妝鏡銘成。晶匳空。賸愁貯。只眼前。蝦菜關心。定有日。將家同住。攜魚具。來著短蓑狂舞。

黃鸝遶碧樹 過古塘橋茅舍幾家。稻堆齊屋旁。通曲澗。奇楓老竹。如在畫圖。

難得輕帆卸。平橋古水。又延清矚。老屋誰家。想柴門關住。白雲同宿。夕陽影外。但吹冷、稍稍疏竹。還賴有、幾葉紅肥。點破一壺幽綠。最羨翁稱足穀。計佳筭、甕頭方熟。定今日、更鮮鱗細斫。新筍微漉。可惜芳鄰未買。欠約箇、雞豚局。留教畫裏償吾。畫來重讀。

臨江仙 曉出三江口露氣彌空天白灑灑令人毛髮如濯

夢醒不知天與水。隨帆飛入銀河。中流擊楫聽吾歌。笙鐘鏗夏。高浪駕龍。萬里洪濤從此合。秋寒風露原多。芙蓉采采去如何。紅萍一點。搖蕩水晶窩。

扁舟尋舊約。重至松江訪味莊。不值將之姑蘇待潮於秀溪橋際晚乘月而行半蟾揭天羣星在水船頭聽葉江上聞漁殊有慰於羈抱矣

圓泖浮涼。橫峯落翠。日斜訪舊重來。寥空雁下。無人吟處。一琴閒臥青苔。破帆留且住。看明鏡、微雲自揩。晚潮生未。么蟾上候。鷗影共徘徊。還記得、攜尊芳草地。聽滿船絃索。燈火蘇臺。思量前約。烟波好在。耳邊吳話先催。冷風吹葉落。早疑是、楓橋夢

同。且隨漁父沿流弄月莫放杯。

齊天樂

題倪米樓稻孫載書圖

綠波如畫江南好。櫂歌千里催發。長物隨身。東風著力。滾滾濤頭飛雪。呼鷗試說。問可識詞人者。般蹤跡。細雨桃花。米家船到片帆溼。垂楊還映古堞。歎楞伽舊夢。空掩苔篋。綵筆期君。青氈坐我。同照二分涼月。吟蟲漸咽。和夜讀聲清。一燈明滅。篷滴依稀。夢醒聞墜葉。

臺城路

題黃潤園梧索句圖

苔邊涼殺。詩人夢醒來。還續吟緒。紅引花窺。青邀竹笑。譜出無絃琴趣。高情漫與。在斜照明時。斷煙疏處。招手青天。響空一鶴共幽語。西江試論派別。羨涪翁句好。香瓣重炷。苦蘖禪心。甘茶俊味。同向箇中參取。春風去住。指吟損腰圍。漸輸前度。且乞花豬。嫩和新筍煮。

高陽臺

祀竈日詹石琴巖堂見過出示新詞賦此爲贈

裂竹雷晴。敲花鼓凍。天涯又逼殘年。茶夢圓成。劃灰閒話爐邊。幾人來跨揚州鶴。歎故巢、多老荒烟。伴蕭閒、折鯤黃梅。笑證枯禪。知音數數桐枝託。但細商琴趣。只在無絃。滌雪腸寒。半生苦戀青氈。何時載酒尋鷗去。怕江湖、也易華顛。趁今宵、燭豔錫香。且賭吟箋。

金縷曲

如皋冒巢民先生水繪園擅名國初爲南北羣賢往來讌集之所至

今百有餘年漸就零落其四世孫妙隱復繕葺之落成後繪圖屬題

捲起楊花雪。儘東風、搖晴送暝。去尋春色。一樣游紅窗戶在。難得斜陽未歇。好重認、巢泥蹤跡。燕子隔簾歌可賭。怕新愁、咽了呢喃舌。逢上巳、事誰說。黨魁名字爭廚及。只流傳、豪華天性。黃金輕擲。今日名園喬木長。依舊故家標格。待推上、黃昏明月。吟遍玉梅三百樹。盪餘春、喚得雲魂熱。流水外、一聲笛。

菩薩蠻

盈盈燭淚相思悄。東風無賴天涯早。吹月上梅花。花寒月又斜。但看芳草綠。日日

歸期卜。夢雨溼春衣。雲停不肯飛。

白雲流出空山夢。前溪十里樵風送。一路草鞋痕。笛聲吹到門。磯頭生晚雨。漁父
擘船去。新水約萍開。桃花入網來。

風光好

笑燈前。醉燈前。鬢卸香雲鞞一邊。泥郎眠。黃昏最苦梨花黑。交寒食。多謝今宵月
上弦。有情天。

柳梢青

極目斜暉。者番風景。那不淒迷。燕子無言。落花如夢。各自相思。憑儂心上抽絲。繫
不住。天涯馬蹄。山上蘼蕪。陌頭楊柳。夫婿誰知。

洞仙歌 田家詞

又聽啼鳥喚。今番春起。瓦卦曾占紫姑未。早秧歌鬧罷。臺笠催來。人影聚。聚向燒畝
烟裏。平林通曖曖。纔過斜暉。遠綠微茫。逗生意。漸泥融雪澤。溝放冰澌。重數到。田

家樂事。但屈指、燈宵最晴明。且莫管流年。幾龍治水。

賽田鼓歇。散村村團社。醉影斜陽亂桑柘。正浴蠶天暖。睇燕風輕。和遠水。畫出青疇綠野。春分今又過。驗到黃姑。浸種還應趁良夜。想差科未動。襪袴晴堆。便雞犬也同清暇。定認是、人家住桃源。看隔著桃花。叱牛歸也。

黃鸝三請。道耕期須早。樹上榆錢已吹老。要踏田努力。救麥關心。泯滑滑。穀雨光陰潛到。老農偏解說。農字從辰。忙月工夫莫閒了。趁東風一路。軟試芒鞋。都踏遍、荷花紫草。看又是、前汀絮飛飛。定水旱今年。吠蛙占好。

千畦繡錯。漸袈裟衣似。麥候餘寒逐烟起。愛桑花菜蕒。竹粉蒲刀。交映著。簇簇秧針刺水。沿流通小步。一徑惜惜。閉戶人家守蠶忌。只豆肥須澆。筍脆煩燒。待朝餉。提來村尾。正布穀。前林一聲聲。看挂笠堆蕘。綠陰圓美。

水車星動。放年年田假。林果黃肥壓枝亞。喜雷教禁住。龍待分來。斜照裏。一陣栽秧鼓打。青青爭插好。井字勻排。短甬衝泥馱驢跨。已麥秋過了。寒減陂塘。纔吟箇、新

蟬葉罇。又柳際披披暗涼多。趁水口風來，白翻穉稻。

汗揮珠顆，覓清陰何地。午倦偷閒枕，耬睡。鷓聲驚夢，夢醒看天，飛鷺去，點破萬峯雲翠。冬青花已落，暑雨連番，漉漉微蒸，稻香起。漸歇涼時節，袒臂斜頭，畫不盡，村村田戲。定隔隴，兒童踏波回，贖水面，噓晴。一牛浮鼻。

黃團紅皺，映茅檐如畫。野老還來豆棚話。聽一聲，字鞭，電脚明邊，人去也，閃得流螢星碎。芒鞋侵曉出，草露濃濃，滑澁偏看下田快。正稻花香動，滿路蟬鳴，已昨日，早稻先賣。但換了，西風有些寒，笑也學鄰家，亂葦晴曬。

浩然風露，望平疇無際。泱泱微通荻苗水。漸草泥深處，黃穗涼垂，扶蟹起，又是輸芒時矣。棗竿歌乍歇，唱賀新涼，釀到巖花暑婪尾。趁敗荷酒熟，指點青旗，且掠取，社錢一醉。怕又過，田家小春時，早裂葉風來，碎鳴窗紙。

黃花無賴，做滿城風雨，盼得新晴踏泥去。尙腰鎌人早，拾穗童稀，只隴畔，鳥雀喧喧無數。誰家臨水次，橘柚參差，霜信寒時，薄雲護。羨稻堆齊屋，豚柵牛宮，都畫向，冷

楓紅處。邀近局。漁翁定能來。好煮豆炊菱。瓦盆圍聚。
糊窗瑾戶。怕寒婆來悄。畫鼓鞞鞞賽神早。記三家村裏。獨木橋邊。催入學。有箇冬烘
頭腦。收租人已去。喜說豐年一例公私得完了。便松肪火活。蘆絮衾溫。憑闌住。柴
門春小。道不用。開爐憶長安。縱熊白能肥。野菘尤好。
賀冬人到。過今年肥節。幾度濃陰未成雪。念時光挑菜。忙到醃齋。風景換。冷挂一繩
斜日。消寒排九九。諺語分占。絕勝燕支畫顏色。但蘆簾土銼。絮帽蒲鞋。渾不管。籬
吹籥築。更盼取。來朝定暄和。任曝背茅檐。白頭捫蝨。
蛆浮臘甕。愛茅茨風味。好句桃符乞題未。道明年餅大。三白先占。傾老瓦。且看天公
玉戲。田家離別少。兒女團圓。賣了癡獸更何事。儘豐年樂意。新歲春聲。先打徹。細
腰鼓裏。還折取。黃梅竈觚供。願司命朝天。乞來利市。

木蘭花慢

登鄉雨樓望雲氣迷濛與水相接荒蘆老柳一片秋陰

甚沈沈黯黯。偏釀就者般秋。但雲有聲時。風無影處。十里沙洲。凝眸似晴更暝。賸斜

陽微閃樹梢頭。併入衰蘆老柳。接天暮色悠悠。高樓徙倚不禁愁。獨自望扁舟。歎荒波蕭瑟。美人不到。落葉空流。歸休。夢隨雁去。只江湖依舊一身浮。怕說黃花時節。天涯短髮還羞。

迷神引 江上聞歌

譜出琵琶絃上語。只怨大江東去。烟波萬頃。流盡相思苦。月初生。潮初定。人何處。一半心兒上。蟲曳杼。一半夢兒中。雁搖艣。似恨還愁。歷歷平生訴。惹葉飄蕭。花淒楚。雨斜風急。直尋到。秋來路。又被秋遮。山程遠。水程阻。來也聽聲聲。公莫舞。去也聽聲聲。公無渡。

品令

寶篆沈瑤瑟。鴨爐暝。氤氳歇。微寒料峭。晚風簾幙。粟肌時節。誰捉迷藏。暗裏笑聲咭咭。夢中愁別。早留下。丁香結。蜜梅花底。枉教寄與。真珠字密。有分圓蟾。須盼仲冬二七。

菩薩蠻

踏青女伴尋春去。留儂偏住春濃處。門外雪纒纒。楊花路一條。相思人不識。滅盡相思跡。一口唾餘花。化爲機上霞。

曲游春

春夜同沈小棠。倪米樓踏月至翠竹菴。虛烟冥浮野水。澗映光景。

清絕

送入蟾陰裏。早清輝浮動。人共春遠。鐘磬無聲。想閒雲同臥。老禪偏嬾。只我疏狂慣。要茶夢。覓來泉畔。客鬢難禁。吹上落花風軟。過眼。誰家池館。賸烟蕩空波。燕歸應嘆。鏡影年年。恁照到繁華。綠蕪能換。塵夢今番斷。好常住。蓬壺清淺。便是寒閃龜燈。不教意倦。

鋸解令

記會相別正花時。又到了。落花滿地。拚教心事付東風。怕柳眼。替人欲淚。連環密誓。難認如蠶。徧紙屏山。咫尺萬重遮。倒不似。昨宵夢裏。

菩薩蠻

欄干十二愁時倚。風風雨雨渾難記。寒食又清明。燕來柳戶晴。
鞦韆枝紅影亞。人立秋千下。蝴蝶並肩飛。花香滿畫衣。

搗練子

冷雨空江留春不得用短調以寄情

雲漉漉。雨涔涔。薄暮欄干有夢尋。啼鳩一聲春去也。落花空羨柳成陰。

西江月慢 夕泊龍潭

風吹暝色分夕照。半沈幽壑。斜影透嵐光。青翠濃邊。悄留帆脚。暮隔溪。惹起餘寒。綠楊一片鷺濤飛落。認白雲送雨歸來。還就故人約。曳酒幟。幾家深樹託。理釣具。幾家茅縛。曲港三叉。隨徑轉。更幾舟蘆泊。愛斷塔。略似枯禪。藤蘿烟裏。亂垂瓔珞。似覩我。篷底一尊延月酌。

虞美人

尋蓮覓藕風波裏。本是同根蒂。因緣只賴一絲牽。但願郎心如藕。妾如蓮。帶頭縮

箇成雙結。莫與閒鷗說。將家來住水雲鄉。爲道買鄰，難得遇鴛鴦。

浣溪紗 攝山道中

藥草吹香上袂衣。鐘聲散雨出山遲。六朝雲氣滿松枝。古磴危巢禽入夢，斜陽荒冢鬼吟詩。行人來拜蔣王祠。

鶯啼序 金陵懷古

垂楊者般掩冉，送繁華早歇。只深巷、斜照重來，舊時飛燕能識。算留得、平蕪一片，傷心畫出興衰跡。便前朝、金粉都消，恁消愁碧。紫蓋黃旗，鬱鬱王氣，數東南半壁。料經過、鼉憤龍爭，往時多少豪傑。歎平沙、骨縈蔓草，尙遺鏃，未湔寒血。甚匆匆、三尺降旛，石頭高揭。如塵似電，紙醉金迷，付砌蛩太息。賸到處、斷垣荒井，雨也風也，歲歲年年，亂苔濃積。黃奴舊夢，玉奴餘怨，江山羞被胭脂澆。撼西風，落葉齊飄瞥。秋墳唱罷，休愁冷了魚燈，壞衣也化蝴蝶。天涯過客，獨立蒼茫，惹鬢毛如雪。可奈是、新亭人去，暗咽涼潮。舊院春歸，已消殘笛。鷗邊鷺外，蕭蕭流水，休更問怕官私。惹得蝦蟆

說。但看影裏山河。丁字簾前。一鉤落月。

長亭怨慢 將還京師賦此爲西湖別

漸搖落。紛紛寒柳。者樣青衫。怎禁秋瘦。撇卻閒鷗。水仙祠畔。屢回首。惱人情味。渾欲似。荷心酒。算幾度斜陽。何苦把、蒼山孤負。知否。只一片歸心。已向別時先逗。停雲懶慣。甚仙枕、夢梁能久。怕重來、雙鬢羞窺。定輸與、春波依舊。仗老鶴多情。還爲梅花廝守。

高陽臺 泊秀州城外夜雨作寒柳聲蕭蕭然殊不成寐

烟處留寒。波邊弄暝。隔湖飛雨俄生。幾樹蕭騷。垂楊忒殺關情。分明笛裏閒波折。到天涯。便作離聲。漸沈沈。低壓篷窗。燈暈難明。旅魂易被相思引。怎空搔兩鬢。夢也無成。已厭宵長。無端爲續涼更。西風不是愁能釀。只心頭。一味秋并。更吟蟲。催動晨帆。還助淒清。

步蟾宮 維揚月夜有懷尤水村陸江吟香紹莘真州

蟾蜍不管繁華事。只涼得樓臺如水。紅橋燈火鬧黃昏。問誰踏松陰滿地。詩名杜牧當時記。定憶到珠簾十二。一分判與小揚州。要照見黃花人醉。

淒涼犯 夜宿高唐旅店清寒特甚孤緒橫生因用樊榭老人韻以寫之既成

尙聞窗外鳴絃拉雜聲彌覺此調之悲也

投林倦鳥前塵隔。巢痕認已全掃。葦簾土銼。蕭蕭四壁。冷侵破帽。相思遠道。搖孤暈。油燈穗小便天涯。音書肯寄。凍雪雁飛少。還問旗亭路。畫壁誰來。酒人都杳。草荒舊里。料齊謳。那時應好。一樣尊前。怕殘妓。楊花唱鬧。惹匆匆。一夜客在夢裏老。

繞佛閣 臘八日游長椿寺

鳥聲喚曉。旋又粥鼓。催動禪院。苔徑徐轉。破寒幾點。黃梅綴金軟。衲衣起款。私笑拓鉢。頻歲會慣。馴鴿簷畔。忍飢也對齋廚側饑眼。屈指梵王地。幾許繁華隨劫換。休悵往時浮圖鈴語怨。展一燈袈裟。雲影全幻。逝波難挽。便欲問興亡。僧意先倦。只殘年夕陽猶戀。

摸魚兒 題柳陰觀釣圖

送蕭蕭鷺鷥風過。輕陰吹面如雨。蓑前笠後商魚計。那得半湖租與。留且住。看熨帖。晶匳影落高高樹。香綸認取。怕玉尺跳時。銀刀上候。暗綠攪千縷。江南憶。最憶漁兒漁女。蘆花頻夢秋渚。畫圖熟識樵青面。何日共尋煙語。攜釣具。便趁箇閒鷗。緩踏涼波去。斜陽漸暮。愛第二橋邊。提來換酒。魚口尙黏絮。

曲游春 題李未庵存厚梅窩圖

說與花休惱。念花時幾度。會夢歸去。雪壓溪橋。早鞋痕沒盡。暗香來路。待慰相思苦。寫足了。白雲千樹。任春風。吹到橫枝。不怕玉鱗飛舞。金汝。修來如許。只憐我京華。蹤跡都誤。縞袂淒涼。歎天涯酒醒。舊遊難數。五月江城住。只銅笛。那時吹處。記得葉底黃肥。一天暝雨。

長相思 王秋勝復招集孫淵如比部 星衍櫻桃傳舍是歌者陳郎舊居感賦

此闕

選石眠紅。洗尊醉碧。當年幽館會來。櫻桃舊夢。幾度光陰。費伊春燕尋猜。步屨徘徊。訝詩人蹤跡。一樣青苔。除卻舞衫裁。後堂聽絲竹還催。只燒燭清歡。試香良會。更誰冶笑能陪。斜陽先一霎。賭旗亭。歇了深杯。葉落花摧。重唱到。人閒可哀。拍闌干。依稀凭袖香回。

唐多令 題友人停車楓林圖

樹色入秋肥。霜風葉葉知。車中人讀畫中詩。疑是老漁來結伴。沿淺渚。照紅衣。遠路白雲迷。何村曳酒旗。花非花處夕陽時。天氣已寒宜薄醉。驅且去。過橋西。

南柯子 題陳默齋惜花圖

春短催三月。花寒瘦一枝。雨絲絲攪鬢絲絲。又是畫簾腸斷。阿灰時。恨遠難成夢。愁深轉欠詩。滿天如雪落胭脂。只向青苔石上。畫相思。

永遇樂 京師以十月一日爲開爐節民間皆作暖爐會從此氈簾火炕花戶

油窗足支風雪之辰小占屏帷之福士大夫退直餘暇結侶消寒關東魚肥

津門蟹大合尊促席排日爲歡刻燭捶琴吟事斯起矣

纔餞西風晚蛩咽處寒已催到。護菊簾垂。釘花窗閉。細引爐熏裊。酒人留住。紅泥乍
圻。待雪者番還早。只斜陽和楓共醉。一分先逗春小。鬢毛易短。朝簪懶插。空自裏
頭吟悄。檢點冬心。舊根無恙。莫悞長安老。鵝絨被暖。木棉裘軟。共說茅簷歸好。恁金
猊。都陷殘灰。夢梁未了。

齊天樂 送屠笏巖州牧紳還尋甸

東風又綠今番柳。一枝拚爲君折。燭醉前宵。雲吟萬里。帶去長安春色。光陰轉瞥。料
細雨蠻天。跳歌聲歇。草長花飛。冶情都仗舊鶯說。奇書續成滿篋。早燈窗讀罷。腸
更縈結。小店聽雞。荒山說虎。定念故人新別。天涯短髮。怕冷絮相尋。一簪催雪。夢入
蒼茫。竹王祠下月。

夢橫塘 題石濤僧蘭竹卷子

嫩描尖葉。老放斜枝。染來濃墨如翠。袖薄籠寒。怕佩采。騷人難倚。零露飄香。回雲送

潤待琴絃未。想禪心畢靜。配筍添苔。前身是瀟湘水。袈裟蛻去何年。歎蕭疏眼底。瘦影如此。舊夢揚州。誰更問。那番歌吹。且幽谷。冰魂喚到。伴向紋窗弄秋碎。蘇縫會題。苦瓜殘款。付虛空彈指。

眼兒媚

風無氣力雨還休。何處說春愁。嬌眠懶起。起來半晌。纔見梳頭。烏衣也是相思伴。尋夢到簾鉤。桃花門外。楊花渡口。夢去悠悠。

醉太平 題畫

楊絲柳絲。桃花間之。萋芽新長荻苗齊。是河豚上時。茅簷竹籬。誰家酒旗。有人醉去欠題詩。補中仙小詞。

河傳

樓外花賣。雨蕭蕭。聽過前邊畫橋。夢醒夢醒愁恁消。迢遙。綠波烟一條。見說歸期梅放後。相望久。開到茶蘼又。萬重山。行路難。衣單。怎禁春後寒。

太平時

一翦秋痕目瞬波。夢纔過。屏風十二冷金鵝。雨迷多。幾日閉簾花落盡。奈春何。愁伊蝴蝶舞僂僂。繡成他。

少年遊

日長天氣倦停鍼。踏遍落花尋。梅豆青纔。櫻桃紅了。替換惜春心。養蠶漸到成蛾候。梯影靜。桑陰。鄰女相逢。一般眉樣。不道入時深。

山亭宴

同王葑亭給諫友亮張船山檢討坐秋花間小酌

夕陽慣畫秋來處。破疏紅。幾花新吐。宛似待吟朋。聽屐響。苔邊暗度。嫩涼今夕到尊前。早不是。尋常風露。相對訴幽情。只可惜。嬋娟暮。酒人近。可晨星數。料天涯。幾回能聚。欲勸碧筒杯。怕溜出。荷心更苦。偏教冷語替人吟。又催動。草蟲機杼。歸夢蝶蘊。定繞芳叢去。

南浦

王薊南司馬禮宦遊江右余不見者十餘載矣今年夏晤於都下述其

仕路險巇令人惆悵無已因譜此調卽題其南浦歸帆圖以遺之

雲飛畫棟翦江風吹過雁聲寒。春水今番生早。新溜放前灘。料理一帆歸去。儘閒鷗。陪我夢同還。只柳枝猶短。不堪攀處。青眼已偷看。檢點故衫尙在。道江州司馬淚休彈。好是風波唱定。燈火報平安。濁酒晚來須買。攏輕舟。已見舊家山。怕夕陽回首。宦途辛苦話都難。

八聲甘州

題張惺齋徵君炯池上草堂圖卽送其還宣城

算鄉關已到雁來時。木葉漸紛紛。正佳兒夜讀。一蠶相答。燈火黃昏。怕是松蒼竹老。烟水待鷗羣。還送跨驢去。落日都門。差喜菊花無恙。要冬心共守。濁酒溫存。況對牀風雨。舊事好重論。問幾時。寄來團扇。訴相思。畫出敬亭雲。定知我倚欄干處。一樣思君。

解連環

白蓮女史方氏揚州羅山人兩峯室也嘗請業於綠淨老人許太夫

人與其妯孫氏淨友小姑秋英暨里中汪楷亭之妻袁夫人作九九消寒會

唱酬成帙管平原曾爲畫寒閨吟席圖今女史下世久矣兩峯以圖屬題因

次卷中王蘭泉侍郎韻酬之

年年歌吹歎前番綺閣誰尋吟味縱二分明月能來奈蘭炷銷殘已灰心字想像雲
衣尙竹外袖羅飄翠只玉梅花下三九交時空暈寒思飛翼悄疑墮地記才高詠
絮瑤管曾試甚夢痕一枕天涯惱雙鬢星星爲伊憔悴落葉荒山怕樂府秋墳催起
惹情絲是蓮是藕暗牽宿淚

洞仙歌 題醉麻姑

鈞天宴罷聽瑤笙吹送暈出明霞醉痕重想肩凭鳥爪似倦還醒曹騰裏一簇銀河
燈擁桑田看屢換笑指蓬萊仙林須催喚龍種身世託壺天多少丹砂纔點就糟
邱眞永莫待取桃花幾時開怕爛卻羅裙蝶飛如夢

夢橫塘 同劉芙初嗣綰嚴少峯榮家香竺瑛倪米樓游蓮花泡尋蝦菜亭不

得

芰葉飄雲藕絲曳。水風吹動涼信。賸與鷗邊。颭萬柄。枯香猶凝。無限淒迷。小亭何處。夕陽紅隱。記沙墟幾里。隔度喧生。船來否。烟中間。頻教撥觸鄉心。道尊鱸一箸。舊夢堪省。晚飯呼燈。愁負了。柁樓風景。料滋味。江湖不遠。說與漁朋約能準。草屨撈時。瓦瓶澆處。時圓茅支穩。

解語花

查小山有圻屬題其姬人玉窗清影

移春檻近。索笑簷低。偎著梅花影。綵毫香凝。休猜是。妝閣畫眉纔竟。吟心暗領。只點屐聲聲誰聽。憑曳來。山字肩斜。鏡裏郎偷並。回首明蟾四映。定前身修到。幽魄堪證。夜深人靜。分明憶。前度煮茶風景。東風太冷。盪一樹。玉烟無定。思酒闌。半臂須添。還剔燈潛等。

高山流水

米樓有高山流水圖屬余題者二年偶遺塵篋中久未得報今秋

值其奉諱將歸慰問之餘離情愴惻因書此調還之山水之音不足以喻其哀也

一天慘碧共煙生。付湘絃、彈出淒清。孤雁帶霜回，平沙又落寒聲。相思處，只隔雲橫。依稀有多少山長水短，夢不分明。算知音、賸我獨坐望江城。冥冥。真州舊遊在，慚負了、幾個鷗盟。愁與訴、蕭騷怕愁指外離情。甚天涯、淚雨重零。扁舟去，料得鶻啼鶴唳，已是難聽。況爬沙古怨，風雪迫歸程。

下水船 秋後寫望

收拾西風去。留了不多紅樹。畫裏蒼茫，遙認夕陽歸路。雁來處，只帶微雲一片。又化天涯飛雨。蛩無語，冷落青苔暮。還借幽人小步。一桁沾帘，倚來禿柳如舞。出蓑聚。爭索壚頭醉好。老瓦澌澌涼注。

臨江仙 雨中退直歸澄懷園錢黼堂前輩招同陳伯恭崇本秦易堂承業錢

湘舲榮 陳梅垞萬全飲於蓮葉西齋酒後棖觸歸心因填此調

細雨忽沾灑。柳陰暗處。如裊爐烟。漸鼈禁、清鐘報午聲圓。聯翩看招鷓鷯。十花外、共曳詩肩。旁觀羨道十州會罷。歸去羣仙。流連名園似畫。遙接官樹芋絲。有蓬池老

手斫鱸尤鮮。燈前話烟波約。今宵夢已到鷗邊。聽簷角似送來篷滴。身在吳船。

高陽臺 題蕭照中興瑞應圖

泥馬祠空。金牛湖冷。照城光竟如何。潤色丹青。殘山已是無多。斜陽縱有閒人粉。料難寫。汙水荒波。算贏來。一著枯棋。字裏黃羅。思量欲墮龍沙淚。忍雙環撇卻。半臂拋過。夢裏冰天。恁教隔了黃河。荷花桂子都無恙。怕高臺。擊竹哀歌。賸神靈。枉護冬青。愁滿烟蘿。

紅娘子

蛩語萋萋碎。葉響騷騷墜。又滴青苔。雨聲不斷。怎生得睡。算黃昏直到五更頭。只愁人滋味。月也愁難替。水也愁難洗。半付秋邊。半兒心上。似醒還醉。待黃花紅樹一齊休。問當歸寄否。

菩薩蠻 題陳雲伯文述碧城仙夢圖

紅牆隔住銀河悄。十二銅龍喚秋曉。軟盪一窩雲。玉笙雲裏聞。情波吹不起。海色

寒青膩。仙語出桃花。酒旗星正斜。

浪淘沙慢

請養得歸買舟欲下。新知舊雨。排日邀留。幾匝月始得成行。周草

窗詞。云南陌脂車待發。東門帳飲正闌。其情景正復相似。因即用其調以寫

余懷兼酬諸君子見贈之什

潞河畔。春波暖動。理榜催發。增我離憂百結。難禁故侶惜別。判酒瓊。循環朝又夕。看
衫色。流處全碧。只滋味。心頭淚攪著。酸甜總難說。淒絕。柳枝道且休折。讓好句明
朝歸裝壓。字字飛白雪。嗟濫花朝簪。敢慕泉石。和君鐵拍。定樹頭。驚起慈烏聲咽。
天末從今相思積。思今日。落花送客。縱春到。來年歡更劇。奈此去。酒冷燈昏。夢醒也。
愁心猶繞觚棱月。

浣溪沙

東光酬潘厚甫大令仁

水活纔看良荻蘆。亭空獨鳥下相呼。誰箋禹貢問胡蘇。罷斂丁錢閒小吏。漸催亥
市起荒墟。知君新試活民書。

齊天樂 游岱宿碧霞宮下

丹梯直上凌閭闔。冥冥欲通天語。白細如縈。青長不了。鐵索一條來路。奇松對舞。早透頂寒濤。暗生雲雨。穩著芒鞋。採芝常願伴樵侶。仙靈今夕會好。聽瑤環翠珥。飛響何處。壑引虬吟。林招鶴夢。拓出瓊壺如許。秦碑漢樹。要明月呼來。共論今古。海色晴邊。一聲雞報曙。

百字謠

題林孃天素雪自書行李單今在黃小松司馬處

柳枝折未。早纖毫落處。都舍行色。約略香奩風味在。蝴蝶一肩隨得。賭酒生涯。愛茶情緒。同付烟波宅。臨歧重點。上船纔試紅屐。多半懽盡鉛華。幾行疏瘦。爭得詩人格。那少紀程新句好。讀向西湖寒碧。不了雲留。相思苔老。空指遺箋說。小團瓢裏。一鐺來煮吟雪。

氏州第一

六月二十八日潘洽泉溥汪古愚廷璧招集徐氏桐花舫歡飲極

適幽思戩生古愚據石彈琴爲奏昭君怨之曲其聲悽惻動人余製此詞亦

以塞外之音寫之用酬其旨

杯面邀涼。桐陰暗轉。虛堂已換秋早。撥觸冰絲。平沙萬里。一雁呼雲先到。催入邊心。料不是、琵琶殘調。恁奈烟霜。蛾眉未染。鬢絲都老。不惜紫臺人去杳。怕絃外、訴愁難了。颯颯沙黃。蕭蕭草白。漸冷搖燈小。便嬋娟、能畫出、憑誰破。燕支一笑。古恨蒼茫。付今宵。蕪城夢悄。

木蘭花慢 韓旭亭是升家居吳門所葺小林屋即其會大父貞文先生浴隱

園也先生與鄭君敷教金君俊明皆爲勝國遺老鼎革後互礪名節朝夕於斯後旭亭之兄鍵屬吳興沈宗騫爲畫治隱園三友圖今又三十餘年矣旭亭來徵余題譜此應之貞文先生諱馨字幼明少有聲南雍黨事起幾罹於禍五人墓碑其所書也貞文蓋私諡云

借蒼烟片席。寫水木。倍清華。看竹互松交。迷迷古雪。吹出疏花。仙家石枰劫後。醉青山。留浸一壺霞。只合冬心共話。柴門莫許輕搗。堪嗟。局外滿風沙。舊夢老蒹葭。賸

斷碣殘陽。傷心碧處。幾字欹斜。天涯畫圖展看。認苔岑。無數白雲遮。合眼鬢眉宛在。飄蕭細雨窗紗。

摸魚兒 題郭頻伽盟鷗圖

者清溪。一條流水。今番須作盟證。十年孤負閒鷗約。待放歸來漁艇。秋滿徑。要軟裏。蓑衣。坐占苔磯穩。垂楊破暝。看浴雪沙渦。尋烟舵尾。撲簌下涼影。平生數。幾度漂萍斷梗。一般蹤跡曾並。催人旅鬢如伊白。憔悴怕窺清鏡。回首聽。聽斟酌橋邊。唱到風波定。江湖夢醒。傍楓葉蘆花。心心照見。月上一丸冷。

月華清 爲祝仁泉崧三題林竹翳如圖卽送其入都

千箇栽餘。二分配取。幾時茅屋新構。翠鎖陰陰。但響根邊紅溜。數知音。流水曾調。休袖了。倚寒吟手。回首。放花光一面。肯教春瘦。此去長安路遠。念抖擻征衣。雪深時候。雁字關山。報汝平安知否。料故園。暗筍應抽。漸迸損。一方苔厚。孤負。到薈騰醉日。久同尊酒。

摸魚兒 題陸蒔梅瑋漁莊九曲圖

認灣灣綠楊圍繞。結茅都在深處。收來破網斜陽裏。人影小于飛鷺。呼野渡。但轉過橫橋。便是回塘路。沿陂細數。正油菜臺黃。荷花草紫。曲折響柔艣。平生憶。最是薛蘿儔侶。前街角里曾住。沈虹浦。住角里街。余往來嘉興。皆主其家。春波已換當時碧。讓汝去尋烟語。還喚取。喚漁弟。漁兄。煮酒沙頭聚。望衡對宇。儘菱角歌來。竹枝唱到。一樣譜琴趣。

掃花遊 題趙丈寶岑琛白雲春草圖

二分明月照揚州。前度有人吟醉。晚風易起。盪天涯。夢影去來如水。草冷雲寒。難寫故園情味。待絃裏。併廿四離騷。彈作清淚。燕市會記未。早笛咽黃墟。舊苔荒矣。令兄春帆先生與余同居長安數晨夕者數載。今歸道山久矣。畫圖點綴。更迷離一片。最傷游子。歸老湖山。賸與春愁滿地。鬪眉嫵。只天邊。亂峯斜倚。

壺中天 送劉澄齋還京

秋風帆健。破蒼茫。暗被吳潮催發。蟲語滿階。林葉碎。可惜一尊涼別。照我偏愁。隨君欲去。只有西湖月。亂山如夢。瘦來還認詩骨。遙念舊侶京華。煙波興在。相待燈前說。莫悔斜陽吟未遍。負了青苔雙屐。鶴外呼雲。鷗邊臥雨。消盡人閒熱。離情能繫。短亭殘柳。休折。

齊天樂 壽蔣東樗八十

綠楊城郭。詞仙住。西風洗顏如鍊。杖瘦拖雲。鞋寬曳雨。只有老鷗頻見。今年更健。早吟過黃花。一籬秋晚。白髮尊前。舊情猶自酒痕戀。當時同唱樂府。歎天涯蹤跡。空掩團扇。村塾圖成。湘江夢在。羨殺先生閒慣。豪吟未倦。要私祝長生。脆調絃管。催起蟾蜍。翠螺還共勸。

雪獅兒 題胡柳浦瑤悼亡詞卷 柳浦妻孫氏善讀楚詞有凝碧軒詩二卷

蛩蛩氈冷。幢幢燈暗。鰥鰥目倦。一枕西風。難得更壽移短。孤吟未斷。早淚織。鮫珠成串。涼花暝。半蟾窺處。影沈羅扇。惆悵彩雲易散。便珊瑚來也。夢情都幻。木葉天寒。

只戀楚騷前怨。愁凝草滿。怕秋碧、樹根先換。抽玉管。空憶鏡鸞相伴。

百字令 阮芸臺學使元重葦竹坨圖屬題卽用卷中原韻

二分竹外記江湖。載酒歸來會泊。老盡篔簹人。不見讓與閒鷗棲託。菱葉波生。藕絲鄉換。重寫林泉樂。惜惜琴趣。翠聲天半吹落。誰復黃雀風中。鬪雞缸滿。相對斜陽酌。秋水藉架橋口路。遮護幾層雲幙。危石能扶。荒亭更葺。高致傳巖壑。明年筍候。一失還迸紅角。

國香慢 題李秋錦徵士藝蘭圖 圖後裝梁相國清標送行一詩今在其後人

遇孫處

詠罷循陔。歎美人老去。香草空栽。還尋漾葭灣口。重認荒苔。辛苦鉏烟舊約。更誰紉。湘佩歸來。東風肯將護。長就靈芽。春返雲階。灌園圖並賞。恁比鄰朱十。句欠親裁。王孫憔悴。應料同怨天涯。補入離筵一曲。賺江南。好夢催回。招魂望天末。試鼓瑤琴。明月徘徊。

看花回 春草園乃趙谷林先生小築今其曾孫侍庵乞詩

會熟識沙鷗眠處都圍春水。恰稱亭臺位置。襯明滅烟痕。低吹寒起。東風人去。舊日
闌干誰共倚。留夢後。一縷詩情。畫來都在夕陽裏。沿流去。平橋雁齒。掠眼過。羣峯
螺髻。閒鎖虛簾靜綠。漸落遍梨花。清明天氣。疑無似有。蝴蝶南園能認未。待重尋。謝
池幽韻。好續洛陽新記。

壺中天 讀張淥卿詡紅杏詞愛其情味綿邈可以繼聲竹翁棖觸舊懷恫恍
如夢老冉冉至矣停燈聽雨有述於言

一燈搖暈聽簷聲。惹起尊邊懷抱。同是無絃琴裏趣。舊夢幾時尋到。柳折疏黃。鷗飄
瘦白。愁向荒波照。阻風中酒。鬢絲都爲吟老。還共細數詞人。尙書紅杏。贏得聲名
早。半臂閒拋。寒自忍。怕被樓頭花惱。綺語分明。柔腸宛轉。綰住情多少。玉壺茅屋。滿
枝重賺春鬧。

萬里春

有正味齋詞

七十一

些兒綠意。作傷春天氣。怎東風、落盡花花。只楊花是淚。淚縱無人替。已愁到、那人
心裏。怕明朝、冷雨攙來。把紗窗牢閉。

醉太平

桃花水生。梨花酒清。那能深似離情。驀兜來五更。長亭短亭。烟汀雨汀。楊枝纔過
清明。忍攀伊送行。

春雲怨

揚州張友棠孝廉。木有女曰得珠。幼通經書。性閒靜。許字同里汪生。溥
歸有日矣。以中暑卒。嘉慶戊午七夕前四日也。孝廉有詩哭之甚哀。余今
年一甥女一姪女。皆以痘殤。柔情根觸。老淚縱橫。因述此詞以慰孝廉并志

余痛

風吹月墜。攪一庭香影。和花都碎。可奈問天無語。晚雨濺衣。先化淚。條脫猶留。迷藏
難捉。咫尺盈盈秋水。空費工夫。女兒箱好。幾日織涼翠。人生最是多情累。歎綵
雲倏忽。琉璃輕脆。愁殺西風畫欄倚。白奈催簪也。怕天孫。不禁憔悴。讀罷聞蛩。酒闌

燈地怎到故園夢裏。

荔枝香近

朱敬亭。絳新納閩姬。字之曰荔。薌乞余以詞贈之。

暮看紅塵飛也。來一騎。問拚幾斛明珠。賭得羅囊紫。憑教十八呼伊。恰稱嬌年紀。還羨小結丁香最宜子。芳譜讀。真帖仿。新圖起。夢到楓亭。應識故鄉滋味。么鳳偷窺。一樣嬌香絳襦褪。恁及女兒膚細。

淒涼犯

顏心齋。崇禎來揚州。出示鄒滿字山水花木卷。卷後題跋如簡齋魚

門。蒞谷瘦銅。皆先後謝世。追懷舊雨。愴然賦之。

二分瘦月。垂楊外。窺人已換華髮。舊游冷落。畫圖空在。看成愁碧。挑燈淚咽。怕重與。青山對說。甚鄰家。偏要夢醒。笛裏幾波折。惆悵金陵路。小舫疏簾。好春時節。梅花過了。又桃花。亂飄紅雪。要換生綃。寫烟草。蕪城暮色。待君來。痛飲十日莫話別。

菩薩蠻

軟風吹過梨花雪。明朝又是清明節。簷口柳冥冥。望郎難眼醒。正思迎接汝。苦被

風潮阻。端的是憐儂。翻教錯惱公。

紅牆攔得銀河住。紅絲牽得良緣聚。離合信天公。單情獨苦儂。爐香飄乍起。半晌成唐字。門外九疑山。教人真箇難。

黃鸝三請人猶夢。東風不晃流蘇動。難得倚闌干。那知花落寒。怕見紅芳歇。窗外憑人折。折去驀思量。蝶飛隨過牆。

東風第一枝 儲香巖桂榮題程姬壽生梅花小影

就影尋煙。投香討雪。敲空飛響吟句。舊遊閒了歌船。寫入孤山暮雨。疏花幾點。怕也是前生嬌女。問甚時。修到冰姿未減。晚妝情緒。人靜也。月華徐吐。風起也。玉鱗低舞。尙疑翠羽來時。夢裏贈伊軟語。天涯相憶。莫便化。行雲歸去。倩夕陽。畫向春波一笑鏡中應許。

齊天樂 華秋槎漢罷官司馬留滯杭州僦屋於西湖僧舍所謂寶雲別墅者

在葛嶺之下名流方外時時過從石門方蘭坻爲寫北山旅寄圖余題此闋

一株鴨脚橫遮處。門外恰臨烟水。宿雨辭林。鮮雲被石。濃裏半房秋翠。倪黃畫意。問寫到湖山。寓公能幾。且破羈愁。夕陽來共冷紅醉。人生都似萍寄。無田歸未得。偏羨廉吏。竹外絃詩。花間命侶。占了白鷗身世。謳思未已。賸心上甘棠。待回餘味。那許丹青置君巖壑裏。

氏州第一 題施柳泉彭齡讀書秋樹根小照

高樹銜晴。斜照又晚。餘暉閃閃堪惜。就石搜涼。剜苔借翠。孤擁縹緗盈尺。吹過清聲。剩幾葉。風中翻碧。細碎蟲魚。縋絲絡網。麝煤蹤跡。笑我妃豨辛苦熟。也磨瘦。年年吟骨。下學光陰。西風幾度。早一簪縈雪。賸丹黃。殘帙在。問奇字。流螢恁識。讓與吟蛩。伴幽人。微聞歎息。

徵招 江翼亭殿榮家休寧之雙橋上江湖遊倦有故鄉之思因自號兩水雙橋一釣翁屬石門方蘭坻作圖傳之徵余賦此

烟蘿暗鎖雙橋路。蕭蕭冷風飛響。題遍故山秋。有沙鷗惆悵。晚風吹月上。恁孤負。柴

門開向一夢扁舟。酒餅間臥。破堆漁網。嚴瀨憶前游。松篁裏。多是畫眉來往。蹤跡
老天涯。賸斜陽無恙。溪流應更長。待搖曳。詩人歸榜。倩圖裏。染出紅衣。認戴家新樣。

摸魚兒 沈文詠樓晚晴曳杖圖

驀斜陽。閃來峯頂。滿衣全染空翠。枯筇偏戀疏林晚。曳向無聲詩裏。行未已。看緩度
溪陰。落葉和涼墜。盟山款水。正野鷺翹時。村牛浴處。瘦影一枝倚。蓬瀛夢。莫惜青
鸞鍛尾。穉龍還逐雲起。阿翁自足東籬興。慣被黃花留醉。歸仔細。道三尺輕攜。便可
奚童比。柴門近未。漸新月鋪黃。鏗然響夏。獨自下烟際。

金縷曲 題趙衡士悼儷篇

密語拋紅豆。起幽窗。盈盈笑語。小時攜手。可奈占星逢張角。好事幾番拖逗。早斷峽、
行雲歸後。夢到圓成還又阻。守東風。耐得桃花瘦。膠堪續。慶佳耦。山盟海誓期長
久。伴年年。荔支香裏。畫簾清晝。不料琴堂聲纔奏。已近折絃時候。道魚目。鰥鰥依舊。
辛苦牽蘿會補屋。賸竹邊。似倚天寒袖。營齋奠。可知否。

桂枝香 吳郡琴山在鄧尉之西下視太湖如赴履鳥山中桂花特盛足與鄧

尉之梅相匹吾友范放谷來芝游而樂之閱十餘載時往來心目間因繪琴

山叢桂圖以寄遐想卷中朱君業以此調填詞余同其韻

涼琴晝寂。賸青山一角。飛響黃雪。占斷秋芳。只有此花幽潔。湖光捲入銀鸞影。儼登臨。廣寒宮闕。滿天風露。單衫耐冷。那回孤立。試證取。前身明月。曾約我吳剛。舊時游客。自笑青鞋孤負。天香時節。西風換了淮南夢。待重盟。故山蘿石。別來無恙。斜陽好在。畫圖金碧。

夢橫塘 孫澄齋承祖家居菱湖地有奎章閣其叔祖南齡公所建周環烟水

兀峙中流菱唱漁謳清響互發今奎章晚眺爲菱湖十景之一澄齋鞦韆

上有故鄉之思繪圖屬題爲賦此解

四圍臨水。一角峨眉。舊時高閣誰到。瘦盡菱花。賸萬葉涼浮烟悄。橋外移帆。樹頭張網。漫延秋眺。儘羅裙褶褶。畫滿鴛鴦。人何處。斜陽老。得歸便合歸休。況白鷗舊約。

渡口催早。莫負漁餐。料比似、官廚應好。只愁我、揚州夢誤。怎把西湖也拋了。下若新
筍。渡江船去。願芳尊同倒。

瑞雲濃

題寄塵上人一船書畫去江南小照送其赴浙

訪秋約在晴湖幽鷺相喚。蕭柳斜陽畫圖展。歸心暗逗。但說到、打包偏慣。淄淄渡江
雲共孤帆斜轉。料理詩囊定早有。烟霞貯滿。舊社西冷縱今換。疏狂容汝道鶴去
揚州尤健。米汁能參酒旗風軟。

剔銀燈

金長孺先生之官學博時其妹士珊隨父任滇南畫野畦圖送之卷

中花果多不能名蓋滇中物也其妹後歸王氏今曾孫綬索題

龍女種花歸矣。雲南點蒼山寺內有龍女花云龍女手種小筆香奩能替桃竹分紅。
木蓮襯碧。尚有蠻烟吹起。滇書注未。怕難識。蘇菽名字。惆悵行分雁翅。寫向柳絲
風裏。雲水千重。湖山一角。愁仿楊家妹子。殷勤答汝。定遙盼。大雷書寄。

水調歌頭

趙穆亭水部承杰名其榭曰邀月屬畫者陳生爲圖余紀以詞

持此一杯酒。今夕祝蟾蜍。孤心莫挂雲際。千里盪模糊。多少松蹊鶴逕。只待銀輪推上。和夢浸瓊壺。如到廣寒府。花影醉來扶。轉晶屏。移翠幌。上銅鋪。玫瑰先破紅笑。誤當玉盤呼。乞得團圓佳約。且要金尊美滿。萬古共歡娛。何日江湖去。相對在菰蒲。

醉花陰

收了紙鳶風色定。只有愁難醒。昨日又清明。軟曳新煙。畫透春波冷。去去柳絲爭
糝徑。天氣晴還暝。最豔是斜陽。一抹胭脂。紅到桃花影。

應天長

茜香髻子梳纔就。偷覓閒情階下走。輕釵溜。單衫皺。人在落花風裏瘦。樓心曾拜
否。眉月一棱斜逗。畫向鵝兒新柳。春愁濃似酒。

少年游

江南三月聽鶯天。買酒莫論錢。晚筍餘花。綠陰青子。春老夕陽前。欲尋舊夢前溪
去。過了柳三眠。桑徑人稀。吳蠶纔動。寒倚一梯烟。

賀聖朝 過廢園有感

晚烟綠染冥冥雨。向梨花吹去。東欄人立。一般如雪。往時情緒。尋巢燕到今無主。只呢喃孤語。拚教春去。最愁閒了。游紅窗戶。

尋芳草 春盡日

拚了一番醉。又拚了、一番離淚。送春歸、問春歸何地。花無語、燕還睡。覺道甚心情。只愁來、有些愁味。戀東風、悄向闌干倚。芳草外、拍天水。

於中好 晚過崇效寺

苔幢不蝕前朝字。尙能識、棗花遺寺。老蟬也解真空義。卸紅蛻、袈裟地。問師提去。西歸履。可重放、松枝東指。謂寧一上人一聲清磬涼如水。寫經榻、留雲睡。

壺中天 重過澄懷園訪陳梅垞同年

煙蒼水白。倚風前脈脈。荷花無語。暮過小橋尋夢遠。吹響半空涼雨。魚戲東西。鷺飛上下。同在香中住。鬢毛如雪。一襟誰浣塵土。猶記退直歸來。碧筩溜酒。共話田園。

趣。唱到風波何日定。早有青山延佇。二品官高。三霄露重。難下尊鱸箸。冷楓門巷讓
吾茅屋先據。

又 胡夢湘比部 稷送其弟 穉之官浙中繪雨窗話雨圖屬題

者般疏滴。悔不把。簾外芭蕉移去。攪得黃昏愁未了。添上翦燈情緒。暫緩鞭絲。徐停
笛唱。酒味荷心貯。簷花細落。冷蛩同訴。淒楚。感我飄泊天涯。故園不見。吟盡相思
句。怕有涼空新雁到。更逗離心南浦。聽水攤衾。呼風挂席。漫擬江郎賦。篷聲彷彿。此
情明夜尤苦。

菩薩蠻 題手山雪意卷子兼寓騎省之感

飛瓊乍醒游仙夢。珮環不響風微送。吹緊一窩雲。梨花蕩軟魂。牆陰如有月。翠羽
無消息。獨自立青苔。縞衣來不來。

洞仙歌 手山又有園林春盡圖劉芙初詞云留春不住看春盡東風短了春

人命蓋亦寫悼亡意也

鶯啼夢破。積寒煙如水。慘綠無端把春替。賸朱旛三尺。難禁東風紅雨外。換了招魂題字。銷寒逢九九。記染燕支。要乞靈緣畫圖裏。甚園林轉眼。碧暗香沈。竟拋得落花苔。最苦是。天涯跨驢人。早飛絮前汀。併成清淚。

摸魚子 再爲手山題萍跡圖

問東風。別來無恙。偏憐人在羈旅。閒鷗共說江湖夢。多少旗亭堪數。重喚渡。剩一片空濛。昨日楊花路。前身證取。正雨壓浮蹤。煙攢浪跡。欲散又還聚。天涯遠。不管那邊離緒。星星一陣吹去。春江也到愁時候。盪得綠波如許。歸屢阻。更半約晶奩。劃住斜陽暮。飄零誤汝。只片段吳綃。紅淒綠慘。畫出斷腸句。

百字令 沈眉峯同年 自臺灣歸以秋林宴坐圖屬題海上回船風波乍脫於此中得大自在矣

一聲彈指。早波瀾畢靜。秋清如許。瀟灑不爭高蓋在。儘有遮頭涼樹。峯落奇青。雲收殘白。吹過修羅雨。破帆無恙。夕陽能住須住。回念海嶠蒼茫。青紅洄洑。橫截飛濤。

去。鼉吼鯨呿爭變幻。難得靜消鞀鼓。失馬非憂。聞雞莫舞。且博林泉趣。閒燒紅葉。一尊仍約鷗侶。

一萼紅 吳興愛山講院以愛山臺得名臺在其後南宋時建蓋取東坡道場山詩尙愛此山看不足之句也暇日登臨雲物斐然與山遠近俯仰今古徘徊久之因用樊榭老人韻以寫其勝

趁筇輕。向亂山影裏來。領古今情。折竹留寒。危苔助滑。幾載惟有雲行。送不盡、斜陽歸鳥。就林缺、高塔指飛英。直接蒼茫。煙無尋處。眼底先青。莫悵寒氈依舊。只梅花一味。別有春生。半臂歸來。大瓢負出夢醒。休說功名。但贏得、酒傾下箸。變鷗波、常願繞菰城。回首髯仙到也。月上空亭。

湘春夜月 題周竹橋炎聽泉圖

響泠泠。宛然琴韻飛來。那料入抱枯桐。猶未古囊開。劈破一條巫峽。只虛空流水噴雪成堆。怕出山易濁。寒雲擁住。澗口先回。鸞飛鳳嘯。天風浩蕩。明月徘徊。聲在無

絃甚聽到綠陰眠處。絃語偏哀。知音去後。料海濤已息喧豗。但石上借清涼一霎。松花如雨。閒理茶杯。

石湖仙 不見家竹橋十餘年矣癸亥七月得遇於松江講舍流連話舊悽惋特深因出閉戶著書圖屬題會余病歸未踐前諾聞竹橋亦以是日得疾不久化去余纏綿牀褥五月有餘其不同爲天邊之鶴者幾希矣病起愴然卽用白石老仙自度曲并次其韻以題於後

蒹葭前浦。認煙水微茫。寒樹遮處。閒煞玉堂仙。滯青山、歸雲懶去。重門虛掩。早隔斷、世間歌舞。誰與。只破氈坐擁千古。東華罷騎瘦馬。贖詞囊、飄零俊句。一面前緣。易換江城秋雨。極目天空。斷霞如縷。玉房金柱。聞笑語。琅嬛舊是仙府。

憶舊游

辛酉除夕戴竹友

延介與鈕非石樹玉陶鳧香梁游虎邱山非石賦

詩竹友鳧香各譜舊遊詞一閱歸而屬其友汪澣雲梅鼎繪圖紀勝今五年矣乙丑春余過吳門竹友飲余於護經書屋出此乞題卽用原韻答之

甚攜來冷伴提著。枯筇。有此幽探。依舊吳宮地。歎繁華如夢。又過今年。定記幾家門巷。綵勝各爭妍。只剩下空山。市喧不到。落日鐘邊。留連。樂無事。任諮禪。坐石說虎。麝泉。薜蘿紛在眼。算新逋難了。最是詩箋。且爇一盆松火。吟罷就雲眠。待改歲梅開。重邀鄧尉同進船。

清平樂

爲米樓題重摹雲郎小影

一窩雲軟。偎得梅花暖。百首珠霏纔許換。不管老髯吟倦。單衫窄窄新裁。宛然出浴圖開。尺八閒拋石上。相思黏住青苔。

摸魚子

題錢十蘭同年帖歸漁圖

道蒨鱸。西風一箸。故鄉滋味堪戀。輕便要換。薑苗履踏。遍夕陽沙軟。沿岸轉。只釣竹蕭蕭。擔向肩頭慣。前溪去遠。趁蘆著花肥。楓吹葉瘦。尋箇白鷗伴。功名事。渾與浮雲等幻。栽花心手都倦。拖烟曳雨。尋歸計。局外管誰長短。休笑懶。料有甚鮎魚。肯受長竿買。柴門閉晚。任獨木船橫。空心網挂。爛月曬來滿。

三影亭寫生譜

春從天上來 初陽臺觀日出

臺古山空。鷦唱起天雞。烟散濛濛。光生遠岫。影入長松。扶桑萬里霞紅。早一輪端正。和海色。飛出天東。隔前林。聽鴉聲。纔動樵語旋通。蒼茫俯看塵世。正夢繞行雲。曉睡都濃。露洗涼衣。風欲欹帽。何人畫我支筇。儘染成秋意。休更數。冷淡江楓。盪心胸。現羣峯璀璨。金碧芙蓉。

西湖月 晚雨初歇涼月在空彎彎淺眉已含秋意

滿天翠雨飛殘。又洗出烟邊。一痕月細。畫蛾風韻。香奩小筆。慣搜涼意。蟾關秋尙早。恁寫得秋心和影碎。更暗浸。幾葉梧桐。化作一庭空水。旋催紫豆花開。聽多少蟲機。曳餘蕭緯。笛聲遙答。伊涼換譜。素娥知未。團圓應有準。待問訊。天香風露裏。惹嬌女。未是愁時。拜來簾底。

壺中天 秋夕同人集寒香館待月

銀雲捲盡。早寒空似洗。涼魄初逗。花底爲憎秋太豔。斜挂一痕清瘦。涼葉低翻。絲蟲暗墮。素影徘徊久。天涯人意。數愁先到歌酒。會照千古繁華。亂蛩衰草。只二分依舊。我亦闌干尋昨夢。難問凭時羅袖。靜響留鐘。閒情眷笛。露冷黃昏後。催教圓滿。隔宵吟醉還又。

永遇樂 壬戌中秋平遠山房待月

判斷秋心撥開雨脚。涼動澄宇。借酒先邀。停琴更佇。目極銀河路。水聲雲學。林聲風送。聽換羽衣新譜。只清光。迷離不定。一珠嬾向烟吐。闌干起拍。素娥前約。料也不應虛度。乍閃廊腰。徐流屋角。爭得銀鸞舞。樓臺照遍。有人愁倚。怕已桂花期誤。忍重催鏡掩中宵。者情更苦。是夜月食

水龍吟 來熏堂觀雨

晚雲忽涌芙蓉。滂然失卻前溪翠。平波萬頃。白烟橫捲。亂跳珠碎。小扇初停。單紗漸薄。江南秋意。惹水芝無數。紅搖碧顛。纔半囊香都褪。徐聽嬌雷碾過。帶涼痕。碧天

如洗。遮留俊侶。闌干拍遍。菱歌初起。磬墮風前。絃生竹外。一蟬催霽。早消殘。簷滴明蟾。漾影在湖烟裏。

梅子黃時雨 梅雨約倪丈嘉樹一擊同賦

雲葉黏空。放林角半晴。旋又催雨。賸麥後殘寒。玉篝凝聚。猶有賀家滋味在。餘酸送過江南路。重屏暮。別夢醒時。聽鬧蛙鼓。閒覷綠濛濛處。已金丸撲透。輕墮無數。問浣壁新痕。墨花誰譜。獨立蒼苔。人不見。隔簾吹潤銀箏柱。陶瓶貯。試尋煮茶風趣。

徵招 積雨連旬青苔及楊有老杜舊雨不來之感

濛濛溼氣和烟漬。山薑病花尤苦。空際捲涼濤。向檐牙掀舞。屐聲深巷。佇歎前約。翦燈頻誤。一夢西園。暗苔空綠。燕歸無主。淒絕又黃昏。吳娘遠。蕭蕭舊歌誰譜。鬢雪種先成。恁秋無尋處。草蟲渾不語。怕迷了。江南來路。畫圖裏。破傘遮頭。認蒼山行旅。

高陽臺 秋雨

荷網黏珠。苔鬢溼玉。絲絲灑破秋陰。飛上疏花。漸教清淚盈襟。西風不是催愁客。是

愁人聽到愁深。又聲聲、聽打芭蕉。攪碎鄉心。淒涼誰共挑燈語。歎門堆落葉。牀擁孤衾。人遠天涯。滿城響答寒砧。今宵莫恨妨歸夢。掩江關、夢已沈沈。只催租、怕近重陽。損了幽吟。

無悶 雪意

寒壓雲低。遮絮護花。爭得東風早晚。任凍雀梅邊。幾番偷眼。盡日陰晴不定。逗一線。樓頭斜陽短。寫成畫本。模糊粉墨。試看天半。深院。小門掩。聽笛唱聲聲。玉龍曾喚。好料理尋詩。預商驢券。莫遣圓珠化淚。便惹起、梨花春來怨。待夢裏、蝴蝶尋歸。定識灞橋人面。

鎖窗寒 秋烟

變不成雲。吹能作雨。悄和涼聚。丹黃未染。預畫數峯疏處。暮西風、前溪送來。似攔水口。渾無路。只雁聲遙遞。江湖一白。暗聞柔艣。延佇。誰尋語。又潦盡潭清。荻邊凝沍。斜陽淡了。望到歸帆還誤。莫飄空、都化水飛。漸連橘柚寒又暮。道沙汀、移過多時。蟹

火星星露。

望湘人 春陰

慣留寒弄暝。非雨非晴。誤拋多少春色。半帶閒愁。半迷歸夢。黯黯蘼蕪空碧。閣處雲濃。禁餘烟重。欲移無力。最晚來、如雪東欄。一樹梨花明白。孤負鴛鴦巷陌。已清明時過。嬾攬游屐。只潤逼熏爐。約略故香留得。天涯燕子。問伊來也。可有斜陽信息。聽傍人、半晌呢喃。似怨暮寒簾隙。

宴清都 秋陰

楓葉今朝冷。吳帆外、夕陽千里無影。竹光杳冥。楊絲掩冉。作成淒迥。尋烟說與西風。載涼意、都輸小艇。好畫來、鷗鷺明邊。幾莖蘆絮搖暝。江湖況味曾諳。年年消黯。空覓吟興。菰蒲舊夢。梧桐別恨。幾時能醒。無端釀雨商晴。盪一片、秋心不定。待笛聲、喚出同看。明蟾樹頂。

戚氏 秋聲

怕秋悲。秋來偏已耳邊知。碎竹廊前。老荷叢底。幾聲飛。遲遲。弄參差。林梢掩抑送斜暉。須臾萬籟遙答。滿空商氣撼窗扉。風也雨也。都和砧杵。擾成一片淒迷。便些些碎碎。如怨如訴。茅屋東西。雲外最苦猿啼。山木響合。慘慘動相思。何堪又。雁調哀柱。蟲曳涼機。惹獻秋。玉漏暗共宵移。二十五點高低。數從枕畔。暈入燈邊。老盡千丈華絲。更有消魂處。客窗倦讀。問夜何其。不信吹來落葉。驀開門。滿地月如篩。此時遠望茫茫。似醒似夢。莫話蕭條意。甚釀來。多作愁滋味。度樓角。笳正淒淒。引水邊。笛又枝枝。惱人是。欲睡不成時。且呼童起。吹蘆捉火。獨自絃詩。

眉嫵 秋山

趁纖蘿裊裊。禿木騷騷。描出一痕瘦。側閃歸鴉去。蒼茫裏。斜陽微帶寒逗。髻鬢更秀。露幾尖。雲外疏透。漸前徑。聽唱樵歌起。葉聲踏來驟。曾記招邀吟友。向最高頂上。同賞重九。眼底冷紅飛。淒涼甚。年年孤負。茱酒。翠蛾似舊。早影涵。新雁飛又。愛獨立。危峯端正獻青戶牖。

有正味齋詞

九十二

眼兒媚 山眉

纖纖粉本卓家來。點染出新裁。春濃秋淡，烟橫霧皺，十樣圖開。
曉妝暈入菱波裏，妒殺小漁娃。蛾分八字，螺堆五斛，可惜天涯。

又 山額

烟邊一角認微茫。亂髮覆松篁。洗頭纔罷，蒼苔帖翠，夕照塗黃。
六朝金粉當時見，描畫只尋常。天然付與梅花萬樹，特助寒妝。

南浦 春水用玉田韻

溪口夜來生，便和烟、帶雨溶溶流曉。漁婦理妝窺，纔今日、鏡面峭寒新掃。樓臺倒影，藏春莫道瓊壺小。眼底綠波如畫，就亂浸、四圍花草。相逢不戀萍蹤，只依依南浦。鷗盟未了。時節過湔裙，問天上、何日畫船人到。魚書杳渺，年年杜若香生悄。那料尋源來又誤，吹得落紅都少。

齊天樂 浪花

紛紛浪擲東風裏。低篷濺來無數。幾朵吹翻。一窩撲碎。打槳聲中掀舞。芳心淡貯。愛
飄雪跳珠。萬荷深處。暈入烟波。枉教偷眼到鷗鷺。吳淞新翦半幅。認羅裙學繡。凝
盼還誤的。爍呈圓。玲瓏結串。每帶回潮涼聚。何曾久駐。只泡影虛空。畫禪能悟。水枕
頻欹。滿衣生暗雨。

無悶 寒原

雲不分明。遙接雁邊。知隔荒蕪幾里。只菜稜霜晴。略餘寒翠。道是牛羊下也。早逐隊、
蕭蕭斜陽裏。寺鐘漸歇。烟迷斷塔。一山如睡。沙尾。正舟艤。畫待渡行人。瘦鴉偏似。
更幾筆蕭蘆。冷添風意。料得明朝雪大。已凍墨。模糊塗空際。獵火宵看。好認北平飛
騎。

壺中天 陳古華太守延慶索詠荔支石

楓亭人到。認攜歸皺紫。陳家堪數。落地星精能幻化。似要筠囊盛取。著色邀憐。留香
待擘。漫許神仙煮。支機持贈。阿環微笑偷覷。還念寶晉齋中。老頭拜後。聲價誰同。

汝賭取輕紅三百顆。合入端明新譜。連理因緣。側生情味。團結雲根古。清饑解否。袖來猶帶烟露。

瑣窗寒

蕤歎詞話京師冬月既以紙糊窗格用琉璃片畫作花草人物嵌之

此歐陽楚功詞所謂花戶油窗也

梵字樵交。冰油紙滑。玲瓏一片。年光小雪。不怕峭寒凝晚。盪東風。梨雲亂飛。似在琉璃影中見。暮夕陽明滅。金迷紙醉。那家庭院。閒翫。幔徐捲。認畫向青紗。折枝花滿。多情遮護。幾度夢魂歸緩。早前廂。春聲乍催。悄地重窺那人面。勝荷時。冷布粗疏。背裏傳嬌眼。

又 涼棚

縛架參差。鋪簾熨帖。滿庭通翳。玲瓏四面。透入柳絲風細。認分明。停雲不流。換教午景清于水。最晚晴。倏忽乍舒還捲。一繩斜曳。堪記。陰陰地。正雪藕冰瓜。玉壺可擬。連宵坐雨。更訝江湖篷底。早天涯。催人夢歸。夢尋老屋畫圖裏。認門前。黑壓松毛。洗

瓊索涼醉。

憶舊遊 秋寺

認紅牆。柳白塔。頽陽尋到僧家。滿地蒼苔冷。恰清涼世界。鐘鼓無譁。石牀要圓茶。夢同證木犀花。訝壞色偏明。黃分幾葉。吹上袈裟。天涯。打包去。問瘦影誰來。月下門闌。爲愛經聲好。早鳴蛩相喚。幽徑穿斜。尙記飯分香積。滋味晚菘誇。鵬鴨脚空廊。蕭蕭此際歸暝鴉。

西子妝 題樊榭先生湖船錄後

霞水雙篙。星萍一棹。寫得烟波千古。曾向湧金門外望。湖風流。慣尋鷗語。新題舊譜。把花月都勾留住。總相宜。道銷金鍋子。并銷愁去。頻年誤。阻風中酒。帶我天涯路。如今圓合西湖夢。問吟篷。美人遲暮。尊前試數。已零落。游紅窗戶。響菰蒲。搖入孤山冷雨。

又 吳俗駕六柱船飾以簾幔羊燈照春鴨爐張夕木瓜茉莉之屬先時雖陳

其名曰盪湖。復有打槳小娃。搵舟彼美。分眉寫黛。量鬢安花。洵欲界之仙航。亦柔鄉之寶筏也。

篷棧籠紗。柁樓坐玉。妝點十分春滿。生來只解浮家好。盪烟波者般柔軟。回塘乍轉。看齊繞綠楊。停遍。問東風。恁等閒識得。情深難淺。尋烟慣。不負鷗盟。肯把心盟換。水窗疏處。笑傳杯。溜秋痕。半斜嬌眼。歸來且緩。最愁是酒闌人遠。漸羊燈。隱隱已消對岸。

疏影 帆影

春江破凍。看挂蒲遙泛。輕影浮動。樹底潛移。烟底還迷。閃閃乍過荒壠。波心一片搖溶處。問帶去。幾鷗殘夢。暮渡頭。掩卻斜陽。誤認隔溪雲擁。偏又飛來遠浦。似憐人別緒。千里常共。荻渚冥冥。蘆汶沈沈。總被東風調弄。寒添百尺晶屏上。寫不盡天涯愁重。到晚來。倦倚船娘。付與月陰微送。

百字謠 酒帘

舊扶醉處。正斜陽閃閃。擡頭重見。不定光陰圖畫裏。搖曳一竿春軟。紅樹旗亭。綠楊城郭。和雨和烟捲。幾痕濃墨。晚來疑帶鴉點。聞道索價新高。行沽何處。拚脫蓑衣換。風雪模糊樓一角。多少梨雲吹滿。歌板因緣。奚囊情味。消得花邊慣。燕歸能認。傍檐徐掠雙翦。

青玉案

查篆仙觀察。淳於揚州高旻寺見梅壑老人遺硯住持如長老知爲

查氏故物遂以歸之觀察爲文記其顛末并系以詩余賦此調

江山畫遍餘殘墨。定費盡蟾蜍淚。乙卯幾時人許替。斜陽荒塚。斷雲一片。未共梅花瘦。敗蕉響颭禪廊碎。喜來駐青絲騎。小篆紅絲名字記。摩挲遺澤。因緣如夢。證向袈裟地。梅壑老人生年乙卯與香光同故自稱後乙卯人

天香

張芑堂燕昌所藏石綠一枚明隆慶年上有龍香御墨四字

杵擣青霞。九分紺雪。氤氳如聚龍氣。兔魄團圓。犀紋密粟。小篆故宮紅字。蒼梧夢斷。寫不了。荒陵烟翠。莫認傾來露掌。銅花欲飛還膩。瑤窗四圍曉啓。伴妝臺。玉妃會

試漫數鬢鴉染處。冶雲凝細。只問纖眉學譜。費素手勻調幾。螺子。賸付丹青。斜陽遠水。

又 小香南館賦高麗紙

老繭裁冰。穉魚灑雪。蠻箋十樣新展。練映書明。銀搖扇冷。珍重烏鄉來遠。苔痕暈碧。認鴨綠。春江會浣。雲海清詞唱否。芙蓉染香。纖管。雞林問誰覓偏。剖松花。硯前吟慣。冶鬢暗窺還訝。鏡開菱面。待寄相思不斷。放尺鯉波心畫鱗軟。怕坼聯筒。情長恨短。

瑞鶴仙 趙吳興私印拓本桂未谷覆索題

細紋凝古翠。苔花老。賸得王孫名字。圖書舊時記。悵白蘋風裏。難尋朱邸。芝泥押紙。似分來。銅駝寒淚。水晶宮遠。問誰剔恨紅。洗向烟水。曾對道場山色。仲姬匳畔。慣鈴眉史。綠紗曲子。催鷗夢。已殘矣。只蠶頭緘碧。繭尾堆愁。空留泥爪雪裏。遜阿兄。小篆風流。水仙葉底。

月邊嬌 宋緯絲月中攀桂圖集三硯齋賦

圈葉攢花繞鏡檻低邊。蟾波凝注。麝寒承袖。金寒籠釧。掩映五銖衫縷。秋心蹙碎。料不怨美人遲暮。尋來樹底怕溜下。宣和釵股。定是詠能霓裳。衆仙歸去。更留遺譜。籠連鈿粟。回環繡絡。收拾許多風露。嫦娥宛在。且莫問。瓊樓今古。金針度否。乞一枝分與。

玲瓏四犯 藕心錢沈匏尊索賦

骨削玲瓏。繞四面銅花。微沁苔暈。折盡秋絲。還惹買香人問。會記玉腕凝酥。愛繫處。一痕紅襯。料佩來要乞宜男。蓮子已通芳信。幾時根自淤泥奮。算銖銖。沈郎偏近。方塘慣結同心夢。夢裏逝波應省。休要卜向天涯。更惹攀芳餘恨。待稗荷低苗。且水面前身認。

滿江紅 祕戲錢

長壽宜男。數吉讖。曾經萬選。誰更把。陰陽巧鑄。雨雲重鍊。誓約怕同烏鰂墨。迷藏不

隔錢龍宴。只君心、難買殿西頭。涼風換。男女式、何須判。歡娛會、何嫌短。但蟲卷蠹。屈天長地遠。色相難空阿堵物。畫圖又入菩提變。笑有情、榆莢蝶團團、尋常見。

天香 龍涎香

泊月槎橫。浮烟路遠。靈爇採自瑤島。半晌銷寒。幾番候火。小試那人纖爪。微熏乍透。漸折入、簾絲徐裊。被底纔醒殘醉。依稀蜃窗燈悄。無端雨聲促曉。映秦箏、尙餘紅小。不盡溫磨。多向袖羅閒繞。莫認巫雲易散。但萬里珠宮夢誰到。寄與心心書空一笑。

又 龔壺

細屑紅泥。圓瑯栗玉。乳花凝注多少。古色摩挲。空罨指點。可惜搏沙人老。酒醒擁被。泥翠袖、燈前樹悄。時候重逢穀雨。春旗須試香早。徐聽蚓吟鼎竅。淪清泉、落花風到。滿腹烟山真味。貯來應飽。長日閒消箇裏。定一枕茶天夢圓了。好伴圖中、蕭蕭石鏡。尤水邨新畫坡。公石鈔圖見贈。

八寶妝 題張芑堂燕昌羽扇譜

一撲鮮雲滿懷晴雪。展卷尙餘涼駐。曾訪金婆門巷遠。踏遍斜陽蕭路。歸來飛夢月
湖。湖水明邊。梳翎重識螺鬢女。纔是合歡時節。煩遮眉嫵。休羨比翼多情。最憐羽
客。年年淮海催去。數歸信。道伊應準。怕歸自。西風來處。惹多少。閒愁恁譜。畫圖隔斷
秦鸞舞。儘渺渺飛鴻。橫空重寫張家賦。張九齡有羽扇賦

合歡帶 蜀府扇

前身修竹摩空。動搖處。與涼通。蜀紙麝煤新樣製。鬪彎環。片月差同。蒜絡垂圓。椒囊
繫小。競渡剛逢。儘窺人。畫簾堪賽。眼波斜趁玲瓏。聚頭名好。最關濃。憑摺疊。在懷
中。底怪秦鸞描不上。帶巴山。溼翠濛濛。撲罷蚊幘。招來蝶夢。香壓肌鬆。只泥金。幾行
字在。怕教磨滅。又西風。

天香 薛鏡

對對分鸞。團團鏤鵲。藍波淬自茗水。寶相圓成。鉛華洗盡。冷浸並頭菱蒂。淨和粉拭。

攪一撲。湖綿紅膩。疑在水晶宮裏。會窺仲姬眉翠。星星鬢邊愁起。展冰奩。幾番凝思。莫惹箇中花影。悄彈鉛淚。銘到宮娃小字。賸不盡。蟾蜍夜來意。吉讖須聽。懷中抱未。

沁園春

閨中用素紙簿收置零星絨線等物。杭俗謂之鍼線本。張船山檢討

問陶以東野詩有啓帖理鍼線。非獨學裁縫之句。云當稱爲鍼線帖。作詩索和。余製此詞答之。

粉本猜伊。乍合還開。工夫最勤。愛字無題處。色絲門豔。心能參到。花樣翻新。不語伴。嗔欠伸小倦。刀尺堆邊。收拾頻年。頭近共嬌兒放學。半月嬉春。逡巡幾度黃昏。尙燈火和郎一卷親。慣刺來丁倒。迷藏鴛思。繡成辛苦。摺疊鸞紋。碧唾黏殘。紅尖蹴損。紙薄愁將情共論。憑精婢也。奩中依樣偷學夫人。

轆轤金井

詠走馬燈

漲烟飛燄。送星蹄。逐隊奔騰不少。一片迷離。向蟬紗圍繞。簾深夜悄。怕壁上。觀來應

笑。幾許英雄。明明滅滅。冬烘頭腦。平生壯懷漸老。念五陵游歷。空負年少。陳迹團團。歎磨驢潦倒。山香插帽。要鼓打太平新調。盡洗弓兵。鷗輪迅捲。月斜天曉。

高陽臺 西瓜燈次金棕亭韻

碧映團圓。冰雕細碎。儘教箇裏生春。暗射清輝。分明冷月當門。瓊壺紺唾都消盡。騰蠟珠。替墮啼痕。定東陵。五色迷離。幻出前身。休誇一片玲瓏影。似連環卍字。排就瓜仁。細燄斜通。已非隴上烟雲。故侯種處誰重問。只飄零。螢火黃昏。怕繁華。易到瓜期。也替消魂。

齊天樂 響竹

驅除一室談何易。論功此君不少。膩鼎紛投。書帷彙集。正怪營營相惱。先聲聽到。似碎攪風梢。助成秋早。觸熱人來。也愁塵狀共伊掃。蕭蕭還更颯颯。譜玲瓏散水。都叶涼調。麈尾旋拋。松枝罷捉。難得桃笙眠好。連筒製巧。颺空際。絲絲肯容飛悄。漸黃昏。隔院重聞。幾叢和雨鬧。

金菊對芙蓉 瓦甌壺

蜂孔交攢。蓮房倒挂。玲瓏製出新陶。正斜陽欲下。自課僮。搵滿貯井華涼。淥浸就花邊。來瀉天瓢。青紅無數。津莖潤葉。一例勻澆。替伊抱甕勞勞。早籬根牆脚。生意添饒。訝買春前約。茅屋重招。糟牀夢聽鄰家壓。迸小槽。滴滴珠跳。山家清供。瓶笙沸處。同慰幽寥。

瑤花 茉莉花籃

濃香解媚。清豔含嬌。簇盈盈涼露。金絲細縮。訝瓊壺冷浸清冰如許。玲瓏四映。問恁得相思盛住。已贏他。織翠裁筠。消受美人憐取。幾回盪著輕舸。聽吳語呼時。爭傍篷戶。拾來素手。愛袖底猶帶采香風趣。斜陽漸晚。看挂向粉輿歸去。到夜闌斗帳橫陳。夢醒蝶魂無據。

解語花 詠橄欖花

蔕烟曳瓣。借燄分花。重疊抽無數。託根蘭炷。前身換。朵朵並頭嬌嫵。餘愁怎訴。只半

响。燈唇如語。拚攪殘香膩。銅盤蠟淚如紅雨。宿醉憑伊解取。記青青子好。羅袖偷貯。玉漿消去。颯深宵。閃閃熱中無主。殘煤寸許。料幽谷無人吟賦。纔省知。回味都無。問此心灰否。

天香 烟草

瑤草深耕。瓊絲密縷。烟霞散入人世。吸似荷筒。敲便石火。領取炙餘風味。朱櫻小破。認朵朵蓮翻舌底。閒趁銀釭未滅。偎衾試銷寒意。溫磨引人如醉。慰孤愁。麴生差擬。翠點秋衫。猶記唾花香膩。百種相思欲寄。奈化作巫雲。又輕墜。颺出紋簾。合成心字。

百宜嬌 檳榔

鳳卵勻圓。錦郎文采。萬里似會相識。小炷蘭熏。細評茗趣。殘飽一般銷得。春生笑語。問可抵香含雞舌。漸迷迷淺暈芙蓉。晚潮添上雙鬢。會共說瘴陰吹黑。舊夢憶南天。酒闌時節。殊盃分堆。青童低捧。蠻語殷勤留客。瓊壺擊碎。臙幾點唾餘紅滴。早琴

川過了花時。雨搖高葉。

沁園春 夢華錄載都人至除夜以酒糟塗竈門之上謂之醉司命曝書亭集
中有醉司命辭余譜此闕

爆竹喧空。倒珮欵冠。朝天去遲。甚錫簫喚賣。膠牙未已。椒杯告酌。軟脚無辭。樺燭花
明。糝盆火旺。絃語丁丁。送有詞。攙扶好。要先求利市。來錫茅茨。靈旗緩邊寒颼。正
嬌女。銅童簇擁時。看迷離雲路。神其醉止。曹騰帝所。臣復中之。煬謝無能。媚思何益。
但願糟邱分一卮。觚邊踞。道詩須聽我。跨亦憑兒。

又 京師上元以泥塗鬼判盡空其竅燃火於中光彩四射謂之火判近人多
有詠之者

蠢爾獍顏。也借光明。逞大神通。漸吐張一口。紅霞嚼爛。搜牢衆竅。赤舌燒空。透頂蓬
蓬。熱中焰焰。炙手今番意獨雄。能火速。甚五花判事。有此威風。形容黃胖。差同道。
道此腹膨亨。不負公。倘延爲上客。何妨額爛。用吾下策。直欲心攻。變相圖開。欲摩天在。

莫是劉鑿塑出工。休相笑。只與君頭腦。一樣冬烘。

又 牀婆子

曲彖橫施。誰司寢興。三瓊須澆。想婆名春夢。曹騰許伴。娘呼夜度。邂逅會遭。魂約鴛鴦。身爲蝴蝶。指點迷途。仗汝勞文。催撰怕葫蘆。換了依樣難描。招要蜜炬高燒。早聞裏迎神羯鼓。敲爲思神嗜好。錫香果軟。酬神笑語。雪豔花嬌。帳底雲行。枕邊月落。聽賦橫陳。記那宵。還私禱。禱阿侯睡穩。莫厭叨叨。

又 不倒翁

莫笑龍鍾顛而不扶。蹶然自興。任幾番壓捺。出頭須放。十八挫拗。強項偏能。老子婆娑。是翁矍鑠。隨意盤旋。走不脛。如人柳也。三眠三起。態度盈盈。掀騰與世何爭。訝封得泥丸。抵死撐。便空空此腹。儘多消納。團團對面。故學逢迎。何處難眠。有時作劇。拚得浮生紙樣輕。驚一跌。早虛空粉碎。蛻去枯形。

念奴嬌 金李用章有掃晴婦詩云。卷袖褰裳。手持帚。挂向陰空。便招手。今俗

于久雨後翦紙爲婦人手持一帚懸之簷下用以祈晴謂之掃晴娘是其遺也。

苔黏履敗甚淫淫。有此荒唐雲雨。要仗擔承箕帚力。暗把龍公攔住。淨捲塵霾。全驅霧陣。報喜先鐘鼓。披衣玉女。一眉遙黛。應妒。偏是血色裙拖。飄揚簷底。疑送秋干去。半晌柔荑裁翦出。爲怕踏青期誤。風鐸爭邀。晴絲乍冒。候到斜陽暮。明燈新歲。紫姑須共占汝。

齊天樂 八月十五夜都下人家皆祀兔兒神雪藕冰瓜月波燈色令人如在

瓊瑤世界因邀張瘦銅填同賦此詞以當樂神之曲

大圓鏡裏游仙去。年年窟雲頻換。毛穎功名。中山氏族。莫笑衣冠裝點。燈前瞥見。似斜向闌干。悄窺人轉。半晌迷離。目成還在玉樓畔。殷勤誰共禮拜。道兒童塗抹。都竊柔翰。老不中書。歸無東郭。賴有么蟾能伴。跋跋走慣。定穴鼻先通。一輪香滿。藥杵重聽。送回涼夢遠。

三姝媚 縫窮婦

塵凝雙鬢悄。漸西風騷騷。沿街來早。也費裁縫。道一般針線。莫嫌潦草。十指玲瓏。會小市。琵琶彈好。憔悴而今。天吳紫鳳。眼迷顛倒。如此生涯堪笑。但聽說明朝。送窮應惱。土銍糠燈。料破氈滋味。不輸多少。百結愁心。偏舊夢。牛衣人老。漫想紅樓。刀尺鴛衾製巧。

臺城路 姑蘇道中賦得漁婦曉妝波作鏡

開奩新淬青銅皎。何人睂眸偷注。襪軟凌波。裙低接草。倒浸一花能語。鱗紋曉聚。要網取柔藍。悄添眉嫵。照出盈盈者。般瘦樣。最憐汝。不爭時世梳裏。只箇香鬢子。斜綰鴉縷。荇帶縈青。蒹絲漾碧。錯認誰遺釵股。空明似許。問網結千絲。幾時兜住。悔被菱雲。暗流春影去。

沁園春 額

山意窺窗。一抹嬌黃。斜陽最宜。念廣眉學譜。半籠月影。雙丫未綰。全覆雲絲。紈扇微

遮晶屏易觸。緊護貂茸冷不知。妝成好。愛紅綿低襯。新裏頭時。鬢鬢兩角靈犀。甚尺宅。居然要粉題。記嬌兒點處。會調朱水。宮神呼到。待扣青霓。蟬小承綏。梅輕墜瓣。描畫休教粉墨迷。相思遠。看幾痕低蹙。怕誤春期。

又鼻

嚙嚙誰知。蘭氣潛通。氤氳遠聞。聽息調半晌。靜將時驗。聲飛兩樣。清與喉分。麝粉先堆。袖羅慣擁。鏡裏端詳分外親。眉新畫。早黛螺橫掃。暈入山根。通神喚汝心門。甚斲處。難防巧運斤。只天香參到。幽禪可證。花枝歟去。纖手煩輪。拭汗開巾。藏羞掩扇。圖畫鉤成半面春。鄰家話。但歸來頻嚏。定說前因。

又耳

一縷靈通。陡觸心頭。含聰可誇。儘聽來鷓唱。不煩鍼砭。教成琴曲。盡洗箏琶。蟬鬢籠雲。鳳釵倚月。阿母跟前軟語加。明璫綴。認天穿節過。翠珥添些。窗紗夢醒啼鴉。正淺暈。香輪枕印斜。愛青衣解意。附時叮囑。銀簪了事。側處梳爬。捻粉微勻。垂貂小護。

便隔紅牆不怕遮。春風悄只小亭私就。刻襪防他。

又 齒

小破胭脂相對粲。然文犀不如。憶漢宮卅六。會誇賦口。吳姬二八。慣溜歌珠。淨罷楊枝。漱來花水。學誦金經。屢叩餘。含毫久。任墨痕涼沁。偷學郎書。吹噓蘭氣來徐。道活斲新巢。玉定輸。愛笑時偏鬪。做成嫵媚。病中微醺。畫出清癯。纖指輪銜。香絨爛嚼。伶俐生來孰似渠。梅酸澗。怕十分軟卻。春色都輸。

又 肩

賦罷洛神。彼美堪憐。生來總垂。看輕雲裁就。儘遮領下。柔絲披著。纔是雛時。紅雨花交。綠烟柳鞦。削就天然瘦影。齊憑相比。笑回頭。剛近不用量伊。芳期春已先知。漸杏子衫單粟起微。到秋千立上。出牆偏半。流蘇承得。顧鏡微差。小側穿簾。輕凭上閣。姊妹相呼左右隨。吟郎句。戲學他山字。半晌還欵。

又 臂

比玉分酥。裏疊吳羅。欲見偏慳。問甚時瘦了。微鬆條脫。幾分倦後。斜靠欄干。搗鼓揎餘。踏歌聯去。月瀉清輝。訝一般。鈴香印。歎綢繆何日。紅字都殘。無端割也盟難。恁綵索。翻能繫合歡。每鴛鴦衾裏。枕來常軟。琵琶絃上。倚處先彎。無語空支。多情試捉。雪藕玲瓏兩袖間。裁文錦。只遮將一半。慣忍春寒。

又 掌

一片雲腴。鉛露曾沾。羅紋細生。愛留仙裙縵。舞時難定。走盤珠活。握處常明。小拓弓彎。背番蓮樣。便是黃金鑄不成。龕燈畔。看合來無縫。學誦真經。闌橫拍徧誰聽。怕反覆如郎最不平。恰停針無語。幾回接到。藏鬪偶中。一面攤呈。教字頻書。揉花易碎。帳裏香蚊擘有聲。調妝粉。要緊窩麝水。不溜微馨。

又 乳

隱映蘭胸。到破瓜時。靈津暗催。甚酥峯兩點。偏教當面。嬌嬰幾日。便解投懷。迸粉成珠。凝脂作芍。剝出雞頭殼裏胎。輕羅抹。認巫山對擘。橫度雲來。綳纒半晌還俚。道

乞向鄰孃口已開。笑舊時藥裏瓊田會賣者。番泉脈玉寶先回。畫檻平齊。檀槽半隱。簾上橫陳雪欲堆。春塵起。記爲郎洗眼。幾度曾揩。

又 膽

一點凝寒鏡裏高懸。窺時最明。縱鎮來綵索。易生嬌顫。喚回殘夢。未了餘驚。因怯常虛。併愁成苦。碎到心頭鉛淚傾。燒香拜。儘深深瀝得。纔表真盟。偏爭要共秋清。蕩脈脈。中池水一泓。怕虛亭私就。花鈴陡觸。空房獨自。雨枕難聽。畫板承趺。危樓點屐。佯起先人身屢停。生來小。只詩邊酒次。約略縱橫。

又 腸

團扇歌來。無限彎環。含無限愁。悵兩頭相結。山都閉水。九回猶剩。春亦成秋。泥酒光陰。阻風滋味。欲斷還連情未休。人千里。歎鹿盧頻轉。一寸難酬。悠悠常抱溫柔。更轉輾。偷將詩緒搜。漸化爲冰雪。藕絲徐引。織成錦繡。繭緒圓抽。吟和鶯歡。淚隨猿苦。木石吳兒解得不。黃昏近。算除教三瓊。怎沃煩憂。

又背

嫋嫋婷婷。當面窺餘。翩然轉身。向樓心拜月。俯時恰照。簾旌曝日。煥處先春。人後猜人。鏡中看鏡。形影端詳。認早真。嗔生客。但花間迴避。恁躡芳塵。逡巡陌上游頻。乍汗溼。紅衫透舊痕。最香綳負穩。嬌兒偏慣。玉纖捶細。小妹先輪。癢卽須抓。冷誰與擁。一片涼紋。楚簾親。情難訴。只欠伸。畫裏免賦懷人。

又膝

輪相圓成。藕覆低連。偏宜促時。愛盤龍新樣。屈來金襖。鬪雞舊製。蔽處花吹。擁卽成吟。支教作枕。曉夢多情。未肯離。苔階步。便防他易軟。要索扶持。柔荑過否。誰知只舞後。頻看大小垂。記依牀曲局。參禪孤坐。和裙折疊。拜月雙低。半晌橫琴。有時磕馬。骨立珊瑚一對齊。閒中好。把佳兒抱置。爲畫纖眉。

又愁

乍減歡容。鎮日無言。含情欲啼。念襤塵淺淺。何時理得。酒腸窄窄。特地澆時。心小能

容眉纖慣惹。幾度橫陳。覓睡遲。曹騰裏。又牡丹開了。擔誤芳期。追思南浦分離。恨魚信銷沈。兩莫知。算量來。萬斛恰如江水。織成千縷。不減楊絲。晚雨簾櫳。夕陽樓角。半是柔情。半是癡。芳名好。待石城西下。艇子留伊。

又 夢

曲院無人。款款飛時。羅衾正溫。任連環不斷。月迷歸步。秋千有約。花引柔魂。帆遠曾隨。屏深慣度。懊惱金釵墮枕根。郎何處。正滿階如水。獨自開門。逡巡難問前因。似空際。春風捲絮痕。但醒猶心苦。未乾紅淚。記還膽怯。怕近黃昏。認雨疑雲。看朱成碧。蝴蝶分明是小身。梅開也。漫妒伊。縞袂。覓到前村。

又 立

閃過斜陽。獨自窗前。無言暗窺。甚青苔冷印。擡身偏懶。明蟾側注。迴步翻遲。拚到酸時。不禁軟處。扶住楊枝有所思。東風起。早落花如雪。沒了鞋兒。迷離半晌。如癡。豈真箇。看雲鎖不移。料鴛鴦密約。比肩湊汝。鷺鷥偷學。一足翹伊。曲彙欄斜。秋千板窄。

約略春纖小露時。游仙夢。怕證來金格。長侍瑤池。

又 睡

三十種眠。一樣曹騰。偏宜箇人。看偎從角枕。斜欹釵玉。帖來晶簾。濃墮鬢雲。眠倦低迷。眉慵小斂。醉頰濃酣。斗帳春無端。誤已遼東夢醒。鶯語堪嗔。擡身略撥餘熏。怎消息頻傳。又欠伸。只離愁萬縷。惹伊反側。沈香八尺。稱汝橫陳。獮子偷窺。鸚哥罷喚。雪壓環肥。畫出真。論滋味。也黑甜鄉好。有此溫馨。

金焦葉

滄州道中同年周薌谷州牧世榮餉滄酒

蘆臺去路東風緊。吹帆外。斜陽將隱。故務千年。落花飛處。壚難認。越地晚寒恁忍。雙餅忽送糟邱信。待紅圻。凍泥新印。最宜名說東陽。瘦得詩腰俊。好配荻苗蘆筍。滄酒有時。酒菊酒東陽。酒諸名見天津志。

天香 花糖

檀粟吹塵。犀株灑雪。餘芳亂撲晴晝。露染鉛黃。霜勻紺碧。一杵廣寒聽後。花飛釧動。

更惹起香生羅袖。曾記紅簫喚買。相思杏園人瘦。氤氳貯來偏久。愛團圓印成纖手。舌本徐參。悟到木犀禪否。莫是涼蜂採了。只一種秋糧釀先就。帕裏分甘。誤拋金豆。

梅子黃時雨 蠶豆

麥候秋清。正涼雨一肩。新綠先賣。記隔隴花開。雪痕烟外。纔近三眠忙未了。須添小食朝來採。盈筐載。萬顆碧珠。梅豆差配。堪愛。都含翠黛。趁風爐火活。炊共巢菜。問煮繭餘香。幾分猶在。減盡桑陰殘莢老。夕陽重約秋棚話。疏籬挂。冷蛾依舊如畫。

尾犯 筍

餘花晚徑。問烏衣來否。翠尖新迸。暗泥掀破。今番占斷。閒園盈頃。禁人踏去。早屐響。籬根靜。認天寒。翠袖籠時。嫩紅偏肖纖影。節物旋過。燒茗配櫻廚。味較勝。早食單催點。酒地先煨。肯遲幽興。試到深山聽。只幾日。籊敲烟暝。憑夕照。老盡孫枝。晚鞭挑向霜冷。

摸魚兒 蕪蒿

趁春江桃花水軟。幾莖柔白。催長詩家解說。羹魚美。恰好河豚新上。縈細浪。愛瘦節。勻圓。小借琅玕樣。荒波寄賞。共荻笳纖鬆。蒹絲滑。忽風味配村釀。西風憶。最喜平田如掌。尋烟蘆子來往。翹翹葉颭秋陰外。吹火柁樓曾傍。新綠漲。又嫩淪吳酸。要待騷人餉。春杓薦爽。正飛絮飛花。一肩市口。冷雨打蕪響。

玲瓏玉 燕俗六月六日以藕苗爲菹餉客蕪史謂之銀苗菜

單舸移波。鏡匳裏。憶采芙蓉。酥消玉腕。瘦餘尙剩春葱。荇帶牽來細認。共清堆冷碧。柔截纖紅。玲瓏。知花間。蓮信早通。也配酸鹹味好。惹鱸鄉前夢。蒹菜差同。鬢已如絲。恁銀絲。未老西風。何須冰瓜相對。早筵上。涼情泛酒。小折秋筩。怨昨夜。覓同心。全未識儂。

摸魚兒 蓴

滿鷗波。罩烟拖雨。涼絲平織千頃。春洲不是西風怨。歸夢早圓菱鏡。撐短艇。試宛轉。

寒來滑比么荷勝。參差鬢影。乍窺到潭心。生香不斷。一碧澹相映。調羹好。幾匙酥融玉凝。吳鹽配就清冷。柁樓纖手垂虹路。俊味酒邊重省。牽舊恨。只萬丈相思。助汝鱸魚興。斜陽送暝。漸蓼岸紅時。蘆碕白處。釵股認誰賸。

又菱

啓晴匳。鏡波圓滿。搖花低淬鉛水。斜陽幾棹。鴛鴦外。能稱采香人意。羅襪底。怕瘦入西風。角褪胭脂細。清歌又起。看月軟烟平。一繩橫界。打漿露華裏。湖濱好。相見呼伊藕弟。嘗來微沁冰齒。分堆小剝青菱雪。歸夢六橋會記。重九矣。好半折魚租。半佐茱萸醉。涼雲蹙碎。漸股老蟾蜍。葉銷蝴蝶。損了故灣翠。

又芡

颭西風。釵莖小立。一羣烟筏來處。年時港口。和菱種。生就紫盤擎露。花可數。記薄暖低烘。開遍斜陽路。芳洲又暮。伴大芋高荷。團團縐綠。萬葉鬧涼雨。蓮歌罷。采采兒童隔浦。歸來盈斗堪煮。青吭漸少菰蒲寂。夢穩者時鷗鷺。鮫女妒。算多少。真珠緊盛。

羅囊護。秋燈酒戶。乍剝出勻圓。宮黃新褪。點點認酥乳。

湘江靜。舟行小港中。兩岸青蘆。彌望蕭寥。無人水風間。作槭槭然如聞秋聲也。

十里疏青搖淺渚。聽梢梢、欲生風雨。纔抽晚笛。徐翻響葉。問伊人何處。際曉露華濃。添篷戶者。番涼聚。分明記得。鷗邊鷺邊。曾相約、共烟語。夢易醒。船又去。寄相思。幾時折取。蕭閒水外。欵斜畫裏。早離愁留住。渾未著秋花。偏空際。飛來秋句。新詩許換。遲他月底。破糝絮被。

水龍吟 秋蘆

夕陽又落江湖。蕭蕭影壓沙鷗重。短篷小泊。一簪飛雪。惱人愁共。港窄全交。橋欵不斷。舊和烟種。漸搖涼。織暝。雁飛纔下。漁燈外。枝微動。渡口歸潮。暗湧。攪秋痕。水風低弄。波荒月冷。笳聲初歇。笛聲徐送。折後梢低。瘦餘葉脆。但聞淒諷。待涼花采了。青羅被底。結鱸鄉夢。

一枝春 菜花和李味莊觀察 廷敬

接隴連村，弄輝輝，一路好春相引。鵝兒蛻後，便帶酒邊衫暈。桑陰半掩，更芳草、半添青襯。憑坐我、田水聲中，畫榼四圍香近。還看柳綿成陣，歎韶光倏忽，桃花紅盡。游蜂鬧晚，待補者番風信。袈裟舊影，問會否、給孤重認。愁故苑，攬入斜陽，是金是粉。

惜紅衣 詠薑

畫裏移家，吟邊坐雨，病花曾賞。一稜苗肥，筠簾恰低障。秋風蜀道，能幾度、游仙來往。回想烏菱紫芋，聽同敲吳榜。爬沙蟹上。良醞招邀，山廚擣微響。雛姬笑靨，怎忍擘紅掌。付與凍糟香漉，待化辣雲相餉。甚指尖齊斂，疑對柳家新樣。

鎖窗寒 綠陰

淺壓山腰，深籠巷尾，碧陰千樹。濛濛密密，番牘幾花明處。映蒼苔、餘寒未休，隔簾又釀江南雨。甚滿身冷翠，低鬟微鞞，摘梅簪去。延佇聽蟬語。縱未到斜陽，已成淒楚。殘紅換了，早是薰風庭宇。認江邊、烟耶水耶，誤人望眼雲又暮。問遮將、一徑春歸，恁

禁秋來路。

聲聲慢 紅葉和那繹堂 彥成

一番醉夢。幾日濃妝。新從竹外班班。便無花分。經秋也作花寒。尋芳已消舊恨。放飛來、蝴蝶都閒。丹青意。只半峯斜照。剩寫孱顏。有客停車愛看。愛紅于、二月霜水初乾。碎翦胭脂。西風纔是艱難。新詩漫題十字。早根邊、蛩語吟殘。飄零易。待明年、重擁綠鬢。

山亭宴 舟中賦黃葉

酒人老去江波冷。徧林亭、都消深翠。山額任勻塗。只略剩、冶眉細細。歸鴉來認寺門秋。畫一片、板橋詩意。昨夜灑新霜。瀉不盡、銅盤淚。打頭幾葉西風裏。共疏花、鬢邊爭麗。偏到最濃時。淡了斜陽十里。天涯容易感飄零。枉自戀、青苔情味。好伴著書身。只小門深閉。

無悶 柳意

疏不關秋。攬碧暈黃。纔寫濛濛幾處。想未到清明。綰愁難住。已被先偷冷眼。看遍了、
章臺人來去。晚寒陌上。鵝兒淺蛻。半和烟雨。回顧舊時樹。只一片銷凝。殢春情緒。
映草色遙看。有無頻誤。應是三眠未醒。正夢入、斜陽花邊路。向鏡中、低照香蛾。大半
斂時無語。

惜餘春慢 柳線

宛轉拖青。惺忪縵綠。低處欲侵芳草。風痕翦翦。雨意纏纏。拋過一梭鶯小。回念消寒
舊時。刺繡光陰者。般斜照。只撩人春色。相思十丈。畫橋遮了。無奈是、攀折年年。替
伊離別。金縷壓殘多少。和烟紡絮。帶暝搓絲。愁把冶蛾催老。爭得長亭短亭。花樣新
翻。碧圍紅繞。趁吳秧千頃。涼針簇簇。僧衣縫曉。

柳色黃 秋柳

減碧攬黃。啼罷晚蟬。涼雨初霽。斜陽暗逗。林梢幾筆。白門秋意。山長水遠。漸見十二
樓頭。依稀颺出青旗字。誰料結同心。有而今憔悴。休擬。停船古渡。繫馬危堤。拄筇

荒寺。老盡絲絲。只在一絲風裏。烟寒月冷。認取無數清愁。分明攔入眉峯底。聽一曲烏棲。把離魂喚起。

玲瓏四犯 觀音柳

吹出東風。記白下門前。烟樹會數。浣濯新姿。侵曉尙含香露。憑仗一縷慈心。要縮結、萬千情緒。暮影邊、擲過金梭。還認故山鸚鵡。自從飛絮沾泥住。悔當時、綺懷無據。斜陽古寺。蕭疏甚。誰畫文殊眉嫵。重乞陌上清陰。好借行人遮護。聽傲傲搖浪。涼雨外。潮音度。

疏影 芭蕉

遮晴弄雨。放幾莖大葉。濃綠當戶。簾影深沈。未到黃昏。暗逗秋心如許。流螢去照池塘外。怕屢被、扇羅兜住。任月陰、低覆欄杆。有約那人私語。偏是緘愁最苦。歎題成字字。難寫孤緒。夢醒單衾。香冷燈殘。只雜涼蛩交訴。西風身世。纔禁得、早又要、冬心將護。賸矮牆、一角離披。可認雪來時否。

齊天樂 菩薩紗

已拚身世如枯葉。涼蟬蛻餘堪悟。非霧非花。卽空卽色。只向白毫分取。絲難罣汝。任明月穿來。了無尋處。證到華嚴。梵天衣共五銖數。方空休更比擬。便鮫綃織就。徒費龍女。卍字玲瓏。冰文細碎。吹透曼陀花雨。通明似許。儘坐我思惟。本來無樹。壞色因緣。半肩憑付與。

賀新郎 孤山觀梅

破雪今年早。忍清寒、棱棱健骨。插來晴昊。日落蒼苔渾似水。容我闌干獨靠。便影暗、香疏都好。老鶴夢回雲乍起。現空亭、四面花圍繞。花缺處、一峯峭。幾生問汝修纔到。更修到、者家眷屬。故山偕老。明月滿空瑤珮舞。贏得先生一笑。喜不奏、茂陵遺稿。數遍西湖三十里。只此花、此客千秋少。尊可薦、白蘋苕。

鬲溪梅令 謝陳師竹寔孫贈紅梅花

數椒暖破絳砂勻。寄殷勤。定是銷寒圖裏。染來真。隴頭無此春。影橫斗帳又黃昏。

暗香溫。夢到羅浮山下，記前身。月斜眠酒人。

東風第一枝 落梅

驛館春深。鈴齋客老。玉烟吹墜亭圃。問誰擲笛江城。喚起薄陰萬樹。游仙夢醒。早一縷。冰魂飛去。最惱人、枝上青禽。猶對晚蟾孤語。閒指點、瘦痕橫處。渾不似、畫橋前度。賸教環珮歸來。只是伴人醉舞。妝銷半面。料粉碎、香瘢難補。待借他、葉底微酸。寫入雨簾新句。

浣溪紗 題藍瑛畫梅

古社何人訪斷碑。燈前重此見橫枝。分明粉本馬和之。賸許瘦金描舊格。欠教白石寫新詞。相思風雪段橋時。

憶瑤姬 水仙

花也如仙。在湘雲夢裏。楚月簾前。已和春共瘦。更瘦餘香影。別樣娟娟。分排碧蘂。小破珠蓮。對一枝可憐。漸酒燈、催上梅花外。留伴殘年。道解珮、未遠江邊。恁招魂無

語孤負吟箋。王孫今老矣。歎白描高格。回首風烟。晚來虛倚十三絃。漸天空雪冷。客去也。腸斷魚波渺渺間。

長相思 王春波霖仿烏目山人梨花烟圃查蘭圃同年堂屬題

雲一枝。雪一枝。憶殺東闌寒食時。月來人不知。醒也迷。夢也迷。酒暈纔消花又飛。畫成春滿衣。

掃花遊 隔水見小桃一枝妍媚可念

恨難銷處。甚脈脈無言。夕陽流水。峭寒未已。悵仙源隔斷。小門深閉。畫出燕支。只在秋千影裏。惹愁起。待愁到減時。那減紅淚。前度闌更倚。念立共鬢齊。箇人千里。染成鳳紙。向烟波杳渺。尺書會寄。漲滿春潮。獨有歸來燕子。憶花未。剩天涯。斷霞魚尾。

過秦樓 姚春漪賦玫瑰花詩和者甚衆彙而顏之曰紫香吟卷余述此調

花市分嬌。馬塍移豔。冉冉莫嫌開晚。催殘小夢。蝶破餘寒。賣向玉人樓畔。剛是曉雨收時。芳信年年。夾衣新換。待鬢絲攏罷。甜香一撲。喚魂應戀。消受得。俊侶閒吟。噓

烟吹露筆底。幾番描染。櫻桃廚近。柳絮簾清。合配嫩茶輕點。寫盡江南好春。相對徘徊。休教緘怨。付紫雲唱罷。依約臉霞如見。

水龍吟 杜鵑花

是花畢竟非花。涓涓淚浸三更月。梨雲散盡。東風無主。暗飄寒血。草碧同愁。篋斑比怨。古懷難說。待絃翻蜀國。喚回遙夢。燈簾外。時明滅。會託春心萬疊。怕春歸。又隨春歇。沈沈黯黯。亂山紅處。悄迷孤蝶。躑躅因誰。淒涼念汝。未消幽魄。早啼殘謝豹。簪逢越女。趁清明節。

憶故人 湖上觀荷

一片清涼。萬荷壓水青無縫。白鷗迎出第三橋。去就花間夢。暗裏但憐香重。怕催歸。歌聲倥偬。鬧紅單舸。汝碧全湖。夕陽休送。

雨中花 澄懷園雨中觀荷

一霎鬧紅喧不了。早身被、冷香圍繞。幾日承薰。今番賜沐。寵遇花應少。移動珮環

聲悄悄。漸萬柄、颭風尤好。潑水涼生。浮烟碧極。已有斜陽照。

水龍吟 白蓮

水香何處尋來。一痕澹月微茫墜。亭亭瘦影。銖衣暗曳。鉛華淨洗。小立烟迷。相思露溼。滿湖涼意。漸搴芳人到。菱歌唱罷。渾不信。明璫倚。掩映銀一十里。倩西風。綠羅扶起。秋添水外。惱人輕誤。看花如水。素藕思儂。苦心憐子。聚成清淚。任雪鷗。選夢。夢回何在。在行雲裏。

臨江仙 紅橋道中賦枯荷

一片斜陽路。碧雲老去。寒滿荒波。畫橋外。無人唱到道歌。消磨。歎西風緊。和紈扇。卸了青羅。思量著。儘翠靱丁倒。鴛夢如何。嗟嗟。無人古岸。飛雨一霎潛過。怕秋絲催老。已自無多。尋麼。向空烟裏。憑收拾。去補漁蓑。開霜鏡。漸珮環零落。還照山蛾。

滿江紅 荷錢

喚汝錢錢。經多少。波掀浪簸。纔選出。勻圓萬箇。藕心堪賽。背面縱橫紅字篆。中央濕

澆青銅海。但估量付與摸魚兒。陂塘買。團□□。斜陽內。零星簸。東風外。更年年勾引。許多吟債。花有定評。君子貴。地無私貨。廉泉大。待明朝。一滴也甜時。珠擊蓋。

沁園春 碧筩

一舸搖紅。唱荷葉杯。臣請中之。認飄蕭塵尾。捉惟長柄。彎環象鼻。飲卽深卮。味苦心參。波涼舌卷。想像金莖露下時。真佳酌。早和香醞釀。沁入詩脾。斯時百罰奚辭。況孔瀉玲瓏。清更宜。似糟林醲出。細跳疏雨。玉壺買處。斜颭青旗。袖捧風前。盤擎月下。細碧還疑哥汝瓷。衣堪製。定酒痕常在。莫訝淋漓。

簇水 菱花

攔住疏香。一繩界處。荒波窄。暝烟低護。淬鏡面。圓紋平帖。漸帶夜深風露。淡浸全湖白。尋夢去。誤了幽蝶。蕩短楫。記聽到。越歌唱罷。又隔浦。吳歌接。若溪宛在。畫十二。羅裙摺。似妒纖趺紅透。漲滿深深葉。憑偷覷。孤鶯涼肩側。

水龍吟 漳蘭

海天萬里清秋。一帆吹入騷人夢。蠻烟乍洗。嶺雲未卸。江南新種。細襯苔衣。嫩澆茶乳。消炎清供。向黃磁斗裏。護花翦葉。冰心在。涼浮動。辛苦年年培壅。鬪春芽。帶泥分送。姿生韻外。香留笑裏。故人情重。榕驛光陰。荔鄉滋味。漫催塵鞮。寄相思異地。滿空風露。聽瑤琴弄。

賣花聲 題羅兩峯仿馬湘蘭畫蘭

烟雨滿汀洲。香草誰收。殘煤替寫秣陵秋。馬四娘家何處是。金粉添愁。名士在揚州。也擅風流。可憐辛苦學雙鉤。名署花之花尚在。白了僧頭。兩峯自號花之寺僧

水龍吟 珠蘭

麴塵冉冉新秋。散來十斛量珠手。蟬紗靜掩。蠻絲細裊。幾分香逗。蜂冷吹黃。鮫愁灑碧。露華低綴。伴闌干眉月。乍濃還淡。涼波浸。疑無有。道是含苞未透。到開時。疏痕依舊。搖花瑟瑟。會無花意。自成清瘦。茗片回甘。爐熏送暖。一般消受。愛晚簾翦去。釵翹顛影。共明璫溜。

國香慢 紅蕙爲袁綬階廷樞賦

空谷苔荒。歎樹來百畝，都染烟霜。誰經莫釐峯下，重訪遺香。漫道施朱太豔，怕瑤佩、冷了瀟湘。相思見顏色，點染微波，暈入斜陽。素心依舊好，更丹誠輸與，箇裏春長。珊瑚堪架，何日彩筆分將。不是胭脂爭買，賺時眼，賞到幽芳。騷人賦新就，一朵初來，雲想衣裳。

秋霽 牽牛花

深瓊浮涼。看裊向筠枝，秀蔓凌亂。烟洗輕綃，露分宿淚，尙帶弄梭幽怨。晚陰庭院。料應識得黃姑面。月影轉。時有睡花吹碧，玉壺濺。還又小步，緩逐流螢，悄來花間。風葉交顛。盼玲瓏、疏籬曉色。銀河清淺，尙情戀。休悵午晴容易捲。愛短橋外，只見滴翠搖青，聽延秋紡，一蛩吟遠。

思佳客 湖上看桂

黃雪空山容易催。訪秋趁曉踏蒼苔。露無聲墜花先溼，風在空行香已來。仙路引。

梵宮開。廣寒無此好樓臺。闌干多是前人倚。金粉斜陽看幾回。

念奴嬌 庭桂方盛冷雨連宵黃雪霏霏零落可念

作成淒楚。正小山詞客。初歸吟舸。夢裏亭亭丹白想。又被簷聲驚破。糝入苔根。飛和露脚。金粉闌邊沈。前身月裏。一眉愁被烟鎖。勞伊招隱篇成。扶疏樹底。那得幽人坐。涼霰滿庭秋又老。賸有白雲留我。洗琰延遲。翦燈聽早。漫數張家課。禪機應省。木樨香已吹過。

疏影 都下菊花以憫忠寺爲勝余購得數十本雜置几案間依燈就月光景徘徊詞以賞之

疏香暗逗。向袈裟初地。妝點重九。分到紋窗。小隱紗廚。消盡尋常奠酒。伴我無絃琴趣外。淡極問誰能偶。任帽簷。側處斜簷。獨向西風搔首。休悵故園千里。但相對持螯。風趣還又。淺醉瞢騰。臥看涼花欲與南山爭秀。么蟾送影。渾如畫。畫不就。滿屏秋瘦。待下簾。重覓冰棱。還待翦燈時候。

浣溪紗 湖上看芙蓉

粉本黃筌活脫描。西風占斷好溪橋。鷺鷥香裏一肩翹。冷豔不禁窺水瘦，醉痕生怕受霜消。夕陽采采趁歸橈。

花心動 蠟梅

風雪殘年望江南。飛來麴塵如此。月上淡黃斜壓苔枝。只辨幾分香意。故山無處尋么鳳。更休認繁珠曾綴。但爭得藏嬌屋住。夢雲飛墜。總是檀心蜜蒂。偏梵磬圓時。小唇堪比。烟暈水邊。酒暈燈邊。過了晚寒天氣。壽陽妝儘翻宮樣。料應悟橫陳滋味。待涼雨。梅丸熟時試比。

一枝春 野花和味莊

白白紅紅道憐伊。怎莫喚伊名字。拖筇繫榜。看遍夕陽村裏。蓬茅夢冷。歎一樣美人身世。多謝是蜂蝶頻來。畫出幾叢憔悴。閒隨綠蕪青薺。算年年開落。都饒生意。朱欄繡檻。怕也綠陰能替。柴門笑語。任村女亂簪高髻。還勝似唱賣春風。半肩巷尾。

臺城路 花魂次汪劍潭端光韻

曉雲不鎖晴紅夢。飛飛綠陰濃處。小住留香。幽尋入幻。一片潛迷苔廡。東風激楚。漸酒醒羅浮。微聞膩語。薄命因緣。者番寒食問誰主。空階時更凝佇。縱相思覓著。難共春訴。恨斷烟中。情銷雨外。誤汝休嫌萍絮。韶光老去。料飄泊生涯。分歸塵土。明月何來。那人深院宇。

是誰露葉風枝外。和香喚回吟紙。影弱旋離。情濃未醒。蹴起烏衣雙尾。芳華捻指。笑欲去還招。枉勞癡婢。化作巫雲。前身都聽逐流水。相思翻自此始。算樓頭陌上。來往堪擬。十尺朱旛。幾分斜照。倩女同盟生死。傷心句裏。道蛻盡胭脂。怎拋青子。雨黑燈昏。杜鵑啼未止。

游仙去去尋蝴蝶。相逢共談離索。悟徹塵根。拋除宿蒂。一任花開花落。三生舊約。漸杏雨都消。梨雲安著。色相先空。肯沾泥水被禪縛。餘寒偏又漠漠。歎光陰可戀。春也非昨。碧落何期。紅顏此度。問到情波難泊。燒燈小閣。照殘睡沈沈。算伊棲託。灰盡

緋衫。夢香留枕角。

幾番惆悵檀房別。回頭露華零亂。酒冷澆濕。苔荒暝早。暗被游絲牽斷。妝餘半面。甚聽了金鈴。又添嬌顫。昨夜天涯。黯然水驛與山縣。良時休付浩歎。尙情難割處。香影縈絆。霧裏迷藏。風前捉搦。春色留伊嘗徧。紅愁碧怨。賸一縷靈緣。畫圖重見。環珮誰聞。滿天飛雨片。

長亭怨慢 寒鴉

問何事鴉兒。鴉女。撲雪偎烟。冷暄高樹。踏遍枯枝。半林殘葉。墜如雨。翠鬢勻染。看陣陣。和雲去。日影滿。昭陽。怎不怕。玉顏相妒。旋住。繞叢祠。軋軋。亂著墨痕無數。荒陂野水。只寒月。照伊棲處。記破曉。幾點蒼茫。倩誰寫。蒼山行旅。偏醒枕。愁聽。啼徹紋窗難曙。

解連環 孤雁

斷烟零雨。寫離情一點。影沈天宇。漸晚來。燈暗長門。和落葉荒涼。悄移柔艣。覓覓尋

尋念昨夜，蘆花深處。嘆關山路杳，剗地風吹，頓折箏柱。蕭條獨依遠渚。正背壓吳霜，欲飛還住。聽幾番、喚弟呼奴。惱千里相思，夢醒無據。爪印年年，料不是、雪泥留住。到歸時、雲水蒼茫，者情更苦。

逍遙樂 鵝

遙趁柳花波軟。蛻出新黃，惟有酒人堪伴。浴浦灘褰，舞日翻翻，獨倚欄干頻翫。一痕雲浣。怕丹青、欠寫茴香。易迷溪絹。合讓與山陰。妙墨先換。爭得么荷新展。鏡中偷來側眼。前村漸斜照。芳草外，更相見。清饑笑太守，紅掌兩雙空羨。還愁雪翎摧易涼。生秋扇。

百字令 鳴

桃花開了，漸春江暖處，饒伊先覺。綠染千頭，渾不辨、透出幾重晶箔。呬呬呼名，呬呬逐隊，小占烟波樂。闌干放鬪，竹枝弓且休拓。空記浴罷蘭湯，紅裙笑裏，誰踐年時約。夕照柴門歸陣晚，水口一篙斜掠。繡引灘長，睡支爐穩，脈脈平生託。僧廊黃靠，幾

株還認卑脚。

臺城路 駱駝

休猜馬背如何腫。形容似渠堪數。老衲參禪。野人種樹。更有零丁尋父。涼沙過雨。看五五三三。柳陰閒住。古錦模糊。放晴天氣夕陽度。聲聲吹動戍笛。惹酸嘶暗答。關塞催暮。軟步蹒跚。奇峯突兀。人影閃來高處。黃金鑄汝。待酒熟蒲桃。一尊濃貯。醉捻鞭絲。夜深馱夢去。

雪獅兒 曝書亭集中有雪獅兒貓詞三闋。蓋和華亭錢葆飭作也。吾杭樊榭尺牘兩先生相繼有詠其攜撫也富矣。暇日戲仿其體。復成四章。凡諸家所有不引焉。

女奴癡小。看蜂蹴果。東風時候。相對瑤姬。眼底金波微溜。紅裙綴否。悄避入。畫裙前後。生怕是。辛苦三眠。蠶簾廝守。但要獅毛長就。傍臨安朱戶。那愁消瘦。醉醒膏騰。約略香生織口。花陰坐久。怕損了。沿階苔繡。娛永晝。結伴鄰家閒走。

宛然飛白。荷塘浴後，輕衣雪浣。穩臥斜陽。莫道真如我嬾。雲鄉夢轉。嘆一枕游仙都幻。憑風雨。化龍歸去。肯隨雞犬。翻笑江心紙翦。甚金山繞去。更增雄健。卜日攜來。贏得頭銜先換。銅花祕玩。料慣惹無魚嬌怨。重相見。待報杏林春宴。一肩香軟。移來畫裏。無多家具。小樣麒麟。對客幾番稱汝。妝臺慣住。莫便把燕支勻注。還留待。滴粉如霜。寫他眉嫵。除卻宜和舊譜。笑外間依樣。幾人堪數。兩點危星。空照安身高樹。清琴罷鼓。問卷軸。倩誰牢護。聽兒女。布被蒙頭學取。問西來意。蓮花世界。同看經藏。撤講僧歸。細聽禪關敲響。伊蒲供養。那用覓魚苗分餉。憑飽去。撩天四脚。蒲萄茵上。休弄紅絲標杖。便粉鼻呼來。已空情障。圓滿三生。舊事廬州誰訪。芙蓉錦浪。道只有好秋堪賞。開菊釀。重對綵糕無恙。

齊天樂 蟬

翠雲不鎖游仙夢。年年蛻餘催喚。露額垂綏。冰鈿刻鬢。愛抱柳枝微顫。絲風送緩。裊一縷殘聲。又過鄰院。不定驚魂。惹教涼韻指間換。深窗愁更落葉。漸吟蛩暗替身。

世如幻。碎雨槐邊。頽陽竹裏。訴盡故宮幽怨。秋陰滿苑。便畫到銖衣。也增淒惋。似磬
飛來。踏莎山寺晚。

綺羅香 螢

織尾拖黃。輕翎搖綠。晚涼人在庭院。剗地風生。颺出一痕如綫。漸星星。豆葉籬根。驀
閃閃。藕花池面。明現。恰更闌。月黑涼燈新翦。漢殿銅仙都換。問影浣鉛波。淒涼誰
管。照淚長門。舊恨那禁秋扇。已分隨。斷蘚零苔。怎窺到。相思紅篆。撩亂。牘繁華一夢。
蕭蕭隋苑。

齊天樂 蛙

綠陂紫遍。荷花草。爭跳活東無數。絮影烟迷。苔根水長。欲問官私難據。喧呼聽汝。乍
闌荇翻萍。釣船來路。閣閣連宵。黃梅時節一燈雨。膨亨空負此腹。想池塘鬪罷。猶
蓄餘怒。兩部風行。千村月落。莎際坐傳更鼓。催耕又苦。記稻葉涼邊。吠聲如許。瘦笑
詩人。食單曾點否。

蝶戀花 桂未谷馥屬題兩峯畫蝶

金粉六朝衣未褪。春去春來，只帶斜陽恨。綠到淒迷寒恁忍。落花爭向裙腰認。借
與麝煤添筆潤。可似輕紈，撲著和香印。夢裏江南歸定穩。紫荷草長飛成陣。

花心動 蜻蜓

溪外風輕移涼影。一路斜陽遮黑。點水有痕。飲露無聲。款款不離香側。折枝花底春
能瘦。描新樣。淡金顏色。問相戴。飛來意穩。幾時曾識。釣後柔絲慣立。任尾籬萍根。
翠梢微溼。還向鬢邊。一翦撩雲。不怕袖羅承得。並頭前夜銀釭話。搖珠暈。眼波同碧。
尋莎岸。重待暝愁細織。

齊天樂 蟋蟀

蒼苔難洗年年怨。宵來暗聞秋語。古磴梧桐。女牆薜荔。併作一番淒楚。疏風碎雨。問
芳草王孫。總憐遲暮。鬢影催寒。幾絲愁到舊機杼。呼燈頻向牖外。正香生茉莉。來
按吟譜。嶺亂荒烟。堂閒夕照。花鳥西湖誰主。欄干罷訴。認菊葉垂邊。夢搖涼露。乃尺

聲遲。夜深人意苦。

又 絡緯

一聲響續。繅車發。斜陽乍催秋晚。豆架花垂。瓜棚蔓絡。風露憑伊吟遍。宵長韻短。料織就情絲也。應淒斷。醒枕三更。幾痕愁向鬢邊換。樓頭無限慘切。惹流黃機上。中婦頻嘆。翠股敲烟涼鬢。曳雨忍道深閨都嬾。餘音乍轉。似說與風詩。綠衣幽怨。譜入哀絃。夜闌燈更翦。

桂枝香 銀魚

芹芽新長。乍密密疏疏。來乘春漲。難避千絲細。雞落花黏網。天然二寸輕跳雪。正斜風亂鳴漁榜。倩描粉本。點睛堪認。者般纖樣。只合作。針芒想像。笑稚子敲餘空釣。寒浪雨後烟邊。誰向舵樓分餉。水晶名字。須鹽配。最相思。櫻桃湖上。夕陽曬徧。和羹滋味。夢回吳漿。

又 蟹

空江月黑。訝譜到爬沙。玉絲淒急。冷入漁汀帶露。幾燈紅滴。吳淞一幅描難就。暗招
來。落潮風色。更無人處。銜蘆索索。亂搖涼雪。早催動。西風信息。惹多少相思。無腸
貯得。悵望樹頭纖爪。故人新別。尊前皂莢。閒風味。最難忘。踏燈時節。買春重醉。江湖
舊譜。老饕能說。

惜黃花 看燈蟹

秋燈會照。瘦扶寒蓼。訝相逢。又春風。賞燈筵早。酒外擘香臍。樣比金錢小。問買夜。何
人籠到。橙齋徐搗。糟邱堪老。縱無腸。也難忘。泖湖香稻。元夜雪深深。預報豐登好。
聽一曲。爬沙新調。

桂枝香 蛤蜊

西風野水。送一羣田雀。都消纖毳。影落斜陽。占了鱸鄉十里。罨泥人在涼烟外。帶青
萍。兩竿收起。連天菰葉。橫塘舊路。夢回重記。記會識。蟾兒滋味。但解得清饑。不知
許事。恰聽隔牆低喚。賣來江市。青帘有約。春宵話。試微鮮。最宜殘醉。嫩黃新漉。酒燈

上候。價休嫌貴。

鐵撥餘音

滿江紅 渡黃河

滾滾黃河。繞底柱。一支而入。經千古。龍愁鼉憤。可憐陳迹。鐵券鑄成如帶誓。金隄費。盡防秋策。讓君平。縹緲說神仙。支機石。心與腹。投膠結。清與濁。投膠別。喜波瀾不起。桃花春色。一片健帆香象渡。中間圓溜神魚折。供書生。五斗坐船頭。蒲萄碧。

思佳客 涿州

麥葦茸茸綠未齊。田家二月放春時。十郎冢畔鳴腰鼓。三義祠邊唱竹枝。寒脫樹。雪融泥。晚來晴色鳳池西。么蟾瘦到難描處。也學文殊淺淺眉。

金縷曲 虎邱

虎氣潛珠阜。賸千年。槎枒石骨。踞風而吼。其下縱橫森積鐵。一劍蛟龍欲鬪。待說與。興亡時候。畢竟青山誰是主。只宮花。苑鹿分先後。歌白紵。試回首。至今喚作繁華。

藪有幾處。紅船弄水。黛蛾傳酒。三尺斜碑殘照落。搖到真孃墓口。看芳草。羅裙依舊。風雨黃昏山鬼泣。苦秋聲。先撼梧桐瘦。西子恨。更添否。

滿江紅 五人墓

聽白楊風似當日。市中呼嘯。灑不盡。滿腔熱血。亂生碧草。毅魄英英三代直。鼠聲暗。啾羣奴小。響寒沙。博浪一椎鳴。全秦掃。委鬼也。冰山倒。茄花也。秋風槁。望白蓮涇畔。听然而笑。屠者共尋朱亥里。義聲不讓田橫島。感行人。四字耀豐碑。斜陽照。周忠介墳在白蓮涇距墓六里

又 姑蘇午日

佩艾簪蒲。笑兒女。者番奇服。費多少。同心綰結。命何能續。往事總如炊黍過。今人那不離騷讀。只年年。風景數端陽。傾醕醪。嚴陵會。江亭築。長安節。蘭湯浴。又金閨勝地。旌旗照目。臺上不逢麋鹿走。波心但見魚龍逐。嘆招魂。無分到靈胥。驚潮蹴。

揚州慢 廣陵懷古

有正味齋詞

銅螿秋衾錦帆春水。可憐幾日繁華。送斜陽一片。直到玉鉤斜。竟圓合。雷塘舊夢。兩家山鬼。同話天涯。惹些些碎碎涼螢來認衣紗。李花又落。況楊花飄泊誰嗟。料種不成陰。吹原是絮。愁見瓊花。早識安公子。曲亡國恨。恁到琵琶。賸隄前老樹。都應啼煞棲鴉。

滿江紅 題維兩峯聘鬼趣圖

索索而來。驀吹得。燈光如豆。應怪爾。青紅塗抹。鬼都生肘。滿載一車藍縷。選空餘兩隻錢刀手。捲陰山。幾陣紙灰風。無生有。書生狀。騎狸走。女郎態。描蛾瘦。數美人名士。幾堪回首。地獄本來隨相變。面皮尙記觀河皺。有十方。香米飽伊無。中元候。跣脚蒙頭。是五趣。中間來者。但散入。閻浮提裏。那分高下。結柳曾勞韓子送。移書屢被東方罵。奈今番。咄咄逼人何。兒童怕。青荷傘。肩頭亞。白楊火。風中炮。又零丁帖。子。招魂纔罷。枯腊難充黃父飯。長身逃得鍾葵鮓。被先生。碧眼一雙圓。淋漓寫。

蝶戀花 題盧竹圃謨小照

赤日此中渾不漏。跣足科頭。獨坐宜清晝。俗已全無肥則否。花豬頓頓須醫瘦。太歲明年聞遇酉。預卜豐年。長養琅玕就。拓取侯封千戶舊。一尊來乞平安酒。

賀新涼 中元節觀盂蘭盆會作

茜帽金花帖。掣圓鈴。郎當而語。滿街明月。大會無遮。今夕好。點點明燈欲滴。更唱出。酸文嗚咽。故鬼漫驚新鬼大。捲紙灰。和影如蝴蝶。人世夢。共淒絕。西風纔過穿針節。記中庭。冰瓜雪藕。夜分會設。人哭人歌。逢此月。忙殺生離死別。漸陣陣。新涼侵骨。燐火一場。僧去早。騰波心。獼傘沈荷葉。功德水。似烟滅。

齊天樂 題施耦堂侍御學濂豆棚閒話圖

有耕而釣而樵者。先生自居爲圃。大扇寬鞋。科頭袒臂。招集閒鷗三五。花今樹古。總攔入吾廬。一棚風露。豆莢纔肥。薦新隨意。井華煮。其中或吟或謔。或酸然說鬼。颯然談虎。一半兒歌。三家村語。更雜琵琶盲女。相忘爾汝。任衣絡青蟲。夜涼如雨。有約休歸。待歸須夜午。

又 再題紅衣釣師圖

緋衣算是人間貴。誰能貴於漁子。風月無邊。江山自在。笑盡尋常朱紫。閒情料理。且大酒肥魚。煮來船尾。身似楓人。一秋常傍夕陽醉。珊瑚竿也慣把。也會踏金鰲。會跨紅鯉。鏡冷芙蓉。船停罨畫。不道老之將至。殘霞樹底。看孤鶩飛飛。與盟流水。悔殺蘆花。白頭烟雨裏。

金縷曲 題蔣心餘先生臨川夢院本

萬事飄如絮。驀吹來。先生筆底。夢都堪據。不怕殘鐘輕打破。機上穿成縷縷。莫認作。荒唐雲雨。一段因緣文字起。續離騷。半部精魂語。真共幻。論千古。宛然玉茗花前句。試喚起。臨川點拍。也應心許。三十種眠全解脫。纔識菩提覺路。引蝴蝶。翩翩而舞。世上儘饒。鼾睡漢。問何人。許入梨園譜。纔讀罷。夜三鼓。

又 同沈梅村夜飲感懷胡竹城應煌

十斛梨花凍。道今朝。燒燈捉醉。飲真須痛。獨出蒙輪當一隊。不怕鄒和魯。閑。忽聽到。

柝聲淒動。落葉滿窗斜月黑。有故人。吹入天涯夢。浮大白。舊曾共。幾年慘抱西州痛。尚孤負。杜鵑寒食。紙錢相送。數到習家池上客。中壽爾偏木拱。莫化了。陶家新甕。酒醒兩人同不寐。恨白楊。窗外誰家種。風颯颯。答愁諷。

滿江紅

同人步出郭外飲村舍而歸

子好游乎。吾與子。且言游意。念策牡。乘堅而出。何如芒履。背負大瓢歌哨遍。路穿方罫看田戲。有野雲。一片就鷗眠。呼之起。西風冷。斜陽霽。二分屋。三分水。見一竿斜插。青旗無字。楓在紅衣圖裏染。酒從黃葉聲中遞。算甕頭。臥去有人扶。何妨醉。

水調歌頭 滹沱河

春草一亭綠。麥飯幾家烟。人渡滹沱河口。去去夕陽船。往日事傳銅馬。今日沙埋鐵鏃。浪捲沫花圓。古廟亂鴉語。大樹憶何年。宛城走。雲臺築。赤符延。有箇故人天際。作壻傍神仙。不羨君王九五。不羨星辰四七。高枕釣竿眠。富貴等閒耳。危度亦堪憐。

南鄉子 桃源

有正味齋詞

雲捲一村晴。芳草裙腰畫不成。絃索吹來茅店裏。東了。小伎楊花唱好聽。春水夜來生。誤殺尋源艇子行。幾樹野桃開放了。清明。閒看風鳶放出城。

滿江紅 乙巳暮春重過揚州作

十載樊川重問到。揚州風月有多少。舊家燕子。可憐離別。小海唱來三月暮。大江東去千秋咽。賸紛紛。飛雪滿蕪城。楊花熱。愁未了。歌桃葉。夢未醒。尋蝴蝶。嘆繁華自古供人一瞥。仙鶴零丁游子在。竹枝縹緲餘聲歇。待鬢絲。禪榻話前因。茶烟活。

摸魚兒 不到西湖八年矣山水相逢彌增感慨醉歌此曲以寫余懷

怪平生。愁花愁鳥。如何偏爾情戀。爲戀水光山色好。宛似故人青眼。柔艣喚。早幾載相思。撇向烟波遠。前緣更踐。合畫我三生。騎牛渡口。丫髻一叢短。閒情惹不少蘋花舊怨。吹來還又尊畔。雲窗霧閣尋常夢。說與白鷗都倦。腸欲斷。歎故侶。山頭半結棠梨伴。西風又晚。漸門近錢塘。背馱紅日。歸路踏莎懶。

賀新涼 揚子江阻風

塔上鈴何語。颺簷端、聲聲唱出。公乎無渡。今日孟婆能合皂。截斷中流萬艣。只一派、浪花掀舞。辛苦江豚招且拜。料我生、鷁退寧關汝。船尾坐。酒堪煮。矯然白鷺翻濤起。看星星、飛來碎沫。滿身如雨。莫是三山仙客會。搬演魚龍舊譜。定笑我、茫茫羈旅。那得使船如使馬。算不如、竟打回帆鼓。風且息。勸君住。

百字謠

陳伯恭同年崇本屬題迦陵先生填詞圖

公眞健者。記昔日、詞壇交推青兕。醇酒婦人供跌宕。學得信陵生計。筆禿枯毫。衫橫老淚。誰曉琵琶意。功名五十。馬周頭早白矣。嘯向玉宇瓊樓。欲乘風去。只有髯蘇比。一百年來朋輩盡。今日玉梅花底。井水依然。旗亭故在。莫說先生死。安排鐵笛。玉龍夜半催起。

滿江紅

朱春橋方藹舊有觀演邯鄲夢詞一闋今刻在小長蘆漁唱中余在

都下偶閱是劇卽用其調賦寄春橋

過眼曹騰纔信了。當場顛倒。悔輕被、文人提破。天工應惱。冠帶一番烏爨弄。箏琶幾

曲華胥調。比長房、藥市興如何。壺中跳。榮辱事、難憑料。烟雲意、誰分曉。走邯鄲道也。故人不少。人哭人歌傳舍換。夢來夢去神仙老。問與君、此段甚因緣。拈毫笑。

又 題畫

一片清秋也不出。倪黃家法。只寫得、絲絲渺渺。丹黃叢雜。近水人家苦氣入。倚天峯影鑿頭插。聽前溪、如有葉聲來。樵人踏。林簇簇、炊烟合。波淼淼、蘆花夾。置余身此地。水雲堪狎。老樹西風。揩癢馬。荒陂斜照呼雛鴨。問抱琴人出。恁忘歸。柴門闔。

金縷曲 楊丈硯雨歿五年矣。令嗣蒔梅。世鯨檢遺墨中得枯樹一幀。尙未跋。

染屬陳熙臺表叔世兼以雪景補之余述此詞

草滿黃墟矣。歎幾年、蕭蕭槭槭。樹猶如此。寒透鴉心飛不去。凍沍一池墨水。誰解把、梨雲喚起。五度春風難得見。算先生、白鳳歸來耳。烏帽影、暮烟裏。探梅重說皋亭事。也只是、迷迷一片。月明人醉。今日替君重著筆。捲得珠殘玉碎。早莫辨、野橋山寺。蟹爪數行埋未盡。剩詩人、驢背經營意。持示我、灑清淚。

又 題沈梅村洗硯圖

一片無情石。慣磨人腸枯骨削。直教頭白。笑破雙雙鸚鵡眼。終日雲烟狼籍。我欲就。種花人說。筆底烟雲驅策慣。洗瘡痍。又要波千尺。憑此硯。灑膏澤。功名試數甘棠跡。已不負。龍泓老友。卅年相識。稚女嬌兒拈筆弄。也學阿爺此癖。且莫問。何時拋得。縱待他年婚嫁了。更買田。須畫林泉策。千古事。寸心積。

百字謠 夜宿清河大風

飛空萬鏃。射林間怪石。吼聲如虎。野店天寒窗紙裂。落葉繞燈而舞。簞箒歌酸。琵琶調啞。月黑高高樹。龍愁鼉噴。塞沙吹灑腥雨。那管喚弟呼奴。白狼河畔。征雁回翔苦。和我雄心齊捲去。撼折當年銅柱。馬齧枯萁。狐嗥破壁。夢逐荒城鼓。喧慙耳後。不知馳獵何處。

過秦樓 懷柔道中

撲面風尖。壓裝雲重。一騎鞭絲孤裊。笳悲塞苦。笛怨邊寒。白盡滿天沙草。爲問廢壘

前朝蒼莽空山。有誰憑弔。羨太平圖畫。橫騎牛背。牧兒閒好。休更數、敕勒歌豪。尉遲杯滿。無限古人懷抱。荆卿畫地。鄒子談天。都係者邊斜照。誰道今日可憐。城角黃昏。暝鴉吹到。且尋余宿處。前路犬聲如豹。

無悶 出古北口

垂者雲耶。立者鐵耶。相對崢嶸萬古。繞一髮中原。自成門戶。照出牆邊冷月。怕更向、秦時從頭數。斷鞭籠袖。回身馬上。但看來路。行旅。亂山去。問酒肆誰家。冒寒沽取。任落葉呼風。吼聲如虎。高歌出塞。盡捲入、丁丁琵琶語。待射侶、相約殘年。爲道短衣休誤。

珍珠簾 溧河大雪

癡雲悄逼龍堆晚。釀尖風。密灑銀沙。凌亂匹馬。犯寒來。詫一番初見。帳裏琵琶翻舊曲。滾不斷。白翎天半。堪翫。更塞樹無雲。萬花春捲。當此縱飲須豪。便市高酒價。貂裘能換。曼衍戲魚龍。笑眼前都幻。起躡松根。尋虎跡。要血洗。今朝腰間箭。誰伴。看莽

莽羣山碎瓊鋪滿。

瑞鶴仙 羅漢峯

問科頭袒臂。胡不肩短錫。不攜隻履。津梁想疲矣。只無聞無見。無嘖無喜。西來萬里。更甚時。還證初地。看烟寒。月黑空林。虎嘯懵懂如睡。其下。灤河暗繞。疑是禪心。化成空水。萬緣淨洗。觀餘面。皺難記。賸青蓮華在。莊嚴多寶。白雲千丈湧起。響天風。咫尺相對。磬捶影裏。面對磬捶峯。卽水經注所謂石挺也。

尉遲杯 月夜同宋芝山飲郭參軍宅

招明月。萬里外。來就清光說。人生見汝先愁。只照年年離別。今宵對酒。更塞上。相逢恁愁豁。喜參軍。肯恕臣狂。一場同舞回鶻。休道壘塊難消。便壘塊消時。已老豪傑。故李將軍猶在否。能幾射。青山石裂。賸沙外。千行冷雁。空爪印。長城古時雪。惱醉來。如意提攜。唾壺之口敲缺。

送入我門來 戊申除夕

有正味齋詞

百五十五

熱鬧椒盤轟騰羯鼓。青氈坐得人孤。短蠟多情也替淚模糊。三杯婪尾澆無益。早鬱壘胸中成畫圖。數人間苦樂。危臺避債。深院呼盧。況有天涯二老。兼之稚男碎女。幾度思吾一段鄉愁。難入綵箋書。爆竹誰家爭餞臘。暮閃閃來燒心血枯。更松明火旺。熬銀煎雪。吹上頭顱。

滿江紅 觀射

毛血縱橫。記獵騎城南大會。曾慣聽。餓鷗聲叫。仰頭雲外。金僕姑從天上落。銅將軍向歌中賽。嘆于今。半是失弓人。何其憊。舞蔗杖。渾難再。識丁字。安能賣。麋皮毬響起。故人宛在。妙技爾誇揚可中。雄心我亦蒲之愛。恍殘年。射虎短衣行。飛狐塞。

又 何春渚瑛以書來問近狀賦此答之

再拜覆言。謝足下。加餐來教。念近日。閒身如竹。平安堪報。結淨只貪鞞鐸供。療飢不待軒光竈。但黃昏。洗足睡麴麴。忘天曉。裁錦段。無機巧。持算子。時顛倒。任錢刀作橫。我何須校。肥瘦靜看三蠹訟。官私戲判羣蛙鬧。但梅花。種就我應歸。期同調。

百字令 登天津望海樓

青浮窮髮。帶腥風。颯雨吹來寒色。人傍闌干。天半迴。天外怒濤如立。烏兔雙飛。魚龍萬變。混漾連朝夕。誰乘高興。蜃樓能倚吹笛。回望礪石蒼茫。斷虹飲處。一片光明滅。萬頃瓊壺搖暗綠。金鷄擘來都裂。魍魎猖狂。馮夷鼓舞。咄咄如相逼。把杯遙酌。估牖飛上蝴蝶。

滿江紅 長田村觀蠶花戲

田野春閒。問誰試。隨身竿木。漸打徹。聲聲腰鼓。看場人簇。大婦慣爲烏爨弄。小姑娘纔過。油花卜。賽馬頭。絃索一般清。迎神曲。食幾葉。紅蠶熟。收幾箔。銀絲足。早郎當舞罷。日斜茅屋。圖書宛然田戲好。流連那得秧歌續。聽餘音。縹緲竹枝遺。波搖綠。

沁園春 題查蘭圃同年堂月影扇頭

似此圓光。非幻非真。在水中乎。記小時不識。玉盤呼汝。前身定是。碧落尋吾。捉處原空。指來卽現。盪入懷中成一珠。渾相印。道扇圓如月。月也人如。今宵伴我非孤。且

米汁相邀醉此壺。漸玲瓏悟境。清涵竹柏。分明毫相。白遍江湖。犀角窺穿。兔毫吹起。勘破禪家三昧圖。涼風早。任一輪收去。影也都無。

水調歌頭 題友人學稼圖

江水聽吾語。何事不歸田。十雙須買陽羨。等辦束裝錢。且讀齊民要術。有日荷花紫草。同坐夕陽邊。去便耦耕去。如願定何年。磨不瘦。擔不怕。荷鋤肩。不如將就料理。早向五湖烟。有箇山妻餉飯。有箇稚兒叱犢。儘勝客窗眠。讀書忽長歎。起立望青天。

瑞鶴仙 七夕

問天天不語。只情波脈脈。盪搖今古。星妃渺何許。道節是雙蓮。怎禁心苦。回頭極浦。算又過。西風一度。看樓前。淺月深燈。涼照幾家兒女。延佇。圓蛛網結。靈鵲橋迷。又催機杼。零絲斷縷。愁無著。夢無據。甚一條銀漢。清清冷冷。總是紅牆隔住。怕來朝。花顫牽牛。賸飄淚雨。

賀新涼 五十生日有感

五十平頭矣。歎無端。鬢毛點雪。飄蕭如此。歲歲文章供奉。那免葫蘆樣子。但瘦馬、東華塵裏。賸有頭銜冰共冷。笑鸞眠。圓嶠何時起。人轉羨。處清秘。秋風正擬尋歸計。早幾日。思親夢遠。白雲千里。負米尙知腰脚健。只要茅堂預置。料河渚。經營猶易。種就梅花還釀酒。待他年。補作萊衣戲。增馬齒。祇慚耳。

又 題家山尊孝廉南樓卻扇圖卽送其之山左

猜了春燈謎。袖香鞭。東風送去。壻鄉千里。那道滑稽成故態。今日居然齊贅。乍一顧。盈盈扇底。多少五銖爭撒出。笑相如。賈賦錢難比。催綵筆。句重試。關心偏是登科記。甚匆匆。歡筵纔罷。別筵還啓。可奈杏花能冷落。孤負呢喃燕子。又打棹。藕花風裏。且學畫眉時樣好。料芙蓉。鏡下終須第。憑看取。東方騎。

大江東去 西湖蘇公祠落成同人分體賦詩余用公舊韻譜此

老髯仙去。曾管領。幾載西湖風物。今日水仙王廟近。遺句重尋苔壁。玉版禪清。花豬味俊。一瓊澆涼雪。峻嶒詩骨。晚山能鬪雄傑。還憶晴雨昏朝。淡妝濃抹裏。笙歌催

發萬頃葑雲迷舊夢。孤臆白鷗明滅。回首蠻荒。桃榔葉暗。細路盤如髮。瓊樓歸好。羽衣來弄秋月。

賀新涼 題譚子受吹簫乞食圖

笑破風塵裏。怎青衫、者般藍縷。也呼公子。怒鐵一聲吹欲裂。險把魚龍喚起。道今古、那非游戲。酒肉朱門同一例。到墦間、便短英雄氣。風颺去、紙錢碎。何妨跌宕吳門市。又何妨、歌姬院內、粉圍香倚。拓益年來吾亦慣。學得阿難生計。只瘦骨、錚錚如此。曲罷蒼涼能和汝。儘蓮花、唱落秋江水。殘杯好、且同醉。

壺中天 題舍弟錫麟石門聽瀑圖

甚時醒耳。歎身世、多被箏琶催老。爲覓西堂春草夢。忽有清音飛到。細或蛇修。大真龍吼。萬籟生苔竅。雲驅霧捲。海風移過三島。休論往日青田。讀書臺上。雷雨關懷抱。知汝壯心渾不已。要共青山呼嘯。九里松長。三天竺近。但喚歸來好。幾間茅屋。聽秋同翦燈小。

金縷曲

張東畬應均。以二端溪硯贈范支山。同年來宗并繪贈硯圖以紀

其事。今東畬歿矣。支山讀畫懷人有感。今昔索余爲此詞以述之。余將北行。自願生平不能硯耕。以老飢驅奔走。悵悵於懷也。

來往成幽契。寫蕭閒、吟聲屋內。屐聲林裏。兩度紫雲煩剖贈。穩稱書生生活計。把墨浪、千層吹起。氣合空山風雨急。感精靈、片石盟生死。滴難盡。蟾蜍淚。憶君芸館翱翔地。數三千、翰林風月。露華涼洗。十載歸耕瑤草長。贏得良田如此。嘆我亦、風塵老矣。鸚鵡依稀偷冷眼。笑書堆、難覓青燈味。飢驅去、又千里。

五福降中天 查蘭圃夙耽禪悅。以家慶圖屬題戲爲拈此。

團團共說無生話。尋思是何因果。竹報平安。林成堅固。著得跣趺人坐。情緣勘破。便何肉無妨。周妻亦可。活現如來。拈花笑口者般哆。逢場原是戲劇。其隨身竿木。難道真箇跳出葫蘆。打開窠臼。不怕毘嵐掀簸。珠圍翠裹。蕩一片香光。此中留我。米汁須分。玉梅三九過。圖中多畫梅花。

金縷曲 題楊米人通守瑛觀津祈雨圖 壬子歲畿輔旱甚時米人攝武邑

事聞衡水有老農楊姓者能祈雨因延之來於東郊設壇以几爲臺以蓆爲
城臺凡十三級老農立其上焚香頂禮米人率其同官柳纓草履齋宿于壇
三日甘霖大霑米人因繪此圖而屬同人題詠以紀其事

疊几紛無數。儼通天。一臺高築。上迷烟霧。玄武蒼涼旗十丈。遮得扶桑欲暮。待海上、
招龍而語。沸耳潮音驚夢醒。探神珠、齊向喉中吐。回翠色、滿禾黍。由來感應誠堪
據。束先生、請天三日。報之甘澍。看到丹青先快意。獵獵風頭起處。便草木、也知飛舞。
尙有輕雷花外碾。賽豐年、預打迎神鼓。真一卷、活民譜。

又 翁覃溪前輩方綱摹文信國與吳架閣三札架閣裔孫蘭雪孝廉嵩梁屬
題

高揭勤王幟。早當筵、屏除聲伎。激昂而起。萬里風塵籌筆驛。佐者吾家義士。同閱盡、
艱難時事。白雁橫空烽火急。要先商、庚癸軍中謎。祈嘉納、羽書遞。千秋不朽惟忠

義到今日，蘭亭摹本也。含精氣，想見新田終老日。猶記咸淳甲子，只可惜黃冠人死。攬向青楓根下讀，惹西臺如意齊敲碎。分明是幾行淚。

又 方正學先生畫松今在胡雪蕉水部永煥處

一抹寒烟繞。想搖臺寫成直幹，上干雲表。其下棱棱巉石倚，莫道青苔點少。要瘦骨、同撐孤峭。此筆輪囷千古卓，肯麻衣來草新君詔。聽謾謾，怒濤獻。張來素壁風生。悄。渾不許，湘簾捲處，燕兒飛到。回首金川門外路，愁殺蒼龍夢杳。賸幾樹、之而鱗爪。一片臣心圖畫裏，戀半邊，月子陰陰照。留正氣，永宜寶。

又 高忠憲公畫像

暗搵孤臣淚。著青衫、飄蕭一葉，揭陽歸未。偌大乾坤須擔負，全仗此心不死。在忠孝兩端而已。君子原無朋黨論，汨清流，都是宵人起。真脈絕，國亡矣。一生學問求其是。想往日，夕陽亭下，那貪生計。狐鼠縱橫吾不辱。此志先盟白水。賸千古，虹蟠波際。遺疏何堪燈下讀。哭靈均，當作招魂紙。瞻面目，有生氣。

沁園春 萬廉山明府承紀年十五時曾乞羅兩峯爲畫請纓圖今幾二十載矣廉山壬子領鄉薦兩上春官不第入楚從軍頗著奇績蠻部平以議敘得官縣令壬戌春相遇吳下酒酣話舊感慨及之屬爲題此

是乘襦生是請纓人。封侯也宜。記寒營雪滿，燭體生擲。大旗日落，籟篋狂吹。名士風流，健兒身手，說與龍泉知不知。吾猶羨，羨黃驄年少，曲裏歌伊。相思幾換年時。算辛苦，真從賊裏歸。看斑斑劍上，尙留殘血，鬢鬢領下，已長新髭。鼓角餘聲，瘡痍舊痛，今日來牽花縣絲。春風快，聽白麟奇木，行對彤墀。

江上尋煙語

剔銀燈 題喻少蘭申江惜別圖

一霎旗亭秋雨。斷送那人歸去。病柳將飛，寒煙自盪，孤負此花誰主。無情南浦。料難押、晚潮留住。怎忍飄流塵土。兜惹相思無數。愁暈燈搖，淚痕衫浣，曾誓心兒相許。酒醒何處。賸葉打琵琶如語。

春從天上來 鏡聽

拂拭圓冰。要好語催來。著意丁寧。擘絲兜軟。和粉措輕。入抱已覺春生。悄瞞伊女伴。出門去。小步伶仃。漸前頭。看街簾靜。人定初更。依稀隔花風轉。又鶯鶯燕燕。遞出雙聲。樂事酬儂。歡情賒汝。抵似密約深盟。料心心照見。千里外。與證分明。乞神靈。願芙蓉再淬。人鏡圓成。

憶舊游 題潘壽生西湖訪秋圖

漸銷金歇後。渲碧平初。已帶荒寒。十里煙蕪遠。早斜陽望盡。重倚闌干。隱隱暗愁生處。瘦入一眉山。甚等伴先來。紅衣獨立。楓樹前灘。闌珊斷橋畔。漸柳褪絲絲。誰共吟攀。約略淒涼意。只分從雁際。并入蛩邊。莫訝菊花期近。風雨有些酸。只隔住天涯。寥寥空碧何處看。

湘春夜月 國初時粵溪鮑讓侯在吳門有狹斜之遊遇名妓潘湘雲遂訂密一後鮑落魄江湖久羈不返潘爲其家逼嫁老兵抑鬱以死好事者圖之梅

花樹下後崑山女畫師陸芝仙爲摹本以貽長洲胡眉峯量題者甚衆余填

此調卽用卷中汪飲泉潮生韻

問丹青幾時重掃眉痕。畫出一段清愁。漠漠只如塵。已是落梅天氣。儘柳描成黛。草長爲裙。夢難尋處。東風捲雪。花掩殘尊。前情試訴。離都迸淚。聚亦成雲。驀地相思。恁惹著。碎環零珮也。替消魂。酸香遞過。料塵來。定在苔根。怕翠羽。又聲聲喚起。催伊去也。月冷煙昏。

洞仙歌 郭頻伽屬題春山羈玉圖

頻伽自魏塘移家來杭。主於錢唐薛氏。薛有女月璘名娟者。其夫人素君愛憐特甚。視之若女。女亦以母呼之。會其父卒。頻伽將有越行。月璘遂隨其夫人共往。不數月。又聞其母死耗。悲痛遽卒。時年纔十七也。女慧麗端好。而命薄如此。是可哀已。頻伽爲買地葬於葛嶺之麓。且爲之銘。而屬其友孫君蔚堂爲圖以紀。余題是詞。戊辰四月廿五日。

明明豔骨。怎催教苔瘞。者樣漚騰甚身世。倚東風。只似笛裏梅花。花過處。無奈雲荒月碎。孝娥江上路。誰與招魂。隔了盈盈一條水。松柏認西陵。麥飯年年。還銷得。禁煙天氣。怕又聽。蕭蕭唱秋墳。子夜歌殘。白楊風起。

祝英臺近

題孫花海瀨元惜花蚤起圖

漏頻移。燈乍燼。催夢枕函墮。起拓紅窗。一綫曉煙破。料已賽得鶯先。趕伊蝶早。定不料。賣花聲過。悄無那。莫道我惜春多。偏惹春憐我。容易明朝。拚卻無眠可。只要旛卓朱高。幔圍青軟。預防備。五更風大。

齊天樂

絡緯仕女圖撫南宋畫院本

梧桐葉落秋何處。蕭蕭絡車催起。小曳風纖。疏鏗雨急。禁得蟲娘身世。相思未已。正愁緒頻牽。者般憔悴。冷逼柴門。一綉燈火夜如水。暮來還說畫院。歎光陰幾度。金粉殘矣。花鳥前緣。山河舊夢。憑著絲絲難繫。楊家妹子。定款寫幽風。授衣能記。辛苦誰憐。暮寒修竹倚。

滿江紅 題家埒城承牧可耕圖

老瓦徐斟。請聽我、爲言田意。趁一片、平疇如掌。遠風涼起。盈把秧栽梅水綠。連陂草。賽荷花紫。儘芒鞋、穩步唱農謳。斜陽裏。會看破、衣冠戲也。經過錢刀市。讓今番叱。犢煙中來矣。笠子遮頭晴亦好。稻堆齊屋。秋逾美。有蛙聲、代課五行書。吾何事。

寬裳中序第一 題鄭書常勳吳山雅集圖

圖中凡七人。程易疇。瑤田歛人。袁陶軒。鈞鄞人。錢晦之。大昭嘉定人。陳仲魚。禮海寧人。胡雒君。虔桐城人。邵懷粹。志純仁和人。書常以鄞人而寓居吳山。蓋爲之主者。七人皆以嘉慶元年徵舉孝廉方正。是日則三年夏六月二十七日。爲書常生日也。至今又十年。雒君懷粹俱已化去。書常出示此卷。爲之憮然。因題此詞以志之。

虛空逗石雨。片席莎陰能借典。難得江山勝處。恰日永瓊壺。騷人初度。虬枝起舞。待倚欄。同譜涼句。吟聲外。白雲似水。隔斷下方暑。遙覩西興前渡。早帆葉。暗催人去。

秋風容易迢遞。問落了、寒潮幾鷗堪數。畫圖朝又暮。怕認到、鬢眉已古。待何日、重編感舊一卷鶴徵補。

西子妝 余擬五月赴揚承李西齋以詞贈別未及答也萍蹤稽滯迨秋末始得成行落葉西風益難爲懷抱矣因用其韻酬之并以爲銷寒訂

陶令耽閒。嵇康習懶。不管軟蒲催挂。荷花招手向陂塘。道鷗邊。水雲能借。莎亭薜榭。且留結、年年僧夏。只垂楊、認折了還休。拚伊凋謝。渾無藉。吹老西風。又被饑驅也。獨攜破硯上孤舟。到天涯。供誰描畫。篷聲雨夜。料難忘、溪邊漁舍。計歸時、微雪山陰又下。

風蝶令 題指畫蝴蝶扇頭

逐絮鬚黏白。迷香翅拍紅。多情脫手總春風。莫笑活伊花底。太憐儂。過眼希夷捉。關心儵忽逢。但聽彈指響虛空。早已夢回、煙草綠濛濛。

壺中天 送徐斗垣同年午之漢陽用洪桐生韻

有正味齋詞

百六十九

柳依依矣。甚湘潭催去。春帆愁早。鬢影波心渾似舊。偏是閒鷗先老。鶴瘦聊騎魚肥。且食何事傷懷抱。蕪城回首。黯然空碧煙草。猶記塞雪寒埋。征衣短後。驅馬天山道。一曲琵琶留不住。畫入江南斜照。妝試燕支。歌翻勅勒。不滿江花笑。楚山幾點。淡蛾天外新掃。

買陂塘 題梁星子台陵茗精舍讀書圖

占西湖。一眉山瘦。平泉無此高致。當門隱隱雪攔住。不許游紅船艤。帷下未。恰帶著。酸寒能稱梅花味。鄰鐘喚起。更蒲褐同參。茶禪回施。修到福誰比。斜陽外。正見高枝絡紫。凌霄尤羨名字。甘棠舊澤今無恙。笏立數峯如睇。珍重意。要長養孫枝。異饌銅槃似。龍蛇字裏。道雪紙宜冬。螢燈照夏。行樂四時記。圖後有四時讀書樂山舟先生書也

賣花聲 題錢叔寶畫董姬小影

容易玉成煙。春寄誰邊。橫塘芳草自年年。那道雲魂吹不去。流落人間。眉黛似愁

牽聽說從前。桃花殘劫秣陵偏。一箇嬌嬈傳樂府。名士因緣。

翠樓吟 題嚴修能畫扇齋秋怨詞并序

夫徂東動零雨之悲。獨宿足錦衾之感。古來善言情者。孰有過於詩人者乎。若夫羅帶空持。珠簾不捲。絮墮無影。花飛若煙。狀窈窕於倚聲。託纏綿於按拍。柔情相黦。癡語時作。此則茫茫春水。我亦欲愁。黯黯秋江。人能無恨也哉。而況鮮卑人種。追自姑家。法喜佛妻。繙從梵夾。翠謹隱於葉鳳。紅笑生於花外。鑄文君之印。牘尾常鈐。讀仙人之詩。淚痕先溼。若修能者。固宜賦誇臣里。題豔箇儂。十索之詞不休。九張之機並織。外孫齋白之語。滋味酸辛。西風刀尺之心。翦裁淒苦。思之怨也。聲其秋乎。爰有西湖寓公。江州司馬。感青衫之易冷。羨白月之常明。乃作秋江載月圖。寫於圖扇贈之。舊夢江頭。高情天上。輕波沿湖。彌有慨於萍逢。永夕團圓。亮無愆於秋諾。從此郎熏沈水。篆卽回文。妾爇旃檀。灰皆心字。歡能替怨。春且移秋。囊叩叩而情通。魚微微而耦合。

寒修爲理。毋忘石鐘之山。藁砧已歸。不隔浮梁之路。雪泥賸在。琴趣流連。題
曰畫扇齋秋怨詞。此其不能已於情者。吾甚恐其過乎情也。既申其旨。且以
勗之云爾。

低浸疏星斜飛細露。銀河脈脈偷盼。不關蟲杼急。已先惹清絲淒斷。么蟾頻轉。照舊
夢浮梁。光陰催換。相思慣。儘伊波折。音拋秋扇。洗怨流過清江。早畫船同載。水窗
會見。追來人種在。悔離淚。青衫難浣。涼花庭院。定睡碧飄餘。西風吟倦。重撫卷。酒醒
燈暗。怕來新雁。

瑞鶴仙 題秦敦夫編修恩復校書圖

嫵嬛春不鎖。放瑤珮聲聲。來陪清課。丹黃肯輕灑。費辛苦研尋。兩鬢雲鞞。斜陽影過。
問訛字。新讐幾箇。怕金猊。香冷灰殘。蠹屑一齊飄墮。青瑣當年曾記。圖史橫陳。萬
花圍坐。高談炙輠。論生計。者時可。只而今。衰鬢蛾眉也笑。故紙鑽伊。怎破。枉思量。逃
學光陰。許誰拋躲。

金縷曲 家迂客屬題凡仙姑射主人墨書詞卷

吹落瓊樓語。問行行、搓冰捻雪，可禁寒否。如此清姿才綽約，第一墉城合數。早折盡、人間釵股。不是神君能畫法，只毫端、活□金盤露。掀墨浪，看飛舞。萬花捲起香陰護。但聽得、搖環曳珮，欲尋無處。爲道蓬山仙侶熟，最好倡予和汝。且商略、者番琴趣。寫到白蘋紅蓼意，讀秋聲、正入江南譜。風颯颯，倏然住。中有步虛詞云但有白蘋紅蓼搖得天淡雲閒

憶舊游 題蔡樾曇息隱園第二圖

正涼聲瀉竹，密翠迷蕉。陶逕人歸。稱得閒雲意，只相隨野鶴，同守柴扉。晚來爲開新釀，悟配白魚肥。好笑語、循陔吹花捉絮，來學兒嬉。依稀。輞川路，看搖蕩淪漣，煙水迷離。多少林泉事，任分編小景，細字重題。最憐遠山如畫，猶是六朝遺。卻金粉都消，前溪老月橫一眉。

百字謠 題屈坡園夢草圖蓋爲其兄硯林儀部作也硯林爲辛丑庶常時余有正味齋詞

被命分校故相知甚深。後因散館改官不久歸里。今歿且十餘載矣。令弟焱園以此索題爲墳。是解撫今感昔不覺淒然於言也。

悄然平碧。慣蕭蕭黯黯。愁生南浦。爲望鴿原先目斷。畫出暝煙如許。選樹鶯迷。藏花蝶老。總被斜陽誤。一燈重翦。謝池人已千古。還問內翰誰呼。一場春夢。不待回頭悟。賸我白頭無藉甚。來續離騷殘譜。聽雨寒凝。吹簾響咽。怕認蘼蕪路。吟魂如答。夜深遙唱秋句。

金縷曲 題李夢集明府海上釣鼈圖

蹴得紅萍碎。慕鱗洲、怒濤滾滾。駕山來矣。風雨蒼茫爭頃刻。問有何人控制。再不料、一竿能繫。收拾海天如鏡淨。算牽絲、小試先生技。驅鱷手。只如是。當時記箇青蓮李。仗天風、送來背上。弄雲而戲。星斗如錢隨手摘。歸向長安買醉。到今日、讓君能替。一樣文章仙格在。莫愁伊、誤了蓬山鱸。看波浪、等閒耳。

扁舟尋舊約 題陳月擘增江山席飲圖

沙鳥眠涼。江風吹影。悄然片月飄天。照來苔席。都忘賓主。但聞笑語尊前。是誰吹笛起。漸零亂、漁燈可憐。渡迷瓜步。潮回鐵甕。陳迹幾堆煙。算不負、江南佳麗好。儘六朝草樹。畫向鷗邊。天涯回首。旗亭賸在。依然湖海年年。多情留客住。要催了、揚州夢圓。不知酒醒人去。夜來老鶴橫掠船。

買陂塘

題石鏡春同福瘦竹幽花館填詞圖

問安排者般花竹。公餘誰共吟和。姚述堯有簫臺公餘詞偷聲減字商纒定。又要換伊攤破。忙無那。怕滴粉搓酥。惹得繁花沓。門鎖鎮鎖。只尺八拖來。芭蕉熨帖。位置一紅妥。關情甚。可惜年華老我。於今意興都惰。旗亭記起雙鬢唱。無奈春風吹過。能幾箇。共井水人間。名字如君播。香圍翠坐。儘女壻微雲。尙書紅杏。次第補清課。

江城梅花引

題舒竹溪慎旃梧竹雙清圖

最清清處沒塵江。是聲清。是心清。但認壓欄梧竹。影縱橫。送過琴言遠。笛譜者邊雨。那邊風。卻月明。月明。月明。夢難成。草又青。鳩又鳴。憶也憶也。漫憶到。楊柳蕪城。往

時竹溪到揚會寓余齋中。今忽忽十餘年矣。只惜鴿原無路款秋聲。傷令兄石溪下世。我爲甘棠思一哭。愁說與卯君聽。

滿江紅

題袁簡齋前輩隨園雅集圖遺照

屋角堆堆簇擁著。六朝山色。道此處樹圍雲繞。慣留吟屐。集比西園圖苑在。禊成南澗秋先得。只時光換了秣陵潮聲蕭瑟。尙書履。苔藓寂。藏園筆。春風息。便翩翩公子。已都頭白。喬木賸教池館護。烏衣尙認簾櫳入。問渡江。若箇寓公能。千秋憶。

憶舊游慢

周希甫太守以補官北上。舟過維揚。洪桐生招同人集平山堂用

宋人趙虛齋詠荷花詞韻。倚聲以送之。酒後興生。亦聊以當陽關三疊云爾。

正荒波鷗外。老樹鶯餘。綠與煙平。故人天末返。便將離花歇。許續新盟。莫愁萬里驢背。官況冷於冰。只要徹底清來。羣山對面。放眼都青。林亭舊游處。湖六一風流。未改門庭。聽話傳花樂。似詞仙此地。咳唾會承。卻憐操了蠻語。幾載楚江行。是日與談。盡中風土。甚悉。侍重到班春。前旌相待楊柳津。

孤鸞 題顧西梅畫小青小影

夕陽千古。幾照到桃花。者般酸楚。瘦影亭亭。料是可憐兒女。丹青縱能活脫。恐難通。那時眉語。空牘癡雲入抱。守一燈聽雨。便一池春水。卿何與。更一字消除。情多無據。稽首蓮臺。恁得慈雲常護。因緣也知。偃蹇怕爭伊。並頭尤苦。拋卻光陰草草。付西冷鷗鷺。

一萼紅 凌芝泉招同人過篠園觀芍藥歸集停雲館讌會甚盛汪礪曇以此

調賦詞三章紀事芝泉因屬友人繪圖索題余亦繼作

望亭林。早攜來綠意。簾鎖畫愔愔。蜂已移房。鶯還選樹。餘紅拚付波沈。算只有。此花能替。莫等閒。孤負殿春心。沒骨圖開。將離曲唱。婪尾杯斟。也說五雲多處。借翻階句好。若箇裁吟。金帶圍空。玉鉤斜冷。卻添歌吹於今。看一路。載香船去。盪燈光。畫入柳陰深。笑問嬉春杜牧。衍子誰尋。

指青楊。只者條門巷。最慣踏斜陽。結客尊疊。惜香樂府。今朝容得臣狂。道一樣。文章

聲價趁光陰。能幾鬧梳妝。後日萍波前因絮果。此度花房。料我相逢會識。早吹來吳語。仿佛篷窗。水調傳歌。灣頭喚渡。二分月子留將。偏可惜、衣香鬢影。夢揚州。也似鶴飛忙。待到銀河曉落。越地紅牆。時有校書月織在坐

驀開圖。認提鷗挈鷺。渾不待招呼。六柱船停。三間屋坐。一般同話江湖。忽憶到大旗落日。仗毛錐。膽氣十分轟。丹青何處。酒杯剩對。如此頭顱。豪氣除猶未盡。又琵琶拉雜。繼付檀奴。煙軟雲鬆。金迷紙醉。可能銷得魂無。只欠我、散花場裏。坐蒲團。一箇老禪枯。嘆珍珠百琲。才子詞輸。謂欄疊

買陂塘 釣絲

嫋筠枝。一絲輕挂。乍沈旋又吹起。蜻蜓小立。偏能穩。恰稱夕陽新理。鉤上未。記前度敲鍼。曾學兒童戲。沿緣慢水。正柳影牽連。蕤根攪亂。鷗眼覷來細。休侈說海上珊瑚。竿慣試。投來都是鰲餌。纖鱗亦解藏身去。微惹落花牽曳。情暗寄。漸腹裏書傳。容易相思繫。風波慎爾。到玉尺兜時。銀刀冑處。弱縷也難避。

金縷曲 題凌芝泉荆襄感舊圖

萬帳沈兵氣。聽吹來、鶯啼燕咤。夜寒如水。爲道青蛾情尤苦。閱過華嚴劫裏。怕重墮、者般身世。賴有書生毛錐健。護名花、才得罡風避。論此沒信知己。天涯誰是羅敷婿。甚闌干、銀河近處。密雲先蔽。憑著鳩媒催歸急。只說兒家故里。惹斷夢、淒迷無際。明月二分今宵照。唱秋墳、容易酸文遞。燈閃閃、落涼穗。

柳梢青

題程一庵柳衣園圖卽用汪礪曼太守韻

柳也如人。得趁東風。眉眼開新。歲歲年年。綿綿絮絮。果果因因。分明一片高雲。暗盪作、枝頭好春。酒地茶天。琴言月話。東主西賓。

玉京謠

元夕後風信俗稱落燈風卽金峴老詩所謂串燈風也

似被封姨妒。蠟淚盈盈。捲向銅盤膩。料峭連番。街塵清已如水。算只是、殘劫毘風。頓換了、瓊壺天地。膏騰裏。蛾兒鬧醒。雲飄煙墜。朱旛兀自搖林際。甚魚龍、竟一齊鷁退。笑我書釘。冥冥都縮油穗。使者時、能洗繁華。怕更有、花花來替。扶紅起。重認剪刀

痕細。

柳梢青

題查槎客有圻銅琴館圖槎客卽小山近號銅琴其新納姬人也

綠浸窗紗。攤書纔罷。又聽呼茶。鬢髻煙猜。衣裳雲想。春在兒家。長紅短白天斜。者顏色。爭伊不差。慢水中央。虛亭四面。人坐當花。

絳都春

唐花

嫣紅姹紫。問密窹幾時。潛藏多麗。識得東風。一面纔逢。春如此。休疑數九寒消易。漸絳帳。都添桃李。豔陽恁早。妝樓信息。未須鶯遞。會記。紅橋舊路。冶春去眼底。尙愁憔悴。曉枕夢回。濃笑重逢。書空也似成唐字。只火速。光陰難恃。還應深雪簾櫳。爲伊夜起。

如此江山

題柳如是初訪半野堂小影應查槎客屬

茫茫留得飄餘絮。堪憐者般身世。雪欲飛時。煙高冷處。才識尙書門第。紅樓畫裏。認家令南朝。黨人北寺。記効綢繆。春風相對幾眠起。鉛華應已洗淨。只虞山新翠。微

映眉際。高簇危巾。徐揚侈袂。莫羨兒家俠氣。桃花扇底。也不惜嬌魂。肯拚生死。家國誰人。一池餘恨水。

轆轤金井 題厲樵山聯芳秋林讀書圖

好秋難得。送清清。最是一燈明處。酸入西風。稱書生情緒。伊吾夜午。似忘了。老蟾來去。葉亂如呼。蟲繁似答。開門看雨。童時爲愁記苦。怕油缸欲殺。挑罷還覷。翠幙深籠。羨者時庭宇。膏腴採取。定俊味。雪鱸輸與。古渡荒寒。空心剩在。憐余病樹。

齊天樂 鵲橋

撲空又學長虹。鶴年年爲誰辛苦。碧漢當中。紅牆對面。莫怨無梁可渡。雲霄萬古。正月白波清。羽毛堪數。去去旌幢。一條平軟待靈步。比伊精衛差似。只全填恨海。餘負難補。陣攏千盤。影迴三匝。生怕秋期還誤。休嫌夜雨。且洗了車塵。再商乾語。倦翅歸來。禿頭重認汝。

滿江紅 河燈

有正味齋詞

荷葉波涼。訝重見、鬧紅無恙。簇煙外、乍明乍滅。幾家齊放。前浦暗隨漁火亂。中流緩學鮫珠盪。驀星星、一串過橋來。風頭搶。魚龍國。金銀旺。薜荔界。光明仗。似橋竿倒影。暮郵同傍。虛白炯合涼水闊。餘青慘逼酸文唱。逐殘螢。又到小雷塘。蘆根亮。

桂枝香

題唐子畏美人拈花圖 江漪塘所藏云卽三笑因緣傳奇中秋香也

秋迴一翦。只脈脈無言。折枝低捻。金粟前身約略。破禪香濺。風前記起靈山笑。證三生。眼波重展。泥金衫袖。滲金窗戶。斜陽人面。料只是情天眷戀。肯才人名字。押上紅券。游戲光陰儘。穀風花磨鍊。初三下九頻頻約。怕梨渦。暈來難淺。幾時圓合。蘭因絮果。畫圖相見。

摸魚子

題陳受生均行脚看山圖

笑平生。期山期水。年年孤負芒屨。如君崧嶽遊。纔返脚下。尙看雲起。行未止。道樵擔僧包。有路前頭指。松陰幾里。正磬響穿林。泉流接筧。留看故山翠。乘風快。偏又相逢旅次。蕭蕭聊頓霜翅。虛空試展臨江望。約略淡蛾煙裏。歌舞地。算兩眼能青。除向

金焦洗。楓人醉矣。便嵐氣寒多。石頭路滑。筇杖健聿倚。

鬪百草 鬪草

有約煙邊。相邀暖處。尋來早。鞋幫沒易。釵股輸防。深悔那回草草。拚工夫。更細爭宜。男渾忘斜照。漸蝶滿南園。迷迷閃閃。粉爭香鬧。休悵吳宮故地。吹醒寒蕪。還惹采香重夢到。綠意分明。紅心宛轉。定贏得。相思不少。清明近。仕女圖應畫成了。芳期悄。剩回頭。裙腰一道。

永遇樂 木瓜

詩授童時。爲商瓊報。殊繫情款。小雪光陰。殘年風味。船恰宣城轉。脂痕露染。粉痕香漬。夢醒枕根尤戀。只羈心。容易酸楚。遠山隱隱如見。老禪曾對。者般癡然。可也稱伊黃面。性只溫宜。味因澀永。藥已籠中選。乞靈笑我。頰后腰脚。名字儘教書慣。道京口。沽春更近。一帘影颭。

憶舊游 題改七齋琦少年聽雨圖

有正味齋詞

問疏聲瀉竹。冷暈搖燈。何處紅樓。送過蕭蕭曲。悔那時青鬢。慣惹閒愁。幾多酒邊殘夢。盪漾在簾鉤。漸催了花飛。纔將葉落。春又成秋。悠悠記難忘。是點屐胡梯。添火香篝。一樣窗紗外。怕換些酸楚。滲入心頭。莫信竹山詞苦。且唱少年游。好挈檻晴嬉。流鶯滿樹啼未休。

湘江靜 送張仲雅還湘潭任

草長旗亭花滿路。黯東風。別離情緒。湘雲才定。湘波又起。早湘人催去。舊夢續篷窗。偏尋到鷓鴣啼處。相思更遠。山長水長。黃陵廟。竹枝苦。雁幾程。鶯幾樹。幸先生。熟游能賦。垂簾晝日。籠燈夜榻。好修成琴譜。子野閣猶留。知難忘。綠楊城住。重來屈指。雙旌五馬。歐蘇共數。君舊寓揚州所居有三影閣蓋用子野事也

木蘭花慢 木筆花

領宜春館事。簪白筆。便生風。早密透銀尖。輕抽紫穎。插架玲瓏。東臯暗濕。點染譜羣芳。先奏管城功。一片雲藍倒映。饒伊得意書空。茸茸。幾瓣簇惺忪。約略小蓮同。訝

江郎夢醒。飄零蝴蝶。各自西東。繁華只愁易了。莫批紅。判白太匆匆。怕是尖頭易秃。廉來清露常濃。

江城子 送家香竺還粵東

紅橋幾日柳枝長。綰游韉。惹離腸。盪得空江。千里綠茫茫。客也如春留不住。來渡口。趁斜陽。吳天此去且徜徉。看挑桑。看拋秧。怕是賽蠶。歌裏要催裝。及到官衙應暑雨。煩寄我。荔支膏。

紅橋笛唱

賀新涼 題蒲進士竹蒲髯出塞圖

聽過關山笛。惹西風。馬頭捲起。寒陰蕭瑟。落日紅衫搖策去。颯颯髯如蝟磔。攪萬帳。旌旗明滅。手把尉遲盃不放。送邊聲。恰照長城月。腰間吼一條鐵。旗亭數去才無敵。況金門。也曾對策。壓伊豪傑。可惜蓬萊風引去。枉卻身經鼇闕。且算是。曳裾狂客。貪戀琵琶彈小妓。只天鵝。怕染吟髭雪。要消受。種花樂。

三部樂 河豚

販鮮船早。道一死能甘。已拚坡老。生成奇味。那許魚蝦爭鬧。休只貪網西施。惹發風動氣。忍俊多少。漉漉乳時。始信金訶披好。三頭聽誰部署。漸上燈節過。又催春到。經得絮花雪大。桃花紅小。洗纖埃。并華易淨。約饒口。腥砧須飽。呼莫且莫。曝書亭集河豚詩主人亟呼莫莫待荻筍蘆芽齊了。

好女兒 紅橋觀新荷

故苑約重來。鷗鷺已先猜。不信田田綠意。忒費畫羅裁。小筏劃波開。早扇底。嬌面偷回。薰風換了。涼雲擁到。驟雨歌催。

唐多令

黃鳥話春風。前頭已落紅。誤闌干。夢太匆匆。卸了柳綿剛幾日。偏換得。袂衣鬆。愁去漸無蹤。新來燕乍逢。占茶天。最好照□。獨臥高樓。貪聽到。來一夜。絕陰濃。

琵琶仙 移春纔過銷夏已催觴詠迭尋主賓互集有過竹林之數無虛河朔

之期人謂自韓江雅集以來六十年無此盛矣因各譜此調紀之

才締鷗盟已添下幾許煙波蹤跡。偏又春夏相期黃鸝樹頭說。憑說與揚州夢好。要重聚客星今夕。出網鱗肥。營巢燕瘦。情共縈結。莫道是潦草盃盤。恁邀到天邊二分月。還賴者般滋味。勝尋常裙屐。暗畫出閒雲一片。被野風幾度留得。只城郭年年綠楊能識。

又 送金手山從漕帥許秋崖先生北上兼懷東甫

回首東華軟紅裏。又換當年陳跡。惆悵高館春移難把舊情說。只記得舊時燕子。伴殘月水荳簾隙。飲水詞傳夢回鼓角。愁遠沙磧。算還是蓮幕風流。有帆影相隨數晨夕。經過亭長亭短。道垂楊偏識。憑萬舫明燈歇後。和冷蛩有此吟客。但怕賞雪龍門。那時留得。

孤鸞 慰黃兩峯涓悼亡

碧雲催暮。聽碎珮零環。樊桐歸去。白奈誰簪。冷逼畫簾微雨。慈暉縱餘晷。問琅玕。

幾留陰護。往而河者從清淺。忍匏瓜孤處。那待阿灰腸斷句。已頭白潘郎。味禁情楚。江國頻年。記伴種花辛苦。青燈一般滋味。歎宮貞更奠離緒。今日須營齋奠。可俸錢支取。

買陂塘 詠盆中蓮子成荷

問冰蕩。幾時栽植。掀泥微擢纖媚。勻圓爭得如錢樣。已到欲花時矣。清苦意。便不識蓮儂也。帶儂滋味。疏簾淨几。看軟柄須扶。柔莖易顛。牽引到絲子。橫塘路。曾記房房密比。秋風留下根柢。正愁兒手拳難見。山谷詩實中有么荷拳如小兒手。卻又苗條如此。恣游戲。要竹葉編船。學作搴香艤。芳情箇裏。道扇許螢兜。盃容蟻泛。且結小連理。

湘月 題馬湘蘭蘭竹

板橋回首。歎夕陽金粉都消煙水。馬四娘家能指點。約略枇杷花底。香草前緣。幽篁小影。留得嬋娟契。卽論翰墨。美人原是名士。聞道放誕風流。千金結客。更挾朱家。

氣。素素不來眉子嫁。拈弄丹青而已。三點心頭。雙鉤指上。欲喚湘魂起。環交珮互肯。忘飛絮園裏。湘蘭管買樓船載小鬟。十五置酒于飛絮園爲王百穀壽。

瑤花 題嚴小秋駿生憶秋圖

黃花新雁落葉哀蟬。問可禁秋苦。西風滿眼。尙記得。往日那條來路。青苔堆滿。怕屐印也無尋去。只賸伊。簷鐵敲鏗。亂了珮環無數。我是獨處匏瓜。歎霜華吹老。潘鬢如許。爲君根觸。莫更被。圖裏鵲華留住。關山楊柳。仗一笛。喚回羈旅。早又值。醒枕寒生。夢斷畫簾微雨。

石湖仙 廖復堂招飲於梅花嶺香遠堂卽用白石老仙元韻

東塘西浦。問身已江湖。搖蕩何處。翻笑誤浮名。任匆匆。光陰老去。漁兒相喚。且學我。短蓑掀舞。誰與伴著書。笠澤千古。多情約來此地。破蒼茫。還催好句。見說年年。總要招攜舊雨。酒溜涼筩。繪飛芳縷。醉敲篷柱。憑鷗語。今朝載在盟府。

沁園春 題畫

有正味齋詞

無悔無嗔。一金堅持不退轉輪。任者般藍縷。拖泥帶水。當場穀棘。鍊苦熬辛。鼻孔繩穿。肚皮篋束。棒喝無端到頂門。將家去。笑貓兒狗子。別甚冤親。今番認破前因。道菩薩。塵凡現化身。要屢提宏願。證明忍士。盆蘭變相。唱徹酸文。百丈騎牛。只尸調馬。莫認那羅戲是真。神通大儘三乘。踢倒予欲無言。

霓裳中序第一 詠二分明月

停盃幾度。要來把、明蟾細評付。爲甚蕪城偏準。道半逐笙歌。半隨金粉。迷離自孕。算破瓜。剛是時分。憑賸取。無賴光陰。約略柳梢認。幽恨繁華一瞬。漸閃過、玉鉤低隱。眉痕都蹙涼暈。訝劃向誰邊。者般淒緊。天心看最近。定玉宇、修成有信。休輕惹、詩人拈簸。靈魄更教損。

壺中天 題王燮堂林屋吹笙圖

鬢鬢無數。愛晶簾隔處。者般清透。灰陷金爐人未到。隱隱已聞瑤奏。鶴語天空。龍吟水定。漸到黃昏後。梅花煙軟。一蟾吹出湖口。會否羽袂攜來。三層樓上。松吹同消。

受去去前林留且住。恰好碧苔鋪厚。窈窕余思。參差爾奏。指爪頻憐瘦。銀河悵望。薄寒微側衫袖。

又 題西子浣沙圖應孫梅龕畫屬

苧蘿顏色。問幾番明月。照伊千古。還許拈毫描瘦影。活脫波心能語。白紵歌遲。黃絲唱早。一樣牽情緒。含顰窺見。只憐無波愁處。空歎故苑烏啼。梧桐葉落。脂粉隨流去。何似若耶溪畔石。賸有青苔遮護。單舸茫茫。空波泛泛。那得浮家住。春風吹夢。啖花來看魚聚。

醉太平 題曲素存江小照

嵐移若煙。泉吟亦絃。我來讀畫其間。望高雲在天。歸耕沒田。買山少錢。揚州一鶴翩翩。似阿儂可憐。

買陂塘 題廖雲槎風雨懷人圖

已天涯。者般騷屑。恁教攙入風雨。濟南縱說多名士。相望不堪孤旅。燈似縷。怕酒醒

雞鳴。送到傷心句。吟蛩又絮。問半枕斜偎。一舟橫盪。篩響豆花未。年來事。我是匏瓜塊處。茫茫偏惹愁緒。春夢易殘。婆亦老。臙箇白頭鷗住。思故侶。歎楚尾吳頭。安得尋君語。相思最苦。便紅樹搖晴。銀蟾移亮。難慰此淒楚。

又 題袁蘭邨通小倉山房月話圖

者亭臺舊時曾記。老仙今已何處。西風也送么蟾到。照透晚來窗戶。涼似許。只畫不成煙。一片傷心樹。相逢且住。恰酒殘新溫。琴言好付。缺月正須補。簡齋先生不善飲。且懶于倚聲。今蘭邨能兩兼之。洵足以補其缺矣。匆匆別。還念燕山此去。游蹤都怕難據。留人只是江南好。攔住青山無數。頻回顧。道鷗鷺休猜。要認重來路。他時喚渡。待臨汝郎來。清光相對。高詠泛牛渚。

愁倚欄令

蘆花蘆葉前汀。要來看。漁家晚晴。不怕渡江風浪惡。紅板船平。行行月子如迎。漸聽到。瓜州二更。多謝一瓶京口酒。睡醒潮生。

浣紗溪

說破茫茫夢一場。不堪微雨正淒涼。黃花影裏過重陽。蛩欲啼時偏緒短。雁無題處最情長。偶然觸著便思量。

臨江仙 病中作

吹過殘雲欲凍。撲來落葉偏驚。自憐藥裏太關情。略移枯枕。透入半窗星。隱隱帶圍銳減。蕭蕭髮素行增。揚州夢裏可憐生。灑漉瘦鶴。只是耐伶仃。

菩薩蠻

春波軟盪紅橋水。多時不放鶯兒起。一樣夕陽天。留寒待禁煙。已是人消瘦。祇此情依舊。可奈別離何。明朝楊柳多。

憶舊游 北郭外觀菜花

認平田簇繡。古岸鋪雲。別有春光。遠聽蜂聲鬧。只聲才覓到。先蛻蜂黃。莫疑六朝人去。金粉易蒼茫。但布滿祇園。袈裟風起。一路斜陽。尋芳引人處。是清彌透豔。暖恰

烘香好發新醅對。宛鵝兒顏色。有約評量。畫榼四圍分坐。來占酒人場。怕綺罽遙連。差差麥浪催趨忙。

惜餘春慢 題楊召林稚園雅集圖

葉隱巢鶯。池眠宿鷺。一樣淖西風景。雲煙奇弄。山水清游。能鼓臥游高興。偏奈老木幽蒼。點染丹黃。易生淒冷。歎秋心吹入。鴿原煙草。夢都難醒。還賴是斜照多情。招逐命侶。來向欄杆同凭。晴開屋角。秋借牆頭。獻出幾峯端正。定憶京華有人。拄笏看餘。鄉關能省。好午陰散直。鈴索恰搖花影。謂召林師黃左田學士余門人也

菩薩蠻 何夢華屬題梅花士女

影兒已比梅花瘦。多情偏愛花來就。不怕縞衣單。留些昨夜寒。欄杆明月到。三九光陰好。恣意踏花行。弓鞋塵暗生。

醜奴兒 草有名馬蘭頭者詞以寫之

江南草長鶯飛熟。薺換花殘。芹雜泥銜。野綠肥挑雨一籃。田家滋味朝炊早。略糝

吳鹽也趁時鮮。持賽花豬分外甜。

過秦樓 題稽姓園紅樓遙指圖

隔斷垂楊。收回斜照。似有玉鉤聲弄。前廂翠掩。別幕雲低。緊護鴨爐香重。猶記繫馬來尋。留住春衫。落花風擁。歎春光幾度。雕闌畫檻。烏衣如夢。休問是。葉葉根根。渡頭人去。擁楫更誰吟共。臨窗瞥見。點屐還聽。記接那邊晴竦。莫問天涯水涯。好趁鞭絲。且飛煙鞚。謝芳草多情。一道裙腰相送。

一萼紅 重九後一日家山尊六十生日同人集紅橋西園釀飲爲壽賦此侑

觴卽用山尊原韻

羨揚州。恰仙人樓閣。稱得客星游。簪待黃花。觴行綠酒。逢君六十平頭。記一樣蓬池斫鱸。只觚棱。月換舊時秋。燭猛歌豪。金迷紙醉。那不句留。若論平生事業。賴文章潤澤。霖雨綢繆。小寄東山。暫紆前席。關心只爲松楸。甚蟹稻都煩料理。望茅簷。頻爲夕陽謀。君以乞養歸里。今逮終制。值闔境大旱。藉給米以贍三黨。纔是壽兼民物。福

被林邱。

又 山尊讀汪劍潭秋夜詞音調淒惋吟諷不休邀余同賦再疊前韻

倚闌干。漸蕭蕭落葉。送過幾分寒。霜氣蒙頭。雨聲灌耳。不堪逼入愁端。早無數。蟲機雁鶻。近黃昏。燈暗聽來難。偏耐天涯。啼辛絮苦。遲到書看。一樣山長水遠。更砧催浣急。笳弄吹繁。往事如雲。舊游成夢。怎禁重訴哀彈。暮觸起。枕函香動。惹酸心。多爲木瓜山。感我樊籠鶴老。醒枕魚鰈。

又 洪桐生擇湖上法海寺爲藏書之所詎吉庀材落成有日邀同汪劍潭家

山尊貴仲符置酒其地屬爲詞以張之余欲止之不得也因賦是篇且寄慨

焉三疊前韻

論生涯。忍名山萬卷。捨向梵王家。螢火搜尋。牛腰束縛。堪嗟過眼風花。想吾道。津梁已倦。藉耆場。勝果證袈裟。鏤腹銅圍。傳衣寶付。呈佛詩誇。還憶鈔來善本。在春明坊裏。同岸烏紗。祕簡嬛娜。叢編宛委。幾回細剔雲霞。暮換了。華嚴富貴。付抄擺。幾樹

夕陽遮。且與同斟米汁。閒老蒼華。

又 長至日壽胡硯農觀察五十生日同山尊四疊前韻

羨陽回。恰圍爐官閣。好約侑新醅。星斗三台。鬚眉五老。同聽鶴奏南飛。颯颯瑤花飛起。捲蓬萊。五色畫仙衣。景祝天長。時留春小。年賀冬肥。十載京華舊夢。已茅檐偃曝。容掩荆扉。廣廈胸中。蒼生心上。如君正賴撐支。莫笑白頭無藉甚。願綵線。重添補袞絲。歲歲蜜梅花底。來禮牟尼。

又 黃母丁孺人節孝詩五疊前韻

柏舟詩。歎風詩一卷。苦節幾人垂。竹念孤生。桐悲半死。得期同穴何時。但留取。卷菴味在。道抽來。心苦我能知。慘念饑猿。哀憐凍雁。身是羈雌。幸臙懷清臺在。任銀盃易化。丹穴難移。窀穸經營。松楸指點。依稀夕照人歸。到楔棹。今番雲外。已荒原。屢換白雲飛。直待草生書帶。方識孤兒。

又 山尊早春過秋雨菴有懷舊雨情見乎詞余亦慨然同賦六疊前韻

漸寒輕。趁新泥送軟。有約踏莎行。吮引簧圓。笑流香細。破禪潛逗春聲。正竹外、短筇扶去。驀吹來、鈴語帶淒清。米汁都消。淨瓶易冷。誰話三生。且喜家風。賸在道竹鍼麻線。不費經營。黃蘗茶煎。桃花飯煮。依然舊日盃鐺。只怕是、柳枝幾度。漸落花、風已緊蕪城。那不鬢絲禪榻。此地關情。

又 爲汪劍潭悼亡七疊前韻

掩鸞釵。歎游仙人去。漠漠積寒苦。雜佩猶留。綦中故在。只愁潘鬢霜催。幸賴是、回頭嶺近。廣西鎮遠府有回頭嶺在施恩縣地。早瘴鄉。聯舫賦歸來。錄補墉城。書編彤管。果證蓮臺。尤羨佳兒鵲起。有選樓高格。水部清才。夫子文章。一家著述。修成奇福。應該。只天上、瓊花易返。誤春風。不見廣陵開。徒惹鰥魚淚漬。醒枕難揩。

又 憶張仲雅湘潭八疊前韻

送風蒲。記桃花江上。一棹雨模糊。數過郵程。寄來吟札。但憑蠻語傳呼。悵三十六灣。煙月照琴堂。未許夢歸吳。黑蝶吟忙。紅蕉種早。丹荔嘗初。賸我竹西近在。只藥爐。

茶竈已學禪枯。三影分吟。君在揚所居有三影閣一箏傳唱。近復以箏譜詞新刻見寄。勞君尙念菰蘆。歎無奈。蕭蕭白髮。聽啼來。峽裏早猿孤。多謝斜陽影在。寄不成書。

又 題友人蓮塘圖同山尊九疊前韻

覓蓮儂。愛重花密葉。搖盪水雲中。鷗鷺聯牀。菰蒲借夢。洗教熱惱全空。慕十頃。玻璃風起。渡涼堂。劃住酒波紅。不定珠圓。十分香透。一樣心通。莫道東林社裏。也曾修淨土。同證禪宗。暗曳明璫。徐移羅襪。但憑魚戲西東。最難得。月遲煙曉。恰招來。君子話清風。正是歌回白紵。人倚吳篷。

又 題張稼村農部灝六橋撰杖圖十疊前韻

奉清游。恰春來花鳥。杖履任悠悠。塔認黃妃。魚呼宋嫂。多緣此段句留。漸催動。外湖船早。讓西冷。閑了舊沙鷗。聽鬧漁榔。看攤香市。且賃僧樓。最羨先生瀟灑。任郎君官貴。儘慣林邱。長帽青籠。寬鞋紅趂。但爭老子風流。只隄上。柳催及第。要他時。傳唱出皇州。樊榭先生所集西湖南采雜事詩有隄上風吹及第柳山中春到狀元花之

可值得阿翁笑口重學鰲頭。

夏初臨 初夏有憶

蝶振新衣鷗圓舊夢多情猶賸垂楊風外餘花趁情有約吹香只憐飛燕成雙啄殘泥來度鄰牆淒迷賸在愁春未醒平前度斜陽單衫乍試小扇輕攜筇將成老蠶已停忙啼鳩雨外催教綠滿橫塘難得年光簇園林草木千章透新涼纔過麥天旋換梅黃。

意難忘 有懷滬濱舊游

梅雨紛飄記停帆前度聽報雞潮白移沙岸活黃帖渚雲高停楚曲盪吳舫屢費故人招閱幾番漁商市鬧蟹稻風高年來病榻無聊歎情拚墮絮身亦枯匏茫茫如夢令黯黯可憐宵殘星轉冷露消老鶴合歸巢無言處九回腸斷曲曲離騷。

南樓令 題石谷上人小像

透頂壓寒青飛空舞片雲是松是鶴卽聲聞難得萸灣清不染纔證到阿師心米

鬪魚喧過。吳頭越角分。剎竿豎起問來因。要取者番茶夢熟。勝誦了。度人經。

眉嫵 小周后提鞋圖

趁微雲遮閃。踏過香街。依約踐苔印。聞道柔儀殿。娘來唱。容華桃李爭勝。襪塵隱隱。只裏幃。防有人問。算須待。亭子紅羅護。合歡夢纔穩。翻念昭陽私幸。甚人閒樂府。傳唱偏盛。天水碧。潛催流珠去。何堪故苑人盡。畫圖試省。歎前游。空記龍袞。便重念家山。怕已墨雲凍凝。

高陽臺 七十初度避人江上賦此自慰

未老荷花。徐涼柳色。最宜江上人家。來往鷗鳧。相逢共說年華。自念夫離身世慣。只添教。白髮堪嗟。悔蕭條。似此浮生。何況天涯。平生自愧觚稜熟。道卅年內翰。塵滿烏紗。茅屋今年。枉勞春夢婆誇。指點破帆歸幸早。已西風。夕照吹斜。謝留人。白露多情。蕩入蒹葭。

秋蕊香 茱萸灣值雨飯于石公方丈得觀早桂

瞥見風馳浪驟。人道蛟龍來鬪。西南一角雲光走。已有佛頭青漏。禪房尙聽飄殘溜。留人久。阿師無隱參先透。不待落花香厚。

臨江仙 夜泊瓜州

月黑星移燈屢閃。依稀打過初更。清游如此太多情。豆花涼帖地。知雨咽蟲聲。漸逼疏篷風淅淅。幾家茅屋都扃。茨菇荷葉認零星。不知潮欲落。漁夢悄然生。

摸魚子

翠屏洲在瓜洲之東與金焦可左右望而大江若來會之其間蘆葦

叢生鷗鳥彌望吾友王柳村始家焉所居有種竹軒小輞川曲江亭諸勝而

花木之繁衍圖籍之皮藏芸臺中丞尤喜稱之蓋柳村內能盡事母之誠外

能篤士大夫之好其自得之樂豈人之所能同其樂哉余與流連竟日因書

此以貽之時乙亥七月二十八日

認迷迷蘆灣荻汶人家都沒尋處。略有閒鷗吹影入。卻喜故人相遇。呼曉渡。看幾葉殘荷。半賸紅衣護。徐飛健鷁。趁短笠斜遮。不多響過。幾點逗涼雨。清游好。難得朋

尊快聚。捲簾重論幽趣。濤聲只在闌干外。留得金焦常住。天亦許。道一樣茅茨。莫但
寧羅比。高情萬古。正孟筍鋤來。姜魚網得。樂事自今數。

南樓令 題曲江亭爲柳村賦

煙水望來寬。斜陽畫出看。聽濤聲、隱隱生寒。似與廣陵圓舊夢。催海月到闌干。白
鷺一痕乾。茅亭客正還。論往來、今古須參。我是之江三折慣。怕揚子認歸帆。

臨江仙 吳園探桂

此地問誰招隱。小山有約尋幽。離騷遺怨廣寒秋。古香吹逆鼻。黃雪撲盈頭。 月子
二分光照。露華五夜爭流。最宜金粉畫揚州。霓裳開寶席。仙珮豔瓊樓。

一萼紅 余七十生日承諸同人各以此詞爲贈余愧不敢當既述余感且以

答所貽云

數前程。歎飄飄萍梗。底事誤浮名。幾處游蹤。百年生計。消磨雨枕風燈。也聽慣、平沙
雁叫。只往來、難認雪中痕。春夢模糊。冬烘潦倒。秋葉零丁。多謝良朋契合。任天涯

海角一樣關情。舊雨青苔。故人白板。今朝來說前盟。怕驀地、移宮換羽。惹秋墳、鬼唱不堪聽。且共一瓶濁酒，醉倚雲扃。

遡天風。正觚棱翠聳，隱隱五雲中。煙水寧貪。文章未報，病餘自愧衰慵。感老去、鬢絲禪榻。夢歸來、猶戀景陽鐘。仙侶蓬壺。朝班鷗鷺。尺五遙通。誰遣揚州慢唱，甚皋比

忝竊。愁說歸農。荒到松楸。淒生井臼。自憐身已枯桐。幸此日、羣星會合。仗錦袍、一領照衰翁。起望長安西笑。藜火增紅。甲戌五月奉旨以唐人文集發揚州校刊計明年

五月可期。戴事時總其成者。巖政阿公厚菴分校者。雲南谷西阿際岐湖南唐陶山仲冕廣東李小松鈞簡江西劉金門鳳誥江南孫淵如星衍洪桐生梧石琢堂韞玉汪劍潭端光江漪堂連秦敦夫恩復貴仲符徵黃聞峯文輝趙芸浦佩湘程漱泉壽齡吳山尊蕭浙江錢次軒栻直隸施琴泉杓浙江莫葆齋晉陳小孟鴻墀而錫麒亦預其列焉。自來維揚賓客之聚未有盛於此時者矣。

秋

竹籟

吟

運彰



趙懷玉（乾隆一二——道光三）

字億孫。一字味辛。號映川。江蘇武進人。乾隆庚子召試舉人。官青州府海防同知。署登州兗州知府。丁父憂歸。性坦易。無城府。工詩古文辭。與孫星衍洪亮吉黃景仁齊名。著有亦有生齋集。

序

許慎曰。詞者。意內而言外也。夫意本無飾。奚別於中。言必有文。何矜於表。此皆聲韻之流。尊其所學。敷之藻采。託於淵深。設爲大雅之辭。以謝小言之累。學者所尙。莫之取焉。近士不察。限於陳言。目睫共趨。心源莫暢。遂爾濫竽騷雅。塗附宮商。金石匪諧。笙簧乖奏。遠習相沿。不可方矣。同里趙收庵先生家有班旂之書。早結鄭莊之客。議古石室。澤躬金言。邃著攬其精。誠辭立其要。儲華璧府。備體蘭臺。祕書行處。兼通律度之微。皇雅賡餘。不廢樂章之作。惟其昌明和易。博大高華。揚挖盡神。發揮殊致。不晦理而膠旨。不壞法而詭詞。煌煌乎曲有直材。質有文德。故能日星賦耀。草木宜春。言不病於扈文。不整於格。蒼萃曩作。編錄近著。輯爲亦有生齋詞鈔四卷。頡頏晏范。出入秦蘇。銷稼軒激楚之音。擯夢窗浮慵之色。促拍短吟。長言永歎。莫不風雨和於節。絲竹赴於心。又何必持言意之畦町。分內外之畛域哉。歲在旃蒙。日次訾陬。先生櫻元晏之末疾。遂季鷹之歸思。江水乍生。扁舟方至。庭梅晉罍。梁燕迎衣。冠簪問字。

偕來通德之門。子姓扶輿。近出柴桑之郭。旣拂花而申款。亦撰石而安歌。魚鳥告歡。粉榆入律。儀暉行陪。撰杖職任。分讎猥以菲才。屬之編次。謹抒所見。以著於篇。嘉慶二十年二月。同里後學周儀暉。

秋籟吟

武進趙懷玉億孫

滿江紅 岳鄂王墓次韻

十二金牌風波起。雄圖竟歇。千載後。我來憑弔。尙餘激烈。朔騎不嘶春隴草。杜鵑還叫南枝月。與諸君。痛飲擣黃龍。平生切。傷北伐。讎難雪。歸北寺。冤難滅。歎長城壞後。水殘山缺。三尺烏金魑魅像。一抔黃土英雄血。看宋家。遺骨記冬青。空陵闕。

連理枝 過斷橋傷蘇小小

波皺湖頭碧。鳥語枝頭間。小娟身後。殘梅蓋墓。飛英狼籍。聽黃昏。風雨打錢塘。任年年春色。車馬紛如織。歌舞千金擲。羅綺場中。青衫顛顛。似誰憐惜。持一杯。清酒醉香魂。歎佳人難得。

菩薩蠻 燒香

蛾眉淡掃嬌妝束。傾城共向三天竺。稽首禮慈雲。私言衆不聞。桃花雙頰暈。心事

噴人問。女伴急催歸。前山隱落暉。

鵲橋僊令

流螢度樹。秋花溼露。正是人間七夕。妾身不願似神僊。只博得、年年離別。曝衣樓上。穿針月下。巧向蛛絲乞得。辛勤烏鵲漫成梁。又隔了、銀河咫尺。

步蟾宮

古香樹樹飛黃雪。步略約、弓鞋應溼香花。茗果小筵張。但低拜、蟾宮月窟。姮娥寶鏡新磨。拭出滄海、長空一碧。今宵裁就綠雲裳。知他日、甚人穿得。

明月生南浦

昨夜雙星重會未。今夜華堂有酒應難棄。誰把金樽頻勸醉。歌喉一串珍珠似。簾外海棠紅滿砌。花亦無顏甘讓櫻桃麗。借問芳齡牢自記。盈盈三五還餘四。

卜算子 閏七月十五夜對月

屈指數中元。晦朔纔週耳。轉盼中秋看再圓。端正長如此。清露溼羅衣。夜色涼如

水。一棹桐溪記去年。明歲知何地。

上林春 題豆

記得故園殘夏。門闌客謝。豆棚花下不知年。任說盡、傷秋話。醉臥不嫌低架。涼蟾新挂。勞勞絮語送寒來。又早金鐘催夜。促織一名金鐘兒。

阮郎歸

江城涼透水雲輕。風光入畫明。苦心蓮子怕秋經。佳人遲暮情。誇鴛子、傲菱兒。小池如鑑清。紅嬌翠婉盡漂零。新鴻報一聲。

浪淘沙 蕪城感舊

煙月古揚州。無限勾留。紅橋詩酒幾春秋。歌舞滿堂賓滿座。雲散風流。轉眼總休。誰醉荒邱。可能關盼守空樓。憑弔不堪塵事改。白了人頭。太守本翩翩。曾記當年。平山堂上敞華筵。今夜竹西明月在。空自嬋娟。環佩半成煙。身去蠻天。米家書畫但餘船。莫向望鄉臺上望。故國山川。

偷聲木蘭花 書所見

日斜人出金閨路。漠漠寒煙籠晚樹。畫舫紅樓兩處閒情一處愁。隔舟遙睇渾無語。疑是宓妃辭洛浦。相約春深花底重將舊夢尋。

剔銀燈 河東君初訪半野堂小影

記說扁舟邂逅。喬結束、幅巾寬袖。半墅初開。絳雲小築那放春光輕漏。風姿消瘦。卻想見、三眠時候。悟卻繁華翻手。皈向空王回首。不負尙書。尙書負爾。國破怎禁巢覆。莊荒紅豆。剩拂水、尙飛巖竇。

雙調江城子 舟夜

龐山湖上水連空。惜孤蹤。守孤篷。野渡無人。漁火一星紅。刻意求眠仍不穩。吹夢斷。五更風。十年潦倒任天公。路重重。事匆匆。彈指春情。多寄雨聲中。只有金尊長醉倒。消不盡。氣如虹。

蝶戀花 齋前牡丹一本栽三年矣始得兩花三日而爲風雨所敗悵然賦之

目送堂堂春緩去。簾外池塘。綠葉陰如許。蜂蝶紛紛猶自舞。鼠姑乍放凝朝露。愁殺韶華難少駐。著意栽培。容易同飄絮。雨雨風風留不住。自來國色多遭妬。

紅娘子 山塘

雨過天如洗。海湧峯添翠。聽賣玫瑰。看堆芍藥。棟花風裏。算呼朋載酒。儘風流。欠東山攜妓。無限勾人地。是處關情記。七里樓臺。十番絃索。蕩湖舟子。任斜陽人散不歸來。又蟾盤高起。

搗練子 四月十四夜

蟾幾望。此宵明。況復孤舟況味清。濁酒一杯風露下。不安窗子到三更。

菩薩蠻 暑夜

輕紈入手人初浴。夜深漸怯羅衣薄。風遞藕花香。今宵第一涼。碧筒慵勸醉。小簟渾貪睡。莫遣下簾鉤。教他月上樓。

沁園春 亦園次屠賢書韻

弱冠科名。唾手拈來。宜乎近狂。任一門才望。封胡過末。同時聲價。沈宋錢郎。但喜高歌。常拚痛飲。相遇名園。共醉鄉秋。初到。試迴風落葉。一聽虛堂。論詩何必宗唐。只小技。從人議短長。看紫薇籠月。花陰濃淡。紅蓮著露。煙水蒼茫。僕本多愁。君能自放。禮法寧爲我輩防。匆匆別記蜘蛛簾幕。蟋蟀林塘。

水調歌頭 十八夜

昨夜月華好。今夜桂添香。一年佳景能幾。屈指最難忘。咫尺錢塘胥口。孤負潮聲月色。此地獨淒涼。踢遍六街路。寒露溼衣裳。哭嗤阮。諸愛朔。誕須莊。百端令我交集。對此歎茫茫。不耐名繯利鎖。但願婦人醇酒。容我儘徜徉。世夢幾時醒。三萬六千場。

滿江紅 送莊然乙北上

說便魂消。最淒切。者番重九。無可奈。依人落落。狂歌擊缶。白雁黃花瓠子渡。西風畫角津門口。把深杯。珍重勸。征人茱萸酒。席帽上。塵三斗。殘篋裏。詩千首。看紛紛捷足。榮枯反手。事業只今輸市販。姓名端合藏屠狗。訂他年。風月傲江湖。君能否。

水調歌頭 蔣雲翔載鞠圖

采鞠向籬下。穩載稱吟懷。滿頭若使俱插，應是爲君開。屏當筆牀茶竈。料理長篇短什。一舸足生涯。興到弄煙水。魚鳥莫相猜。攜孺子。訪陶令。傲歸來。年年花放時節。彈缺上燕臺。何似南溪北港。博得持螯把酒。盡洗舊塵埃。抱甕與君去。遍買冷香栽。

沙塞子 觀莊

秋村踢遍舊梭鞋。喜逢豐歲。禾黍雲堆。更極目、慈菇葉爛。蕎麥花開。松楸葱鬱氣。佳哉因上塚。霜露縈懷。幾日住、兒童相狎。雞犬無猜。

金縷曲 黃仲則蒲團按劍圖

炎冷都嘗到。耐蒲團、空山風雨。狐狸悲嘯。肝膽好憑三尺託。空負聞雞懷抱。算慧業、多應得道。觸起心頭千古恨。試摩挲。未許魚鱗老人世事。幾憑弔。真空畢竟何時了。誤平生、輸它柔骨。工於媚竈。放下屠刀原作佛。吾輩行藏難料。便一任、路旁鬼笑。仙釋英雄皆偶耳。卻名心未盡還留貌。塵障外、把頭掉。

鞞紅 題錢季木鸚鵡媒傳奇

奈何頻喚多情肯死。直幻作、因緣乃爾。寶山夢後。隴禽聲裏。悄不管、新愁陡起。自
分生涯。尊前花底。只博得、狂名足矣。玉簫試按。綠鬢偷記。有度曲、東之略似。

蝶戀花 齋前碧桃忽死鼠姑無花作此弔之

愁似丁香千百結。花事無多。又逐東風歇。深揜玉樓春不洩。元都夢斷三更月。一
紙難從青帝乞。香憶郎熏人面。還思妾。啼殺春光離白舌。輕寒薄薄羅衣怯。

又 艤舟亭送春

聽倦西窗連夜雨。曉夢如雲。零落渾無主。小鳥聲聲啼不住。綠陰池館深如許。已
是春情無著處。凝望園亭。更遣新愁補。獨自憑闌誰共語。斜陽流水東西去。

晝夜樂 枕上聞雨

匆匆又送春歸矣。空欲挽、終無計。一時舊夢前塵。總在心頭眼底。窗裏寒燈窗外雨。
誰識得、箇中滋味。枕上數殘更。又雞聲亂起。若教落莫長如此。便百年、仍負耳果。

然厚福多庸碌。碌也同餘子。前路迷茫終莫問。只一任、彼蒼驅使。臣壯不如人。願躬耕而已。

浣溪紗 玫瑰花

瑤作肌膚麝作胎。徘徊花下幾徘徊。滿城絲雨近黃梅。色欲泥人還滴露。香如泛酒莫辭杯。佳人笑插鬢雲堆。

瀟湘夜雨 虎邱觀競渡

斟酌橋邊。貞孃墓下。曉來畫舫如雲。陳王賦裏。暗消魂。看不定、珠簾柳影。飄不盡、繡閣爐熏。關情處。盈盈一水。隔箇伊人。笙歌起處。吳兒狎浪。競渡紛紛。試摩挲醉眼。漫倒金尊。休只笑、多情易戀。也須惜、好境難分。匆匆去。今宵有夢。依舊到吳門。

雙調望江南 朱康侯夜船吹笛圖

攜玉管。何處覓知音。渺渺江湖行路慣。蕭蕭風雨夜來深。吹作老龍吟。邀笛步。舊夢已消沈。擊楫豈無千里志。倚樓空負十年心。憔悴到而今。

瑤臺聚八仙 錢廣平五十

露溼牽牛。凭闌處、如鉤新月初懸。小筵瓜果。傾觴爲駐君顏。應是上清星侶謫。百齡剛半未華顛。更輸它、翛然髯也。人擬坡仙。平生清狂自喜。笑棋聲酒影。是處勾連。沈酣論史。古今羅列尊前。回頭春明舊夢。彼事業。何須羨木天。交情好。試與君屈指。吾最忘年。

念奴嬌 秦淮中元

六朝人物。真可惜。都向愁中錯過。今日煙花猶道是。千古繁華未破。畫舫簫聲。青溪蟾影。夜夜知憐我。中元到也。孟蘭盆會燈火。今年秋暑偏遲。苧衫渾未脫。餘炎難躲。夜半西風初起處。吹出紅蓮萬朵。人盡貪癡。鬼無形影。豈亦啼寒餓。三更水榭。捲簾看月斜墮。

滿江紅 舟夜有感

枕上濤聲。陡觸起、愁苗怨種。還自問、此來貿貿。鷗迎雁送。千里空馳南北路。三年不

醒榮枯夢。歎六州鑄鐵錯空成。勞何用。茂才第。成均貢。治安策。昇平頌。看登華袞。衰都誇殊衆。芻狗豈充燕市馬。凡禽也飾丹山鳳。莫輕嗤。目瞽耳無聞。於陵仲。

又 中秋

病裏還家。又早是、中秋時節。且自慰、勝它孤館。秦淮水咽。一任三橋燈影遍。獨聽四壁蛩聲切。只清尊、孤負月當頭。天寥泐。夢幾度。莊生蝶。剩幾寸。張儀舌。歎蓬山雖近。罡風易掣。雞肋功名甘吐棄。馬荅事業羞生活。笑灰心。近得棒頭禪。何煩喝。

解佩令 冷吉臣仕女爲蔣雲翔題

玉般心性。花般年紀。乍相逢、驀地催歸去。一夜秋風。怕別後、重來崔護。最憐它、丁寧傳語。青衫凝淚。朱顏入畫。任漂零、和伊同住。七里塘前。但遮日、斜陽紅樹。夢中尋、押衙何處。

題蔬果畫册九首

南鄉子 桃

秋籟吟

最恨天台賺得劉郎去復回。何似安期瓜大棗。仙人島。玉井流乾王母老。

點絳脣 楊梅

綴紫垂紅。稽山何似廬山古。任他甘苦。誰到金家塢。著齒嫌酸。半晌渾無語。微行處。矮檐風雨。血色羅裙污。

豆葉黃 本意

豆花籬落雨絲絲。話盡傷秋不合時。策杖渾忘暮欲歸。勸君持。珍重田家酒一卮。

比梅 橙

合傍漁村蟹舍。任卻雨移風打。且莫歎遺才。橘柚豈真無價。如畫。如畫。一片夕陽初射。

醉公子 銀杏

花落三更雨。十畝陰如許。誰辨我雄雌。婆娑舞罷時。一泓秋澗水。照影偏宜子。試染夕陽痕。何如烏桕邨。

南歌子 荔枝

絳雪紗輕裹。細枝霧半籠。剝來應貯玉盤中。笑請檀郎、嘗箇狀元紅。曲譜長生殿。詩成玉局翁。寄圖還憶白家風。試問孃行、十八帶頰容。

賣花聲 木瓜蘭

並蒂擅羣芳。盡日明窗。報投愛誦國風章。卻喜秋來添伴侶。臭味無雙。位置稱閨房。淺綠輕黃。笑他袖進范陽張。昨夜國香新入夢。私語蕭郎。

歸自謠 枇杷

人乍倦。深院濃陰遮四面。夏長不借無憂扇。蠟兒底事頻頻喚。閒情戀。校書門巷相逢慣。

摘得新 柿

顆顆金。緊霜氣已深。離宮三十六。夢華林。青衫尚有傭書客。抱秋心。

侍香金童 題人雙鬢伴讀圖

萬卷驅貧。盡讀君能否。更紅袖、添香銷永漏。曾記毛詩爭上口。識得郎情。幾回消瘦。彼世間、國色才人多不偶。算文福、難全常八九。畢竟信陵能看透。不愛奇書。卻耽醇酒。

金縷曲 養真齋觀鞠

何處羅含宅。是城西、年年會到。冷香盈室。位置儼然高下座。畢竟誰標百尺。倘耐久、何論十日。帝女寧隨桃李嫁。傲西風、賤殺金無色。吾欲友、楚之屈。治蔣名字人爭識。對餘芳、幾番欣賞。幾番憐惜。拚取閒身勞十畝。不使等閒霜逼。好借影、紅燈瓊壁。獨抱秋心無可語。只此間、合費題詩筆。三徑好、幾穿屐。

又 同人集養真齋疊韻

不耐籌田宅。但生平、料量花竹。便稱居室。晚節亭亭偏爾壽。笑彼爭稱枉尺。試采采、還乘暇日。斗酒主人容我醉。況賓朋、盡帶餐霞色。泥有螻、任信屈。泉明孺子吾難識。莫輕拋、當前光景。後應追惜。月到斜廊更漏永。漸覺衣裳寒逼。更起舞、狂歌呵壁。

我已年來吟事廢。爲破除陳例重拈筆。霜露重溼歸屐。

又 送洪華峯之姑孰

君又投人去。對西風。茫茫心曲。尙誰堪語。滅竈更炊須自熟。記取伯鸞賃廡。只此志。惟予與汝。月落煙荒。經采石。試呼余。一訊青蓮墓。茲役也。亦千古。燈前重檢寒衣補。歎尸饔。累他老母。倚閨心苦。不信男兒能餓死。可惜頭顱如許。無恙否。故人叔度。
謂黃仲則我又明朝東泛浙。問何時。重結荆高伍。南雁過。莫輕阻。

江城子 客以涉江采夫容圖屬題乃木芙蓉也

生涯強半水鄉中。一髯翁。一雛童。采徧蓮房。又采木芙蓉。秋色滿船吟思冷。浮浪去。自西東。枝枝總是拒霜紅。任煙籠。任霞烘。日暮天寒。寂寞綴西風。願把閒灘添十畝。留晚節。與君同。

賣花聲

畫舫綠楊中。偏易相逢。杏紅衫薄鬢雲鬆。解得拈花心事在。一笑春風。獨秀綺羅

叢月襯霞烘。箇情脈脈我匆匆。燕子林間聲不住。似罵吳儂。

金縷曲 中秋

天果憐人意。爲良宵、故教風雨。做成新霽。此夜月明應更賀。把酒臨風自喜。只一霎、青天如洗。畢竟微雲相襯好。彼太清、滓穢空言耳。羅袂冷、薄于紙。紅牙檀板情長寄。喜富筵、清歌罷後。是日觀劇華燈剛試。踏遍三橋穿窄巷。縱有高樓莫倚。惆悵煞、尋芳無計。只有嬾娥成獨照。又人間、羅帳燈昏矣。歸去也、曙光起。

又 十六夜

一樣清光照。卻人人、道他顏色。不如昨好。我本廣寒仙吏謫。那得團欒長抱。嘆令節、人多草草。便是百年能幾見。況愁中、病裏都除了。願長健、別無禱。木犀今歲花偏少。只蕭條、空階懶坐。瑤街重到。三五良朋三五月。願共醉鄉終老。惟贏得、狂名爲寶。人影衣香聊逐隊。倘逢場、不樂空添惱。人世事、幾逢笑。

又 十七夜

月意今宵倦。又匆匆、天香送冷。秋光過半。一種情懷消不得。生怕酒闌人散。且省卻、幾回留戀。明日陰晴知變否。只錢塘、孤負看潮眼。我欲去、可風便。空階蟋蟀吟如怨。更簷前、絲絲蛛網。漾成愁線。文字塵緣曾久懣。到此又偏難遣。怪作俑、都由九辨。千古悲秋同一局。且破除、陳例開生面。呼宋玉、夢中見。

南浦 送蔣重光之青陽

偏是正悲秋。又西風、吹到別離情緒。江闊浪黏天。扁舟也、載爾與流東去。黃花白雁。此行初領他鄉趣。寂寂雲溪荒草遍。剩有倚樓人住。匆匆休負銜杯。更臨歧、頻屬歸期莫誤。多病白頭人。高堂上、拜母尙無佳婦。霜明九子。蓮花踏破誰爲伍。若遇荆高應問我。謂稚存仲則只道酒狂如故。

點絳脣

鳩鳥無媒。年華空好。心情麗。千秋萬歲。記得伊名字。水閣珠簾。瞥見人雙鬢。卿知未。護花無計。獨抱憐香意。

傾杯令 八月十八夜泛舟石湖

水閣宵涼。雲開月迸。攪碎一輪冰鏡。今夜衣香何處。目斷驚鴻秋影。湖山如此誰能醒。最關心、年年酒病。青衫莫問紅袖。牢落自來同命。

眼兒媚 花陰點屐圖

紅牙慵案罷吹簫。徙倚鎮無聊。最無人處。半開時節。一樣魂消。妒花莫遣東風到。夢斷浙江潮。恐添離恨。不栽紅豆。只種櫻桃。

憶秦娥

春晴後。斜陽忽遣花光透。花光透。楊家姊妹。畫中曾覩。心香幾瓣深深叩。匆匆一段雲歸岫。雲歸岫。此情值得。爲伊消瘦。

百字令 程比部煮茶圖

雲龕月澗。問螺峯深處。春光誰見。不是蠶鹽同嗜好。肯寄金英千片。蟹眼徐烹。蟬膏細品。茗戰兼文戰。論詩讀畫。此中應許添伴。我亦北汲中冷。南尋羅嶰。家本鄰陽。

羨。況是年來。瓠笠影。曾歷洞庭山徧。半榻輕煙。一泓止水。此味吾能慣。卜居何地。公乎盍與吾判。

品令

幾日歡游續。殢人處。偏情屬。紅潮暈頰。綠雲堆鬢。口脂含馥。噴道環肥。恰是十分韻。足。後期頻囑。怕良夜。更籌促。此情牢記。露涼月白。香溫酒熟。漫說初逢。樓下已曾送目。

離別難 書程景師悼亡詩後

偏是好花易謝。悲朝露孤雲。更誰招。帳裏香魂。剩荀郎。無語獨悽神。莫回首。舊夢茫茫。從頭思徧。都怕重論。譜哀絃。寫就傷心詞。豪湘管。染啼痕。春晚晚。月黃昏。但長關。韞玉樓存。想妝臺。物是人改。護遺編。休使委芳塵。我亦是。到死春蠶。孤飛秋雁。難笑難顰。卻無端。又得愁城同伴。爲我更憐君。

探春令 寒食艤舟亭

傷春難遣踏春慵。去又逢寒食。怪桃花似面。梨花浥淚。不是年年色。秋深病裏停舟日。忽風前猛憶。恨無情帶水。催人東下。只有魂歸得。

雨中花 齋頭牡丹爲風雨所敗

信是殘春難久駐。一番風。幾番疏雨。盼到全開。先拋弱質。翻悔不曾珍護。伴我綠窗惟賴汝。瑤臺遠。爾先我去。儘有鉛華。饒他富貴。縱好那能如故。

鳳凰臺上憶吹簫 五日

草可宜男。絲能續命。算來總是空言。怕又逢佳節。艾酒當筵。記得深閨去歲。持尊勸病已沈綿。誰知是。回頭卽夢。猶勝今年。堪憐錦標易奪。便報道真龍也。只徒然。況獨吟顛顛。客尙如原。踢徧雲溪舊路。簫聲斷。一帶寒煙。休留戀。人生草草。幾箇華顛。剔銀燈 五月廿三日自味辛齋移居舊寢

一自楚山雲斷。孤月七番圓徧。再過空閨。重登舊榻。淒絕不逢人面。香消燭暗。便入夢也難頻見。怕檢篋中鍼線。慵理匣中筆硯。雨到殘時。酒常醒後。有淚獨傾枕畔。

百年有限。愁病裏。等閒過半。

滿江紅 七夕

玉露金風。又添得。者番淒咽。聽四壁。蛩聲助歎。乍涼生怯。莫道神仙離別易。年年尙有逢時節。枉人間。終歲共羅幃。俄成訣。山海誓。休重說。瓜果會。應停設。悵穿針樓閉。曝衣香歇。我已今生緣巧誤。癡兒莫更從天乞。獨空庭。坐到曙星殘。銀河沒。

傾杯樂 董上舍漁樵耕讀小影

百歲浮名。一身清福。最難兼得。問誰是。兒能課誦。奴能耕稼。婢能蠶織。功名畢竟同雞肋。倦游京洛。依舊歸徒四壁。五湖三泖。可許人爭物色。尊酒外。區區何惜。況八口團圞。塵事隔。只應憐。生死交情。剩有尙書遺筆。謂錢茶山先生歎行樂。年華易擲。徒自晒。煙霞成癖。尋樂地。知甚日。從君卜宅。

鳳凰臺上憶吹簫 七月二十七夜

事怕重題。時偏易觸。十年前是今宵。正雙星渡後。鵲更填橋。一見偏生惆悵。原自料。

福命難招。猶曾記、新昏小別。黛減肌銷。蕭條合歡牀在。只隔簾幃兒。地遠天遙。又五更風雨。滴起愁苗。信是人生似夢。便夢也太覺寥寥。千秋恨。彼魚鰥。鴿寡。總有先拋。

賣花聲 桐華館感舊

虛館小簾櫳。吹徧西風。拒霜花與雁來紅。持比淚痕深淺似。別樣秋容。泡影總成空。忍紀游蹤。去年到日正相同。著意解愁無處解。莫負杯中。

看花回 楊上舍盤馬圖

買得千金神駿。玉鞭親試。儘有輕裘換酒。任朔地風高。薄吹沈醉。聞說君能借客。無妨人共敵。誰結納。錦帶吳鉤。五陵年少半知己。太息我。鹽車瘁矣。惟自盼。九方歎耳。歲月疾如下坂。又日莫天寒。吟窗愁倚。君若閒中念我。只百里非遙。可能命騎。況有阿咸好伴。謂蒼雲。雲螭參月駟。竹林中。句初就。便乞君郵寄。

解佩令

春山如睡。春波如醉。恰春人、畫橈輕載。小語遮燈，任瞥見、柔情難慰。又簾前、月痕初墜。眼中流媚。意中傳慧。怯宵涼、薄羅衫袂。珍重光風，莫遣他、國香顛顛。願名花、酒狂長對。

一翦梅 巡檐索笑圖

昨夜東風小院吹。吹過南枝。先放南枝。春陰如夢卷簾遲。半月來時。半雪來時。幾度巡檐有所思。吟趁花期。飲趁花期。此情珍重付將誰。有畫中知。有篋中知。

金縷曲 楊豆村無雙傳樂府

看過滄桑劫。卻三生、柔波未斷。舊絲難割。世路恩讎都易辨。只願人心肯熱。問靈藥、何妨頻乞。遂得區區兒女志。枉青鋒、併灑多情血。非怪事、亦奇節。聲名異代同歸滅。任飄零、陸公奏草。段公遺笏。多少興亡家國恨。付與歌衫舞屨。只空惹、千秋評說。我正牢愁思作達。更那堪、讀到詞終闕。浮白竟、唾壺缺。

卜算子 金伯承將納姬人用詹天游詞意寫蕩香圖

不是藕絲長。肯把柔情繫。蓮子經秋便苦心。解共相思味。莫問若耶溪。檻外清波是。閒煞田田葉正齊。看盡雙魚戲。

青衫溼 乾隆丁酉夏秋之間洪稚存家設。訖默叩云亡婦或沈鬼趣或轉人

天敢乞明示頃果降乩云云因記以詞

悠悠生死今三載。消息仗神仙。少君難致玉真能訪事。總茫然。此江東下。盈盈百里。使隔人天。傷心空盼乘鸞如夢。射雉何年。

蝶戀花 畫蝶

纔得春來春已暮。粉蝶匆匆。相逐東風去。花裏一生渾不妒。閒情占斷裙腰路。淺翠如茵輕著露。不寫芳菲。知向繁華悟。夢醒漆園無覓處。它年合向羅浮住。

祝堇臺近 前題

倦塗金慵傅粉。又是晚春候。日永於年。池館草如繡。分明禁本流傳。寫從村裏。滕王蝶圖有名村裏來。見西陽雜俎續集。又潛向此間輕逗。玉腰瘦。葬它不惜輕盈。

風前趁斜鬪。且莫垂簾。領取此清晝。憑君公子翩翩。高人栩栩。更誰省、生前身後。

眉峯碧 題閨秀毛曉芬詩後

筆向徐陵取。願把珊瑚與。最喜琴聲共綠窗。趁暇日、添眉嫵。說盡思親語。做盡悲秋主。莫遣新詞唱到殘。高城容易瀟瀟雨。曉芬有高城九月瀟瀟雨腸斷重陽更憶家句

金縷曲 莊大令亦和知昌平州時夢至一處門署聯語云誰知馳馬驅車地
覽作修齋念佛人未幾罷職浙西俞榕爲作徵夢圖頃以復官俞又作出山圖續其後爲拈此解

四十飛騰速。笑長年、黃塵烏帽。桑無三宿。天遣蒼林先入夢。悟得前身金粟。偶墮此、朱門華屋。梁肉何曾妨作佛。但慈悲、使種蒼生福。論得失、任蕉鹿。北山那許思猿鶴。問東山、斯人高臥。爲霖誰屬。枹鼓聲稀琴更靜。踏徧閒庭莎綠。我亦願、急留面目。何事干卿拋未了。又勞勞、人海重投足。茅店飯、幾時熟。

眉峯碧 曉妝

簾外花光重。葉底鶯聲凍。曙色無情上綠窗。春睡起、還如夢。 驀覺盤雲鬆。失卻搔頭鳳。賺去雙鬢覓墜釵。防他臨鏡紅潮動。

賀新涼 張載芬秋林課子圖

滿院秋聲裏。對蕭疏、梧桐蔭碧。庭階如洗。不少春花顏色好。何必盡刪紅紫。誰解得、箇中微旨。架積叢殘尊貯酒。便百城、南面無逾此。它縱樂、誑君耳。 膝前況有駒千里。喜從容、執經問難。師生父子。底事塵緣仍僕僕。應爲衰親驅使。念祿養、誠非得已。我願一言臨別贈。恐時宜、不合人爭鄙。田二頃、可歸矣。

前調 題太原九老圖

九老圖者。吳門王丈世誠集高曾以下九人。命族孫恭仲各寫小像。補以椿桂之景。用誌家慶。圖中九人。合得六百八十五歲。其未逮七十。不預焉。右方題詞。例皆耆宿。丈獨不以余爲不佞而屬題之。後有非此例而廁入者。自余

始矣。

柱國坊猶壯。問誰家。百年喬木。依然無恙。天使於中開壽域。羣從一堂扶杖。但仙桂、靈椿相傍。對弈彈琴何不可。覺此心同在義皇上。惟舊燕任來往。念他盛事香山。防。惜當時。水殊九派。根非共壤。尺幅丹青圖衆皓。神比石田尤旺。聽園綺紛賡迭唱。我獨容爲諸老殿。笑瑤池宴例將毋叛。長命酒盍分餉。

小桃紅 曹劍亭前輩淥波花霧圖

一棹空江曉。幾輩尋芳早。花重於煙。天陰如夢。但聞啼鳥。記前身。來處是蓬山。卻仙源重到。畫裏詞人老。鏡裏春人少。有約應歸。無官亦得。九峯三泖。借王郎。歌句杜陵詩。遣先生懷抱。

蘇幕遮 閔貞梅花美人爲鄭定齋孝廉作

雪將殘。波欲縐。春病春愁。寂寞誰經受。一片斜陽凝翠袖。賸有梅花。解共人肥瘦。影低橫。香暗逗。記得林閒。省識風姿舊。生怕樓中吹笛後。我夢江南。君夢揚州否。

金縷曲 喜晤湯遵路卽送之官鳳山

春色濃于黛。喜江鄉、廚開櫻筍，又成佳會。鬢影婆娑花綽約，十日尊前相對。數舊雨、寥寥幾輩。足跡已週天下半，把平生、出處商量再。耕釣約，恐難遂。
君有五年後歸田之約
澎湖東去濤千派。儘容看、扶桑日出，神山鼇戴。除卻曾經滄海外，何事更堪稱快。況轉眼、金門報最。狀擬嵇含箋比鄭，只歸裝、使勝明珠載。燕市酒，待君醉。

南樓令 莊京叔秋夜讀書圖

梧竹碧於煙。星河影在天。恰歐陽、方夜無眠。除卻叢殘誰遣興，只憑仗、七條絃。蝶夢儘翩翩。多君兄弟賢。又才名、第五爭傳。笑我秋風常作客，壁魚飽、字神仙。

減字木蘭花 莊廣文紅袖添香圖

高燒絳燭。深夜何人能伴讀。半臂初添。珍重春寒入畫簾。帳前帳後。借問風流如馬否。香度芙蓉。莫待樓頭又打鐘。

沁園春 莊印山看劍引杯圖

閒裏銷磨。除是龍淵。或者兕觥。看滿天風緊。傾殘白墮。三更燭短。舞罷青冥。歐冶爲鄰。杜康作友。脈望前生也。證盟幽居好。任徃流暗水。堂帶春星。浮榮何事干卿。又豈爲中心偶不平。但三分俠骨。一腔熱血。無從陶寫。聊繪溪藤。樂莫如魚。夢還化蝶。真處從來別有情。吾衰甚。笑酒狂漸減。劍術無成。

八歸 爲錢霞叔題凝秀閣遺詩

寒蟾似水。殘燈如豆。人在小院遲寐。情懷此際。愁難遣。只有迴文遺詠。最堪尋味。手展烏絲千徧讀。一仿佛。林間風氣。久寂寞。午夢堂中。此獨瓣香契。詩酒蕭郎跌宕。天教爲壻。日畫雙眉勻細。慧偏慳福。才能妨命。忍使黃門哀逝。笑星橋再駕。用楫渾忘渡江計。霞叔舊有姬人近復締姻海虞蔣氏。應回首。等閒泡電。擁髻愁吟。猶疑前日事。

減蘭 家仰原太守以崑山王某隨時行樂圖屬題凡十二幅余未識其人也
重違其意分題三闋

秦淮蕩槳

晴波似掌。十里秦淮堪蕩槳。對酒當歌。人物風流晉永和。
江南信好。偏我遊蹤都草草。丁字簾前。惆悵青衫二十年。

驪山晚眺

阿房火歇。又見華清宮殿出。多事驪山。閱盡滄桑不肯閒。
搆西折北。指點蒼茫空暮色。殘照秋風。付與詞場畫譜中。

襄江泛月

沈碑不起。千古多情羊叔子。從此人間。共博浮名身後傳。
清宵泛宅。一片江光和月白。便欲從君。訪隱先過舊鹿門。

憶故人 題畫

澹日林梢。杖屨歸路橋東直。臨流危閣兩三間。便是幽栖宅。
山與暮雲同碧。喜新篁。鬪它顏色。地非淇渭。客捨羊求。吾將安適。

采蓮令

漸生涼。暮地雲飛棟。闌干外、樹枝齊動。一番急雨。瀉圓荷、瑟瑟珠堪弄。閒中望、舟橫浦潑。人攜笠屐。幾峯濃綠添重。此際幽人自在。正把羲皇夢。驚清睡、晚雷輕送。起來無事。只拄頰、靜者機誰共。憑收拾、煙鬟霧髻。來供渲染。想見虎兒酣縱。

過秦樓

友人摹唐六如畫鶯鶯像用六如原題韻

夜合籠煙。牡丹經雨。想像玉人微倦。短紳歌後。狂杜吟殘。牛女隔河難見。嗟好事太恩恩。春去重衾。秋生團扇。定從頭記到。幽輝初射。幾回嬌顫。千載後、著意丹青興懷。今昔畢竟也如泡電。癡能受福。憂最傷人。但願莫生才辨。安得無心。任它蕙草當庭。桃花映面。笑情絲易惹。偏在梵王宮殿。

解連環

昨宵風雨。問行雲何往。隔峯遙阻。聽嘯鶯、霧色新開。向七里塘前。遍看花譜。一種仙葩。樹狼籍、衆芳誰伍。況慧從性出。瘦是家傳。放誕如許。春光自來易去。怪東皇少

力替人做主。已儘拚。月落參橫。奈多事。誰樓疊。催更鼓。僥倖蘭香。只贏得。秋雲千縷。待重來。恐它綠葉。又繁別圃。

無俗念 史南塘觴詠行幃

舊遊多少。數論文把盞。交君尤早。猿逕春風。龍泮月。是處有人傾倒。種秫田荒。燒芸窗冷。容易歸心擾。別來重見。盛顏青鬢猶好。差喜子已知書。婦堪謀酒。事事安排了。偶向溪南營十笏。花竹居然深窈。茆店飄帘。灞橋策蹇。試問如何較。汗青浮白。此中功業非小。

減蘭 姜學在姬人陳素墨桃

春風入夢。七寶池頭。花影動。恨已全銷。寫向妝臺。只助嬌。險麼小試。偏與蘇州顏色異。緋桃一名蘇州桃。密葉深根。占斷人間月二分。素廣陵人號二分明月女子。

雨中花 桐華館梅忽爾枯瘁少權遂有鼓盆之戚朱八丈爲作圖蘭坻補以

水仙余作此闕

玉骨何曾風雪犯。任年年、影疏香暗。九未交殘，燈才試過，春色忽驚全減。怕聽笛聲愁倚檻。羅浮夢、怪渠太短。月落難留，星寒欲化，總是一般孤豔。

沁園春 少權爰山下居圖

人世勞勞，除卻登朝，必也在山。看四方游倦，常思故里，三公位極，反羨長閒。瓊剩詩篇，基留井竈，一輩詞人一輩仙。幽栖定，便任君位置，爰貝之間。清緣未必全慳。只怪爾、遐心早十年。但空中樓閣，意中水石，聊明雅尚，差傲時賢。我昔曾遊，境還入夢，招隱相期共揜關。抽簪果，恐遂君此願，鬢已皤然。

貂裘換酒 癸卯除夕

我本風塵慣。笑舟車、辭家廿日，征途未半。任貼桃符喧爆竹，那及春回江縣。珍重是、今宵茆店。短燭兩條人四座，更村醪也抵屠蘇勸。雞與黍，咄嗟辦。飛騰暮景情懷倦。縱區區、微名博得，斗筭何算。身尚浮沈親已老，只此未能排遣。且客路、勉加餐飯。骨肉漸疏童僕曠，賴親朋、好年消愁伴。商陸火，幾番換。

又 甲辰元日

漸覺東方曙。看紛紛。林雅散影。非關列炬。三十八年空墮地。孤負頭顱如許。又蹤跡。慳來東魯。回首南雲飛不遠。怪宵來。夢被關河阻。離思鬱。與誰語。爭如歸築閒村塢。儘逍遙。采蘭歲月。看花伴侶。斗酒斲肩長在手。噲等亦堪爲伍。誰耐說。文章遷固。便是經生誇奪席。也經經。沒齒終無補。胸別有事千古。

減蘭

鶯歌乍囀。浪說枝頭春尙淺。家本江南。稍喜天生一種愁。不曾真箇。殘月荒雞容易過。絮已沾泥。一任風花著意飛。

賣花聲 元夜漫河

茶熟酒溫噉。消盡黃昏。看燈情異去年人。只有半牀殘月到。許客平分。寂寞杜司
勤。傷別傷春。自來好夢不曾真。依約畫簾風細處。昨夜星辰。

又

姹紫逗春妍。雨過林鮮。試燈風後暮晴天。一半揚州明月好。一半河間。酒盡撥湘絃。抵唱陽關。重來門巷可依然。便聽清歌雙角彩。也當良緣。

鳳凰臺上憶吹簫 甲辰中秋

自結同心。到今屈指。曾經六度中秋。算前年此夕。無病無愁。坐到雙鬢睡去。心香爇。寶鴨煙浮。憐渠耐。輝寒霧溼。數盡更籌。悠悠關山千里。歎魂已難招。月尙當頭。只淚痕獨照。倚幌何由。豈是文簫劫重。難消受。半紀綢繆。空追悔。問今來底事。直恁輕遊。

滿江紅 渡江游金山江天寺有寄

小住揚州。歸心起。樵風又借。笑此際。人皆北去。我偏東下。湖海一身原不繫。魚龍滿眼誰先化。續遊蹤。重上妙高臺。輕帆卸。嬌杏綻。寒梅謝。春意鬧。春晴乍。問裴公何福。占成巖舍。鈴語靜時僧入定。波心幻處雲開罅。料隔江。使館正懷人。題詩罷。

減字木蘭花

秋籟吟

微波不斷。卻是吹來風力軟。小別關情。掌上雲英太瘦生。山香一曲。聽雨紅樓銷畫燭。怕說將離。便而留春寫折枝。

金縷曲 贈張豐山秀才

白苧城西路。記前塵、一林柿葉、乍停柔櫓。小關園池留塔影。中有一家詞賦。算此福、自關天付。寫遍烏絲卿獨秀。任硯焚、不管君苗妒。三歲別、黯情緒。新陰綠到桐溪樹。喜重逢、吹簫夜月。送鉤宵雨。畢竟頑仙空證果。休信聰明多誤。怕只是、離觴易舉。我願乘風依翼軫。向天邊、長伴張星住。先爲爾、唱金縷。

又 別少權兼懷豐山蘭士

爾我形骸忘。又經時、狂歌痛飲。盍簪堂上。幾度欲歸歸未得。小別不教輕放。便同趁、一篙新漲。直到伯通橋外泊。論深情、真比花潭樣。風與雨、忽添悵。瀟瀟怕聽吳娘唱。怯羅衣、重陽天氣。端陽先釀。賴有岑家兄弟好。謂初文昆仲能遣客中愁。況早南北。抽帆分颺。詩幻無聲花弄影。望桐溪、都被溪雲障。還附訊、近何狀。

青玉案 少權舊藏薛素君竹祕閣面剝月形中有美人執鏡題云兒憐我瘦
我憐兒單嫦娥邈矣空此廣寒款署素君下有一薛字小印綠窗清供也頃
以見贈索填此解

湘筠一尺春痕透。更巧琢、明蟾寶。只有嫦娥憐共瘦。輝寒瓊臂。風生羅袖。卿慣能消
受。拋殘金彈慵拈繡。且細壓、濤箋皺。最易賺它條脫溜。簪花初仿。畫蘭剛就。名策
靈芸後。

沁園春 題吳次升人天誥傳奇用亡友余少雲韻

聞說才人命似紅顏。然耶否耶。悵行雲偶合。旋消巫峽。東風乍起。便妒梅花。紈素通
辭。瓊瑤作報。博得重添好事嗟。青谿口。有情波三尺。長抱蒼葭。憐它彩鳳隨鴉。翻
不及、鴛鴦塚日斜。但茫茫上下。呼之欲出。悠悠生死。樂也無涯。試命清尊。更呼小部。
紅展氍毹翠幙遮。應爭嘆。費將軍揖客。如許詞華。

蝶戀花 題程命三丈還婦編傳奇

秋 韻 吟

沙際鴛鴦雙顧影。十斛明珠難買芳心肯。不是當筵教合鏡。看花淚眼何人省。贏
得梨園歌玉茗。摩詰詩工。此曲還相等。多事人間猶說餅。寧王笛已千秋冷。

減蘭 春蘭夢影圖爲徐朗齋孝廉作

生成空谷。若箇將來藏畫屋。黃浦春風。妒盡桃花不敢紅。露濃煙重。今夜國香何
處夢。對影徘徊。便抵移根一畝栽。

南浦 次韻徐尙之桂花小幅

清秋院宇。算香風。只有木犀濃。能得幾回消受。電已碎春紅。賸取珊瑚架筆。把情文、
曲折寫來工。道半生憂患。十年離別。此夢太怱怱。我已哀蟬聽慣。怪黃門、近亦悼
亡同。況是秋霖腹疾。頻減客邊容。蒙楚詩成應許。和稠桑、路斷可能逢。羨連枝桂樹。
重開依舊去年叢。

壺中天 李蘭友閩嶠紀遊圖

征帆高挂。又仙霞在望。穿林踰隘。行盡東南唯有海。博得生平稱快。翠巖堆鹽。絳囊

剖雪風味誰能養。榕城詩好拾來應續清話。杭菴浦翰林有榕城詩話。更喜篋剩新詞。按將鐵笛吹出劉衡派。秋館桐溪風雨裏。一見投憐鍼芥。絕嶺飛猿危灘吼虎。說到心猶戒。少文四壁臥遊聊付圖畫。

霜葉飛 同人游般若菴卽事

岸低橋小尋游跡。城南精舍重到。丹黃幾樹綠秋陰。只泛舟先好。喜近寺、修篁夾道。水邊僧已相迎笑。便共穿幽徑、更極目、高樓四圍。都入清眺。回首廿載前塵。貫休瓶鉢可憐。頻付衰草。寺僧蓮宗一輪相繼示寂且將濁酒洗牢愁。有賞音同調。看卽席詩成誰早。忽來風雨催歸櫂。待速倩方壺。謂闕士寫上生絹莫教忘了。

風入松 爲沈道士題松鶴

雲停高閣瞰吳山。聽雨記尊前。有時攜屐松風下。更擎舟、放鶴亭邊。小別十年一面。怎教人不華顛。懸厓千尺瀉飛泉。此境卽壺天。浮生我近憐多病。只難拋、藥裏詩篇。何日共尋瑤草。呼龍耕徧蒼煙。

如夢令 題潘湘雲小影湘雲震澤人色藝雙絕國初諸名士多賞之與梁溪鮑讓侯定情讓侯遠適竟失身廝養以死圖爲錢塘奚岡臨大梅數株湘雲踞石坐焉

本是瀟湘雲影。卻在羅浮山頂。一樹玉梅花。剛被天風吹猛。江冷。江冷。今日畫圖重省。

思佳客 秀水蔣乾九以楊梅漬寫木芍藥取草汁作葉傳之錢香樹尙書題曰天生富貴頃以示予爲賦此解

省卻胭脂畫牡丹。嫣紅活碧自天然。王郎庭院春長借。謝客池塘夢未殘。懸斗帳。近雕闌。生綃雅合酒醒看。洛陽貴客紛如許。總帶儒生一點酸。

浣溪紗 武林歸舟

記得停舟霜葉紅。漸看紅葉褪江楓。送人只有雨冥濛。三竺六橋遊草草。十年一月住惛惛。拚將清夢續孤篷。

三姝媚

霜濃風力峭。喜經過平橋。紅樓重到。黛減脂慵。正玉人初病。熏籠斜靠。生就愁腸。算只有文園同調。秋月春花。細數前期。教人添老。休怨尋芳遲了。又補就新陰。燕雛鶯小。綠酒明鐙。聽緩歌低唱。口靈心巧。值得魂銷。拚十斛珍珠傾倒。怕是嚴城。又早嚴更幾報。

蝶戀花 吳門紀別

才得清尊良夜共。醉不成歡。卻被離愁中。多謝故人爭踏凍。霜天也抵花潭送。別語無多眠食重。隔箇城兒。各做相思夢。篷背月窺衾獨擁。寒山寺又鐘催動。

沁園春 錢大令松翰猶存圖

歸去來兮。正好功名。飄然遂初。愛松風一枕。閒窗夢穩。鞠畦幾稜。晚節香餘。樹有龍鱗。門無鳳字。從此光陰付著書。盟言在。說抽簪五十。君有五十歸田之約。願果能如。何須別賦閒居。就老屋西頭。更結廬。笑人非善飲。種仍秫稻。具還濟勝。昇謝藍輿。

落落霜標。離離瘦影。伴卻吟身。德不孤。披圖問。彼柴桑三徑。得似君無。

賀新郎 爲王伯蒼新昏作。伯蒼在臺灣爲賊所困。濱死者屢間。關得脫。初伯蒼喪偶。父母爲議昏。錢氏伯蒼在閩不知也。及爲賊所困。武舉某實藏護之。遂以女甥許嫁。至是迺並娶焉。

天上三星大。正人間。梅花放蕊。燭花成朵。那識王郎歸萬里。滄海已曾經過。容易得。鸞皇聲和。踏徧蛟潭。辭虎穴。畫眉人。聽說眉應鎖。先酌酒。自稱賀。尹邢畢竟誰爲左。想深閨。調停不費。自然安妥。大婦溫存中婦謹。廚下羹湯爭作。早佳話。姻朋傳播。此日肩隨同問寢。看明年。又產珠雙顆。湯餅會。可邀我。

采桑子 本意

塘灣橋畔停舟晚。日落金烏。水浴春鳧。陌上桑陰入畫圖。攜筐誰把柔枝采。雲作衣裾。玉是肌膚。可惜羅敷已有夫。

沁園春 贈徐中剛

屈指朋游。城北徐公。知之最真。任門前客至。心常泛愛。牀頭金散。口不言貧。七里山塘。三閒水閣。管領蘇臺自在春。扁舟訪。喜鐙紅酒綠。歲歲留髡。知君家近橫雲。怕峯泖。還將鄉夢分。看蕙成芝蕙。兒童爭秀。栽來梧竹。烏雀俱馴。甲子才周。庚申好守。風月長留健在身。休嫌別。只披圖斯在。時以寫真見示如見其人。

青玉案

程叔平讀書秋樹根圖

銀牀昨夜商聲報。悟落葉、須頻掃。手把叢殘閒自校。一枝春色。千章夏木。未抵疏林好。陳編人笑秋心抱。富貴長安致身早。我道無如行樂老。酒能謀婦。經能傳子。福已難脩到。

惜分飛

錫山秦生姬人葛秀英小影

早識蓬山歸去驟。何必人間邂逅。畫裏眉痕瘦。沈吟想見新詩就。珍重蕭郎情獨厚。值得華年不壽。君悟梅花否。落時原在三春首。

阮郎歸

毛小蘭桃花

是誰蘸筆寫芳叢。花如人面紅。息嬌無語夕陽中。思量昨夜風。
春事晚。水流東。眉
樓夢已空。願橫波亦善畫桃花。黃塵紫陌去悠悠。仙源隔幾重。

鵲橋仙 七夕得月樓

孤篷歇雨。高樓得月。燈火山塘漸少。雙星影裏合歡杯。卻可喜、天然事巧。
蘭缸吐
豔。桃笙引夢。怎禁柔情縈繞。神仙也有別離時。反不若、相思更好。

奪錦標 癸丑五日病中

唐老爲郎。朔飢索米。佳節又逢人病。可笑糶難益智。艾未蠲疴。縷猶長命。縱消愁有
酒。怎澆得、埋愁深窞。再休嗤、豎子成名。噲也何妨生並。盼斷南來雁影。客夢連宵。
都被雨聲驚醒。遙憶雲溪水榭。珠箔高懸。畫船方競。料家庭聚話。也說到、長安風景。
卻誰知、八尺桃笙。日午還嫌衾冷。

柳梢青 題吳門汪徐二生深柳聯吟小影

往聽黃鸝。柳陰深處。對詠新詩。緒也前身。恭乎夙世。難得同時。
春人珍重芳菲。況

弱冠才名早齊。怕是離羣。曉風殘月各惹相思。

買陂塘 周希甫舍人射鴨圖卷

看瀟湘綠波初動。問誰先識寒暖。翠衾趁曉衝萍過。啞得露珠零亂。名自喚。喜呶呶齊聲。去去隨人慣。漫拋金彈。任闌影花扶。竿絲風裊。飛盡落霞片。黃塵裏底事猶多。繁絳。舊巢應有餘戀。漁莊蟹舍閒拋卻。來共賓鴻忙燕。歸夢遠。記卅六灣頭吹笛。曾忘倦。能如初願。彼射虎山南。羈鷹塞北。此樂莫輕換。

賣花聲 題董小柔小像小柔長洲人母曰湯柔卿故名小柔所居紅杏樓在

金閨門外。余初見纔十一二齡。未幾名噪一時。又未幾嫁爲廝養婦矣。頃於貽拙齋壁間見所懸小像清輝依然。往事若夢。感有情之難得。傷薄命之不足。爲填此解以志慨云。

舞盡掌中身。樓小藏春。嬌嬈樂府一番新。見比簸錢時候早。已是銷魂。花落不飄茵。白石成塵。天台路恐誤劉晨。只有生綃能駐景。儘喚真真。

減蘭

西風殘照。油壁車過輕一笑。半臂生涼。鬢是江南鬪掃妝。
驚鴻飛去。底事又從城闕遇。團扇芳姿。可惜相逢已嫁時。

又 爲葉次由題墨蘭

疏疏澹墨。不御鉛華偏自得。莫逞幽姿。待泛光風卻已遲。
無人空谷。誰肯采來親沐浴。如此年年。縱有芳菲也可憐。

念奴嬌 中秋雨夜灤陽客舍作

短衣匹馬。又匆匆到了。平分秋序。剛盼同看端正月。惹起一宵風雨。賓雁東南。浮雲西北。添得階蟲語。憑吹絃管。與誰同上天柱。亦有濁酒盈尊。故人促膝。強笑排離緒。底事竟拋田二頃。直爲雄心耽誤。兒女長安。庭闈故里。夢也迷投處。慵支孤枕。已拚聽盡更鼓。

沁園春 馮玉圃給事種竹卷子

誰可爲徒。除卻崇蘭。爭推此君。看娟娟瘦影。能篩夜月。森森直節。欲上孤雲。鴉嘴攜來。貓頭插處。憑報平安。日日聞。應官暇。有綠卿青士。長對黃門。何須歸計。徐論。早移得。江南十畝春。喜所師不遠。爲虛爲實。其占逢吉。宜子宜孫。香豈人知。醉還自笑。悵我天寒倚夕曛。幽居定。效鷗波故事。敢乞平分。

鳳凰臺上憶吹簫。題寒閨吟席圖。圖迺揚州管希寧平原爲羅山人聘之妻方白蓮作也。白蓮學詩於綠淨老人許氏。與其姒孫淨友小姑秋英頗多酬倡。山人嘗屬平原作圖諾而未與。丙午夏平原臥疾不起。山人經紀其事。病中始以此圖授之。則猶癸未春所畫。山人既哀永逝。復感故交。乃裝池什襲乞同志題焉。

爲雪開簾。因詩炙硯。生來林下風姿。況掃眉才子。天遣同時。不羨人家詠絮。消九九。別有新題。皋比擁。飄蕭白髮。是女中師。人非境難再得。只仗著丹青。小駐鴻泥。卻廿年前約。不負心期。收拾悼亡傷逝。都併入。老淚漣洏。孤吟處。僧樓寒夜。可似深閨。

百字令 羅山人登岱圖

天門跌蕩。問青青不斷，誰齊誰魯。有客登臨忘觸熱，曾阻幾番風雨。六月披裘，三更見日，畢竟教人妒。芒鞋獨往，入雲如踏輕絮。回想浪跡當年，匆匆一覽，悔未攜衾住。重向畫圖勞指點，卻在軟紅深處。我病將衰，君貧尙健，四嶽游應補。待完婚嫁，向平心事終誤。

醉花陰 本意

怪來睡思濃。春晝國色初酣酒。眠向萬花叢。花片吹來，便抵氍毹厚。心情生怕將離候。嫁與東風驟。何處去行雲。不在巫峯，可在三湘否。

南浦 送王侍郎還青浦

風雪駐蒲輪。喜再來，風姿海鶴如故。林下豈無人，耆筵設，誰是獨承恩遇。手攜柳栗，杖頭猶帶屑霄露。路人共說，便除卻名山，亦堪千古。怱怱匝月春光，又隄柳搓青，催生離緒。結習在文章，聯裙屐，排日迭爲賓主。千山歇浦，送公夢已隨公去。欲談鄭

學。待耶齋名期。它日從遊。重繙箋註。

傳言玉女 題夢游圖爲胡孝廉稷

絕不逢人。只有垂楊千樹。赤闌橋畔。似曾經微步。隱約簫聲。此曲問誰能度。今夕何年。是鄉何處。翠袖黃冠。夢中身。天上侶。奇蹤易失。倩丹青長駐。殘月東風。又是江南歸路。恨無雙翼。共君飛去。

燭影搖紅

爲吳山尊孝廉題南樓卻扇圖孝廉新昏後入都既下第將仍赴

兗州孫淵如觀察署南樓卽署中就贅之所也

蓮漏沈沈。春寒漸入窗紗罅。合歡團扇乍開時。喜待嚴妝卸。才與左芬相亞。又新詩。玉臺吟罷。眉痕深淺。除是生花。問誰能寫。鄉到溫柔。名心何事終難化。青衫衆裏。偶嫌身。豈久居人下。自信文章聲價。便歸時。何須傍夜。南樓月好。戲撲流螢。儘消長夏。

沁園春 桂馥大令戴花騎象圖

非惠非夷。騎象戴花。仙乎使君。彼帶牛之子。應還耕鑿。捕蛇者說。其忍傳聞。堆鬢成霞。渡河蹴雪。那管哀牢。遠插雲。風塵裏。笑是諸衆等。忽有畸人。升菴疑是前身。豈名士。由來致不羣。看夕氛曉瘴。飛鳶站站。蠻童棘女。竹馬紛紛。秋氣西來。征車南去。四海交游。幾輩親。歌驪後。待它年奏績。再與論文。

賀新涼 潘芝軒脩撰秋帆歸興圖

疏柳斜陽外。趁秋潮、初懸五兩。還裝輕載。曾跨鵬鰲橫海過。猶記鷺鷗盟在。且披著、宮衫戲綵。留得一枝題塔筆。向深閨、細寫春山黛。蓉鏡下、合歡帶。葦鱸雖好無心愛。數紛紛、黃塵烏帽。不如君快。第一科名年弱冠。事事勝人千倍。只尺幅、丹青難賽。我是石尤風裏慣。笑虛舟、觸處都成礙。歸去也、又何待。

如此江山 沈石田爲吳匏菴作東坡赤壁夜游圖今在曹侍御錫齡處

沈沙折戟都銷盡。游人尙傳詞筆。烏鵲南飛。大江東去。此景呼之欲出。迢迢千載。有多事髯翁。頻尋遺迹。萬頃茫然。放舟舉酒屬嘉客。何人收拾二賦。將溪藤尺幅。摹

寫聲色。石亂濤驚。山高月小。別有蕭蕭蘆荻。攜來賓座。喜祕笈深藏。緹巾重襲。後再流傳。又向今視昔。

沁園春 木蘭畫像

能替爺征。猶是紅顏。居然丈夫。記鴛機拋卻。便驅駿馬。鐵衣著後。不夢羅襦。河水東流。黑山北互。想見當時親執杓。啾啾騎比。秋閨促織。聲竟何如。策勳底用尙書。有魯仲連。風功不居。喜十年遠戍。望廬仍在。二親無恙。出郭相扶。鬢影窗前。眉痕鏡裏。省識春風向畫圖。區區願把。凌煙別構。一例傳摹。

長亭怨慢 送張檢討歸蜀

漸開到將離時節。銷盡殘魂。又逢君別。萬里關山。杜鵑一路。正啼血。餘寒珍重。怕易透。衣如雪。辛苦賊中歸。須早慰。高堂情切。曲折。望青天蜀道。何處是君栖歇。蒼黃去也。莫忘卻。故人書札。恐異日。再過春明。我先把。江湖身乞。且努力行藏。後會茫茫難說。

百字令 題譚子受止止堂初稿並送出都

揮毫落紙。早新詩一卷。傳來人口。何事干卿拋未了。觸處易成僂僂。癡是鍾情。慧應得道。狂亦由天授。虛堂夜靜。鐵簫時作龍吼。卻怪公子翩翩。短衣匹馬。也被飢驅走。若向趙州城下過。爲我先澆杯酒。白雁黃花。西風殘照。別可魂銷否。重來相見。定添行笈千首。

定風波

黔中女子冉氏南籠張太守鳳枝妾也其母欲奪其志風波百出女

以死誓卒歸太守同人爲作還珠圖後太守被譴遠行女不能從欲赴水死賴救得免今女猶滯黔中太守在都下出圖索題

買得明珠珍重看。卻愁風浪起無端。母也如天偏不諒。休悵。此生終對水晶盤。省識春風人影瘦。依舊。好花已分作紅殘。有日西窗同話雨。辛苦。莫言別易見時難。

雙調望江南 周斯才春江歸棹卷

春江遠。一棹任夷猶。鄉夢已通江。令宅客情還戀庾公樓。身許狎閒鷗。披圖看。棖

觸使人愁。鎮日軟紅來撲面。幾時淨碧去撐舟。準擬待今秋。

賣花聲

孫鏡渠紫薇桃花使面

誰向省中裁。絳雪飛來。好花爭似此長開。且喜仙源消息近。對影徘徊。紫陌拂黃埃。走馬曾陪。添香想見待朝回。記取瑤池重結實。更索銜杯。

水龍吟

譚子受吹鐵簫乞食圖

居然乞食吹簫。伍行人後。斯人繼。誰將頑鐵。鑄成清管。授君絕技。度曲風前。賣錫花下。可如吳市。此非常人也。今無市正。且聊作逢場戲。漫說英雄兒女。到窮途。一般蕉萃。閒關游倦。參差吹徹。行行止止。纔出番閩。便驕門內。眼中多矣。笑我拙言詞。亦思托鉢。請從公子。

黃鸝遶碧樹

戴惟憲吉士聽鸝圖

何處尋芳好。垂楊百尺。掠波梳霧。上有黃鸝。恰閒關相對。坐風而語。幽人此際。正傾耳。林間聽取。須識是。斗酒雙柑。數典不忘其祖。遣畫長年樂趣。卻重來。軟紅塵土。

還記否、有繡湖花鳥、寶掌煙雨。僕本京華倦客，悵苕苒、春光誤。幾時訪戴山陰，扁舟來去。

減蘭 題羅兩峯爲何耳山所畫蘭花卷

生綃尺幅。想見幽居常在谷。蘭以香燒。何意吟魂併疊招。天涯雪涕。卅載交情今再世。耳山尊人數峯。余舊交也。子又生孫。管領餘芳自有人。

金縷曲 贈袁達夫卽送南歸

不到清溪久。記當年、隨園高會。張燈置酒。一自風流悲頓盡。知己淚傾三斗。喜京國、君來把手。王謝門基今有託。況豪情、奇筆都無偶。哀與樂、試同剖。新詞纔脫輕圓口。便驚它、微雲秦七。斷虹歐九。秋夢樓頭高百尺。多少才人低首。何事向、軟紅奔走。對鞠正拌連日醉。卻恩恩、又折桑乾柳。珍重別、朔風吼。

又 邵壽民招集橋東書屋分得世字

歲歲開尊地。是橋東、數椽書屋。銷寒常例。一輩才華推第五。況有難兄難弟。愛薇省、

清閒多味。食譜翻成家釀熟。看翩然來盡知名士。誰舊雨。孰新契。酒酣以往增豪氣。試評量。幾人風雅。幾人經濟。畢竟胸中先有竹。始許目能空世。聽更鼓。疊催三四。歸路不愁逢醉尉。怕金吾夜禁。今初厲。期後會。請重詣。

長亭怨慢 贈張子白進士

久辭卻。紅塵車馬。遠自雲間。重來日下。十載相思。此時容我。乍傾寫。春明話雨。記否在。西窗夜。不少唱驪駒。可抵得。士安聲價。君北來彭兆蓀甘亭作送行序最工爭詫。問詩壇酒陣。誰果與君堪亞。一行作吏。恰笑比。玉人初嫁。料此去。種福蒼生。休把閒愁牽惹。且銷過嚴寒。日日莫拋杯罨。

壺中天 送李和叔舍人奉使琉球

中山持節。是儒臣。數十年來榮遇。一品衣披。仙骨健。脚踏滄洲煙霧。積氣涵天。殘宵出日。旗有靈風助。青蓮筆下。定添多少奇句。想見萬里樓船。十行詔勅。遠把皇威布。君到海東。如北望。清夢還應飛渡。去宴紅雲。來迎玄鳥。屈指程先數。吾將歸矣。未

知重會何處。

水調歌頭 爲尤二娛題西湖看蓮圖卽送之官滇南

麴院納涼處。人倚夕陽天。郎家銷夏灣近。妾姓指荷錢。不怕雲翻雨覆。長願聞聲對影。好是正田田。值得一千字。珍重賦長篇。君有藹菖篇百韻別愬愬。愁黯黯。又經年。東風忽催行色。歸夢逐春圓。便去蒼山瀾海。同訪碧雞金馬。可記總宜船。桃李徧栽後。再結看花緣。

減蘭 爲楊米人題張仲治畫蘭便面

寫蘭爲贈。兩兩素心。持作證。汎徧光風。是處春歸一握中。久疏芳訊。孤負儂家陽羨近。別有關情。聽到琴傳空谷聲。

暗香 張鹿樵梅花卷

瓊英爭吐。問是誰管領。依稀張緒。小坐蒼苔。惹得衣裳滿香霧。折得疏枝在手。便先自。把春留住。別幾載。重展丹青。風兒尙如許。何處舊遊路。記西崦以西。也會來去。

軟紅耽誤。欲覓家山夢魂阻。且喜從君讀畫。只當作看花同步。此幅後。煩更寫紫薇新樹。

賀新郎 邵季民新婚

季虎才華著。有冰清、建牙江漢。今之羊杜。想見南樓明月夜。卻扇共傳好句。天遣結同心雙縷。身是姬家公奭後。論門楣。合把齊姜娶。還聽取。鵲巢賦。南風吹過黃梅雨。看相攜。蘋花溪畔。蘭舟容與。歸拜尊章添色喜。長博堂前笑語。又早放槐黃如許。先祝泥金書作帖。待明年。湯餅筵重赴。須醉我。滿尊醕。

貂裘換酒

爲張仲治題雪中狂飲圖

醉亦尋常有。怪寥寥。古今數字。獨傳人口。西蜀東吳天萬里。忽共尊前奮袖。卻正是長安雪後。僵臥碎瓊呼不起。看繁星。歷亂如棋走。此樂也。世能否。丹青早入長康手。歎圖中。幾番離合。未堪回首。遷客夜郎今已返。謂雅存君尙顛狂依舊。更笑我。病還強酒。寧可荒墳澆一盞。勝向它。丞相卓茵嘔。身外事。盡芻狗。

離亭燕 題莊伯鴻秣陵秋傳奇卽送之官秦中

憑卻移宮換羽。寫出一時兒女。便使人歸沙叱利。也算奇緣千古。秋草沒長干。回首
舊游何處。又別東華塵土。去聽灞橋風雨。收拾瘡痍烽火後。地是從前歌舞。且待
鬪穠花。再把閒情重賦。

醉太平 書楊米人都門竹枝詞後

情真景真。才新調新。長安冠蓋如雲。問關心幾人。經秋歷春。非愁卽貧。不如歸憶
都門。讀君詩一巡。

倦尋芳 書米人考具詩後

忙何日了。纔過槐黃。桃浪如許。幾尺筠籃。便載一家家具。心細無煩童僕檢。裝輕又
忍衣餐誤。記頻攜。把春風秋月。等閒虛度。怕讀到。盈川詩句。字字形容。真似談虎。
我已田荒。未耜不知何處。縱欲下車防士笑。屢曾按劍遭人怒。悔蹉跎。竟輸它。棄儒
而買。

齊天樂 送汪劍潭之官粵西

五升倉米纔餐罷。青衫又爲司馬。卅載浮名。廿年薄宦。算我行藏相亞。吟鞭手把。向揭帝塘邊。越王城下。日瘦天寒。那堪別淚此時灑。閒愁再休易惹。彼三蘇父子。君已方駕。胸有江山。家饒述作。隨吏誰如風雅。吾言記者。但二頃盤營。擔肩應卸。住本揚州。只須尋鶴跨。

貂裘換酒 辛酉元日

又是新年矣。進屠蘇。今居最後。老之將至。捲地風狂。連日吼吼。裂北窗窗紙。擡眼望。白雲天際。妻病每添醫藥債。況景升豚犬。頑而穉。塵世大幾如意。此腰折爲衰親。仕任浮沈。青衫司馬。青州從事。除目難修人物表。不過逢場作戲。但默祝。早成歸計。山色對門花繞屋。儘餘生。細嚼閒滋味。春夢好。偶然耳。

又 題瞿鞠亭鶴歸來樂府

建業降幡豎。問誰將。桂林殘局。隻身撐拄。留守原知難獨守。成敗付之天數。好接踵。

揚州開部。況有睢陽能共命。謂張別山司馬看從容。柴市同歸去。天亦感降雷雨。
汗青歷久丹心著。喜忠宣易名異代。特邀褒許。精衛空留填海恨。且化鶴還故土。卻
贏得文孫述祖。鐵板銅琶纔一唱。早滿堂客淚青衫注。人與曲並千古。

滿江紅 五日雄縣

夢隔春明。纔信宿便逢端午。猶幸得二三知己。追歡逆旅。有命肯煩絲縷力。爲貧合
受風塵苦。羨此邦習俗數錢工。盈盈女。燕與趙。空歌舞。屈與賈。空詞賦。且買魚佐
酒。殺雞爲黍。別恨家偏分兩地。名心我已灰千古。問何時。穩泛白雲溪。聽簫鼓。

減蘭 同日寄內

同斟蒲醕。屈指長安曾八度。別淚俄傾。漏短連宵夢不成。病多愁重。艾合勤收葢
合種。黃鞠花開。准待香車緩緩來。

浪淘沙 夜宿陰平

郵宿一程程。土飯塵羹不平路。最是陰平。聽說江南行已近。無限鄉情。風急亂雲

生疑雨。疑晴。半衾纔暖。又雞聲。窗外月光窗裏夢。都欠分明。

沁園春

一樣青衫。檢點淚痕。江州最多。歎林泉未遂。空拋省掖。輪蹄已倦。又涉風波。黃口科名。白頭令僕。喚醒寧煩春夢婆。除非是。把甲兵盡洗。手挽天河。半生事事蹉跎。推到了。而今鬢漸皤。問貧猶兼病。計將安出。才偏無命。人敢誰何。兒女情深。家庭樂大。莫負光陰一刹那。思量遍。總不如歸去。對酒當歌。

又

曾記當時。目視九霄。心雄萬夫。忽爲名賺出。輕言仕宦。被飢驅去。遠挈妻孥。蠟味空嘗。藕絲未割。斷送琅邪王伯輿。渾難遣。是兒同豚犬。親已桑榆。十年不返江湖。偏喫過。鱒魚剩白魚。且斑衣學舞。戲當夏永。碧筒勸飲。醉到秋初。但得閒身。便將冷眼。細看人間苑與枯。傲天幸。更徧游勝地。盡讀奇書。

鵲橋仙 辛酉七夕

乍收風雨。依然星月。又早筵排瓜果。清輝只隔兩回圓。已宛似、經年捱過。何曾得巧。頻愁作客。容易家園小坐。又憐兒女滯天涯。卻轉向、長安憶我。

沁園春 題顧仲歐讀書齋

讀書頻年。有顧虎頭。仙而地行。算無它嗜好。唯餘翰墨。偶然寄託。都付丹青。古錦齊裝。香芸細爇。十笏營來抵百城。何須羨。彼雲臺繪像。太室書名。扁舟夜聽河聲。又岱頂朝迎海日生。卻歸看四壁。煙雲過眼。間抽插架。圖史怡情。笑我浮蹤。曾遊上塞。欲繪生綃總未成。風塵倦。擬從君卜築。小結鷗盟。

壽星明 壽吳乘常封公七十

未到縣車。天子遂初。翛然此身。羨壯遊萬里。江山飽看。倦歸三逕。風月常存。旋馬門庭。驂鸞著作。管領人間七十春。香飄處。是枝頭金粟。特侑開尊。多時契闊音塵。喜還里。剛逢初度辰。況翩翩鳧鳥。潘輿方待。雙雙鶴髮。梁案相親。閒傲神仙。健誇腰脚。論福無如此最真。殷勤約。約兩三年後。扶杖從君。

百字令 題汪蛟門三好圖爲秦敦夫編修

生綃尺幅。把才人寫出。當年情緒。濁酒一中書萬卷。可抵花枝解語。杯已銷愁。鄉還送老。結習偏成蝨。圖中人往。舊時多少題句。恰喜桑梓流傳。屬之淮海。物得歸其所。我本無能。空有好事。事輸君千古。味澹橫陳。命安窮達。只合青州去。浮生如寄。不行胸臆何苦。

減蘭 爲朱敬亭題荔枝寫生敬亭姬人韓氏閩產小字荔香也

宋香陳紫。誰遣海隅能產此。寫幅丹青。認取楓亭錄小名。二分月皎。照卻水晶丸更好。占斷羣芳。莫怪蕭郎老是鄉。

壺中天慢 喜晤孫雪帷同年

吳船分手。卻鱗鴻隔斷。楚雲燕樹。今日大馮君座上。謂馮蕙嶼司馬把酒暫銷離緒。書霧迷江。夕烽照地。說到如談虎。麻衣脫卻。軟紅重踏塵土。猶記匹馬昏黃。落強千丈性命。輕於羽。君曾墜馬傷足。儘有三公會折臂。捷徑讓人先去。我倦應官。忽然

捧檄也學邯鄲步。聖湖風月幾時同。結游侶。

沁春園 爲朱鑾坡題其尊人鶴亭大令憶園禊飲圖

未到平泉。今日畫圖依稀見之。記人依甥館。會脩禊事。客邀謝傅。詩和王維。花爛成霞。春深似海。裙屐翩然盛一時。纔彈指。便卅年以往。逝者如斯。堂前舊燕都飛。恐故老談來也不知。問雲寒西塞。甘棠應在。煙橫北固。絳帳誰施。只此丹青。付將孫子。博得名流著意題。今猶昔。料後之攬者。又費沈思。

減蘭 於郎銀漢吹笙小影

吹簫擲笛。聽到玉笙羣籟寂。悵望明河。不是牛郎不許過。櫻桃偶種。便有琅邪情最重。誰辨雄雌。剛值僊人十五時。

金縷曲 題董超然琵琶俠傳奇

文每難齊福。卻嫌他。濟南名士。未能免俗。偏使憐才歸粉黛。千載琵琶一曲。更劍氣。愁埋豐獄。回首恩讎。惟宿草。只仙山。尚可容投足。塵世事。笑蠻觸。江郎筆許江都。

續譜新聲。移將宮羽。付之竹肉。俠骨情癡銷不盡。別寫神姦面目。記遼海。年年曾哭。解道蒙莊言是寓。借他人。酒瓊澆君腹。風雨夜。那堪讀。

蝶戀花 題雲間女史張筠如畫冊

一管生花長在手。著色無多。骨自天然秀。想見春寒凝翠袖。疏梅脩竹人同瘦。琴瑟綠窗如對友。富貴饒它。此福何曾有。看去丹青渾似繡。好詩值得題千首。

沁園春 胥大令杏花春雨江南卷

一片春陰。十里杏花。其中有人。笑綠蓑青笠。此遊入畫。小樓深巷。昨夢無痕。家世河東。寓公江左。卜築新依闔闔門。回頭問。問手栽桃李。有幾株存。自憐奔走黃塵。枉說道。吾家是趙邨。卻風前濺淚。花時作客。雨中翦燭。海國逢君。碎錦坊高。爭春館好。細算都如過眼雲。何年遂。向谿山深處。結個比鄰。

又 次韻答歸佩珊女史

屈指閨中。玉尺上官。鍼神夜來。問幾人脩到。案同梁舉。一燈吟處。花共江開。佩珊所

居爲一燈雙管草堂第。是司空櫛非進士也。學書生筆冢埋。焚香讀只繡餘小草。無限低徊。何年謫向蓬萊。任風雨。閒庭砌上苔。歎禁方繙遍。病難卻去。鄉雲望罷。夢易驚回。芡煮雞頭。茶分雀舌。步障今知道韞才。吾衰矣。但君苗焚硯。蘇晉長齋。

減蘭 屠子垣申江秋訪圖

聲婆聲送。月白江心秋似夢。說著相思。記得扁舟半面時。行雲翹矣。天下銷魂惟別耳。往事休論。我已青衫滿淚痕。

壺中天慢 聽湯澤山說夢

是何幻境。忽靈風引去。山深谿杳。魍魅逼人常在險。除卻導師誰導。鳥喚迦陵。香霏蒼蘂。兜率天重到。前塵難記。此因寧自心造。君本蓮社中來。夙成慧業。合掃諸煩惱。我亦窮通都悟徹。路鬼從他嗤笑。生也如浮夢。耶易醒。浪說華胥好。晨鐘聽後。且聽焦尾清妙。君善琴

青玉案 女史廖織雲寒閨讀畫圖

形雲低壓三間屋。正幾樹、疏梅馥。誰伴深閨形影獨。荆關山水。徐黃花鳥。摩詰詩重讀。琴聲罷撫吟聲續。更把丹青寫成幅。日暮春寒愁倚竹。聰明天賦。才華人羨。只是輸庸福。

水調歌頭 李樂只秀才攝山聽雨卷

辛苦白門路。襍被幾回行。攝山峯最高處。聽慣滴梧聲。萬壑風來澗底。百道泉生樹杪。相助更淒清。併入有心耳。都作不平鳴。紫峯閣。雲片石。記曾經。廿年前亦留宿。舊夢欠分明。一任高樓紅燭。也有僧廬白首。我已兩無情。但願與君去。采藥共餘齡。

壺中天 歸佩珊女史雨窗填詞圖

重陽近也。九分秋。又送七分秋去。空谷有人空絕代。何計遣他風雨。雁字排愁。花枝比瘦。戶聽寒蟲語。慵拈湘管。此中多少情緒。卻喜解事汪倫。梅鼎偶然潑墨。已得幽窗趣。譜出草堂傳繡口。遂使一詞千古。但少催租吏。逢送酒。是我銷憂處。年年遼海。錦囊燒後無句。

菩薩蠻

疏簾清簟過長夏。問天欲把秋光借。天亦愛春人。將秋逗幾分。玉簫吹倦後。月色渾如畫。故意避檀郎。桐陰去納涼。

減蘭

澹妝約束。且喜問年如碧玉。月上初三。從此清光夜夜添。城頭霜冷。人到離筵容易醒。明日扁舟。夢逐西風繞畫樓。

菩薩蠻

韻香女德空山聽雨圖

山居愛向雲深處。雨聲先上芭蕉樹。獨坐卷簾時。此情若個知。福難兼是慧。肯受聰明累。我已鬢添星。蕭蕭怕再聽。

減蘭

胡黃海虬髯公便面

虬髯一樣。誰踞中原誰海上。國士佳人。只有英雄省識真。西風跨衛。君亦漸愁顏色悴。爭瘦爭肥。空向丹青辨是非。

蕙蘭芳引 題袁又愷紅蕙山房圖徐尙書健菴脩書洞庭山偶植紅蕙至今

流傳山人鈕某以贈袁袁珍之遂顏其室焉

秋到草堂早紅遍。數枝芳蕙笑楚客多情。猶有未銷舊淚。尙書種後。卻衍出、莫釐新派。想昔年小宋官燭雙條會對。此事當今。推君獨擅。又得憐愛。便長伴中郎。不許水仙作佩。除非紅豆尙堪一例。聽故山佳話共傳袁惠。

賣花聲 寇白門小影

姊妹總輕盈。卿最知名。幾回金屋歎飄零。香好錯將韓掾贈。負了多情。結客小園亭。俠骨天生。阿誰湘管畫娉婷。我欲買絲重繡取。媚眼能青。

水調歌頭 渡江

風色入雲緊。江意正涵秋。今年三渡揚子。試問欲何求。不過饑驅而已。牽率老夫至此。難怪覓封侯。本乏濟時策。擊楫笑中流。水東下。客西去。兩無休。金焦依舊相待。草草幾曾遊。身已六旬過了。天借一閒足矣。吾道託滄洲。人竟不如鳥。蘆畔有眠鷗。

百字謠 題江子屏書窠圖後

雲煙俄頃。算世間富貴大都如此。妾換驕驄。裘換酒。何似鬻書求米。四部親題。百城高擁。舊事從頭記。龍鱗今老。種松人可知矣。最怪幾卷叢殘。無多綈袂。也犯天公忌。夢入瑯嬛容易醒。憑仗丹青盈紙。餅可充飢。梅能止渴。真幻原同耳。筆花長放。使便還有經笥。

浪淘沙 揚州客舍觀袁籜菴遺像

把酒月當頭。曲度西樓。三聲空憶舊風流。今日畫圖纔一面。算識荊州。衰柳拂邗溝。小住經秋。名場末路半羈愁。詞客有靈應念我。此地同遊。

金縷曲 潘令填詞圖

早聽絃歌遍。記前身、春風桃李。栽花成縣。官向六朝金粉地。住是吳興清遠。任題盡、烏絲黃絹。脫口新聲還自唱。教小紅、反把瓊簫按。三影外、有三變。吾家咫尺鄰陽羨。喜迦陵、填詞舊例。而今重見。絕勝揚州明月夜。長得玉人爲伴。便嚼徵、調宮忘倦。

不怕寶深涼氣逼。把芭蕉、權當氍毹展。仙令福、只君擅。

南樓令 爲胡城東納姬作

白嶽記幽栖。新來住白堤。有高樓、斟酌橋西。拓盡簾櫳都面水。邀月影、鬪蛾眉。海湧一峯低。蒼然暮色迷。聽笙歌、過了前溪。此際客心誰遣得。紅袖伴、羽觴飛。

揚州慢 丙寅至日雨

人憶秋來。節驚日至。廣陵廣漠風高。正離愁積處。又雨滴終朝。待徐盼、窗兒得黑。麤鐙孤坐。猶聽蕭蕭。只沾來杯酒。傾殘能慰無聊。尋芳已晚。枉橋頭、吹徹瓊簫。恐冬不會肥春。無可借。灰管徒飄。一任淺斟低唱。銷金帳、醉盡羊羔。問奇章何處。樊川魂已難招。

滿江紅 歸自揚州作

河上翱翔。又才了、衝寒驢背。纔幾日、雨風霜雪。備嘗滋味。第一閉門能送老。從來行路原非易。卻故鄉、難也似登天。真奇事。金早盡。裘長敝。時已晏。歸猶滯。看揚帆跨

馬所投如志。干祿尙嫌前轍誤。依人豈是終身計。笑盤根、錯節總徒然。何曾利。

阮郎歸

試燈風裏放新晴。載花雙槳輕。奈何喚罷酒杯停。清歌第幾聲。攜素手、趁微行。金蓮步步生。烏衣深巷月朧明。歸來剛二更。

暗香

題方子和舊時月色圖用姜白石韻

萬枝春色喜。小山坐對。旁橫長笛。笑領衆芳。未許人來等閒摘。君本家鄰大庾。早流播。江南佳筆。便合向、銅井銅坑。高處置吟席。鄉國信寥寂。歎驛使不來。離恨空積。酒醒夢斷。月落參橫好追憶。漫擬栽梅西崦。長占卻、湖光深碧。彼此畫、先攝取、祕誇獨得。

水調歌頭 石大令藻塘小影

放槳入蓮漪。劃破碧溪煙。有人顏與花映、同泛木蘭船。幾縷霞明濯錦。千柄風搖香影。桃李讓芳妍。試把玉缸倒。那惜酒如泉。政多暇。涼可納。吏疑仙。白雲渡水一曲。

剛抱縣門前。人愛元公作說。我喜閒情彭澤。無礙使君賢。菱製久拋卻。應憶楚中天。
南鄉子

春色冷於秋。半日江干阻石尤。一片夕陽芳草外。凝眸。惻惻輕寒入敝裘。夢已醒。
揚州何事重登王粲樓。攜得故園花作伴。扁舟。載了芳菲更載愁。

百字令 仇實父桓伊吹笛圖卷

青溪如鏡。正王郎畫舫。乍停柔櫓。岸上貴人油壁過。誰把小名私語。便踞胡牀。試橫羌管。三弄升車去。但相知耳。有言何必傾吐。聞說一往情深。奈何頻喚。伎擅無雙譽。爵拜通侯。身執籥。卿也居然無迂。莫道彈絲。不如吹竹。曾使君王悟風流。何往至今。邀笛留步。

買陂塘 宓大令春船載茗圖

燕新來。社翁雨過。紅橋簫鼓初競。紛紛舸載花枝去。商略不如攜茗。楊柳影。有淺碧。盜甌。一色旗槍映。微醒易醒。但第五泉邊。松濤沸處。使作撫琴聽。翻寒葉。回首榆

秋籟吟

谿塞迴。如今還剩遊。馳
陔南。永。全家上艇。笑。杵

青衫溼。過如臯

塵緣斷後難重合。除是
權。水接長天。關心舊事

虞美人 本意

芳菲綴向閒庭好。蝴蝶
地。簾慵捲。開落無人管。

金縷曲 題馮生

海國憐春去。喜新聲、紅
英雄兒女。鐵板銅琶初
數。但人間、銀牀素綆。卽

我 命 陰 入 癩 曾 穉 笑 幾

粉黛何福銷磨此。箇人如玉。玉蟾餘韻應爾。拌卻飲到黃昏。重燒高燭。醉看花枝細。莫遣長條輕易折。憑仗東皇留意。指鬪葱纖。舌調鶯嫩。值得明珠費。烏絲爭譜。同人多有填詞者。自甘輸一頭地。

臨江仙

味辛齋梅花盛開宿遷陳膺卜司馬有小詞因次其韻

種了梅花常作客。幾回負卻芳春。暗香容易惹吟身。自逢姜白石。分外氣氛氳。同著青衫同灑淚。回頭迹已成陳。萍蹤且喜近來親。君聞調鼎手。我本跨驢人。

賣花聲

蘭漿近蕪城。剛是清明。連宵無奈雨聲聲。銷盡春魂渾不管。偏要人聽。官柳也多情。和淚盈盈。看花留得眼常青。能載閒愁千萬斛。誰說船輕。

金縷曲

聞秦州築壩返自邗上作

難莫如行路。笑揚州。夢還未醒。此江頻渡。泊向隋隄剛三日。聽盡孤篷春雨。把寒食。清明虛度。明月而今深藏影。但名花。賤折飄塵土。鶯與燕。悄無語。男兒蹤迹輕於

絮又匆匆。北風朝猛。送歸柔櫓。非蟻非牛。同旋磨。磨自隨人來去。最怕是、年華重數。天地雖寬。吾衰矣。問浮生、可有安排處。寧餓死、閉蓬戶。

燭影搖紅 會上舍家看牡丹

排日看花。此來消盡閒中福。君家花事更繽紛。濃豔枝枝簇。襯得玲瓏琢玉。向階前、爭妍鬪馥。兩行紅粉。百兩黃金。一時盈目。更有名葩。天生不與羣芳逐。花皆玉樓春中有輕紅一朵何時種。謫自蓬萊。舊夢應難續。酒後閒情頓觸。把清樽、澆花暗祝。自憐白髮。但願年年。共燒高燭。

輕紅 本意

落霞飛處紅雲一朵。恰位置、天然貼妥。若論富貴。只君還可。儘日日、烟籠霧鎖。想見昭陽。新妝婀娜。喜暗裏、香風入座。記曾識面。舊時山左。輕紅一名青州紅笑落魄、青衫故我。

菩薩蠻 送春

樓前新漲三篙綠。送春怕縱登樓目。此意問誰知。酒闌人散時。濃陰天似夢。惹得餘寒重。不肯放春行。東風狂有情。

水調歌頭

洪生介石齋中仿宋曾端伯栽花中十友名之曰十友吟社而梅

花尤盛嘉慶丁卯冬艱於卒歲以此屋典質於人作別梅圖紀其事一時題

詠多爲介石惜余維物之聚散有數彼始牽所愛而終去之者豈唯梅哉作

此以廣其意

破屋數間耳。人道玉川貧。空庭梅幸無恙。且喜伴吟身。一旦矮牆隔斷。但與階前。水。和夢入西鄰。從此月明夜。把酒向誰親。遣柔翰。裁素紙。寫花神。花如知爾情重。也共暗消魂。試問河梁秋色。又有閨中春日。何處不離羣。翻是畫圖好。長見一枝新。

滿江紅 五日

佳節怱怱。凡幾度。客中端午。空負了。白雲溪上。畫船簫鼓。桃豈金耶能作印。艾原草耳。俄成虎。待明朝。擲向路旁看。隨塵土。拈秃管。心何苦。臨曉鏡。頭如許。笑延年無

術仗他絲縷。鐵聚六州人已錯。石磨五色天難補。幸先生、別有卻愁方。菖蒲醕。
蝶戀花

盡日凝妝篷底坐。數遍前溪。隊隊鴛鴦過。爲問年華眉欲鎖。風情老去渾無那。倦
擁羅衾欹暗墮。隔一窗兒。好夢平分做。著意佯人無不可。銷魂何必曾真箇。

賣花聲

春上綠楊梢。腕地長條。依人飛鳥乍辭巢。記得兒時門巷否。丁字簾飄。鬢笑總魂
銷。病不勝嬌。客窗同聽雨瀟瀟。無計渡將桃葉去。愁趁江潮。

滿江紅 閏月五日用五日韻

六十年來已六度。兩番重午。乾隆辛未壬午庚寅辛丑己酉及今戊辰。休便歎、老之
將至。興還堪鼓。旅客尙隨梁上燕。佳人重顛釵頭虎。問孟嘗、幾遇閏生朝。今抔土。
黃楊厄。誰知苦。青雲業。徒爭許。且門除宿艾。臂纏新縷。風雨正愁長日誤。義和恰把
良辰補。記月前、賸得舊浮梁。重傾醕。

水調歌頭 湯雨生秋江罷釣圖

得失一魚耳。何喜復何嗔。五年垂釣江上。鷗鷺亦知君。曾記桃花如浪。又見蘆花雪。樣秋色可輸春。暫釋把竿手。且去把清尊。涼風起。吟興好。飽鱸蓴。煙波多少答答。幾個趁閒身。會取珊瑚拂動。莫任長鯨輕縱。待理舊絲緝。結網笑吾嬾。但作坐觀人。

又 八月十三夜集橫舟亭

良會入秋盛。頻過橫舟亭。昨來叢桂未放。今已是餘馨。一片天香散處。幾朵纖雲捲。後坐待月華生。竹柏滿庭影。身世盡空明。倚蒼厓。臨碧沼。酒爭傾。東坡仙去千載。水調許誰賡。不少畫樓綺榭。亦有哀絲急管。難得此閒情。扶醉撥歸櫂。城上又三更。

賀新涼 張蠡秋學博谿山選勝圖

皖口高門第。記當年平泉乍築。金邀君賜。身已周行天下半。偏憶兒時舊地。早寫向。刻谿藤紙。寶馬名姬無不有。算人生快意當如是。觴詠外。更何事。賣魚灣畔萍蹤。繼喜通門。今傳五葉。共談先世也。欲買山思選勝。此願貧難遂耳。但僕僕。飢驅而已。

何日龍眠同卜築。便芒鞋、竹杖相終始。添我入畫圖裏。

百字令 題張蠡秋青溪三笑傳奇

青溪煙雨。問南朝、多少美人黃土。難得紅顏生並世。忍使不傳千古。恨肯填膺。歡宜開口。幾輩因癡誤。暮年陶寫。又看三笑新譜。拈就一管生花。千紅萬紫。齊向毫端吐。我有閒愁。還試讀。頓覺眉飛色舞。柳認藏鴉。堂迎歸燕。人約蘭舟渡。舊遊如夢。與君何日重去。

芰荷香 張判官調冰雪藕行看子

晝舒長。喜晚來風過。人倚斜陽。翠琅玕外。繞池更補垂楊。闌干閒倚。把白松、招引荷香。何處得、此地清涼。調冰雪藕。況有紅妝。試看晶盤捧到。卻勝它玉椀。美酒生光。賣魚灣上。可如丈八陂塘。萍蹤偶合。幸使君、容我疏狂。圖畫好。再與評量。田田葉底。少個鴛鴦。

減蘭

香添爐火。裁翦膽餅花幾朵。綉帙慵披。恰是歌停酒罷時。笑拈羅帶。何日畫堂巢翡翠。別有關心。紅杏枝頭春最深。

沁園春 書張蠡秋做合子會歌後

何處行雲。片片飛來。忽停此間。算六分春色。移從雉水。一枝花影。照到魚灣。蘭室新盟。板橋舊韻。佳會重教合子傳。於中好。是秦家樓上。丁字簾前。談禪我笑香山。卻老去。風情未肯刪。使搓酥滴粉。團成豔體。拈蜂捉蝶。繪向蠻箋。瓊液徐斟。銀箏輕按。珍重歌聲付小鬟。同淪落。怕青衫溼淚。紅袖低顏。

菩薩蠻

經時萍跡因風聚。怱怱又逐雲歸去。紅淚澀秋波。奈他腸斷何。黃楊生易病。弱絮飛難定。只恐損花枝。更無人護持。

金縷曲 檀橋招集養春東館觀家樂

宛轉清歌度。把天邊、行雲遏斷。不教來去。半展氍毹燒畫燭。別有養春深處。恰揀得、

花枝三五。能使紅妝成小隊。但登場。已勝梨園部。憑顧曲。不愁誤。人間奇福輸君取。恐當年。東山絲竹。也應相妒。禪榻茶煙容易老。爭似閒情頻賦。我已歎。鬢絲如許。曾向幽窗聽夜雨。替小青。重續傷心句。是日演題曲。今不樂。亦何苦。

杜韋孃

水深千尺。兒家合傍花潭住。問姓名。都被離騷占。試數遍。幽蘭香杜。喜爪長似雪。跌纖似月。銷魂更在閒眉嫵。畫圖中。恐有人把。全身攝取。看一縷。行雲出岫。飄然百里。任來去。賴東皇能替花爲力。得一曲。春風聽度。只幾番。困酒。連宵惜別。關情總是城南路。笑封姨。卻颺不起。沾泥柳絮。

浪淘沙 次韻答女史熊澹仙

半畝便爲宮。苔砌痕濃。可知林下有高風。除卻筆牀同硯匣。身世都空。塵夢了無蹤。冰雪填胸。王桃董杏敢爭紅。且喜絳紗經幔近。一葉舟通。

我亦悟空花。愛讀南華。浪遊猶滯海之涯。只有鷺鷥成熟識。迎過蒹葭。好句似餐

霞。閨閣名家。偶來譚藝一停車。記得幽栖堪入畫。古木寒鴉。

望江南

停漿處。依舊柳藏鴉。碧草幾叢蝴蝶繞。醱醱開後已無花。深巷夕陽斜。

人月圓

無錫吳仲壬秀才作人月圓雙曲徧爲徵詞因次其韻

何年謫向蓬萊住。成就連枝樹。慈雲近覆。慧燈巧映。多費調護。荃提留馥。迦陵餘韻。回首寧誤。三生石有姮娥證。笑浮萍飛絮。

神仙眷屬。皈依佛。偈乞維摩說。鵝曾比翼。魚還比目。蟾兔同窟。夢中因果。鏡中形影。心已先結。願人長與嬋娟共。過春秋時節。

滿庭芳 七月十七夜卽事

記拜雙星。纔過十日。絳河依舊低橫。人間離別。又把酒杯傾。不住繁絃急管。吳孃曲。半帶商聲。更番聽。間關語裏。恰恰有雛鶯。重經門巷。熟秋光正媚。姊妹花榮。問羅浮合體。可是天生。卻笑白頭紅粉。相逢處。猶是關情。催人去。橋東月上。街鼓近三更。

卜算子 庚午元夕

去歲過元宵。徹夜冰輪皎。踏遍三橋不見人。可惜燈兒少。今夕共傳柑。拚把金尊倒。聽說金花火樹齊。月又模糊了。

解語花 過揚州以桃花供之。膽餅既解。維舟於岸邊。日折一枝爲獻。

嬌猶帶露。嫩若含煙。寒浸銅餅水。水邨山郭看難盡。忽又載將蓬底。無言有致。笑一舸。西施范蠡。休便嗟。開落恩恩紅與年年似。難得榜人解事。肯更番折取。欲令公喜。崔郎憔悴劉郎老。時去暗中容易。玄都觀裏。問誰是。種桃道士。翻不如。畦菜能花。遍布黃金地。

菩薩蠻 雨泊

孤帆帶雨荒邨泊。開箱重檢征裘著。時候未黃昏。幾家先閉門。梨花爭鬪白。桃漸無顏色。不敢怨春寒。暗將紅淚彈。

無俗念 陳上舍秋林小憩圖

秋光如沐。愛樹根獨坐。涼颺徐動。肯把吟髭輕撚斷。句已琅琅成誦。尙友惟書。遊仙有枕。久絕繁華夢。爐熏茗椀。是君隨分清供。吾亦四載魚灣。溪堂山館。扶杖時迎送。手種蒼松。今已老。又把芳蘭新種。身自康彊。兒還醇謹。只待雛孫弄。明年湯餅。好將藏釀開甗。

金縷曲 同年歐陽棣之爨下圖

物好常遭枉。最驚心。燒桐作爨。此聲淒壯。休怪良材輕易擲。功業偏歸竈養。笑聒耳。箏琶空響。天下儘多焦尾在。問中郎。以外誰能賞。圖畫裏。寫惆悵。齊年我比君差長。恰同來。依人海國。幸俱無恙。各有平生知己淚。流到章江分漾。君出南昌彭文勤大庾戴侍耶之門。予文字之知亦半出江右。任桃杏。日邊天上。近婦飲醇。應自遣。是英雄。末路銷磨樣。回首事。莫傷往。

極相思

珠池碧水鱗鱗。是處化行雲。華年二九。芳名兩合。春在眉痕。披上襜褕。慵結束。肯

愁它月夕霜晨。微吟學得新聲。度曲顧曲何人。

壽星明 葛伯吹六十

歲又逢庚。甲子剛週。屈指六旬。算平生嗜好。本殊流俗。倘來富貴。早比煙雲。偶有牢騷。付之歌嘯。吟得詩篇欲等身。掀髯笑。便漫論傳世。已可驚人。雖根鞣綻。續紛且日對。寒香醉幾巡。任春花爭放。豔何曾久。明珠若產。晚更堪珍。時君尙無子喜我萍蹤。近君茅屋。二老攜筇。暫結鄰。還相約。俟它年杖國。再共清尊。

行香子 金素中西瀛小築

偶厭風塵。便憶鱸蓴。林泉好。到處留人。半生宦跡。屈指重論。是燕臺雪。漳江月。泰山雲。天都小別。西瀛小住。有高樓。百尺藏身。花常照眼。松已成鱗。況書連屋。賓環座酒盈尊。

水調歌頭 沈二瞻蕪浦釣徒卷

家本近西塞。蓑笠雅相宜。夫容湖畔。卜築十笏有幽栖。遊倦秦關百二。不待秋來風

起歸坐舊苔磯。一半爲鱸膾。一半爲蓴絲。手長竿。理香餌。狎清漪。其中得失偶耳。何用費沈思。且喜豪情如昨。好共擊鮮爲樂。飛雪任侵髭。吾與子同歲。學釣未嫌遲。

滿庭芳 爲金子青題漢江送別圖

槩泛寒溪。屐登西塞。笛吹黃鶴樓頭。題襟幾輩。屈指盡名流。更喜燈明酒釀。長消受。一串歌喉。無端別。青衫紅袖。併淚送歸舟。今來重把袂。東風剗地。春老韓溝。笑遊興初慵。官興難收。噴道文章憎命。陳編外。別計菟裘。君休躁。腰纏縱遠。爲月且勾留。
時子青有爲贊而仕之意

滿江紅 金子青畫一髻者以爲己像作牽馬出門狀旁爲一姬如送別者索

題填此

有客虬髯。誰繪就。英英之氣。須信道。廬山真面。本非如是。駿馬聲嘶殘月下。美人顏。慘春風裏。任英雄。到此亦魂銷。俄千里。難得遂。求田志。何必悔。封侯壻。笑學書學劍。幾番變計。君欲身登游俠傳。我猶命託叢殘紙。記十年前也出長城。今衰矣。

百字令 題唐陶山刺史鬢絲禪榻小影

鬢絲禪榻。問前生。知是牧之之續。有酒何妨仍學佛。一榻翛然離俗。示宰官身。幻翬疊相。慣種蒼生福。維摩多病。帶圍應笑微覺。我亦近在棠陰。登山臨水。曳杖時追逐。正值落花風緊。後來共周郎顧曲。謂希甫消受茶煙。評量詩句。肯把閒愁觸。遲遲慵去。又成桑下三宿。

水龍吟

辛未五月四日雨中同人攜肴酒過成山精舍預賞重午

去年端四閉居。今年海上留萍迹。不聞簫鼓。但聞風雨。榴花無色。難得良朋。隻雞斗酒。慰予岑寂。把天中氣象。先期洩漏。移佳會。歸今夕。且向山齋浮白。傲朱門。華筵狼藉。藏鈎射覆。高歌低唱。解衣除屐。興到酣時。頓忘羈旅。并忘通塞。奈更闌客散。又聽檐溜。在空階滴。

百字令

題張舸齋煙波共泛圖圖畫其配鮑苙香同坐一舟時苙香已沒

綠蓑青笠。遡家風。眞稱志和之後。況得鮑姑仙眷屬。偕隱不愁無偶。魯望江湖阿章

書畫此福誰能有。蘭舟宵泊月中還。貫虹否。憶昔托興丹青聯吟對飲。肯使華年負。畢竟彩雲終易散。應讓名山長久烟水依然。音容渺矣。陳迹空回首。清娛閣冷。舊詩聽播人口。

雙紅豆 孫子瀟吉士把酒祝東風種出雙紅豆圖

得氣東風託根南國。天公可許栽成拂水巖前。有個荒莊。昔年遊跡曾經。世產多情。又孫郎把酒默禱聲聲。願尹並邢生。似鮫珠掌上雙擎。況山水家園。神仙眷屬。何人福慧如卿。拈來拋未了。被柔絲幾度纏縈。燕燕鶯鶯。看兩美居然合并。惹相思都緣骨太瑣瑣。

金縷曲 讀家子梁秀才悼蓮辭爲其妾徐蓮卿作也書此慰之

畢竟紅顏誤。問天公。芳華隊裏誰爲蓮伍。正是低光剛出水。忽地房淒冷露。況有子先隨風雨。莫恃同心兼並蒂。算淨根不久終西土。生薄命。又何語。前番桃葉江初渡。卻重來。聞聲對影。已無尋處。怪底玉峯難種玉。空把玉環親付。但吟盡。傷春詞句。

蘭佩蓉裳原是伴。向泉臺、合侍靈均女。休更悼、髮如許。

賣花聲 李白樓鴛湖並載圖

夾岸盡垂楊。泛個輕航。樓頭煙雨翳湖光。莫羨文禽能比翼。人也鴛鴦。來往水雲鄉。東指錢唐。仗它桃葉伴三郎。鏡下夫容容易得。此福難償。

滿江紅 灑池客舍雨

點滴連宵。人意倦、雨聲還續。燈影裏、幾家茅店。又來投足。剗地風狂寒氣逼。黏天絮。溼春光促。笑衰齡、底事尙勞勞。將何欲。少與壯、前塵速。離與合、柔腸曲。記夜船吹笛。驛邊人獨。忍遣青衫重染黑。可憐白髮難生綠。問幾時、歸去話巴山。西窗燭。

百字令 贈同年黃文石大令

昔年人海曾記得。高會城南亭子。嘗與君及己。亥同年集京師陶然亭。一別遂成萍梗散。仙掌秦雲同指。我病而衰。君才且敏。相去真千里。牀頭握手。故人情重如此。更喜一卷新詩。從頭快讀。契得風騷旨。循吏還兼文苑傳。取法都由庭庑。桃李春風。

江湖夜雨。舊夢茫然矣。甚時尊酒。與君重論文史。

減蘭 題桃花

繽紛如許。灑向生綃疑潑雨。白白紅紅。得氣都從人面中。
兔葵燕麥。搖漾春風空自得。輸與劉郎。管領玄都日月長。

又 題秋海棠

紅妝小樣。誰把淚痕描色相。鵝角籬邊。腸斷西風又一年。
嫣然絕世。俯首那甘爲鞠婢。解共相思。只有人間紅豆知。

摘紅英 采花圖

筠籃小花枝好。披煙帶露勞長爪。尋芳徧。歸來倦。一樣韶光。洞天春賤。苞含坼。香
狼籍。肯教散去留痕迹。仙無定。人多病。有誰采藥。與花同贈。

乳燕飛 清明日臥病近林精舍是日子六十七歲生朝

風雨連宵起。到清明。如何釀得。者般天氣。六十餘番初度過。那有今番若此。又觸動。

思家情味。故國儘堪容臥病。卻將人牽率三千里。雖分定亦貧使。曲江慵訪開桃李。且終朝匡牀偃息。講堂扃閉。久廢蓼莪恩未報。豚犬空攜兒子。問畢世開眉曾幾。不恨天公於我薄。恨天公生我徒然耳。來祝者請休矣。

百字令

顧西園獨坐幽篁小影

檀欒影裏。只此君雅稱。其人如玉。但有虛心師自得。相對況能醫俗。別卻雲間。來從劍外。未抵瞻淇澳。試看左右。便如天賜湯沐。我亦昨過青門。近分講席。膝每談經促。偏是平安難得報。一病又更寒燠。住苦身貧。歸愁道梗。夢繞鷗波淥。何時開徑。渭川居許同卜。

又 周衣谷觀察出山圖

層厓複嶺。問從戎九載。誰如辛苦。容易據鞍重顧盼。已是出山行路。一片孤城。千尋峻堡。想見經營處。桃花楊柳。莫教春色虛度。畢竟帝念酬庸。貂蟬早珥。麟閣圖形佇。近喜青門來秉節。更許時親談麈。公健依然。吾衰甚矣。脾肉愁難拊。茶煙禪榻。便

將歸老江渚。

賀新涼 書阮松山大令九秋吟遺稿後

一樣寒暄釀。只秋光、配它春色。動人欣賞。難得詩翁能解事。佳日不教輕放。便九九排成絕唱。鑱刻虛空歸妙筆。笑乘時。白帝權還讓。吟已就。氣猶王。當年共羨遊蹤壯。記興桓、短衣匹馬。舊曾來往。種徧河陽桃李後。又撫孤松千丈。正老圃、秋容無恙。何意人琴都寂寞。賴遺編、子舍流傳廣。餘慶在。不須愴。

浪淘沙 乙亥三月重過湖州有感

雨後綠陰連。桑柘拖煙。前番來亦暮春天。眼底卻疑殘夢續。四十三年。曾泛米家船。訪徧湖山。浮生何事戀塵寰。僂指舊游惟贖我。都隔重泉。乾隆癸巳春與朱丈吉人方蘭士金少樞同遊吳興三人皆久歸道山矣

壽星明 韓聽秋六十

猶記逢君。玉樹臨風。今已杖鄉。看鹿鳴歌早。曾脩月桂。龍鱗種晚。抵憩甘棠。弟近三

臺親開九秩。述祖淵源澤本長。孫枝擢。又添人佳話。四世同堂。名場回首茫茫。遡京國。聯吟已廿霜。笑業能不朽。貧而可樂才原易。阨病亦何妨。心鏡常磨。智珠潛耀。疲照應輸返視良。吾誠幸。幸餘生歸里。剛及稱觴。

雨中花慢 鄰宅牡丹

澹日籠煙。微雲送雨。人稱是養花天。正鼠姑逞豔。鹿韭爭妍。卻喜鄰家小院。幾株高並檐前。自憐衰病也來扶杖。一晌憑闌。看花人衆。聞說朝朝共攜尊酒留連。早贏得詩如束筍。次第成篇。我羨洛花富貴能兼蘇井神仙。主人業醫。恩恩春去。未銷餘興待賞明年。

菩薩蠻 珠蘭

勻圓百琲枝頭簇。露痕曉映紗窗綠。香在有無間。呼名擬若蘭。薰風吹鬢畔。玉骨涼無汗。末麗世同珍。終嫌太媚人。

買陂塘 寄題縹雲石石爲吳將軍六奇贈查孝廉培繼者事詳諸家紀載查

沒石歸於顧。今又歸於馬。氏主人繪圖徵詩。東南之士。斐然有作。予亦續拈此解。

問誰能拔山超海。巧從萬里移置。英雄舉動原殊俗。何況感恩知己。峯丈二。但抵得尋常投報瓊瑤耳。試追往事。是大帥筵開。孝廉船到。錫以縉雲字。根頻徙新主。更番換幾。如今仍屬名士。分明羅綺平難熨。石也儼然雲矣。尤可喜。喜畫卷詩篇。與石長留世。風流相繼。縱彭澤曾眠襄陽。欲拜未許等閒擬。

琵琶仙 盛吉士席上贈女郎潤珠

碧玉盈盈。問年紀。猶未曾交三五。爭道聲遏行雲。家風曲能顧。何處產。疑從合浦更添。涸一泓。天乳。獺髓凝來。梅花點後。都助眉嫵。且向紅杏枝邊。把檀板芳尊。遺情緒。還喜四筵佳客。有清歌酬汝。休負了。花朝節近。卻等閒。邂逅相遇。只歎無賴司動。鬢絲如許。

武陵春 題表甥屈生頌滿桃源圖遺筆

一握春風猶在手。物是。恨人非。世有桃源若箇知。下筆幾沈思。何事聰明妨福命。要把蒼疑。流水和花去不歸。空濺淚溼人衣。

金縷曲 徐俠仲填詞寄憶次韻答之

自過清明節。直相連。黃梅積雨。濯枝浸葉。偏是雨中人欲去。早怕歸徒四壁。難捨卻。溪光嵐色。多謝臨行頻送我。更盟心。默證還如一。重約汎玉湖楫。追歡正好輕言別。細尋思。尊同泛綠樓開鄰碧。短幅長篇吟不盡。都道近來苦憶。想暇日。勤繙細帙。珍重發函如覲面。是故人。季海親題帖。秋已近。願將息。

又 題同年沈小如津門拯溺圖小如官廉使早卒此其令天津時事也

海水翻坤軸。記當年。災連三輔。析津晨酷。賴遇東陽賢令尹。曾爲蒼生種福。給餅餌。兼炊糜粥。獨上危城勞指點。縱施仁。有術還蒿目。嗟往事。又根觸。活人之報人爭卜。荷君恩。遞遷陳臬。終膺豸服。惜道山歸太早。我病反延風燭。喜令子。家聲能續。珍重攜圖來索句。覺圖中。尙有精靈哭。循吏傳。幾時讀。

雙紅豆 題王忘菴先生紅豆畫幅畫爲康熙戊午作用水墨不著色蓋東禪
寺僧懷公折紅豆花貽先生時兼餉筍因并圖之後寺僧以此畫歸嘉定張
日容與華亭高查客崑山徐大臨秀水朱錫鬯聯句紀之事載曝書亭集今
歸長洲毛氏

南國靈根東禪異種神僧攜自何年葉如翡翠實似珊瑚遂令吳下爭傳問唐文湯
沈幾度花前劫已歷風煙賸連枝三丈猶驚 又摩詰拈毫墨痕渲染寫生妙筆如
仙名流多後起小軒中重鬪詩篇我惜無緣一披圖相思易牽記當初桐華七字曾
聯 乾隆丁亥曾與石門方蘭士桐鄉金少樞集桐華館中有紅豆七言排律聯句今拙
稿已佚兩人亦久歸道山

憶舊遊 董濟甫一枕夢游圖

記兒時早到壯歲頻過最是吳門不獨靈巖好更虎邱埭月鶴市尋春有時畫船簫
鼓良會醉芳尊今老病追思前塵已失生怕重論 輸君曾經處卻寫入丹青與夢

留痕。又把新詞播。使一時聽者。都道銷魂。始信借來仙枕。還讓倚聲人。試長展生綃。能遊便抵宗少文。

百字令 閨秀趙儀姑意中雲樹圖

生綃尺幅。問誰能寫。山橫雲雲樹。清遠吳興居亦福。別有最關心處。且喜茗溪近。通滬瀆。夢易尋歸路。謝家詩好。畫師應亦神助。回首京國當年。徵歌命酒。凡幾春秋。度太息吾宗俱宿草。我老偏留風絮。病已餘生。貧還作客。一權空來去。展圖根觸。舊時多少情緒。儀姑名柔能詩謙士侍郎女少鈍太守姪女也少鈍謙士俱沒故篇中及之

乳燕飛 三月朔日清明愛山講舍對雨用癸酉清明韻

三月今朝起。怪清明。餘寒料峭。了無春氣。自向秦關扶疾返。蹤迹無端來此。且領略。新泉茶味。雨驟風狂。遊不得。望湖山。咫尺如千里。非我懶。實天使。空庭割半栽桃。李。卻何人。看花肯過。有門長閉。但把殘編消白晝。何用羣經諸子。闕快事。遭逢能幾。

便令年年佳節賞。笑吾生也。只須臾耳。賢達論盡之矣。

賣花聲 玉湖春泛

畫槳趁風斜。煙水無涯。船如天上覆浮家。莫恨湖隄桃李少。座占名花。覆額髮鬢。影碧玉年華。酒酣雙頰暈紅霞。好是伴羞歌不出。遮面琵琶。

壺中天 高已生白雲親舍圖

出門西笑。又長安小住。流光如駛。回首南雲親舍隔。屈指路三千里。春盎重幃。樹榮雙蔭。此樂誰能擬。無端作客。思量難怪。遊子且喜天祿歸來。儒官暫就更。遂承歡意。曩舍橫經多暇日。便是名山基址。架皮縑緗。盤堆苜蓿。潔養陔華裏。青雲方近在。君還算餘事。

賣花聲 初夏重泛玉湖

昨夜送春回。綠遍溪隈。扁舟載得二喬來。坐近鬢雲香不散。新插玫瑰。種就好根。菱姊妹花開。一枝瘦影向人偎。何必淺斟低唱合。我自深杯。

減蘭 題人水心雲意圖

是雲是水。一片空明成兩美。疑水疑雲。併入豪端了不分。有心有意。興到堪乘聊一寄。無意無心。此際何從索賞音。

鳳凰臺上憶吹簫 爲歸覲揚題其原配季筠濱姍步圖

月已難圓。雲還易散。畫中想像容儀。似珊珊微步。來又何遲。收盡殘膏賸粉。唯留得、一卷遺詩。詩和畫。左家嬌女。千里相攜。誰知掌珠更碎。歎合浦茫茫。珠返無期。忽仍歸故國。重慰相思。太息人多磨折。隨行雁。近又分飛。時君復悼亡因君悼悅添吾恨。根觸當時。

鳳來朝 詠同根鳳仙鳳仙一枝二幹花葉悉同作此志異

拆幹還連蒂。共雙蓮。並頭獻瑞。看分枝。一樣團緋紫。爲誰淚染誰指。畢竟苞禽顏異。儼朝陽。怕寒擁背。只合與桃根似。肯便與鞠爲婢。

惜黃花慢 九月三十日列鞠施有堂有詩紀事至十月廿九日已彌厥月花

事亦闌設酒餞之爲拈此解

收拾秋容。羨傲霜不怕。又過初冬。記花纔放。迓來北郭。今花將散。送向西風。翠銷紫
褪。黃添瘦。爲君餞。釀綠燈紅。問座中。甚人情重。先動離悰。明年此會誰同。笑逢場
戲後。迹等飛鴻。病因整遣。興還爾爾。豪雖未減。時竟怱怱。夜深莫惜深杯酌。到來日
已委荒叢。要尋蹤。夢魂但繞籬東。